

DISCOVRS DE LA CONSER- VATION DE LA VEVÉ: Des maladies melancholiques: des catarrhes: & de la vieillesse.

*Composez par M. André du Laurens, Medecin
ordinaire du Roy, & Professeur de sa
Majesté en l'Vniversité de Medecine à Montpellier.*

Reueuz de nouveau & augmentez
de plusieurs chapitres.



A PARIS,
Chez IAMET METTAYER,
Imprimeur ordinaire du Roy.

M. D. XCVII.





A M A D A M E ,
MADAME LA DVCHESSE
d'Vsez, Comtesse
de Tonnerre.



A D A M E ,

*Dés l'heure que i'eus
cest heur d'estre co-
gneu de vous, vous me fistes
cest honneur de remettre du
tout vostre santé entre mes
mains, Et d'auoir autant de
confiance en moy, comme si
i'eusse esté vn second AEscu-
lape. Ceste affection & bien-
vueillance que i'ay recogneu
proceder plus de vostre bon*

EPISTRE.

*naturel, que de mes merites,
ont eu tāt de pouuoir sur moy,
que ny la douceur de ma pa-
trie, ny le nombre de mes a-
mis, qui n'estoit pas petit, ny la
charge honorable de Profes-
seur Royal que i'exerçois avec
assez de reputation en vne
des plus celebres Vniuersitez
de l'Europe, ne m'ont sceu em-
pescher que passant par dessus
toutes difficultez, & forçant
tous ses liens, ie ne me sois en-
tieremēt voüé à vous, & vous
aye suiuy par tout où il vous a
pleu me commander. I'ay de-
quoy me louer infiniment, &
contenter iusques à present de
la fortune, qui m'a esté si fa-*

E P I S T R E.

uorable, d'auoir rendu tous
 mes seruices utiles & aggre-
 ables. Je croy, Madame, que
 Dieu s'est voulu seruir de moy
 pour alöger vos ans, & rēdre
 vostre vieillesse plus heureuse:
 vous l'auēz assēz experimen-
 té depuis deux ans. car ayant
 esté viuemēt assaillie des trois
 les plus violentes & extraor-
 dinaires maladies qu'on eust
 sçeu voir, & qui estoient as-
 sēz fortes pour esbranler la
 meilleure complexion du mō-
 de, & faire courir fortune à
 un aage plus florissant que le
 vostre, vous n'en auēz senty
 aucune diminution en vostre
 vigueur. C'est à Dieu seul (qui

EPISTRE.

nous a ouuert l'entendement pour inuenter les remedes propres, & qui les a voulu benir) à qui nous en devons rendre toute la gloire. Il ne vous est resté que vos trois maladies ordinaires, lesquelles nous combattons tous les iours avec un bon regime, & avec des remedes si benins, qu'ils ne peuvent en rien alterer vostre bon naturel. Vous avez un petit cōmēcemēt de taye à l'œil droit, mais l'autre est du tout sain: vous sentēz par fois quelques attaques de l'hypochondriaque, mais si legeres, qu'elles s'esuanouissent aussi tost que fumee, ce qui vous fasche le plus

EPISTRE.

sont ces petits catarrhes qui tombent sur les yeux, sur les dents, sur les bras, & sur les iambes. Vostre esprit qui est capable de tout ce qui est de plus rare au monde, a esté curieux d'en cognoistre les causes, & sçauoir d'où procedoiēt tous ces accidents : Je vous en ay fort souuent entretenue, & en propos vulgaires, & en termes expres de la medecine. En fin mes discours vous ont esté si agreables, qu'estant retiree à l'Abbaye de Marmoustier pour iouyr avec la beauté du lieu, de la bonté de l'air, vous m'avez commandé de les mettre par escrit, & de leur faire

EPISTRE.

voir le iour sous vostre autorité. Je n'ay peu honnestement vous le refuser, encores qu'un si graue subiect meritast d'estre enrichy d'une infinité de belles autoritez, que ma memoire ne pouuoit fournir pour estre despourueu de liures. Je vous ay donc dressé trois discours touchant vos trois maladies: le premier est de l'excelence de la veüe, & du moyen de la conseruer: le second, de l'hypochondriaque, & des maladies melancholiques: le troiesime, des catarrhes, & du moyen de les guarir. I'y ay adiousté sur la fin un petit traité de la vieillesse, qui vous

EPISTRE.

pourra servir à l'aduenir. car de vous appeller à present vieille, il n'y a point d'apparence, veu que vous ne ressentēz encores aucune incommodité de la vieillesse. N'est-ce pas un miracle de nostre siecle, d'ouyr vos discours si graues, de voir vostre entendement si sain, vostre memoire si riche, vos sens si entiers, que de l'œil qui vous est resté sain vous lisēz de bien loin la plus menue lettre qu'on vous sçauroit presenter sans lunettes? l'ouye vous est demeuree aussi subtile, & le goust aussi friand que iamais: le cœur si vigoureux, que toutes les atakes q̃ vostre

EPISTRE.

stre hypochondriaque luy aye
sceu faire, ne l'ont iamais peu
esbrâler ny faire perdre sa ca-
dence: le foye si liberal, qu'il
fournit plus de sang au corps
qu'il ne luy en faut: de sorte q̃
nous sōmes cōtraints vous en
faire tirer vne fois l'annee. Je
ne diray rien de la bonté de
vostre estomach, vous la re-
cognoissēz assez, ayant à tou-
te heure appetit, & digerant
tout ce que vous luy donnez.
Puis dōc que vostre ame exer-
ce si dignement toutes ses a-
ctions, peut on dire que son in-
strument soit usé ou vieilly?
Je croy, Madame, qu'on ne
vous peut appeller vieille, sinō

P I S T R E.

*pource que vous auez passé
 cinquante ans, & que la cou-
 stume est de conter la premie-
 re vieillesse à ce nombre là.
 Vous auez dequoy rēdre gra-
 ces à Dieu. car ceste lōgue &
 heureuse vie est un tesmoigna-
 ge certain de sa benediction,
 pource que la plus belle recom-
 pense qu'il promet en ce mōde
 à ceux qu'il ayme, est qu'ils
 marcheront longuemēt sur la
 terre. Resiouissez vous donc,
 Madame, vous n'estes qu'en
 vostre premiere vieillesse, qui
 est toute verte & courageuse,
 il y en a encores deux à passer.
 Dieu qui a dōné ceste vigueur
 à vostre corps, & qui l'a an-
 à vj*

EPISTRE.

nobly d'une ame si belle & si
bonne, les vueille rendre aussi
heureuses que les souhaite,

MADAME,

Vostre tres-humble & tres-
obeissant serviteur,

A. du LAYRENS.



L'AVTHEVR

AV LECTEUR.

EN NE doute pas
que ces discours ne
courent hazard d'e-
stre calomniez &
outragez auant que d'estre
bien recogneuz par vne infi-
nité de persônes qui ne sont
nais que pour reprendre.
Quelques Medecins trouue-
ront mauuais que j'aye diuul-
gué les mysteres de nostre
art, & pourront alleguer que
les Ægyptiens (qui ont esté
les premiers inuenteurs de la
Medecine) pour ne propa-
ner vn si saint & sacré don de
Dieu, n'escriuoient leurs re-
medes qu'en lettres hiero-

Au lecteur.

glyphiques : mais ie leur res-
pōdray avec Aristote, qu'un
bien tant plus il est commun
tant meilleur est-il, & que les
Medecins Grecs venoient
vne fois l'annee escrire à la
veuë de tout le peuple, en ce
beau temple d'Æsculape qui
estoit dressé en Epidaure,
tout ce qu'ils auoient obser-
ué de plus rare en leurs mala-
des. Les Naturalistes se scan-
daliseront de ce que ie m'at-
taque quelquefois à ce grand
interprete de la nature Ari-
stote: mais ils n'auront autre
replique de moy que celle
d'Aristote mesme. Platon,
dit-il, m'est amy, & Socrate
aussi, mais la verité m'est en-
core plus amie. J'auray bien
plus à faire à contenter ceux
là qui ne s'amusent qu'à la

Au lecteur.

mignardise des mots & à la propriété des dictiōs: car sans doute ils trouueront vne infinité de mots rudes qui pourront offenser leurs par trop delicates oreilles: mais s'ils ne veulent auoir esgard que ie ne fay pas profession d'escrire en François, ie leur diray avec tous les sages, que ceste trop curieuse recherche des mots est indigne d'un Philosophe, & que ie me suis contenté fuyant la barbarie (de laquelle ils ne me sçauroiet du tout accuser) de faire entendre mon subiect. Pour le regard de tous ces enuieux & malicieux qui ne cessent d'abbayer apres moy, & ne me sçauroient mordre, qu'ils se mettent seulement en campagne, nous verrons

Au lecteur.

filz sçauront mieux faire . Je
croy que tous les gens d'hō-
neur aurōt agreable ce mien
petit labeur : c'est à eux à
qui ie m'adresse, ie puis
donc marcher hardi-
ment sous l'om-
bre & faueur
de leurs
ailes.





TABLE DES

CHAPITRES CON-

tenus en ces Discours.

Discours premier, auquel est
traicté de l'excellence de la
veüe, & du moyen de la
conseruer.

QUE le cerueau est le vray Ch. I.
siege de l'ame, & pour
ceste occasion tous les
organes des sens sont logez à l'en-
tour de luy. *feuillet. I*

Comme les sens externes, vrais
messagers de l'ame, sont cinq seule-
ment, tous logez au dehors du
cerueau. *II.*

Que la veüe est le plus noble de
tous les sens. *III.*

17

TABLE.

| | | |
|-------|--|----|
| IIII. | De l'excellence de l'œil, propre instrument de la veüe. | 24 |
| V. | De la composition de l'œil en general. | 29 |
| VI. | Description fort particuliere de toutes les parties de l'œil, & premierement de ses six muscles. | 35 |
| VII. | Des six tuniques de l'œil. | 38 |
| VIII. | Des trois humeurs de l'œil, de la beauté & excellēce du crÿstallin. | 42 |
| IX. | Des nerfs, veines, arteres & autres parties de l'œil. | 46 |
| X. | Comme la veüe se fait, si c'est par emission ou par reception. | 48 |
| XI. | En combien de façons la veüe peut estre offensée. | 61 |
| XII. | Brief denombrement de toutes les maladies de l'œil. | 64 |
| XIII. | Regime general & tres-exquis pour la conseruation de la veüe, auquel est fort particulièrement demonstŕé tout ce qui peut nuire aux yeux, & tout ce qui leur est propre aussi. | 77 |

TABLE.

Remedes choisis pour la conser- XIII.
uation de la veüe, & l'ordre qu'on
doit obseruer en les appliquant. 87

Second Discours, auquel est
traicté des maladies melan-
choliques, & du moyen de
les guarir.

Que l'homme est un animal Ch. i.
diuin & politique ayant trois puis-
sances nobles particulieres, l'ima-
gination, le discours, & la me-
moire. fueil. 97

Que cest animal plein de diuini- II.
té s'abaisse par fois tellement & se
deprauue par vne infinité de mala-
dies, qu'il deuient comme beste. 108

Qui seront ceux qu'on appelle me- III.
lancholiques, & comment on doit
distinguer les melancholiques ma-
lades d'avec les sains. 113

Definition de la melancholie, & I III.
toutes ses differences. 116

TABLE.

- V. De la melancholie qui a son propre siege au cerueau, de tous les accidens qui l'accompagnent, & d'où viennent la peur, la tristesse, les veilles, les songes horribles & autres symptomes. 120
- VI. D'où vient que les melancholiques ont de particuliers obiects tous differens, sur lesquels ils resuent. 130
- VII. Histoires de certains melancholiques qui ont eu d'estranges imaginations. 139
- VIII. Regime de viure pour les melancholiques qui ont le cerueau malade. 141
- IX. Comme il faut guarir les melancholiques qui ont la maladie gravee au cerueau. 146
- X. D'une autre espece de melancholie, qui vient de la furie d'amour. 161
- XI. Le moyen de guarir les fols & melancholiques d'amour. 167
- XII. De la troisieme espece de me-

TABLE.

lancholie qu'on appelle hypochondriaque, & ses differences. 172

Des signes de l'hypochondriaque, XIII.
& d'où viennent tous les accidens
qui l'accompagnent. 177

Histoires fort remarquables de deux hypochondriaques. XVIII. 181

La curation de l'hypochondriaque. x v. 185

Troisieme Discours, auquel est traicté de la generation des catarrhes, & comme il les faut guarir.

Que le cerueau est le siege du froid & de l'humide, & par consequent la source des defluxions. Ch. I. 195

Que signifie ce mot de catarrhe, quelle maladie c'est, & en quoy consiste son essence. II. 199

Les differences du catarrhe. III. 203

Des causes du catarrhe. IIII. 208

Regime de viure general propre V.

TABLE.

| | | |
|--------|--|-----|
| | <i>pour les d-fluxions.</i> | 214 |
| V I. | <i>Methode generale pour la cura- tion des defluxions.</i> | 219 |
| V I I. | <i>Le moyen de cōserver les dents.</i> | 230 |

Quatriesme Discours, auquel est traitté de la vicillesse, & comme il la faut entretenir.

| | | |
|----------|--|-----|
| Ch. I. | <i>Que l'homme ne peut tousiours demeurer en un estat, & quil luy est necessaire de vieillir.</i> | 236 |
| I I. | <i>Description tresbelle de la vieil- lesse.</i> | 243 |
| I I I. | <i>Regime pour se conseruer lon- guement.</i> | 250 |
| I I I I. | <i>Quel air on doit choisir pour vi- ure longuement, & quel est le plus propre pour les vieilles gens.</i> | 251 |
| V. | <i>Les reigles generales qu'on doit garder au manger & au boire pour viure longuement.</i> | 255 |
| V I. | <i>Comme il faut particulierement nourrir les vieilles gens, & de quel-</i> | |

TABLE.

| | | |
|--|-----|-------|
| les viandes. | 259 | |
| Quel breuuage est propre pour les vieilles gens. | 263 | VII. |
| De l'exercice des vieilles gens. | 264 | VIII. |
| Quelles reigles on doit garder au dormir. | 267 | IX. |
| Comme il faut resiourr les vieil- lards, & les destourner de toutes violantes passions de l'ame. | 269 | X. |
| Quels remedes sont les plus pro- pres pour les vieilles gens, & par quel artifice on peut corriger les in- commoditez de la vieillesse. | 272 | XI. |

F I N.



PREMIER DISCOVRS
 AVQVEL EST TRAICTE
 de l'excellence de la veuë, & du
 moyen de la conseruer.

*Que le cerueau est le vray siege de l'ame:
 & pour ceste occasion tous les orga-nes
 des sens sont logez à l'entour de luy.*

CHAPITRE I.



L'AME de l'homme,
 la plus noble & plus
 parfaicte forme qui
 soit sous la voulte
 du ciel, portant pour marque
 de son excellence la viue &
 vraye image de son Createur,
 cōbien qu'elle soit toute sem-
 blable à soy, immatérielle, in-
 diuisible, & par consequent
 toute en tout le corps, & tou-
 te en chaque partie d'iceluy:
 si est-ce que pour la diuersité

De l'excellence de la veüe,

de ses actions , pour la difference des instrumens desquels elle se sert , & pour la varieté des objets qui luy sont proposez , elle paroist & semble au vulgaire estre en quelque façon diuisible. Les Philosophes mesmes voyans ses plus nobles puissances reluire en vn endroit plus qu'en l'autre, l'ont voulu loger & quasi confiner en vne seule partie. Ainsi les Theologiés ravis des merueilles qui se voyent avec plus d'apparence au ciel qu'en aucune autre partie du monde, disent le ciel estre le Throsne de Dieu, combien que son essence soit infinie, incomprehensible, & qu'elle s'estēde par l'estendue de tout ce qui est.

Herophile a creu que l'ame logeoit en la seule base du cerueau; Xenocrate au sōmet de

la teste, Erasistrate aux deux membranes, que les Arabes appellét Meres, Strato au milieu des sourcils, Empedocle assisté des Epicuriens & Egyptiens, en la poictrine; Moschion en tout le corps, Diogene aux arteres, Heraclite en la seule circonference, Herodote aux oreilles, Blemor Arabe, & Syrene medecin Cyprien aux yeux, pource qu'on y remarque comme dans vn mirouer toutes les passions de l'ame: mais ce ne sont, à mon iugement, que vanitez & pures folies. Il y a bié plus d'apparece à l'opinion de ce grad interprete de la nature Aristote, qui pense le cœur estre le vray siege de l'ame, pource que son principal instrument, qui est la chaleur naturelle, s'y trouue. C'est, dit-il, le premier

Diuer-
ses opi-
nions du
siege de
l'ame.

Opiniõ
d'Aristo-
te.

De l'excellence de la veüe,

viuant & dernier mourât, seul magasin des esprits, origine des veines, arteres, & nerfs, principal auteur de la respiration, fontaine & source viue de toute chaleur, contenât dans ses ventres vn sang subtil & raffiné qui sert cōme de brasier pour alumer & animer tous les aütres petis feux, bréf l'vnique Soleil du petit monde. Et tout ainsi que le ciel est le premier principe, duquel dépendent toutes les generacions & alterations clementaires; ainsi le cœur est le premier principe de toutes les actiōs & mouuemēs du corps.

Belle cōparaïson du ciel & du cœur. Le ciel produit des effects merueilleux par son mouuement, par sa lumiere, & par son influence; Le cœur par son mouuement cōtinuel (qui ne nous doit pas moins rauir que

le flux & reflux de l'Eurippe)
& par l'influëce de son esprit,
anime toutes les parties, leur
donne ceste belle & vermeil-
le couleur, entretiët leur cha-
leur naturelle. Le mouuemēt
& la lumiere aux corps supe-
rieurs sont instruments des
intelligences & du ciel; des
intelligences, comme du pre-
mier mouuant immobile: du
ciel, comme du premier mou-
uant qui est meu. Le mouue-
mēt du cœur, & son esprit qui
se communiquē quasi en vn
moment par tout comme la
lumiere, sont instruments de
l'ame & du cœur; de l'ame, cō-
me du premier mouuant qui
n'est point meu; du cœur, cō-
me du premier mouuant qui
est meu de l'ame. C'est donc-
ques le cœur, en la doctrine
des Peripateticiens, qui est le

De l'excellence de la veüe,
vray siege de l'ame, seul prin-
ce & gouverneur en ceste si
excellente & admirable œco-
nomie du corps. Chrysippe &
tous les Stoïques ont suiuy
le mesme aduis, & ont creu
que tout l'enclos des parties
que nous disons vitales, se
nommoit Thôrax, *Θώραξ τὸ
θεῖον ὤργανον*, pource qu'il enferre
ce diuin entendement d'A-
naxagore, ceste ardente cha-
leur de Zenon pleine d'un mi-
lion d'artifices, cest admira-
ble feu que Promethee pilla
du ciel pour animer & viui-
fier l'homme, cest esprit re-
muant duquel Theocrite fait
tant de cas. Voila comme ces
Philosophes ont diuersement
parlé du siege de l'ame. Je ne
veux point employer le tēps
à examiner particulièrement
toutes ces opinions, mon in-

tention n'est pas de disputer icy, ie me cōtenteray de dire simplement la verité. car ie m'asseure qu'elle sera assez forte pour réuerfer tous ces faux fondemēs. Je dis donc que le principal siege de l'ame est au cerueau, pource que ses plus belles puisāces y logēt, & ses plus nobles effectis y reluisent le plus. Tous les organes du mouuement, sentiment, imaginatiō, discours, & memoire ou se treuuēt dans le cerueau, ou en dépendent immediatemēt. L'Anatomie nous mōstre à l'œil que de la base du cerueau sortent sept grandes paires de nerfs, qui s'en vont tout à l'instant apporter l'esprit animal aux organes des sens, & ne sortent point hors la teste, sinon le sixiesme, qui a son estēdue iusques au bout

Que le
cerueau
est le
vray sie-
ge de
l'ame.

Raisons.

Premiere.

du petit ventre. Nous voyons
sortir du derriere du cerueau
(où le grand & petit cerueau
se rencontrent) ceste admira-
ble queuë, ceste belle & blan-
che mouëlle dorsale, que le
Sage en son Ecclesiaste appel-
le chorde d'argent, qui est soi-
gneusemēt conseruee dans vn
canal que Lactance nomme
Sacré. D'icelle on voit naistre
vn million de petits nerfs qui
apportēt la puissance de mou-
voir & sentir à toutes les par-
ties qui en sont capables. On
apperçoit tout à l'entour du
cerueau logez les sens exte-
rieurs; qui sont comme cour-
riers & messagers de l'entē-
dement, partie fouueraine de
l'ame. Quand on descouure
(dit Philon) les gardes d'un
Prince, on pense qu'il n'est
gueres loin; nous voyōstous

du moyen de la conseruer 8
les satellites & ministres de la
raison, les yeux, les aureilles,
le nez, la langue, situez en la
teste; nous deuons par conse-
quêt iuger que ceste princesse
n'en est pas loin. L'experience
nous fait cognoistre que si le
cerueau est alteré en sa tem-
perature, si est trop eschauf-
fé, comme il arriue aux phre-
netiques, ou trop refroidy,
commeaux melancholiques, *Troisi-
esme.* il corrompt tout aussi tost l'i-
magination, trouble le iuge-
ment, affoiblit la memoire; ce
que n'arriue point aux mala-
dies particulieres du cœur:
comme à la fièvre hectique,
& à ceux qui sont empoison-
nez. L'ame (dit le diuin Platon) *Quatri-
esme.* ne se plaist point en vn cer-
ueau trop mol, trop dense, ou
trop dur, elle demande vne
bonne temperature. Si la con-

De l'excellence de la veüe,

formation de la teste est tant soit peu deprauee, qu'elle soit ou trop grande, ou trop petite, ou pointuë, comme celle qu'on lit dans Homere de Therfite, ou du tout ronde, sans estre (comme, elle doit naturellemēt) applatie par les costez, on apperçoit toutes les actiōs de l'ame deprauees, on appelle ces testes folles sās iugement, sans prudence, qui nous doit faire croire, que le cerueau est aussi bien organe de toutes ces actions, comme l'œil de la veuë. Davantage ceste figure ronde qui est particuliere à l'homme, ce chef esleué au ciel, ceste grande quantité de cerueau, qui est quasi incroyable, monstrent bien que l'homme a quelque chose en sa teste plus que les autres animaux. Les sages d'E-

du moyen de la conseruer. 6

gypte l'ôt bien recogneu . car
ils ne iuroient que par la teste,
ils confirmoiēt tous leurs ac-
cords par la teste, & defen-
doient de manger le cerueau
des animaux, pour l'honneur
& reuerence qu'ils portoient
à ceste partie. Je croy que le
haut mal n'a esté appellé Sa-
cré des anciēns pour autre rai-
son, que pource qu'il occupe
la souueraine & sacree partie
du corps. Reconnoissons dōc
le cerueau pour vray siege
de l'ame, principe du mouue-
mēt, sentimēt, & de toutes ses
plus nobles operatiōs. Je sçay
bien que quelque esprit cu-
rieux me demâdera, cōment
est-il possible que le cerueau
soit principe du sentimēt, veu
qu'il est du tout insensible; cō-
ment peut-il estre authcur de

Pour-
quoy le
cerueau
n'a point
de senti-
ment.

De l'excellence de la veüe,
tant de belles actiõs, veu qu'il
est froid, & que l'ame ne peut
rien sans la chaleur? Mais ie
luy respõdray que le cerueau
n'a point eu de sentiment par-
ticulier, pource qu'estât le sie-
ge du sens commun, il deuoit
iuger de tous les obieets sen-
sibles. Or vn bon iuge doit e-
stre exempt de toute passion,
& tout organe (dit Aristote)
doit estre sans qualité. ainsi le
cristalin, principal instrumēt
de la veüe, n'a point de cou-
leur, l'aureille n'a point de son
particulier, la langue point de
goust. Que s'il arriue qu'un
organe se laisse corrompre, cõ-
me si le cristalin deuient iaune,
tout ce qui se présentera à l'œil
paroistra de mesme couleur.
Comme dõcques le cerueau
ne voit, n'oit, ne fleure & ne
goust rien, mais il iuge tref-

bié des couleurs, des sons, des odeurs, des sapueurs: Ainsi n'estoit il pas raisonnable qu'il eust vn sentiment particulier du tact qui luy fist refléter les excez des qualitez qu'on nōme tractables. Il luy suffisoit d'en auoir la cognoissance & le iugement. Quant à l'autre poinct, ie dis que le cerueau est actuellemēt chaud, & qu'il ne peut estre appellé froid que par cōparaison du cœur. Il falloit necessairement qu'il fust de ceste tēperature, pour tēperer les esprits qui estoient de nature de feu, pour retenir les especes, & pour les conseruer longuement. car si le cerueau estoit aussi chaud que le cœur, il y auroit tousiours du trouble & de la sedition parmy les plus nobles puissances de l'ame: tous les sens

Pour-
quoy le
cerueau
est rem-
péré.

seroiët esgarez, tous les mou-
uemens desreiglez, tous les
discours temeraires, & la me-
moire du-tout volage, ainsi
qu'il arriue aux phrenetiques.
Que rien d'óc ne nous arreste
à recognoistre le cerueaupour
la plus noble partie du corps.
C'est ce magnifié & super-
be edifice de l'ame, ce beau
palais Royal, ceste sacree mai-
son de Pallas, ceste tour im-
prenable enuironnee des os
comme de fortes murailles,
où la puissance souueraine de
l'ame (i'entends la raison) qui
comprend & embrasse tout
l'vniuers en vn momét sans y
toucher, qui voltige par l'air,
descéd és abysses de la mer,
& monte en mesme instant
sur les planchers des cieux, se
poumene par leurs estages,
mesure leurs distances, com-

Et du moyen de la conseruer. §

munique avec les Anges, pénétre iusques au throsne de Dieu, & lors que le corps est endormy se laisse par vn saint vol, où par vn rauissement doux transporter iusques au miroüer du diuin Archetype: Bref qui est tout (dit Aristote) ayant tout par puissance: où dis-ie ceste grande princesse s'est voulu loger comme dans sa citadelle, pour commander aux deux regions basses, pour tenir en brideles deux puissances inferieures (i'entens l'irascible & la concupiscible) qui estoient quasi tousiours disposees à la reuolte. l'oseray bien passer plus outre, & pourray peut-estre des premiers dire, qu'il n'y a que le cerueau qui puisse veritablement estre appellé noble & souuerain au corps, que toutes les autres

De l'excellence de la veüe,

parties sont faiçtes pour le cerueau, & luy rendent tribut comme à leur Roy. Voicy ma demonstration, qui est à mon aduis aussi claire que le Soleil.

Belle demonstration pour l'excellence du cerueau.

L'hôme ne differe des bestes que par la raison: le siege de la raison est au cerueau: il faut pour raisonner & discourir que l'imagination presente à l'entendement les objets tous purs, immateriels, & desnuez de toutes qualitez corporelles. L'imagination ne les peut d'elle mesme conceuoir, si les sens extérieurs, qui sont ses vrais espions, & fidelles mesfagers ne luy rapportent. Il a donc fallu former les organes des sēs, les yeux, les oreilles, le nez, la langue, & les membranes tāt internes qu'extérieures. Les sens pour recognoistre la diuersité des objets ont

eu besoin d'un mouuement local. car l'hóme ne bougeât d'un lieu, & demeurât immobile côme vne statuë, ne sçau- roit rapporter que bien peu à son imagination. Il a dõc esté necessaire pour la cõmodité & perfection des sens, d'auoir certains organes du mouue- mēt: ces instrumēs sont deux, les nerfs & les muscles; les nerfs pour la continuation qu'ils ont avec leur principe, comme ont les rayons avec le Soleil, apportēt du cerueau le pouuoir scellé en vn corps bien subtil, qui est l'esprit ani- mal: les muscles comme bons subiets obeissent à ce mande- ment, & meuuent incontinēt la partie, l'estendēt, la flechif- sent comme il plaist à l'imagi- natió & à l'appetit. Le cerueau doncques commande, le nerf

De l'excellence de la veüe,

porte le commandement, le muscle obeit & se retire vers son principe. Et tout ainsi qu'un adroict Escuyer manie avec la bride son cheual, le fait tourner à droit, à gauche, & comme il luy plaist: ainsi le cerueau par les nerfs flechit & estend les muscles. Ces deux organes du mouvement volontaire ne scauroiēt subsister ny entreprendre leur action s'ils n'estoient appuyez sur quelque corps solide & immobile. Il a donc fallu bastir des colonnes, qui sont les os, les cartilages d'où naissent les muscles, & où ils se vont inserer: les os ne pouuoient estre joints ny rafferms sans liens, il les falloit aussi couvrir de leurs membranes. Toutes ces parties auoient besoin d'une chaleur naturelle & de nour-

du moyen de la conseruer. 10

riture pour leur conseruation: ceste chaleur, cest aliment venant d'ailleurs, deuoient estre conduits par des canaulx, qui sont les veines & arteres: les arteres puisoient leur esprit de quelque fontaine, qui est le cœur: les veines prenoient le sang au commun magasin, qui est le foye. De sorte que s'il faut remonter par la mesme eschelle d'où nous venons de descendre, le cœur & le foye n'ont esté faits que pour entretenir la chaleur de toutes les parties: les os & cartilages, pour seruir d'appuy aux muscles & aux nerfs, instrumens du mouuement volontaire, les muscles & nerfs pour la perfection des sens: les sens pour représenter tous les objets externes à l'imagination: l'imagination pour rapporter

Conclu³
sion,

De l'excellence de la veüen

les especes denuces de toute matiere à la raison qui les donne apres en garde à la memoire comme sa thresoriere. De sorte que tout obeissant à la raison, & le cerueau estant le vray siege de la raison, il faut dire que toutes les parties du corps ont esté faictes pour le cerueau, & le doiuent recognoistre pour leur souuerain.

J'apporteray vne autre demōstratiō qui n'est pas à mon aduis cōmune pour tesmoigner l'excellēce de ceste partie: c'est qu'elle donne la forme & perfection à toutes les autres. Car il est tout certain que de la forme & quantité du cerueau depēd la grosseur, la grandeur, la petitesse, & en vn mot toute la figure de la teste, pour ce que le contenāt se rapporte tousiours au con-

tenu comme à son principe. A la teste se ioint l'espine qui est composee de vingt & quatre vertebres & de l'os sacrû, & fait ce qu'on appelle le tronc du corps. Si le trou de la teste par où doit descēdre la moëlle est grand, il faut que les vertebres soient larges. Sur ceste espine cōme sur le fond d'un nauire sont appuyez tous les autres os ; en haut vous y verrez les espaules auxquelles les bras son attachez de costé & d'autre, les douze costes, & en bas les os des iles & des anches, dās lesquels s'emboistēt les os des cuisses ; de sorte que si toutes les proportions sont bien obseruees , la grandeur & grosseur des os depēd de la teste , & par cōsequēt du cerueau cōme du premier principe. Sur les os s'attachēt les li-

De l'excellence de la veuë,
gamens, les muscles, & la plus-
part des autres parties s'y ap-
puye, d'as leur enclos s'enfer-
mēt les plus nobles parties &
les visceres. Les os en somme
donnēt à tout le corps la for-
me qu'ils ont receüe du cer-
ueau. C'est ce qu'a tres-bien
remarqué le diuin Hippocra-
te au secōd de ses Epidemies,
disant que de la grandeur &
grosseur de la teste le Medec-
in pouuoit iuger de la gran-
deur de tous les os & des au-
tres parties aussi, comme des
venes, arteres & nerfs.

Concluons doncques avec
la verité, que le cerueau ayāt
tant d'auantage sur les autres
parties doit estre le principal
& souuerain siege de l'ame.

Et du moyen de la conseruer. 12

Comme les sens externes, vrais messagers de l'ame, sont cinq seulement, tous logez au dehors du cerueau.

CHAP. II.



VIS qu'il est tout certain que l'ame estant enfermee dás ce corps, comme dans vne prison obscure, ne peut ny discourir ny comprendre aucune chose sans l'aide des sens, qui sont côme les vrais ministres & fideles messagers; il a esté necessaire de loger les organes des sens bien pres de la raison, & tout autour de sa maison royale. Or ces sens que nous appellons exterieurs sont cinq seulement, la veüe, l'ouye, l'odorat, le goust, & l'attouche-

De l'excellence de la veüe,
ment, desquels despend-en-
tierement toute nostre co-
gnoissance, & rié (dit le Philo-

Pour-
quoy il
n'y a que
cinq sēs.

sophe) ne peut entrer en l'in-
tellect qu'il n'ait passé par l'v-
ne des cinq portes. Ceux qui
ont voulu rendre raison de ce
nombre disent qu'il n'y a que
cinq sens, pource que l'vni-
uers n'est composé que de
cinq corps simples, qui sont
les quatre elemens, & le ciel
qu'ils appellent cinquiesme,
nature, etheree, toute pure &
pleine de lumiere. La veüe
(disent les Platoniciens) qui
a pour son instrument ces
deux astres jumeaux, tous
pleins de rayons & d'un feu
celeste qui luit & ne brusle
point, represente le ciel, & à
la lumiere pour son objet.

Premie-
re raisō.

L'ouye qui ne reçoit que les
sons, a pour objet vn air bat-

tu &

tu & son principal instrument
(si nous croyons Aristote) est
vn air enfermé dans vn petit
labyrinthe. L'odorat tient de
la nature du feu ; car l'odeur
ne consiste qu'au sec qui est
rendu tel par la chaleur : &
nous tenons comme par ma-
xime, que toutes choses aro-
matiques sont chaudes . Le
goust a l'humide pour obiect,
& l'attouchement la terre.
Les autres disent qu'il n'y a Secõde.
que cinq sens , pource qu'il
n'y a que cinq obiects pro-
pres, & que tous les accidens
qui se trouuent au corps na-
turel, se peuuent rapporter ou
aux couleurs, ou aux sons , ou
aux odeurs, ou aux saveurs, ou
bié aux qualitez qu'on nôme
tractables tant premieres que
secondes. Il y en a qui recueil- Troisies-
me.
lent le nombre des sens de

De l'excellence de la veüe,

leur vſage, qui eſt la cauſe finale: Les ſës ſont faits pour la cõmodité de l'hõme; l'hõme eſt cõpoſé de deux parties, du corps & de l'ame; La veüe & l'ouye ſeruent plus à l'ame qu'au corps, le gouſt & l'attouchement ſeruent plus au corps qu'à l'ame; l'odorat ſert à tous les deux également, recreant & purifiant les eſprits, qui ſont principaux inſtrumens de l'ame. Je dirois que des cinq ſens il y en a deux qui ſont du tout neceſſaires pour l'eſtre & pour la vie ſimplement, les trois autres ſont pour le bien eſtre & pour le bien viure ſeulement. Ceux qui ſont neceſſaires pour l'eſtre ſont l'attouchement & le gouſt. L'attouchemēt (ſi nous croyons les naturaliſtes) eſt comme le fondement de l'a-

nimalité) i'vseray de ce mot pour ce qu'il exprime fort biē la chose,) Le goust sert pour la conseruation de la vie . La veüe, l'ouye, & l'odorat ne sōt que pour le bien viure : Car l'animal peut estre & subsister sans eux. Les deux premiers pource qu'ils estoient du tout necessaires ont eu leur moyē interieur & si conioinct avec l'organe qu'il en est quasi inseparable. car au goust & à l'atouchemēt, les Medecins cōfondent le moyen & l'instrument. Les trois autres ont eu leur moyen exterior & separé de l'organe, comme la veüe a l'air, l'eau & tout corps diaphane pour moyen. Aristote au commencement du troisieme liure de l'Ame, a bien plus serieusement philosophé que tous ceux cy, mais c'est

avec tant d'obscurité, q̃ quasi tous les interpretes s'y trouuent fort empeschez : de sorte qu'il sēble nous auoir voulu cacher les secrets de la nature & les mysteres de la philosophie, nō pas avec vn voile fabuleux , comme les Poētes anciens, ny avec vne superstition des nombres comme les Pythagoriciēns, mais avec vne obscure briueté, ressemblāt à la Seche , laquelle pour ne tomber entre les mains du pescheur iette vne liqueur noire & se cache. Les sens, dit Aristote , ne sont que cinq, pour ce que les moyens par lesquels nous sentons ne peuvent estre alterez qu'en cinq façons : Les moyens par lesquels nous sentons sont deux seulement , l'vn est exterieur, l'autre interieur: l'exterieur est

Quatri-
esme.

La de-
mōstra-
tion d'A-
ristote
sur l'ob-
bre des
sens.

Et du moyen de la conseruer. 15

l'air ou l'eau , l'interieur est la chair ou les membranes. L'air & l'eau reçoient les objets externes , ou comme diaphanes, & lors ils seruēt à la veüe, ou comme corps mobiles & rares, & lors seruent à l'ouye, ou comme humides receuant le sec , & lors sont subiects à l'odorat. La chair ou les membranespeuent estre confiderees en deux façons, ou selon la téperature des quatre premieres qualitez , & lors elles sont subiectes à l'attouchement, ou selon la mixtion du sec & humide, & lors elles reçoient les saueurs pour le goust. Quoy que ce soit, il n'y a que cinq sens extérieurs qui sont tous logez au dehors du cerueau. Ce sōt les vrais courriers & messagers de l'ame, ce sont les fenestres par où nous

De l'excellence de la veuë,

la voyons tout à clair: ce sont les gardes ou portiers qui no^t font entrer en son plus seeret cabinet: s'ils sont fideles à la raison ils luy representent vn milion de beaux obiects, sur lesquels elle faiet des discours merueilleux. Mais, hélas! cōbien de fois la trahissent-ils? ô comme ils sont dangereux & subiects à corruption! C'en est pas sans cause que ce Mercure trois fois grand, appelle les sens tyrans & bourreaux de la raison, car ils la liurent bien souuent prisonniere aux deux puissances inferieures, ils la font de maistresse deuenir seruâte, de libre qu'elle estoit ils l'asservissent & la rendent esclau. Elle a beau commander pour lors, elle n'est non plus obeye que la loy ou le magistrat en vn estat troublé

Les sens
bour-
reaux de
l'ame.

de diffensions ciuiles. He! cō-
bien d'ames ont perdu leur li-
berté par la veüe? Ne dit-on
pas que ce petit folastre, cest
aueugle archer entre dās nos
cœurs par ceste porte, & que
l'amour se forme du rencon-
tre des rayons qui sortent de
l'œil, ou bien de l'ynion des
plus subtils & deliez esprits,
qui montent secrettement du
cœur à l'œil par vn petit fen-
tier, & ayans abusé ce portier,
mettent l'amour dedans, qui
se rend peu à peu maistre de
la place, & en met la raisō de-
hors? Combien de fois la rai-
sō se laisse charmer par l'ouye?
Si tu prestes l'aureille à ces lā-
gues affêtees, à ces voix pipe-
resses, à ces discours artifi-
ciels pleins de douceur &
d'vn milion d'apas, ne doute
point que ta raison ne soit sur-

Comme
les sens
rauisent
la liber-
té
à la rai-
son.

De l'excellence de la Veille,

prinse, les escoutes sont endormies, l'ennemy se laisse couler tout doucement & se saisit de la forteresse. Le sage Vlysse n'estouppa-il pas les oreilles de ses compagnons craignant qu'ils ne fussent ensorcelez & endormis du chant harmonieux des Sirenes? La friandise du goust, la gourmandise, l'yurongnerie, n'ont-ils pas perdu de grans personnages? Et ce sens de l'atouchement que nature a donné aux animaux pour la cōservation de leur espee, le plus grossier, le plus terrestre de tous, & par consequent le plus delicieux, ne nous fait-il pas souuēt deuenir bestes? On ne surprend donc iamais la raison que par la corruption de ces portiers, on n'entre iamais dās son palais que par l'intelligence des

du moyen de la conseruer. 17

gardes, pour ce que, comme
i'ay dit au commencement de
ce chapitre, l'ame estant en-
fermee dans ce corps ne peut
rien sans le ministere des sens.

*Que la veüe est le plus noble
de tous les sens.*

CHAP. III.

DANS tous les sens,
celuy de la veüe a esté
iugé par l'aduis com-
mun de tous les Philosophes,
le plus noble, le plus parfait,
& le plus admirable. Son ex-
cellence se fait paroistre en v-
ne infinité de choses: mais en
quatre principalement, à la
diuersité des obiects qu'il re-
presente à l'ame, au moyen de
son operation qui est quasi
tout spirituel, à l'excellence
de son obiect particulier qui

Trois
choses
pour l'ex-
cellence
de la
veüe.

De l'excellence de la veüe

La pre-
miere.

est la lumiere, la plus noble & plus parfaite qualité que Dieu crea iamais, & a la certitude de son action. Premièrement il n'y a point de toute que la veüe ne nous face cognoistre plus de diuersitez & differences des choses que nul autre sens. car tous les corps naturels sont visibles, mais tous ne se touchent pas, de tous ne soit point vne odeur, vn goust, vn son : le ciel qui est l'ornement du monde, & le plus noble corps de l'vniuers ne se laisse pas toucher à nous, nous n'oyons pas ceste douce harmonie qui procede des accords de tant de mouuemens diuers, il n'y a que la veüe qui nous le face cognoistre, les corps mols ne font point de son, la terre & le feu n'ont point de goust, & tout ce-

la pourtât est visible. La veüe
oultre son obiect propre, qui
est la couleur, en a vne infini-
té d'autres, comme la gran-
deur, le nombre, la figure, le
mouuement, le repos, la situa-
tion, la distance. C'est pour-
quoy le Philosophe en sa Me-
taphysique l'appelle sens de
l'inuention, d'autant que par
son moyé toutes les plus bel-
les sciences ont esté inuêtees.
C'est par le moyen de ce no-
ble sens que nous auons com-
mencé à philosopher: car la
philosophie ne vient que de
l'admiration, l'admiratiō pro-
cede de la veüe des choses
belles. Nostre ame donc s'e-
leuant en haut vers le ciel ra-
uie de tant de merueilles, en a
voulu recercher la cause, & a
commencé à philosopher. Je
diray d'auantage, que la veüe

De l'excellence de la veüe,

est le sens de nostre beatitu-
de. car le souuerain bien de
l'hōme consiste en la cognois-
sance de Dieu. Or il n'y a point
de sens qui nous y conduise
mieux que la veüe. Les chō-
ses inuisibles de Dieu (dit l'A-
postre) se cognoissent & ma-
nifestent à nous par les visi-
bles. Ceste premiere cause,
qui est infinie & incompre-
hensible, ne se peut cognoi-
stre que par ses effectz. Moyse
ne sceut iamais voir Dieu que
par le derriere; car de sa face
sortoit vne si grande clarté
qu'elle luy esblouyssoit du
tout la veüe. Vien t'en icy, ô
athée, employe ce noble sens
à contempler cet excellent &
parfaict ouurage de Dieu, cet
vniuers qui contient tout. E-
leue ta veüe en haut, d'où tu
as pris ton origine, regarde le

Belle cō-
sideratiō
pour les
Athées.

throsne de Dieu qui est le ciel,
la plus accomplie de toutes
ses œuures sensibles & corpo-
relles : voy ce nombre infiny
de feux allumez au ciel, & en-
tre autres ces deux grâds flâ-
beaux qui nous esclairêt, l'vn
le iour, l'autre la nuit ; Con-
temple la majesté du Soleil
quand il se leue , comme il e-
stend en vn moment ses rayôs
depuis vn'extremité du mon-
de iusques à l'autre, & comme
le soir il plonge son char de-
dans l'onde. Regarde la varie-
té des faces & apparences de
la Lune, les diuers mouuemēs
des planetes qui vont conti-
nuellement avec vne viftesse
& esgalité incroyable, & ne
s'entrecheurtent iamais. Si tu
as honte de regarder le ciel,
de peur d'estre contraint de
confesser vne diuinité, iette

De l'excellence de la veüe

ta veüe en bas vers les eaux
ou vers la terre: voy en la mer
vne merueille, comment elle
menace perpetuellement la
terre & ne desborde iamais:
elle reçoit tous les fleuves du
monde, & pour cela n'enfle
point, on ne luy vit iamais pas
ser ses bornes. Regarde com-
me la terre est suspendue en
l'air & se soustient sur sa pro-
pre pesanteur; Considere la
diuersité des animaux qui sôt
si accomplis en leur espee, la
beauté des pierres, le nombre
infiny des plâtes qui sont aussi
agreables en leur varieté,
qu'admirables en leur pro-
prieté. Si tout cela ne te peut
esmouuoir à recognoistre ce-
ste premiere cause, si tes deli-
ces t'attirent ailleurs & te ra-
uisset le téps qu'il faudroit em-
ployer pour remarquer tant

Et du moyen de la conseruer. 20
de varietez, vien t'en icy, ie te
feray voir en moins de rien
l'abregé du grand monde, le
chef d'œuvre de Dieu, le ta-
bleau de l'vniuers, & lors, ra-
uy d'un si merueilleux artifice
tu seras contraint de t'escrier
auec ce grand magicien Zo-
roaster, ô homme, miracle &
effort de nature. Ie ne te veux
representer pour ce coup que
la teste, d'autant que les rayōs
& marques de la diuinité y
reluisent le plus. Contemple
cette maison Royale par de-
dans, par dehors, & par tout:
voy l'artifice du cerueau, les
trois colonnes qui soustien-
nent tout le couuert de ce su-
perbe edifice cōme vn Athlas
soustient le ciel de ses espau-
les: Les quatre chambrettes
où logent (si nous voulons
croire les Arabes) les puissan-

De l'excellence de la veüe,
ces souveraines de l'ame, l'imagination aux deux premières, la raison à celle du milieu, & la memoire à celle du derriere, le miroüer transparent, le ret admirable qui est comme vn labyrinthe tissu d'un milion de petites arteres entrelasseees, où se preparent & raffinent les esprits, les sources des nerfs, la corde d'argët, & son incroyable fecondité à la production des nerfs, les canaux & aqueducs par lesquels toutes les immondices du cerueau se purgent. Si tu ne te veux enfermer dans ce palais Royal, fors dehors, tu verras au deuât de la teste ces deux astres luisans, ces deux miroirs de l'ame qui nous representēt toutes ses passions: tu admireras le beau cristalin qui est plus net & plus pur que

les perles Orientales, la polif-
sure des fix tuniques, la mer-
ueilleuse agilité des fix mus-
cles, & sur tout de ceste poulie
amoureuse. Tu verras à costé
les deux oreilles qui ne te ra-
uirôt pas moins. N'est-ce pas
vn traict bien hardy de la na-
ture d'auoir enfermé en vn si
petit trou vn tambour bien
têdu, ayant par derriere deux
petites cordes, trois osselets
qui ont la forme d'vn enclu-
me, d'vn marteau, & d'vn estri-
cu, trois petits muscles, vn la-
byrinthe, qui contient l'air in-
terieur, deux fenestres ouales,
vn nerf, vn canal cartilagi-
neux qui se rend au palais, &
fait ceste belle sympathie des
instrumés de l'ouye avec ceux
de la voix? Et que diras tu de
ce petit morceau de chair, qui
se meut en cent mille façons

De l'excellence de la veüe,

comme vne anguille, i'entēds
la langue, qui est l'interprete
de toutes nos conceptions,
vraye messagere de l'ame, qui
chante (comme dit l'Apostre)
louange à son Createur, & dō-
ne souuent malediction aux
hommes, qui rait, flechit,
tonne, qui anime au combat
les âmes genereuses, qui a le
pouuoir de perdre & renuer-
ser les plus florissans Empires
& de les remettre aussi. Bref
regarde, ô Athee, en gros, si
tu ne veux en détail, la beauté
& la majesté de ceste face qui
fait trébler tous les animaux;
n'y trouueras tu pas vne estin-
celle & ie ne sçay quel rayon
de la Diuinité? n'y verras-tu
pas la marque & caractere
de son createur? & ayant le
tout contemplé, ne seras-tu
pas, bon gré mal gré que tu

en ayes, contraint de t'escrier
auec le Prophete Royal : Tes
mains, Seigneur, m'ont for-
mé, ie t'exalteray tout le téps
de ma vie. Combien donc est
noble la veüe, puis qu'en nous
representant tant de merueil-
les & tant de diuersitez d'ob-
iects, elle nous meine à la co-
gnoissance de Dieu. Le secôd
poinct qui nous fait paroistre
l'excellence de la veüe est le
moyen de son operation, qui
est tout spirituel; car la veüe se
fait en vn instât, sans mouue-
ment local, & a vne distance
fort esloignée. Je veux, afin
qu'vn chacû cognoisse la per-
fection de ce sens, le paran-
gonner, & rendre quasi sem-
blable à l'intellect. Tout ainsi
que l'intellect reçoit de l'ima-
gination les especes immate-
rielles; ainsi la veüe reçoit les

Le secôd
poinct
pour l'ex-
cellence
de la
veüe.

Belle cō-
paraïson
de la
veüe à
l'intel-
lect.

De l'excellence de la veüe,

especes sans corps, que les Philosophes appellent intentionnelles. L'intellect comprend tout l'vniuers sans qu'il occupe aucun lieu, contient le ciel & la terre sans qu'ils s'y entremeschent : la veüe reçoit le ciel sans qu'il occupe aucune place, les plus grandes montagnes du monde entrent tout à la fois & toutes entieres par la prunelle sans qu'il y ait presc à l'entree. L'intellect iuge en mesme temps de deux cōtraïres, du vray & du faux, les loge egalemeñt en soy, les entend l'un par l'autre, les range sous yne mesme science. L'œil en mesme moment reçoit le noir & le blanc, & les discerne parfaictement sans que l'un empesche la cognoissance de l'autre, ce que n'arriue pas aux autres sens : Car

ayāt gousté l'amer on ne sçau-
roit en mesme temps bien iu-
ger & discerner le doux. L'in-
telle&t voltige en vn instant
partout le monde; la veüe re-
çoit en vn instant l'espece du
ciel; Tous les autres sens se
meuent avec le temps. c'est
pourquoy on voit l'esclair a-
uant qu'ouyr le tōnerre, com-
bien qu'ils se facēt en mesme
temps. L'intelle&t est libre de
sa nature, & a vne volonté de
discourir ou de ne le faire
pas: La veüe en son operation
a comme vne espece de liber-
té que nature a denié aux au-
tres sēs: Les oreilles sōt touf-
iours ouuertes & le nez aussi,
la peau est exposée au froid,
au chaud, & à toutes les iniu-
res de l'air; mais les yeux ont
des paupieres qui s'ouurent &
ferment quand nous voulōs,

pour voir ou ne voir point, sinon quand il nous plaist. Le troisieme subiect que j'ay pour tesmoigner l'excellence de la veüe est la certitude de son action; Car il n'y a nul doubte que ce ne soit le sens le plus asseuré & qui se trompe le moins: Aussi a t'on accoustumé de dire quand on veult asseurer quelque chose, qu'on l'a vëu de ses propres yeux. & le prouerbe des Anciens est tresueritable, qu'il vaut mieux auoir vn tesmoing qui aye vëu que dix qui l'ayët ouy dire. Le Philosophe Milesien nômé Thales disoit qu'il y auoit autant de difference entre la veüe & l'ouïe, comme entre le vray & le faulx. Les Prophetes mesmes pour asseurer leurs propheties ne les appellët que visions, comme

estans choses certaines & veritables. En fin l'excellence de la veüe se fait paroistre en son obiect particulier; qui est le plus noble, le plus commun & le plus cogneu de tous. Ie le dis le plus noble, pource qu'il comprend la plus belle qualité qui soit en l'vniuers; c'est la lumiere qui a pris sa naissance du ciel, & que les Poëtes appellent fille aînée de Dieu. Ie le nomme le plus commun pource qu'il se communique à tous indifferémēt, & le plus cogneu de nous, d'autant que tous les corps naturels participent de quelque couleur, & qu'il n'y a riē en l'vniuers qui ne soit visible. Disōs dōc avec Theophraste, que la veüe est comme la forme & perfectiō de l'hōme: avec les Stoïques, que la veüe nous fait appro-

Le troisieme point de l'excellence de la veüe.

*De l'excellence de la veüe,
cher de la diuinité, & avec le
Philosophe Anaxagore qu'il
semble que nous ne sommes
nais que pour voir.*

*De l'excellence de l'œil propre
instrument de la veue.*

CHAP. IIII.

SI le sens de la veüe est
admirable, l'organe qui
luy est dedié, surpasse toute
merueille; car il est composé
avec tant d'artifice & de tant
belles parties, qu'il n'y a per-
sonne qui n'en soit rauy: & ie
ne sçay si ie dois avec Plotin
& Synesius appeller la nature
magicienne, pour auoir en vn
si petit astre enfermé tant de
graces, & fait vn ouurage qui
surpasse les siens ordinaires.
Les Egyptiens ont autrefois
adoré le

adoré le Soleil, & l'ôt appellé le fils visible du Dieu inuisible; & pourquoy n'admirerōs nous l'œil, qui est (cōme chante l'ancien poëte Orphee) le Soleil du petit monde, plus noble sans comparaison que celuy du grand? Le grand Soleil par l'estendue de ses rayōs illumine tout l'vniuers, mais il ne reçoit point de plaisir ny de commodité de ce seruice, il ne voit rien de ce qu'il nous fait voir; L'œil qui est le petit Soleil, en nous representant tous les corps colorez, les voit & recognoist aussi, s'ē resiouyt avec l'ame, & apperçoit la forme, la grandeur, & la distance des obiects, ce qu'aucū autre organe ne peut faire. Platon pour honorer ceste diuine partie la nôme celeste & etheeree, il croit que l'œil est tout

Compara-
raison
du So-
leil avec
l'œil.

De l'excellence de la veüe,
plein de rayons & de feu sem-
blable à celuy des estoilles
qui luit & ne brusle point.
Orphee appelle les yeux mi-
roirs de la nature, Hesychius
portes du Soleil, Alexandre
Peripateticie fenestres de l'a-
me, pource que par les yeux
nous la voyons tout à clair,
nous penetrons iusques en
ses plus profondes pensees,
nous entrons en son plus se-
cret cabinet. Et tout ainsi que
la face nous represente la
vraye & viue image de l'ame,
ainsi les yeux nous descou-
urent toutes les passions: les
yeux admirent, aiment, &
sont pleins de cōcupiscence:
Aux yeux tu remarques l'a-
mour & la haine, la tristesse &
la ioye, la hardiesse & la crain-
te, la pitié & la vengeance,
l'esperoir & le desesperoir, la santé

Les yeux
miroirs
de l'ame.

& la maladie, la vie & la mort.

Regarde, ie te prie, comme en l'amour les yeux te sçauēt flatter, commē ils deuiennēt doux, graticux, affettez, attrayās fretillars, enchâteurs: en la haine comme ils s'effarouchent, & deuiennent rudes; en l'audace ils fesseuent & brillēt sans cesse; en la crainte ils s'abbaisent & deuiennent comme immobiles: en la ioye ils sont rians & clairs: en la tristesse tous abbatus, larmoyans & tenebreux. Bref ils sont du tout disposez à suyure les mouuemens de l'ame, ils se changent en vn moment, s'alterent & se passionnent avec elle, de sorte que l'Arabe Blemor & Syrenec medecin Cyprien n'auoient pas trop de tort de dire que l'ame habitoit aux yeux, & le

Toutes les passions de l'ame se voyēt en l'œil.

De l'excellence de la veüe,

Mome
cōdam-
né.

vulgaire le croit encores , car
en baissant les yeux , il pense
baïser l'ame. Te voila cōdam-
né Mome impudēt, tu as per-
du ta cause, vien t'enicy faire
amende honorable à la na-
ture , pour l'auoir malicieuse-
ment & faulusement accusée
d'erreur , en la fabrique du
corps humain, d'autant qu'el-
le n'auoit fait des fenestres
aupres du cœur , pour voir
toutes les passions. Veux tu
de plus belles fenestres que
celles des yeux? n'y vois-tu
pas comme dans vn miroir
tout ce qui est de plus caché
dans l'ame? le pauvre crimi-
nel ne lit-il pas dans les yeux
de ses iuges son supplice, ou
sa grace? Il y a (dit Theocrite)
de l'œil au cœur vn chemin
tout ouuert: on a beau se mas-
quer, telle est la passion dans

l'œil comme elle est dans le cœur. Ha que ie trouue ces discours pleins de vanité, de souhaïter vne poictrine de crystal afin qu'on puisse voir ce qui est dans le cœur, veu que nous auons ce beau & rond crySTALLIN dans nostre œil qui darde comme à trauers d'vn luisant verre ses plus viues lumières. Que si parmy ces fleurs philosophiques & poëtiques il m'est permis d'entre-mesler quelque traict de medecine, ie diray qu'aux yeux nous y voyons l'estat entier de la santé du corps. Ce grâd oracle de Grece, que tout le monde admire enco-

Aux yeux on voit l'estat entier de la santé.

De l'excellence de la veüe,
veüe sur toute la face, mais
principalement sur les yeux,
pource qu'on y voit comme
dans vn miroüer, & la force
& la foiblesse de toute la fa-
culté animale : si l'œil est clair
& bien luisant, il nous donne
bône esperance, mais s'il est
obscur, flety & tenebreux, il
nous menace de la mort. Ga-
lien appelle l'œil membre di-
uin, partie solaire de l'animal,
& en fait si grand cas, qu'il
croit que le cerueau soit fait
pour les yeux seulement. Les
Iurisconsultes tiennēt qu'un
aueugle ne peut postuler,
pource qu'il ne peut voir la
majesté du Magistrat. Ceste
lumiere de nature Aristote au
second liure de la generation
des animaux, dit q̄ des yeux
on prend des signes certains
de la fecondité, & que distil-

lant quelque liqueur amere dans l'œil de la femme, si la langue en est incontinent infectee, c'est vn signe de fecondité. Les yeux (dit le mesme Philosophe) sont pleins d'esprits & de semēce. c'est pourquoy aux nouveaux mariez ils sont tous abbatus & comme languissans. Mais qu'est-il besoin d'alleguer tant d'autoritez pour faire paroistre l'excellence de ces deux Soleils, puis que la nature mesme la nous demonstre assez? Lisons au liure de la nature, voyons combien elle a esté soigneuse de conseruer les yeux comme ses plus chers messagers: admirons l'artifice duquel elle a vsé pour leur deffense, nous trouuerons qu'elle n'y a rien oublié, non plus que ceux qui veulent

Le soin
que nature
a eu à
conseruer
l'œil.

De l'excellence de la veüe,

La forti-
fication
de l'œil.

fortifier vne place & la rendre imprenable. Premièrement elle les a logez dans vn vallon, pour ne les exposer au hazard d'vn milion d'in- iures; & de peur que rien ne commandast à ce vallon, elle a basti tout à l'entour quatre beaux bouleuars tous reue- stus d'os, aussi durs que pierre, qui s'aduancent en dehors, comme si c'estoiét petits ter- res, pour receuoir les coups & soustenir l'effort des enne- mis qui pourroient l'assaillir. En haut il y a l'os du front, en bas celuy de la maschoire su- perieure: à dextre & à senestre les deux angles, le grand qui est vers le nez, & le petit qui est opposite. Et d'autant que le deuant de ceste place estoit tout descouuert, de peur que le prince qui y commande,

qui est l'œil, ne fust surprins, ou offensé d'une trop grande clarté, du vent, du froid & de la fumee, Nature a fait comme vn pont leuis qui se hausse & s'abbaisse par le commandement du gouuerneur, c'est la paupiere qui s'ouure & ferme quand il nous plaist : Les chaines qui haussent & auallent ce pont, sont les muscles, instrumens du mouuement volontaire. Ce soin donc que nature a eu à la conseruation & deffense des yeux, nous fait assez paroistre leur excellence, & nous apprend aussi combien nous deuons estre soigneux de les bien conseruer.

De l'excellence de la veüe,

*De la composition de l'œil
en general.*

C H A P. V.

IL est temps de descou-
vrir l'artifice de ces a-
stres iumeaux, ie m'en vois le
descrire si exactement que les
plus curieux, & ceux qui ne
sont nez que pour reprendre,
peut estre, s'en contenteront,
laissant en arriere vne infini-
té de belles disputes, qui se
peuuent esmouuoir sur les par-
ties de l'œil, lesquelles j'ay
amplement traiçtees au qua-
triesme liure de mes œuures
Anatomiques. Or tout ainsi
que les Cosmographes, ou
ceux qui par curiosité voya-
gent, s'enquierent premiere-
ment du nom des provinces,

remarquent auant qu'entrer dans les villes, l'affiette, la forme, la grâdeur, les deffences, les aduenues, & tout ce qu'on peut voir par dehors: Ainsi veu-x-ie deſcrire la forme, l'affiette, les deffences, la grandeur, l'vſage, le nombre des yeux, & tout ce qui ſe peut remarquer en gros, auât qu'entrer en vne plus particulière recherche de toutes ſes pieces.

Les yeux donc ſont appellez des Grecs *ὀφθαλμοί*, pour ^{Les nōs de l'œil} ce qu'ils nous font voir, & les Poètes diſent qu'ils ſont enfans de Thea. Les Hebrieux leur ont dōné le nom de haut, pour nous faire reſſouuenir de noſtre origine, & que les yeux nous doiuent ſeruir pour cōtempler les choſes hautes. Les Latins les nōment *Oculi*,

De l'excellence de la veüe,

pource qu'ils sont comme cachés & enfermez dans vne vallee creuse.

La forme
de l'œil.

La forme ou figure de l'œil est ronde, mais non pas du tout spherique, car elle est vn peu longue & comme pyramidale ayât sa base endehors, & sa pointe en-dedans vers le nerf optique. Ceste figure luy a esté tresconuenable pour la

Pour-
quoy
l'œil est
rond.

la force. Les Mathematiciens croient que la figure ronde est la plus capable de toutes, & les Optiques assurent, que si l'œil n'eust esté rond il n'eust iamais peu cōprendre la grandeur des corps, & n'eust sceu voir à la fois plusieurs obiects pource que la veüe ne se fait que par droicte ligne. de quel costé donc que l'œil se tourne plusieurs lignes se rendēt tout

à coup à la prunelle, qui est ronde, ce qui n'arriueroit pas si elle estoit plate ou quarree. Ceste figure ronde sert aussi à l'œil pour l'agilité, afin que plus facilement il se puisse mouuoir en haut, en bas, à dextre, à fenestre, & en rond; car les corps ronds se meuuent quasi d'eux-mesmes n'estans appuyez que sur vn poinct. Je croy que ceste rondeur n'est inutile à la deffence de l'œil: car entre toutes les figures la ronde est la plus forte, & resiste plus aux iniures externes, pource qu'elle est toute continuë, & n'a point d'inegalité: on n'y trouue aucun angle ny aucun poinct qui puisse estre principe de sa dissolutiō.

Les yeux sōt situez au plus haut du corps, au deuant, & dans vn vallon: Au plus haut

La situa-
tion de
l'œil.

De l'excellence de la veüe,

pour descouurir de loin & garder que rien ne nous assaille au despourueu; ils seruēt à l'animal deguette ou de sentinelle, & sont bien souuent appelez dans l'escriture sainte *Phares*. Or a-on accoustumé de loger les sentinelles au lieu le plus eminēt, & de mettre au plus haut de la tour ou du nauire le phanal. Ils sont logez au deuāt plustost qu'au derriere, pource que l'animal se meut en deuant: il doit dōc voir ce qui le peut offencer, les sentinelles ne doiuent iamaïs tourner le dos à l'ennemy. Les anatomistes disent qu'il falloit necessairement situer les yeux au deuāt, pource que la veüe auoit besoin d'un nerf fort mol & bien moëlleux qui apportast soudainement grande quantité

Pour-
quoy il
est situé
en haut.

Pour-
quoy en
deuant.

d'esprits : or ce nerf ne pou-
uoit sortir du derriere, qui e-
stoit trop dur & trop sec. l'ay
autrefois approuué ceste rai-
son, mais depuis ayant remar-
qué la source de tous les nerfs
estre au derriere, & ayant veu
l'optique en sortir aussi bien
que les autres, ie suis cōtraint
de changer d'opinion. En fin
les yeux sont enfermez dans
vne fossette creuse, que le
vulgaire appelle Orbite, pour
leur plus grande seureté, &
afin qu'il ne se fist pas si gran-
de dissipation des esprits. Ce
vallon est remparé de tous
costez des os du frōt, du nez,
& de la maschoire superieu-
re, qui s'aduancent comme
petites collines : & pource
que le deuant estoit tout des-
couuert, nature l'a clos d'vne
paupiere, qui s'ouure & ferme

Pour-
quoy il
est dans
vnvallō

qund il nous plaist, de peur
quel'œil ne fust alteré d'une
trop grande lumiere, ou que
l'œil demeurât tousiours ou-
uert, les esprits ne s'esuanoüis-
sent tous, ou qu'en dormant
il ne fust offensé des causes
externes. l'adiousteray encô-
res, que si l'œil ne se fermoit,
les esprits exposez tousiours à
la lumiere ne se retireroient
si tost à leur centre, & nostre
dormir ne seroit si paisible:
car les Philosophes tiennent
que le sommeil se fait par la
retraite des esprits au dedans.

La sub-
stance
de l'œil.

La nature de l'œil, qu'on
appelle en termes anatomi-
ques substance, est toute mol-
le, diaphane, crasse, aiguse:
molle pour receuoir prom-
ptement les especes, diapha-
ne afin que la lumiere la puis-
se trauerser, & aussi pour ce

que tout organe doit auoir quelque analogie avec son obiect, crasse afin que les obiects s'y puisét arrester: L'eau seule auoit toutes ces qualitez. L'œil donc est de nature aiguse, & non point comme disoit Platón, de nature de feu, comme ie discourray au dixiesme chapitre.

L'usage de l'œil est double, l'un est commun à tous les animaux, qui est de leur seruir de guide & de sentinelle, pour descouurir ce qu'ils peut endommager; L'autre est particulier à l'homme seul, la cognoissance de Dieu par les choses visibles, la perfection de l'intellect, & sa beatitude; car receuant l'espece du ciel, l'intellect s'ennoblit & se rend quasi sēblable à son Createur. *Le nom-*
Les yeux sont deux pour *bre.*

De l'excellence de la veüe,

l'excellence & necessité de ce sens, afin que l'un estant malade ou perdu, l'autre serue; ils sont aussi deux pour la perfection de la veüe, afin qu'on puisse voir plusieurs objets à la fois: car s'il n'y auoit qu'un œil, & qu'il fust logé au milieu du frôt, comme les Poëtes ont fait des Cyclopes, nous verrions seulement ce qui est au deuant de nous, & ne verrions pas ce qui est aux costez. Ces deux yeux, encore qu'ils soient assez esloignez l'un de l'autre, ont telle sympathie, & s'accordent si bien en leur action, que l'un ne se peut mouuoir sans l'autre, il est hors de nostre pouuoir d'en mouuoir vn en haut & l'autre en bas, ou bien d'en mouuoir l'un & que l'autre demeure immobile. Aristote

Vn œil
ne se
peut
mou-
uoir sãs
l'autre.

rapporte cela à l'vñion des nerfs optiques, & croit que les yeux se meuuent ensemble, pource qu'ils ont vn principe commun de leur mouuement qui se trouue en la cõionction de l'optique. Mais ce grand personnage s'abuse icy, comme il s'est trompé quasi en tout ce qui est de l'anatomie. Le nerf optique ne sert de rien pour le mouuement, il apporte seulement l'esprit pour la veüe, car estât bouché en la goutte sereine, la veüe se perd, & l'œil ne laisse pas de se mouuoir. Il en faut donc attribuer la cause à la fin & perfection de ce sens. Les yeux se doiuent mouuoir ensemble, afin que l'obiet ne paroisse double. que si nous pouuions en hausser vn & baisser l'autre en mesme temps,

Erreur
d'Aristote.

De l'excellence de la veüe,
ce sens qui est le plus noble,
se tromperoit tousiours, & se-
roit le plus imparfaict, d'au-
tant que l'obiet, qui est sim-
ple, paroistroit tousiours dou-
ble. Tu en verras la preuue si
tu presses tō œil avec le doigt,
ou en haut ou en bas.

Le tēpe-
ramēt.

Le temperament de l'œil
est froid & humide.

Le senti-
ment.

L'œil a vn sentiment très-
exquis, & a vne merueilleuse
sympathie avec le cerueau.

Les cou-
leurs des
yeux.

L'homme seul a les yeux
diuersement colorez. Ceste
varieté procede ou des hu-
meurs ou de la tunique vuee,
ou des esprits. Aux humeurs
ie remarque trois choses, la
situation profonde & super-
ficielle, la substance grossie-
re ou subtile, claire, ou tene-
breuse, & la quantité. Si l'hu-
meur crystalline est biē nette,

Et du moyen de la conseruer. 35
claire, & subtile, si elle est grã-
de & fort auancee en dehors,
l'œil sera flamboyant; si au cō-
traire elle est obscure, grosse,
& fort enfoncée en dedans,
l'œil sera noir ou brun: la tūi-
que vuee qui se trouue diuer-
sément coloree est aussi cause
de ceste varieté, les esprits y
peuuent beaucoup seruir.

*Description fort particuliere de tou-
tes les parties de l'œil. Et premie-
rement de ses six muscles.*

CHAP. VI.

N'E s t - c e pas vne des
merueilles du monde,
que ce petit organe, qui ne
paroist quasi rien, soit com-
posé de plus de vingt parties
toutes differentes, si bien v-
nies & rapportees ensemble,

De l'excellence de la veüe,
que l'entendement humain
n'y peut remarquer ny defaut
ny superfluité? ie m'en vois les
descrire l'une après l'autre, &
avec l'ordre qu'on les doit
môstrer aux anatomies. L'œil
donc est composé de six cor-
des de chair, qu'on appelle
muscles, qui le font mouuoir
en haut, en bas, à dextre, à se-
nestre, & en rond; de six taves
ou tuniques qui lient toutes
les parties ensemble, les nour-
rissent, & contiennent les hu-
meurs en leurs bornes; de
trois humeurs claires & dia-
phanes qui reçoivent, alterét
& gardent tous les objets vi-
sibles; de deux nerfs, qui ap-
portent l'esprit animal, l'un
pour la veüe, appellé optique,
l'autre pour le mouvement;
de plusieurs petites veines
qui apportent la nourriture;

Brief des
nombre-
ment de
toutes
les par-
ties de
l'œil.

d'autant d'arteres, qui luy donnent la vie; de beaucoup de graiſſe, qui le rend plus agile; & de deux petites glandes, qui l'arroſent & tiennēt frais, de peur que par ces continuelſ mouvemens il ne ſ'eſchauffe & ſeiche par trop.

Les muſcles ont eſté neceſſaires à l'œil pour le faire mouvoir de tous coſtez: car ſi l'œil demeuroid immobile, nous ſeriōs cōtrains de tourner la teſte & le col tout d'une piece pour voir: mais avec ces cordes il ſe meut ſāſ bouger la teſte, d'une viteſſe & agilité incroyable, c'eſt pourquoy le Poëte les appelle faciles. Les muſcles de l'œil ſōt fix ſeulement, quatre droicts, & deux obliques; les droicts ſervent au mouvement droit, le premier tire l'œil en haut,

Deſcription des muſcles.

Les quatre muſcles droicts.

Erreur
des an-
ciens.

De l'excellence de la veüe,
le second en bas, le tiers vers
le nez, le quatriesme l'en reti-
re. Les anciens qui ont esté
fort grossiers en l'anatomic,
ont pésé que ces quatre mus-
cles venoient du dedans de
la dure mere, mais ils se sont
lourdement abusez, car ils ne
le doiuent & le peuuent en-
core moins. Ils ne le doiuent,
pource que la membrane est
trop sensible & enueloppe le
nerf optique: de sorte que les
muscles faisans leur action &
se retirans vers leur principe,
presseroient le nerf, empê-
cheroient le passage qui doit
estre libre à l'esprit, & pour le
sentiment de la dure mere,
qui est tres exquis, leur mou-
vement seroit tousiours dou-
loureux. Ils ne le peuuent aus-
si, pource qu'ils ne seroiēt pas
appuyez sur vne base assez so-
lide,

lide, leur fondement seroit trop foible, il faut que la partie qui tire soit plus forte que celle qui est tirée. Il faut donc croire que ces quatre muscles viennent du dedans le l'orbite, d'une portion de l'os sphénoïde, & se vont diversément inserer en la tunique blanche: Les deux autres muscles appelez obliques, meuvent l'œil obliquement & comme en rond, l'un en haut, l'autre en bas, toujours en dehors, iamaïs en dedans, pour ce que l'œil n'a rien en dedans pour voir. Le premier des obliques sort du mesme lieu que les quatre droicts, & comme il approche du grand angle, fait une corde ronde & blanche, laquelle passant dans un petit canal ou anneau cartilagineux en forme de poulie.

Les deux muscles obliqs.

La poulie amoureuse.

De l'excellence de la veüe,

lie, fait vn mouuement à demy circulaire, & s'insere obliquement aux costez de la conionctiue. cet artifice qui est admirable a demeuré caché iusques à nostre temps, qu'un subtil anatomiste nommé Falope, l'a descouuert. L'autre vient du grand angle & s'insere au petit, retirant l'œil obliquement vers l'oreille. Nous donnerons pour plaisir à chaque muscle son nom: celui qui hausse l'œil & l'esleue, s'appellera orgueilleux ou superbe: l'autre qui l'abaisse, humble: celui qui l'amène vers le nez, liseur ou beuveur, pource qu'il beuuât, ou lisant, nous tournōs l'œil vers le nez: l'autre qui le retire, desdaigneux ou courroucé, pource qu'il nous fait regarder de trauers. Les deux obliques ou

Noms
plaisans
des six
muscles

Et du moyen de la conseruer. 38
 circulaires seront nommez
 rouans & amoureux, pource
 qu'ils font mouuoir l'œil à la
 desrobee, & ietter les œilla-
 des. Tous les anatomistes ad-
 ioustent vn septiesme muscle
 qui enueloppe le nerf opti-
 que, le tient ferme, & empes-
 che que l'œil ne sorte de sa
 place : mais ils se trompent.
 car il ne se trouue qu'aux ani-
 maux à quatre pieds, qui ont
 l'œil abaissé en terre; l'hōme
 ayant la face esleuee au ciel,
 n'en a pas eu besoing. Quel-
 ques vns pensent que ce mus-
 cle est aussi necessaire à l'hō-
 me qu'aux autres animaux,
 pour faire le mouuement to-
 nique, & pour le tenir arresté,
 quand attentiuement nous
 regardōs quelque chose; mais
 ie leur dis que le mouuement
 tonique se fait lors que tous

Erreur
 des an-
 ciens sur 7.
 muscles.

De l'excellence de la veüe,
les six muscles tendent egale-
mēt leurs fibres, cōme quand
elles laschent, l'œil n'a point
d'arrest, & se meut perpetuel-
lement. Si cela ne les cōtente,
qu'ils me monstrent à l'œil de
l'homme ce septiesme mus-
cle, ie les croiray.

De six tuniques de l'œil.

CHAP. VII.



O ŒIL estant diapha-
ne & de nature aigeu-
se, deuoit estre retenu
par quelque corps qui eust
cōsistence, autrement les hu-
meurs flotteroient & n'au-
roient point d'arrest. Nature
dōc pour cet vsage a fait cer-
taines pellicules, qu'on appel-
le tuniques ou taves, qui vnif-
sent tout l'œil, contiennent
les humeurs en leurs bornes,

Pour-
quoy il a
fallu des
tuniques
à l'œil.

& leur apportēt la nourriture. Le nôbre de ces tuniques n'est pas trop resolu: les vns en mettent plus, les autres moins. Hippocrate n'en reconnoist que quatre, Galien en a remarqué cinq, les anatomistes de nostre temps en cōtent iusques à neuf. Quant à moy, apres auoir bien curieusement fucilleté le liure de Nature, ie n'en trouue que six, la blâche, la cornee, l'vuee, l'arantee, la reticulaire, & la vitree. car celle qu'on nomme ciliee, dépend de la vitree, & la dure est vne portion de la cornee. Quant à celle qui se fait des extremittez des muscles, il n'y a point d'apparence de la nommer tunique propre de l'œil. car si cela auoit lieu, il faudroit que la mēbrane cōmune qui couure

Il n'y a q
six tunic
ques.

les muscles de l'œil, iouyst de
mesme priuilege. La premie-
re doncques de toutes se nō-
me blanche, ou le blanc de
l'œil, autrement conionctiue:
ie laisse tous les noms Grecs
& Latins, qu'on les voye en
mō anatomie. Ceste tunique
est assez forte, & vient des ex-
tremitez du pericrane: elle
n'environne pas l'œil par tout,
mais se termine au cercle qui
est diuersemēt coloré, & qu'ō
appelle pour ceste occasion
Iris. Ie recognoy trois vfages
de ceste taye; Le premier est
d'empescher que l'œil ne soit
offensé de la durteté des os:
le secōd, de tenir l'œil ferme,
de peur que par vn excez, ou
en ses plus violés mouuemēs
il ne sorte de place; le dernier,
d'asseurer tous les six muscles
& leur seruir d'appuy.

La pre-
miere est
la blan-
che.

Trois v-
fages de
la cōion-
ctiue.

La secōde membrane s'appelle cornee, pource qu'elle est claire & polie comme la corne des lanternes, ou pource qu'ō la peut diuiser en plusieurs escorces & pellailes: elle est aussi nōmee dure pour sa durezza, & d'autant qu'elle vient de la dure mere. Son corps est dense pour resister aux iniures externes; diaphane, afin que la lumiere le puisse soudain percer; esgal, poly, & sans aucune couleur, d'autant que seruant comme de vitre ou de lunette au crystallin, s'il eust esté teint il représenteroit tous les obieets de mesme couleur: c'est pourquoy l'on n'y voit point de veines ne d'arteres. Que s'il arriue que ce corps blāchisse (comme apres vn vlcere, ou pour l'auoir trop approché

La Cor-
nee.

*Vsage de
la Cor-
née.*

lu chaud, ainsi que les Turcs
ont à ceux qui veulent voir
le sepulchre de Mahomet) la
veüe se pert, la vitre est ob-
scurcie. Ceste tunique a trois
vsages. car elle sert de deffen-
se aux humeurs, elle les con-
tient & embrasse toutes, & si
sert de lunette au crystallin.

L'vuee.

La troisieme est l'vuee res-
semblant à la peleure d'un rai-
sin noir. elle se nomme aussi
choroïde, d'autant qu'elle cō-
tient tous les vaisseaux qui
nourrissent les autres taves,
ou pource qu'elle vient de la
pie mere, que Galien appelle
souuent choroïde.

Ceste peau environne l'œil
tout par tout, hormis au de-
uant, où elle est percee, & fait
un petit trou rond, qu'on nō-
me prunelle, qui est la vraye
fenestre de l'œil, laquelle

estât fermee aux cataractes nous fait viure en perpetuelles tenebres: il n'y a que ceste tunique qui soit diuersement coloree. Au deuât elle est cōme noire pour vnir les especes, au dedans elle est bleuë & verte, & de diuerses couleurs pour resiouyr le crystallin quād il seroit lassé. L'vuee ^{vsages} fait des seruices bien signalez ^{del'vuee.} au crystallin & aux autres parties de l'œil. Premièrement elle empesche que la durté de la cornee ne le blesse, apres elle le resiouyt par la diuersité de ses couleurs, retient & vnit les esprits qui se dissiperoiēt: en fin fournit de viures à la cornee, à la reticulaire & aux humeurs; c'est pourquoy nature l'a faite molle & pleine de vaisseaux.

La quatriesme se nomme

L'Aranoïde.

Aranoïde, pource qu'elle est fort delicee, & ressemble au crêpe que l'araigne forfille de ses pieds. elle enveloppe immédiatement le crystallin, & sert pour vnir & retenir les especes, comme le plomb fait aux miroirs.

La reticulaire.

La cinquiesme est la reticulaire, entrelacee d'un milion de petits filets en forme de ret: elle vient de la moëlle du nerf optique qui se dilate: c'est pourquoy estant iettée dans l'eau on l'apperçoit toute blanche, molle, & comme moëlleuse. Son usage est d'apporter la lumiere interieure, qui est l'esprit animal, au crystallin, & de rapporter toutes les images au nerf optique, & de là au cerueau pour en iuger.

36. usage

La vitreuse.

La derniere se nomme vi-

& du moyen de la conseruer. 42
tree, pource qu'elle contient
& enuelope l'humeur vitree.
Les anciens ne l'ont pas co-
gneuë : on voit au milieu d'i-
celle vn cercle rond ayant la
forme de la paupiere ; ie croy
que ce sont plusieurs petites
veines qui apportent le sang
à l'humeur vitree pour le pre-
parer & blâchir au crystallin.

*Des trois humeurs de l'œil, de la be-
auté & excellence du crystallin.*

CHAP. VIII.

VOILA toutes les en-
ueloppes ostees , il
est temps de descou-
urir le plus precieux tresor de
l'œil, le riche diamant, le beau
crystallin, qui est de plus grâd
prix que toutes les perles
d'Orient: c'est ceste humeur

L'excel-
lence du
cristallin.

glacee, qui est le principal instrument de la veüe, l'ame de l'œil, la lunette interieure: c'est celle qui est seule alteree des couleurs, & qui en reçoit toutes les images. C'est en ce crystallin que se fait la rencōtre des deux lumieres, de l'exterieure, & de l'interieure: c'est ce seul crystallin que toutes les parties de l'œil recognoissent pour leur souverain, & luy rendent service. car la cornee luy sert de vitre, la prunelle de fenestre, l'vuce de iardin pour s'esgayer quād il est trop lassé, l'arancee de plomb pour retenir ses especes, l'humeur aigüese d'avantgarde pour arrester & rompre le premier abord des obiects qui voudroiēt tout soudainement entrer, l'humeur vitree de cuisinier, luy prepa-

Comme
toutes
les par-
ties de
l'œil ser-
vent au
crystal-
lin.

rant & blanchissant sa viâde,
le nerf optique de courrier
ordinaire, luy portant du cer-
ueau le cōmandemēt & puis-
sance de voir, & rapportant
tout soudain ce que le cry-
stallin a veu: les muscles sont
ses cheuaux qu'il le pourme-
nent en haut, en bas, à droict,
à gauche, & par tout où il luy
plaist. C'est en somme la par-
tie principale de l'œil, laquel-
le ie descriray apres auoir
monstré celle qui est au de-
uant, i'entends l'humeur ai-
gueuse. Tous les anatomistes
sont d'accord qu'il y a trois
humeurs en l'œil, l'aigueuse, la
cristalline, & la vitree. L'ai-
gueuse, autrement blanche, est
ainsi nommée, pource qu'elle
a la consistance d'eau, & est
quasi semblable au blâc d'un
œuf. Nature l'a logee au de-

Descri-
ption de
l'humeur
aigueuse

Pour- quant du crySTALLIN pour luy
quoy seruir de rempart, afin qu'il ne
l'humour fust offensé de la dureté des
aigueuse membranes, & que les pre-
est au de mieres rencôtres des obiects
uant du mieres fussent vn peu arrestees : de
cristal- sorte qu'il semble estre com-
lin. me vn moyen interieur, ap-
portant les images au crystal-
lin. Et tout ainsi que le poul-
mon reçoit le premier abord
de l'air & le red amy du cœur :
ainsi l'humour vitree altere la
lumiere qui vient de dehors,
& la rend familiere à celle de
dedás. ceste humeur sert aussi
pour arrouser le crySTALLIN &
le tenir humide. car estant sec
il ne pourroit receuoir les es-
peces. Elle empesche que les
esprits, qui de leur nature
veulent tousiours gagner le
haut & le dehors, ne se diffi-
pent, leur estant opposé com-

du moyen de la conseruer. 44
 me vne barriere. Elle separe
 l'vue du crystallin, & tient la
 cornee tousiours tendue, la-
 quelle venant à se flectir ou
 s'affaïsser nous feroit perdre
 la veüe. Ayant donc toutes
 ces perfectiõs, il n'est pas vray
 semblable qu'elle soit vn ex-
 crement du crystallin, com-
 me a voulu le prince des Ara-
 bes Auicène. Je croy que c'est
 vne partie spermatique en-
 gendree aussi tost que le cry-
 stallin, qui a sa quantité limi-
 tee, son siege arresté, & est se-
 parée du crystallin par deux
 membranes, ioint qu'estant
 vne fois perdue ne se restau-
 re iamais, & nous fait perdre
 la veüe.

L'hu-
 meur ai-
 genfe est
 vraye-
 ment
 partie.

L'humeur crystalline fuit
 apres, qui est luisante & gla-
 cee cõme vn crystal bien net:
 c'est le miroir de l'ame, où se

Descri-
 ption du
 crystal-
 lin.

fait la reception des images,
& l'vnion des deux lumieres.
on pense que l'vsage des lun-
nettes soit venu du crystallin,
pource que le mettant sur vn
papier escrit, il fait paroistre
la lettre deux fois plus grosse
qu'elle n'est. Sa substance est
aiguese, mais elle ne flotte pas
comme des autres; elle est fixe
afin que les images s'y puis-
sent arrester; diaphane & plei-
ne de lumiere, afin qu'elle eust
quelque similitude avec son
obiet qui est lumineux; sans
couleur, afin qu'elle les peust
toutes receuoir indifferem-
ment; car si le crystallin estoit
teint ou de vert, ou de rouge,
ou de iaune, tous les obietts
paroistroient de mesme cou-
leur. Il faut icy admirer la
prouidence de nature, qui n'a
point voulu que le crystallin

La sub-
stance du
crystal-
lin.

Pour-
quoy le
crystal-
lin ne se
nourrit
du sang

Et du moyen de la conseruer. 45
 fust nourry de sang comme
 les autres parties du corps, de
 peur que le sang ne le rougist,
 mais luy a donné l'humour
 vitree qui le luy blanchit, &
 luy sert de cuisinier. Sa figure La figure
 est ronde, mais non du tout re.
 spherique; on la trouuera ap-
 platie des deux costez com-
 me vne lentille ou vn palet,
 c'est pourquoy les Grecs l'ont
 appellé φακοειδὴ, καὶ διοφοειδὴ.
 Je croy qu'il a eu ceste forme
 afin qu'il demeurast plus fer-
 me, & que aux mouuemens
 violens de l'œil il ne fortist de
 sa place. car les corps exacte-
 ment ronds se meuuent quasi
 d'eux-mesmes, & n'ont point
 d'arrest, n'estans appuyez que
 sur vn poinct. Il est situé au Situa-
 milieu de l'œil cōme au cen- tion du
 tre, afin qu'il reçoie egale- crystal-
 ment les deux lumieres : par lin.

De l'excellence de la veüe,
derriere il est couché sur l'humour vitree, & semble quasi nager dessus; pardeuant il a l'aigüse: il est enuëloppé de sa propre tunique qui se nôme aranoïde.

L'humour vitree.

La derniere humeur s'appelle vitree, d'autant qu'elle ressemble & en couleur & en consistance, du verre fondu. Son principal vsage est de preparer l'aliment au crySTALLIN, non pas que le crySTALLIN se nourrisse de sa propre substance, comme Auicenne a creü. car vne partie ne nourrit iamais l'autre, mais elle luy blanchit le sang, & luy sert de cuisinier. Elle deffend aussi le crySTALLIN de la durté des membranes, & retient les esprits.

Sa quantité est beaucoup plus grande que des autres, elle est enuëloppée de sa pro-

Et du moyen de la conseruer. 46
pre tunique, que les anciens
n'ont pas cogneuë.

*Des nerfs, veines, arteres, &
autres parties de l'œil.*

CHAP. IX.

IL y a encores deux paires de nerfs à voir, & quelques autres petites parties. Le premier paire se nomme optique, qui apporte l'esprit animal & la lumiere interieure au crySTALLIN. Ce nerf ne vient point des ventricules anterieurs du cerueau, comme ont voulu les Arabes, ny du milieu de la base; cōme ont creu les Grecs & croyent encores tous les anatomistes de nostre temps; mais de la partie posterieure du cerueau, où le grand & pe-

Le nerf
optique.

Son ori-
gine.

tit cerueau s'vnissent. Ceste obseruatiõ est nouuelle, mais tres-veritable, ie la croy pour l'auoir veüe bien souuët. L'optique donc venant du derriere, & ayant fait plus que de la moitié du chemin, s'vnit avec son compagnon, & ne s'entrecroisent pas comme le vulgaire pense, ny ne se touchent pas seulement en forme de fer de moulin, mais s'entremeslent si bien qu'on ne les sçauroit separer. Ceste vnion estoit necessaire, pour ce que les optiques estoient fort mols, & ayant à trauerser vn long chemin eussent fleschy, & n'eussent iamais apporté droiètement l'esprit, si on ne les eust renforcez par cet embrassement. Il falloit necessairement que ces deux nerfs se rendissent au crystal-

Pour-
quoy les
nerfs
optiques
s'vnissent.

Raison
premiere

Secõde.

lin, & qu'ils fussent situez en mesme plan, autrement la veüe eust esté tousiours deprauee, & l'obicet simple eust tousiours paru double. Or ils ne pouuoient estans si longs & si mols garder ceste egalité, s'ils ne se fussent vnis au milieu.

J'adiousteray vn autre vsage Troisi-
esme. de ceste vnion, qui est pour la perfectiõ de la veüe, afin que l'esprit puisse en vn moment aller d'un œil à l'autre, & que par ce moyen vn œil estant renforcé & plus plein d'esprit, puisse voir de plus loin: Aussi auõs nous accoustumé si nous voulons viser à quelque obiect, de fermer vn des yeux. Les nerfs optiques apres s'estre embrassez se separerent & s'en võt inserer à chaque œil; la partie interieure du nerf qui est moëlleuse se

*Insertiõ
de l'opti-
que.*

dilate & fait la tunique reti-
culaire, l'exterieure fait la cor-
nee & l'vuee. Herophile, Ga-
lien & quasi tous les anato-
mistes ont creu, que ce nerf
estoit caué, mais il est seule-
ment poreux, & n'y voit-on
aucune cauité. L'autre paire
de nerfs s'en va aux muscles
de l'œil, & sert pour le mou-
vement: sa distributiõ est fort
gentille, car il enuoye vn filet
à chaque muscle.

*Les nerfs
du mou-
vement.*

*Les vei-
nes & ar-
teres.*

Il y a plusieurs petites vei-
nes & arteres en l'œil qui luy
apportent la nourriture & la
vie: elles viennent des rameaux
iugulaires & carotides.

*La grais-
se.*

La graisse qui environne
l'œil le tient humide, & em-
pesche qu'il ne flectrit point:
il le deffend aussi du froid, re-
tenant sa chaleur naturelle,
c'est pourquoy l'œil ne fris-

Et du moyen de la conseruer. 43
sonné iamaïs.

Il y a des glandes qui l'arou-
sent, & boiuent aussi, comme
petites esponges, l'humidité
qui tombe ordinairement du
cerueau.

Les glân-
des.

*Comme la veüe se faiët; si c'est par
emission ou par reception.*

CHAP. X.

LE pense auoir assez exa-
ctement descrit l'arti-
fice de l'œil & de toutes ses
parties, voyons maintenant
comme il exerce son action
qui est la veüe, & comment
elle se faiët. Tous les Philo-
sophes sont bien d'accord,
que pour la perfection de la
veüe trois choses sont neces-
saires, l'organe qui est l'œil;
l'obiet, qui est la couleur; &

Trois
choses
necessai-
res pour
la veüe.

le moyē illuminé, qui est l'air, ou l'eau, ou quelque corps diaphane: mais quand ce viēt à ioindre les trois & expliquer le moyē de ceste action, qui est la plus viue & la plus soudaine de toutes les sensibles, ils s'entrebattent, & ne peuuent estre d'accord. Les vns font sortir de l'œil vn rayon, ou vne lumiere qui s'estend iusques à l'obiet, & nous le faiēt voir: les autres font venir l'obiet iusques à l'œil sans qu'il en sorte aucune chose: ceux là tiennēt que la veüe se fait par emission seulement, ceux cy par reception. Platon est ordinairement allegué pour authœur & prince de la premiere secte: vn de ses principaux fondemens est, que l'œil est tout plein de lumiere & de nature de feu,

Platon
tient que
la veüe se
fait par
emissio.

de feu, non pas de celuy qui
brusle & luit tout ensemble,
ny de celuy qui brusle & ne
luit point, mais de celuy qui
luit & ne brusle point, com-
me est le feu celeste. Ce fon-
dement semble estre appuyé
sur quelque apparence de ve-
rité. car l'œil estant frotté,
mesmes aux plus obscures te-
nebres, esclaire quelque rayó;
on voit les yeux de ceux qui
sont en cholere tous flam-
boyans. Pline remarque que
Tibere Cesar par la seule
veüe auoit espouuenté plu-
sieurs soldats, tant elle estoit
viue & pleine de lumiere. A-
ristote fait mention d'un ieu-
ne hôme nommé Antiphon,
qui voyoit tousiours deuant
luy son image par la reflexion
des rayons qui sortoient de
l'œil. Galien raconte qu'un

Fonde-
ment de
cette o-
pinion.

Raisons
pour
prouer
que l'œil
est de na-
ture de
feu.

foldat deuenant peu à peu
aueugle, sentoit tous les iours
sortir de ses yeux cōme vne
lumiere qui l'abandonnoit: &
la nuit ne voyons nous pas
reluire l'œil du chat, du loup,
& de plusieurs autres ani-
maux? D'auantage ceste pro-
ptitude & agilité quasi in-
croyable de l'œil, son action
qui se fait en vn moment, &
sans mouuement local, la fi-
gure pyramidale, tesmoignēt
bien que sa nature est subtile
& pleine de feu: l'œil ne fris-
sonne iamais combien qu'il
soit exposé au froid, pource
qu'il est tout plein de flamme.
En fin l'organe doibt auoir
quelque analogie avec son
obiet, l'obiet de la veüe est
la couleur, que les anciēns ont
definy vne flamme sortāt des
corps; il faut donc que l'orga-

du moyen de la conseruer. 30
ne soit de mesme nature. Si
cela est (i'entens que l'œil soit
tout plein de flamme & de
rayons estincelans) il faudra
croire que la veüe se fait par
emission. C'est aussi la plus
commune opinion, qui a esté
suyuie de plusieurs grâds per-
sonnages; comme de Pytha-
gore, d'Empedocle, Hippar-
que, Democrite, Leucippe,
Epicure, Chrysippe, Platô, &
quasi de tous les optiques.
Voicy leurs principales rai-
sons.

Le Basilic infecte de sa veüe
tous ceux qui le regardent: la
femme ayant ses purgations
naturelles teint le miroir sur
lequel elle iette ses yeux; on
dit que si le Loup apperçoit
quelqu'un le premier, il le fait
deuenir rauque. Les anciens
ont pensé qu'on pouuoit en-

Raisons
pour
prouuer
que la
veüe se
fait par
emissio.
Pre-
miere.

De l'excellence de la veüe,
forceler & charmer par la
veüe, & le Poëte s'en plaint:

*Je ne scay pas quel œil charme
mes aigneaux tendres.*

Si tu t'approches d'un o-
phthalmique, & regardes attē-
tiuement celuy qui a les yeux
rouges, sans doute tu pren-
dras le mesme mal; Tout cela
môstre bien qu'il sort de l'œil
quelque chose. Pourquoi est-
ce qu'une grande blancheur
nuit à la veüe, sinon pource
qu'elle dissipe les esprits qui
sortent de l'œil? Pourquoi
l'œil s'affoiblit en voyant, si-
non pource qu'il en sort trop
de lumiere, & que tous les
espris s'esuanouyssent? Pour-
quoy est-ce que ceux qui
veulent voir de bien loin un
obicet fort petit, reserrent
les yeux & ferment à demy
les paupieres? N'est-ce pas

Secōde.

Troisié-
me.

Qua-
triésme.

pour vnir les rayons & ioin-
dre les esprits, afin qu'on les
puisse plus viuement & plus
droictemēt esclācer? Les chats
ne vōt-ils pas la nuit à la chaf- Cin-
se? ils dardent donc quelque quiesme
rayon. Dauantage, si la veüe
ne se fait par emission, il ne se- Sixième
ra pas nécessaire que l'œil se
tourne vers son obiect, l'espe-
ce viendra assez à nous, nous
verrons en ne voyant pas. Si
nous voyons seulement en re- Septi-
ceuant, les gros yeux verront esme.
mieux que les petits, pource
qu'ils reçoieēt mieux, les pru-
nelles larges seront les meil-
leures, ce qui est du tout con-
traire à la verité: vn petit ob-
iect sera aussi tost veu que vn
grand, on verra aussi bien de
loin que de pres si les especes
sont toutes par l'air. Regarde Huieti-
(disent les optiques) vne peti- esme.

De l'excellence de la veüe,

te aiguille qui aye la pointe dressée en haut, tu ne verras pas du premeir iect d'œil ceste pointe, mais ayant tourné l'œil de costé & d'autre tu la verras, pource que quelque rayon sortant de l'œil l'aura rencontrée: tout de mesme en est-il d'un petit obiect qui sera en terre, on ne le sçauroit voir du premier coup. En fin si la veüe se faisoit par reception, l'œil receuroit en mesme tēps deux contraires, qui est contre les loix de nature, & ne pourroit estāt si petit recevoir la grandeur, ny la figure des grandes mōtagnes: il faut dōc que la veüe se face par emission. Voila toutes les plus belles forces de ce party que ie viens de mettre en campagne: voyons maintenant les esquadrons du party contraire: Ari-

stote en est le chef, qui est
suiuy de toute la bande Peri-
patetique, d'Auerroës, Alexā-
dre, Themistius, & d'une infi-
nité d'autres. Ils tiennent tous
que la veüe se fait par rece-
ption, c'est à dire qu'il ne sort
rien de l'œil qui serue pour la
veüe, mais que l'obiet ou son
espece viennent à l'œil. Leur
fondement est du tout con-
traire à celuy des Platoniciēs:
car Platon croit que l'œil est
tout plein de flamme, & Ari-
stote soustiēt que l'œil est tout
plein d'eau, sa demonstration
est tresbelle, mais ie la veux
esclaircir. L'instrument de la
veüe doit estre diaphane, c'est
à dire transparent, afin qu'il y
ait similitude entre l'obiet &
l'organe, & qu'il y ait propor-
tion de l'agent au patient. Ce-
ste maxime est toute resoluē

Cōtrai-
re opi-
nion de
ceux qui
tiennent
que la
veüe se
fait par
receptiō

Que
l'œil est
tout
d'eau,
belle
demon-
stration.

De l'excellence de la veüe,

en la philosophie naturelle. Or des corps diaphanes les vns sont iutbils & rares, les autres denses. L'œil ne doit point estre diaphane & rare, car il ne retiendrait point les especes, elles s'escouleroient & n'auroient point d'arrest, comme les especes qui sont par l'air: & le verre mesme des miroirs ne peut retenir les images, si on ne met de l'acier, ou du plomb au derriere; il doit donc estre diaphane & dense. Or il n'y a point d'Element qui soit diaphane & dense que l'eau, car l'air & le feu sont diaphanes & rares: il s'ensuit donc que l'œil est de nature d'eau. Ceste demonstration est renforcee par vne autre qui n'endure point de repliche. La partie principale de l'œil est l'humeur crystalline, qui n'est autre chose

Autre de
mōstra-
tion.

qu'une eau glaccée, laquelle a
au deuant l'humour aigueuse,
& au derriere la vitree qui le
nourrit : si tu creues vn œil tu
n'en verras sortir que de l'eau,
il faut dōc croire que l'œil est
de nature d'eau, plustost que
de feu. Ce fondement estant
ietté, il sera aisé d'asseurer tout
le reste du bastiment, & sou-
stenir que la veüe se fait par
reception; pource que le pro-
pre de l'humide est de rece-
voir. Voicy les principales rai-
sons de ceste secte. Tout senti-
ment est vne passion, & sentir
n'est autre chose que patir; Raisons
pour mō-
strer que
la veüe
se fait
par rece-
ption.
Tout sentiment donc se fera Pre-
miere.
par receptiō, & non par emis-
sion qui est vne action; ainsi
l'ouye se fait par receptiō des
sons, l'odorat par reception
des odeurs, le goust reçoit les
saueurs, l'attouchement les

De l'excellence de la veüe,

Secõde.

qualitez traictables: & pourquoy denierons nous ceste reception à l'œil? Ceux (dit Aristote) qui ont les yeux fort humides, voyent les obiects plus grans qu'ils ne sont, qui monstre bien que les images se reçoient & grauent au crySTALLIN. car les corps paroissent tousiours plus grãds dãs l'eau.

Troisième.

Tout excellent obiect destruit le sens, comme vne grande blancheur esblouit la veüe: il y est donc receu avec violence.

Quatrième.

Aristote fait vne demande en ses problemes qui peut seruir icy: pourquoy la main droicte est ordinairement plus agile & plus forte que la gauche, & l'œil droict ne voit pas mieux que le gauche, ny vne oreille n'oit pas mieux que l'autre? Il respond que la puissance, qui faict mouuoir les

maines, s'exerce par vne actiō,
& celle qui fait voir & ouyr,
par passion : de sorte que les
deux yeux & les oreilles peu-
uent patir & receuoir egale-
mēt. Les vieillards ordinaire-
ment voyēt mieux les obiects
esloignez que ceux qui leur
sōt plus proches. Cela ne peut
venir des rayons ou de la lu-
miere qui sort de leurs yeux,
pource qu'elle est fort petite
& obscure; la cause doit estre
rapportee à l'espece, laquelle
venant d'un obiect plus esloi-
gné se rēd plus spirituelle, plus
subtile, moins materielle, &
par consequent plus propre
pour la reception.

Cinqui-
esme.

En hyuer si le temps est cal-
me & serain on voit bien sou-
uent en plain iour les estoilles;
ce qui n'arriue iamais en Esté;
pource qu'en hyuer l'air estant

Sixies-
me.

De l'excellence de la veüe,

plus grossier & plus dense les especes se terminent en l'air & sy multipliét; mais en esté pour la rarité & tenuité de l'air les especes n'ont point d'arrest & ne se peuuent multiplier: qui monstre bien que la veüe se faiët par reception & non par emission. En fin l'œil est comme le miroir qui reçoit toutes les images qu'on luy presente, sans qu'il enuoye rien du sien à l'obiet. Ils different seulement en vne chose, c'est que le miroir n'a pas ceste puissance de renuoyer l'espece à son iuge, comme fait l'œil au sens commun par le nerf optique. Voila les deux partis formellement bandez & opposez l'un à l'autre, ie voudrois les pouuoir accorder, comme a voulu faire Galien, mais il n'y a point d'apparence: car la ve-

Septies-
me.

rité ne peut soustenir deux cō-
traires. Je me rangeray donc
du costé des plus forts, & sou-
stiendray avec Aristote que la
veüe se fait par reception seu-
lement, & qu'il ne sort rien de
l'œil qui puisse seruir à la veüe.
L'employeray pour la premie-
re attaque ceste raison qui me
semble assez poignante. S'il
fort quelque chose de l'œil, ou
c'est vn corps bien subtil cō-
me est l'esprit animal, ou vn
rayon seulement. Si c'est vn
corps, comment peut-il en vn
momēt estre porté iusques au
ciel, veu q̄ tout corps se meut
avec le temps, & la veüe se fait
en vn instant? Ce corps ne se-
ra-il point batu, dissipé, & baf-
foué des vents auant qu'il ar-
riue à l'object? Ce corps qui
sortira de l'œil, ou il penetrera
l'air, ou l'air luy fera place; de

Opinion
de l'au-
theur.

Belle de-
mōstra-
tion cō-
tre les
Platoni-
ciens.

De l'excellence de la veüe,

penetrer il ne peut : car la nature n'endure non plus la penetration des corps que le vuide ; si l'air luy fait place, la veüe ne se fera iamais : car la continuation des rayons sera empeschée, d'autant que l'air le suiura tousiours, & se mettra entre deux. Si pour euitter ces pointes qui sont assez vives, tu dis que ce qui sort de l'œil est vn rayon, ou vne lumiere qui penetre l'air & se cōmunique en vn instāt partout le moyen comme la lumiere du Soleil, qui illumine tout l'air sans mouuement; ie te preferay de plus pres, & te feray voir qu'il n'y a pas assez de lumiere dans l'œil pour s'estendre iusques au ciel. Regarde comme vn flambeau ne iette ses rayons qu'à vne distance proportionnelle, vne chan-

Ce qui
sort de
l'œil ne
peut
estre
rayon.

delle ne peut esclairer toute vne sale, & comme veux-tu que ce petit organe enuoye en vn moment son rayon iusqu'au ciel? Il est aisé au Soleil, qui est aussi grand que toute la terre, de ietter ses rayons & les respandre par l'Vniuers, mais à l'œil, non. Il ne peut donc rien sortir de l'œil, qui aille iusques à l'obiet. D'auantage si les rayons qui sortent de l'œil sont cause de la veüe, il faut ou qu'ils retournēt vers l'œil, ou qu'ils demeurent en chemin; s'ils ne reuienēt, ils ne rapporteront pas l'espece de ce qu'ils touchēt; s'ils retournent il n'y aura que les corps polis qui se puissent voir, pource qu'il ny a que ceux la qui fassent reflexiō, & par ce moyē vne grāde montaigne ne se verra point. Disōs encore que si ces rayōs

De l'excellence de la veüe,

seruët à la veüe il faut ou qu'ils reuiennent vuides, ou qu'ils soiët chargez d'especes; s'ils s'ë retournët vuides, la veüe ne se fera pas; s'ils rapportët les especes à l'œil nous aurôs ce que nous demandôs, c'est à dire q la veüe se fera par reception.

Les fon-
demens
des Pla-
toniciës

Quât aux fondemens des Platoniciens, il est aisë de les renuerfer. ie confesse que l'œil a beaucoup de clairté, mais ceste lumiere ne viët pas du feu, elle vient de la clairté du crystalin & de la poliffure des tuniques. car tous les corps qui sont polis cōme la corne lui-sent aux tenebres. l'actiō de l'œil qui est si soudaine, & son agilité grande, ne nous forceront pas de croire qu'il soit plein de feu. car ceste actiō est soudaine, pource que l'œil ne reçoit que les especes imma-

terielles & sans corps. Pour le regard de l'agilité, il n'est pas mal aisé à six cordes de mouuoir prôptemēt vn si petit organe. Les yeux ne frissonnent iamais, pource (dit Aristote en ses Problemes) qu'ils sōt pleins de graisse qui les eschauffe par accidēt comme nos robes, ou pource qu'ils sōt en perpetuel mouuemēt. Il n'y a dōc point de feu dās l'œil, on n'y trouue rien que de l'eau, du crystal & du verre. Quāt aux raisons qu'ils alleguēt, elles sont fort legeres. Le basilic, & l'ophtalmique ne nous infectent pas par les rayons qui sortent de l'œil, mais par vn corps naturel bien subtil, par vne vapeur qui sort de tout le corps insensiblement, & infectāt l'air est apportee iusques à nous. Ce qu'o

Respōce
aux rai-
sons des
Platoni-
ciens.
A la pre-
miere.

A la se-
conde.

De l'excellence de la veüe,

Pour le charme de l'œil, nous tenõs qu'il ne se peut faire naturellement. Vne grâde blancheur dissipe la veüe, pour ce qu'elle attire tous les esprits en dehors, qui doiuent demeurer dâs l'œil pour le cõtenir en sõ deuoir. L'œil s'affoiblit & se lasse en voyât, cõme fait toute autre partie, pource que la chaleur se dissipe avec les esprits qui trauaillët au mouuement de l'œil & à le tenir ferme. Nous fermõs l'œil à demy si nous voulons voir de plus loin, non pas pour vñir les rayõs, mais afin que la lumiere exterieure n'entre soudainement, & ne dissipe l'interieure. L'œil se doit tourner vers l'object, pource que la veüe ne se fait que par droicte ligne. Les gros yeux & les prunelles dilatées ne voyët pas si bien, pour.

A la troi
siesme.

A la qua
triesme.

A la cin
quiesme

A la fixi
esme.

ce que les esprits interieurs se perdent, qui sont necessaires pour la reception. Pour le regard de l'aiguille, ie dis que du premier coup on ne voit pas la pointe, pource que l'obiet n'est pas proportionné. La reception de deux contraires & des plus grandes montagnes se fait à l'œil, pource que l'œil ne reçoit que l'espece qui est immaterielle. Que rien donc ne nous empesche à conclure que la veüe se fait par reception. Mais le moyen de ceste reception est tres-difficile & entēdu de fort peu de gens: ie m'en vai donc pour l'esclaircir, rechercher, qu'est-ce que l'œil reçoit; en quelle partie se fait la reception, quand elle se fait, & comment. Pour le premier poinct ie trouue des opinions fort differentes. Demo-

A la septiesme.

A la huitiesme & neuuesme.

Le moyen de la reception esclairci.

Qu'est-
ce que
l'œil re-
çoit.

crite & Leucippe croient que nous receuõs des atomes; Epicure pense que ce sont seulement les rayõs de l'obiet, Alexandre Peripateticien l'image de l'obiet, non pas cõme au subject, mais cõme en vn miroir. Aristote soustiët que nous ne receuõs que l'espece qui est produite de l'obiet & se multiplie par l'air, comme l'ombre est produite du corps & la lumiere du Soleil. Ceste opiniõ est la plus veritable, mais elle a

Nous ne
receuõs
que l'es-
pece.

besoin d'interpretatiõ, car vn chacun n'est pas capable du premier coup, de sçauoir que c'est de l'espece de l'obiet. Disons donc que ceste espece n'a point son estre en l'entendement, & n'est pas ce qu'en termes scholastiques on appelle *ens rationis*, c'est quelque chose realemēt qui est en l'air

& en l'organe . Or tout ce qui ^{que c'est}
est realemēt se doit rapporter ^{que l'es-}
ou à la substāce ou à l'accidēt. ^{pece de} l'obiet.

Ceste espee ne peut estre substance , pource qu'elle seroit plus noble & plus parfaicte que son obiet qui est la couleur . C'est donc vn accident . Mais quel ? l'appellerons nous quantité ? non , car il y auroit penetration des dimensions : nous ne l'oserions nommer relation , d'autant que la relation n'a point de force d'agir , & ceste espee nous fait voir . Encore moins la reduirons nous à l'action ; Il faut donc que ce soit vne qualité immaterielle , indiuisible , sans corps , que les Philosophes appellent intentionnelle , qui se rapporte à l'obiet , & en est immédiatement produite , comme l'ombre du corps . Ceste espee se

De l'excellence de la veüe,

multiplie par tout l'air; car l'air estant subtil & humide est capable de receuoir toutes les formes: & receuant vne partie de l'espece represente l'object entier. Ceste espece ne se voit pas, mais elle nous fait voir; il n'y a que l'object qui se voye.

Questiõ.

Quelqu'un pourra demander; si ceste espece est immaterielle comment altere elle la veüe en vnissant ou dissipant les esprits? car la blancheur dissipe la veüe, & la noirceur l'vnit. Je respondray que ceste alteration ne vient pas de l'espece, mais de la lumiere qui sort des couleurs. Or il est tout certain

Resposẽ

qu'une grande lumiere dissipe la veüe, pource que nos esprits qui sont tous subtils & lumineux, sortent pour se ioincre à ceste lumiere exterieure; au contraire voyant les tenebres

& vne couleur noire, se retirét
fuyans leur ennemy. Il n'y a
donc que l'espece immateriel-
le qui soit receuë, c'est pour-
quoy la veüe se fait à l'instant,
& nō point avec temps, cōme
les autres sens. Voions main-
tenant en quel lieu, c'est à di-
re en quelle partie de l'œil se
fait la reception. Il y en a qui
pésent que la reception se fait
au cerueau, pource que c'est le
siege du sens commun, & que
tout le sentimēt vient du cer-
ueau. Auicenne croit que la
reception se fait à l'vnion des
optiques, & que l'object ne
paroist point double, pource
que les especes s'vnissent en
cet embrassement de nerfs: les
autres veulent qu'elle se face à
la tunique aranoïde, qui est
plus nette & plus polie qu'un
miroir. Nous tenons avec Ari.

En quel-
le partie
de l'œil
se fait la
receptiō

stote, Galien & la verité mesmes, que la reception se fait au crySTALLIN, pource que c'est la plus noble partie de l'œil, ayant vne substance toute particuliere, estant situé au milieu de l'organe comme au centre; où se vont rēcontrer les deux lumieres, l'exterieure, qui entre par la prunelle comme par vne fenestre, & l'interieure qui est apportee par le nerf optique. Toutesfois si tu veux accorder toutes ces opinions, tu pourras dire que la reception se fait au crySTALLIN, la refraction aux tunique, la perfection en ceste conjunction des optiques, la cognoissance ou iugement dans la substance du cerueau. De tout celōg discours nous rapporterons, que la veüe se fait par receptiō seulemēt & non par emission, que le

*Vray
moyen
cōme la
veüe se
fait.*

Et du moyen de la conseruer. 61
que le crytalin (principal in-
strument de la veüe) ne reçoit
que les especes, lesquelles sont
côme ombres des objects vi-
sibles, que ces especes estant
produites & multiplies par
tout l'air, sont en vn instant
receuës par droite ligne, & nō
autrement. Je suis esté cōtraint
d'adiouster ceste dispute en ce
petit traicté de l'œil, en ayant
esté fort sollicité, & en ayant
reçu vn commandement ex-
pres.

*En combien de façons la veüe
peut estre offensee.*

CHAP. XI.

TOVR le discours que
ie vié de faire de l'ex-
cellence de la veüe, de
l'artifice de l'œil, & de toutes

ses parties, outre le plaisir qu'il apportera aux plus curieux, ne fera pas (à mon aduis) inutile à ceux qui auront enuie de cognoistre les maladies de l'œil, & qui voudront entreprendre de les guarir. Car nous tenons pour maxime en la Medecine, qu'on ne peut cognoistre ce qui arriue contre nature à la partie, si on ne sçait premiere-ment ce qui luy est naturel. Le droit (dit Aristote au premier liure de l'ame) sert comme de reigle & à soy-mesme, & à l'o-blique. Il faut donc que le Me-decin cognoisse le naturel de l'œil, & ce qui est requis pour son action s'il veut sçauoir en combien de façons elle peut estre bleffee. Toute action (cō-mé remarque Galien en plu-sieurs endroits) peut estre of-fensee en trois façons, ou elle

En com-
bien de
façons
vne ac-
tiō peut
estre of-
fensee.

se perd du tout, ou se diminue bien fort, ou s'abastardit & depraue. Ces trois vices peuuent arriuer à la veüe ; la diminutiõ ou affoiblissement est ordinaire aux vieilles gens, la deprauation se fait, lors que l'object paroist autre qu'il n'est, la perte totale se nomme auement. La veüe s'affoiblit, ou par le vice de la faculté, ou par la mauuaise disposition de l'organe. La faculté, qui est ceste puissance de l'ame qui nous fait voir, a son siege dās le cerueau: Si doncques le cerueau est alteré en sa temperature, comme quād il est trop froid, chaud, humide & sec; ou que sa conformation ne soit loüable, tous les sens sentirõt vne diminution notable en leur actiõ, & sur tout la veüe, pour ce que l'œil estant le plus pro-

Cōment
la veüe
s'affoi-
blit.

cha, & ayant vne merueilleuse sympathie avec le cerueau en patira le premier. La mauuaise disposition de l'œil affoiblit bien souuent la veüe, encores que la faculté soit entiere. Ceste disposition se trouue quelque fois en tout l'œil, comme quand il est trop gros, ou trop amaigry, quelque fois à vne de ses parties, comme aux tuniques, humeurs, muscles, esprits, nerfs, veines, & arteres, à chacune desquelles arriuent leurs maladies particulieres, que ie deduiray au chapitre suiuant.

La deprauation de la veüe.

La deprauation de la veüe se fait quand l'object se presente d'autre couleur, forme, quâtité, ou situatiō qu'il n'est; comme quād ce qui est blanc paroist iaune ou rouge, pour ce que l'organe est taint de

quelque couleur; ainsi les iâe-
riques voyent tous les objets
iaunes; quand ce qui est fixe
semble se mouuoir, comme
aux vertiges, pour le mouue-
ment desreiglé & extraordi-
naire des esprits, quand vn
objet simple paroist double.
Or cela arriue ou par le vice
de l'organe, ou par la mauuai-
se situation de l'objet, ou des
rayõs. Si les deux yeux ne sõt
en mesme plâ: que l'vn se hauf-
se & l'autre s'abaisse, indubita-
blement tous les objets pa-
roistront doubles: la paralyfie
& conuulsion en est souuent
la cause. Le nerf optique aussi
estât relasché & mollifié d'vn
costé, represente tous les ob-
jets doubles, comme il arriue
à ceux qui sont yures. Si tu
presses vn œil avec le doigt
sans toucher l'autre, tu verras

De l'excellence de la veüe,

tous les corps doubles. La situation donc de l'organe est la premiere cause de ceste deprauation. La seconde est la situatiõ de l'object. Si tu meus vn baston, en rond tu iugeras que c'est vn cercle, si en long: vne ligne toute continuë; cela arriue pource que l'object change si prõptement de place qu'auant que la premiere image soit effacee, l'autre se met en son lieu. La derniere cause se rapporte à la situation differëte des rayõs; si tu te mires en vn miroir fendu, ton image te paroistra double.

La priuation de la veüe.

La perte & priuation totale de la veüe, que nous appellõs aucuglement, vient ou de la secheresse des humeurs, ou de l'empeschement des deux lumieres, qui ne se peuuent rencõtrer & ioindre au crystallin.

du moyen de la conseruer. 64

L'interieure, qui est l'esprit animal, est empeschée par l'opilation du nerf optique, & se nomme goutte serene; l'exterieure est empeschée par la catarachte, qui ferme la prunelle, fenestre du crystalin. La veüe donc ne peut estre offensee qu'en ces trois façons.

*Brief denombrement de toutes les
maladies de l'œil.*

CHAP. XII.

IE ne veux pas m'amuser icy à faire vne description exacte de toutes les maladies de l'œil, l'entreprinse seroit trop grâde, il me faudroit pour le moins cent chapitres, car il y a bien autant de maladies particulieres de l'œil: ie me contenteray de tracer vne

methode pour les plus nou-
ueaux Medecins & Chirur-
giés, ausq̃ls ie delie ce chapitre

Diuision
des mala-
dies de
l'œil.

Or donques, des maladies
de l'œil, les vnes sont commu-
nes à tout l'organe, les autres
sont propres à chaque partie.

Celles qui se rapportēt à tout
l'œil, sont ou similaires, ou or-
ganiques, ou communes. Les

maladies
qui se
rappor-
tent à
tout
l'œil.

similaires sont l'intéperatute
humide, seche, chaude, froide,
simple, cōposée, sans matiere
& avec matiere. Les organi-
ques paroissent en la mauuaise
conformation, comme en la
grandeur augmētee, ou dimi-

La gros-
seur de
l'œil.

nuée, & en la situation. Mala-
dies en grandeur sont quand
l'œil est trop gros, ou trop pe-
tit; le gros se nomme œil de
bœuf, il nuist à l'actiō de l'œil,
car la veüe n'en est pas si viue,
pour la dissipation trop gran-

Et du moyen de la conseruer. 65
de des esprits, & le mouuement
n'en est pas si prompt. Ceste
grosseur vient ou du vice de la
premiere conformation, ou
par accident, comme d'une
tumeur œdemateuse d'une in-
flammation & d'une fort grã-
de defluxion. La maladie con-
traire à ceste-cy est la petite-
se de l'œil qui vient ou de na-
ture, & s'appelle commune-
ment œil de cochon, ou par
quelque accident, comme par
la dissipation de la chaleur na-
turelle, que les douleurs ex-
tremes, les grandes veilles, les
defluxions acres, & fieures
continuës ont causé : de sorte
que tout l'œil estant affoibly
n'attire plus l'alimēt, & encore
qu'il y aborde ne le peut cuire;
on appelle ceste maladie atro-
phie, ou extenuatiō de l'œil.

La petite-
tesse.

Maladie en situation est,

De l'excellence de la veüe,

L'œil for-
jetté.

quand l'œil est hors de sa place, comme quand il sort dehors, & quand il tombe tout en bas; s'il sort dehors, c'est vn œil forjetté, en Grec se nomme *ἐκπίεσις*. Auicéne remarque que cela arriue ou de cause externe comme de coup, cheute, effort, en toussant, vomissant, soufflant; ou de cause interne, comme d'une soudaine fluxion qui lasche tous les muscles & tout le corps de l'œil, d'une grande inflammation ou autre tumeur.

Solutiō
de cōti-
nuité.

Maladie commune est la solution de continuité, qui paroist lors que l'œil est du tout creué, ou que toutes les humeurs sont cōfuses & brouillees ensemble.

Voila les maladies qu'on peut rapporter à tout le corps de l'œil, car *lenyglalopia*, *myo*.

Et du moyen de la conseruer. 66
piasis, & amblyopia, sont sym-
ptomes des esprits & humeurs,
& non de tout l'œil.

Les maladies partitulières maladies
particu-
lières de
l'œil.
sont differente, selon les par-
ties de l'œil. Or à l'œil nous
auons remarqué les humeurs,
les tuniques, les nerfs, les mus-
cles: il y aura donc des mala-
dies propres à chasque partie;
Je cōmenceray à descrire cel-
les des humeurs, cōme estans
les plus nobles parties de
l'œil, & mesmes que Galien
au liure des causes d es sym-
ptomes a suiuy ceste me-
thode.

L'humeur cristalline peut en- Maladie
du crysta-
lin.
durer toute sorte de maladie,
mais les plus remarquables
sont l'intēperature seiche, &
quand il sort de sa place L'in-
temperature seiche est cause
d'un accident que les Grecs

Le glau-
coma.

nomment *γλαύкома*, qui est
vne concretion & seicheresse
du crystallin deuenant com-
me blanc. Hippocrate au troi-
sieme des Aphorismes re-
marque, que ceste maladie
n'arrive gueres qu'aux vieilles
gens, nous la tenons pour in-
curable. Le crystalin peut sor-
tir de sa place en plusieurs fa-
çons, car ou il se tourne vers les
costez, ou il se hausse & abais-
se, ou il s'enfonce trop en de-
dans, ou s'aduance trop en de-
hors: En quelq façõ qu'il bou-
ge, il nuist bien fort à la veüe:
s'il est trop enfoncé, il ne peut
voir de pres; s'il est trop ad-
uancé, il ne peut voir de loin;
s'il est tourne à droict ou à
gauche, tous les obiects pa-
roissent de costé, s'il se hausse
ou s'abaisse, tous les images se
representét doubles, pource

Ce qu'ar-
riue quã-
le crystal-
lin sort
de la
place.

qu'ils ne sont pas en mesme plan.

L'humeur aqueuse estant maladies
de l'hu-
meur ai-
gueuse. aussi bié partie que les autres, a ses maladies particulieres. Si elle est trop desseichée, comme il arriue bien souuent aux suffusions, nous priue totalement de la veüe: si sa quantité est fort diminuée, le crystallin se tarist, l'vuee se flectrit, la corne s'affaïsle, la lumiere extérieure n'est point rabbatuë. Quant à l'humeur vitree les auteurs n'en ont point remarqué de maladies particulieres, mais ie pense qu'elle peut endurer mesmes affections en sa température, substance & quantité que l'aqueuse.

Les tuniques de l'œil sont Mala-
dies des
tuniques six, mais il n'y en a que trois ausquelles on aye obserué de maladies particulieres, ce sont

De l'excellence de la veüe,
la conionctiue, la cornee, &
l'vuee, car à l'aranoïde reticu-
laire & vitree on n'en remar-
que point.

Maladies
de la cō-
ionctiue

Les maladies propres de la
cōionctiue sont trois, l'ophtal-
mie, l'ongle appellee *pterygium*,
& la meurtrisseure : l'ophtal-
mie est vne inflammation du

Ophtal-
mie.

blanc de l'œil, laquelle par fois
est si legere que d'elle mesme
se guarit, les Grecs la nommēt
τὸ ἐγξίς. Sa cause est le plus sou-
uēt externe, comme la fumee,
le vent, le Soleil, la poudre, le
ferain, l'odeur des oignons; Si
ceste inflammation est plus grā-
de, se nomme absolument oph-
thalmie : si elle est extreme, de
sorte que le blanc paroisse fort
haut, & la prunelle en soit
pressee, on l'appelle *χμωσις*. Il
y a des opthalmies bilieuses,
sangunes, pituiteuse, melan-

Différé-
ces
d'ophtal-
mie.

choliques: il y en a dans Galien de seiches & d'humides, dans Hippocrate de symptomaticques & de critiques, dans Tralien de tabides & non tabides, de malignes qui regnēt en temps de peste, & non malignes, de continües & de periodiques. L'autre maladie se nōme *pterygium*. C'est vne chair L'ongle. nerueuse qui commence ordinairement au grand coin, & s'estend comme vne aïlle iusques à la prunelle, elle a aussi la forme d'vne ongle. Elle suit bien souuent les ophtalmies mal guaries, & est accompagnée d'un prurit, d'une petite rougeur, & de l'armee. Il y en Differēces de l'ongle. a plusieurs differences, lesquelles nous tirons de leur couleur, cōnexion, substance, & quantité. Pour raison de la couleur, il y en a de blanches,

De l'excellence de la veüe,

de rouges, de iaunaſtres : de la connexion les vnes ſont fort adherentes, les autres ſe ſeparent aiſement ; Si nous regardons la ſubſtance, il y en a d'eſpaſſes & de plus tenues, de molles & de dures, de membraneuſes, qui ſont comme peaux, d'adipeuſes, qui reſſemblent à la graiſſe, & variqueuſes, qui ſont comme vn ret tiſſu de pluſieurs petites veines & arteres . La quantité fait la derniere difference, il y en a de petites qui ne paſſent pas le blanc de l'œil, il y en a de grandes qui s'eſtendent iuſques à la prunelle, & nuient biē fort à la veüe. La derniere maladie de la conionctiue ſe nomme *Πορφύρα*, noirceur ou meurtriſſure de l'œil : Paul & Aëce la definirent vne rupture des veines de l'œil, qui fait

La meur
triſſure
du blanc.

que le sang se respand par toute la conionctiue, & par la cornee aussi, representant à l'œil tous les obiects rouges. Sa cause est ordinairement externe, coup, ou cheute, quelque fois interne, comme repletion des vaisseaux & tenuité de sang. Il y a d'autres maladies de la tunique blanche: comme les pustules, les taches blanches en forme de cicatrice, mais elles sont communes à la cornee.

Les maladies de la cornee sont pustules, vlcères commu-
nes, malignes & chancreuses, la sanie retenue dite *ἑρπύλλον*,
la cicatrice, la rupture. Les
pustules sont dites *φλύκταινα*
des Grecs, des Arabes *Rothor*.
Ce sont cōme petites vessies
causees d'une humeur subtile
& sereuse, qui se met entre les

Maladies de la cornee.

Pustules.

Differē-
ce des
pustules.

escorces de la cornee & les
estéd. On prend leur differen-
ce de la couleur: il y en a de
noires qui sont entre la pre-
miere & seconde peau, & de
plus blanches qui sont entre
la troisieme & quatrieme; De
la situation les vnes sont plus
superficielles, les autres pro-
fondes: de la matiere, les vnes
se font d'humeur bilieuse, les
autres d'une eau claire & sub-

Vlcères
commu-
nes de la
cornee.

tile. Ces pustules estans per-
cees, si la sanie sejourne lon-
guement, fait vn vlcere en
la cornee. Les Medecins
Grecs & Arabes font sept es-
peces de ces vlceres, trois in-
ternes & quatres externes: la
premiere des internes s'appel-
le *βότρυς*, dans Paule & dans
Auicenne *annulus*, des autres
fossula; c'est vne vlcere caue,
estroitte, petite, & sans ordu-

Trois in-
ternes.

re : la seconde est plus large & moins profonde, Paulus l'appelle *κοίλωμα*, Auicenne *lilimie* : la troisieme est fort sordide, & avec crouste: les Grecs la nomment *ὀπίχρυμα*, les Arabes *al-*
ficume. Les vlceres externes Quatre
externes. sont quatre: la premiere ressemblable à vne fumee espaisse, & noircit la prunelle, on l'appelle *ἄκλυσ* : la seconde est plus blanche & plus profonde, & s'appelle *νεφέλιον* : la troisieme est ronde, & paroist au cercle de l'œil, c'est *ἀργεμον* de Paule: la derniere est fort sordide de couleur cendree ressemblant vn floquet de laine, c'est pourquoy Auicenne l'appelle *lanosum vlcus*. Galien le premier a remarqué toutes ces differences en vn petit liuret des yeux, mais il ne leur a point donné de nom particulier, & en tout

Corre- ce liuret se trouue vne faute
 ctio d'un remarquable, car par tout où
 texte de il y a interne, faut lire externe,
 Galien. & au cōtraire. Manard a vou-
 lu reprendre Auicenne en ses
 Vlcères différences, mais c'est sans rai-
 mali- son. Ils se font d'autres vlcères
 gnes. à la cornee qui sont malignes,
 & se nomment νόμα, qui man-
 gent & cheminēt iusques aux
 Vlcères muscles & paupieres. Il y a
 chan- aussi d'vlcères chancreuses ac-
 creuses. compagnées de douleurs cui-
 santes, elles s'engendrēt d'une
 cicatrice humeur acre & atrabilaire, te-
 de la cor nant de la nature du chancre.
 nec. La cicatrice est vne maladie
 de la cornee, car elle luy oste
 sa couleur & sa clarté, la ren-
 dant du tout blanche, on l'ap-
 pelle λεύκωμα, ou albugo. L'hyp-
 opion en approche fort, qui
 est vn amas de matiere puru-
 lente occupāt le noir de l'œil.

En fin la cornee viét à se rompre, & lors se fait vne maladie particuliere de l'vuee, que nous descrirons cy apres.

Rupture
de la cor
nee.

A la tunique vuee nous considerons vn corps, & vn trou qui est la prunelle: le corps de l'vuee a vne maladie particuliere, qui est sa descente: la prunelle endure trois maladies remarquables, la dilatation, l'estresissemēt & la catarachte.

Maladies de
l'vuee.

La descente de l'vuee se nomme des Grecs *μεγανωσις*, qui ne peut arriuer que par la rupture ou erosion de la cornee qui luy sert de barriere: la rupture vient quasi tousiours de cause externe, l'erosiō de cause interne. On fait ordinairement quatre especes de ceste descente, qui ne differēt qu'en grandeur: car s'il n'en sort que bien peu, on l'appelle *μικράφα*

Descente
de l'vuee

Quatre
especes
de la descente.

λος, teſte de mouche, ou dans Auicenne *formicalis*; ſ'il en ſort d'auantage, & comme de la groſſeur d'une peau de raiſin, on la nomme *σαφύλωμα*: Si elle ſort encores plus & pend comme une pommette, ſe nomme *μῆλον*: ſi avec tout cela elle ſ'endurcit & deuient calleuſe, ſ'appellera ἥλος clauus.

Maladie de la prunelle.

Dilatation.

La prunelle a trois maladies, car ou elle ſ'eſlargit par trop; ou deuient trop eſtroite, ou ſe ferme du tout. La dilatatiō des Grecs *μυδρίασις*, eſt maladie organique, pource que la cavitē eſt plus grande qu'elle ne deuroit. Galien fait deux differences de ceſte dilatation, l'une eſt naturelle, l'autre vient par quelque accident, toutes deux nuſent bien fort à la veüe, pource que la lumiere interieure ſe diſſipe trop, &

comme dit Auicenne, les especes ne sont pas receuës en pointe: la cause de ceste dilatation est latension de l'vuee: elle est tédue, ou par vne trop grande humidité, ou par vne extreme secheresse: l'humidité si elle est nuë, relasche la mébrane, si elle est avec matiere côme aux tumeurs de l'œil, absces, & autres defluxions, la tend encores plus. La secheresse retirât les extremittez de l'vuee eslargit son trou, comme nous voyôs au parchemin trop sec. La maladie contraire à ceste-cy, se nôme des Grecs *φθίσις*, extenuation, ou estreffissement de la prunelle; celle qui est naturelle & trespropre pour la veüe, mais celle qui est accidentale nuit tousiours: sa cause est la cheute de l'vuee: elle s'affaisse par vne trop grã-

Causes
de la di-
latation.

estreffis-
sement
de la pru-
nelle.

La cata-
rachte.

Cause
des
taye.

de humidité qui n'est que du costé du trou, ou par la consommation de l'humeur aqueuse qui remplissoit toute cét espace. La dernière maladie de la prunelle se nomme *Xenoma* des Grecs; des Arabes goutte ou eau, du vulgaire catarachte ou taye. Nous la définirons vne obstruction de la prunelle, causée d'une humeur estrange, qui ayant coulé s'espaisit peu à peu entre la cornee & le crystallin: Sa cause prochaine, qu'on appelle continēte, est vne humeur estrange, & en cela elle differe du *glaucoma* qui se fait par la concretion des humeurs naturelles de l'œil, cét humeur au commencement flotte, mais en fin s'espessit: c'est pourquoy Paulus au troisieme liure definit la suffusion par effusion, & au
sixiesme

fixiesme par concretion, descriuant là celle qui commence, & icy celle qui est ia faicte.

Ceste humeur s'assemble, si nous voulós croire Haliabas, Haly, Azaraius, entre l'vuee & le crystallin; si nous aimons mieux croire Auicenne, Mesues, Albuchasis, entre la cornee & l'vuee. Quant à moy ie pense qu'elle peut demeurer en tout cet espace, qui est depuis le dedás de la cornee iusques au crystallin, & se mesle bien souuent avec l'humour aigueuse. Ceste taie empesche la veüe en diuerses façons: car si elle ferme toute la prunelle, qui est la fenestre de l'œil, la veüe se perdra du tout: s'il n'y a qu'une partie de la fenestre fermee, cōme la droicte, ou la gauche, la superieure ou inferieure, l'œil verra les obiects

Le lieu
où se
met l'hu
mour
qui fait
la taie.

qu'on luy presentera, mais il n'en pourra voir qu'un à la fois: si l'obstruction est iustement au milieu de la prunelle, tous les objets paroistront diuisez & comme fendus, & ne pourra-on voir le milieu de l'image: si l'eau n'est encores assemblée, & qu'elle soit respandue inegalemēt parcy par là, on verra comme des mouches voler par l'air. On tire les differences des catarachtes de leur quantité, substance, couleur, connexion, situation, & du moyen de leur generation: il y en a de grandes & de petites, d'espaisses & de subtiles, de blanches, cendrees, gypsees, rouges, noires, citrines. Les causes internes sont les humeurs & les vapeurs qui s'espaississent; les humeurs ou viennent du cerueau par les

Differen
ces des
catarach
tes.

Les cau-
ses inter-
nes.

nerfs, veines, arteres; ou s'engendrent à la partie mesme, par la foiblesse de la faculté concoëtrice & expultrice. Les catarachtes ont tousiours pour auantcoureurs certaines visions fausses qu'on appelle imaginatiōs; car on pense voir des mousches, des poils, & filets d'araigne en l'air, qui toutesfois n'y sont pas: la cause de ces visiōs est vne vapeur opaque, qui se met entre la cornee & le crystallin: Ceste vapeur ne se voit pas en sa propre espeece; car l'vuee se verroit aussi bien, mais en vne autre de celles qui sont par l'air: Il est vray que le crystallin iuge ces vapeurs estre au dehors, pource qu'il s'est tellement accoustumé à voir les obiects externes qu'il pèse ce qui est au dedans estre au dehors. ces vapeurs

Les imaginatiōs qui precedent les catarachtes.

s'esleuēt quelquefois d'embas,
quelquefois des humeurs qui
sont au cerueau, ou à l'œil
mesme.

Mala-
dies des
muscles
de l'œil.

Les maladies des muscles
de l'œil sont trois principales,
la distortion de l'œil, le bran-
lement, & l'immobilité. La di-
stortion appellee *ἁβισμός*, ou

Distor-
tion de
l'œil.

Ἀστροφία, vient, ou de la reso-
lution de quelques muscles, &
lors la partie malade se meut
vers la saine: comme il arriue
à la paralysie de toutes les par-
ties qui ont des muscles op-
posites; ou ceste distortion
vient de la cōuulsion de quel-
ques muscles, & lors la partie
saine se meut vers la malade.

Differ-
ces.

Quoy que ce soit ceste mala-
die vient ou de secheresse, ou
d'humidité superflue: or l'œil
se tourne en beaucoup de fa-
çons, en haut & en bas, & lors

on ne voit que le blâc de l'œil,
Hippocrate l'appelle *ἰλασις* :
ou l'œil se tourne vers les co-
stez & nous rend louches. Le
branlement d'œil appellé *ἰσ-
μος*, est vn vice des muscles qui
sont tellement affoiblis, qu'ils
ne peuuent cōtenir l'œil. Tous
les anciens ont creu que ce
branlement d'œil venoit d'vn
septiesme muscle qui embras-
se l'optique : mais ils se sont
abusez. car on ne le trouue
point aux hommes, comme
i'ay demonstté en l'histoire de
l'œil. Je croy donc que com-
me le mouuement tonique,
qui tient naturellement l'œil
ferme & immobile, se fait lors
que tous les six muscles ten-
dent egalemeut leurs fibres :
aussi que ce branlement se fait
lors que tous six laschét leurs
fibres. Il y a vne maladie con-

Le bran-
lement
de l'œil.

Erreur
des an-
ciens.

Immo-
bilité de
l'œil.

traire à ceste-cy , quand les yeux demeurent du tout immobiles . Hippocrate l'appelle $\pi\eta\zeta\iota\nu$ & $\sigma\acute{o}\sigma\iota\nu$, qui se fait lors que les muscles ont du tout perdu la puissâce de mouuoir, ou par l'obstruction du nerf qui apporte le mouuemēt, ou par la paralysie d'iceluy.

-Mala-
dies du
nerf op-
tique.
Obstru-
ctiō du
nerf.

Les maladies du nerf opti-
que sont l'obstruction, com-
pression, paralysie, cheute, ru-
ption, scirrhe, inflammation.

L'obstruction se fait soudaine-
ment d'une humeur froide &
crasse, pource que la cavitē du
nerf est biē petite: la compres-
sion se fait de coup: la paralysie
d'une humeur tenue & sereuse

Com-
pression.
paralysie

qui amollit le nerf : la cheute
appellée $\sigma\acute{\upsilon}\mu\pi\tau\epsilon\iota\sigma\iota\varsigma$, quand les
extremitez mēbraneuses s'ap-
prochēt, & ne demeure point
de place à la moëlle: la ruptiō

Cheute.

Ruptiō

vient de coup, & lors l'œil sort
 premierement en dehors, puis
 se retire & s'amaigrit. Toutes
 ces maladies de l'optique font
 vn symptome commun, que
 les Grecs appellent ἀμάωσις, La gout
 les Arabes goutte sercine; c'est te serci-
 comme definit tresbien Aëce ne.
 vn auuglemēt entier sans au-
 cun vice ou tache apparente
 de l'œil: cet auuglemēt vient
 de l'empeschement de la lu-
 miere interieure.

Les plus subtils Medecins Malades des
 mettent au rang des parties de esprits.
 l'œilles esprits, & recognois-
 sent aussi leurs maladies, qui
 sont μυωπία, & νυκταλωπίσεις. myopes.
 En la premiere on ne peut voir
 qu'en l'obscurité comme à la
 pointe du iour & à l'entree de Nyctalo-
 la nuit, en plein midy on ne pes.
 sçauroit lire. En l'autre c'est
 tout au contraire, on ne peut

De l'excellence de la veüe,

voir qu'en vne grande clarté. On attribue cela aux esprits: ceux qui ont les esprits fort subtils ne peuuent voir en vne grande lumiere, pource que leurs esprits se dissipent: ceux qui ont les esprits grossiers ont besoing d'vne grãde clarté pour estre illuminez.

Voila en somme les principales maladies de l'œil, ie ne touche point à celles des paupieres, ny des coings, ny des parties voisines, ie crains de m'estre trop esgaré: car mon intentiõ n'estoit que de monstrier l'excellence de la veüe, & d'apprendre le moyen de la conseruer: Ie m'en vai donc remettre à mon chemin.

*Regime general & tres-exquis pour
la conseruation de la veüe, auquel
est fort particulièrement demon-*

Et du moyen de la conseruer. 77
stré tout ce qui peut nuire aux
yeux, Et tout ce qui leur est pro-
pre aussi.

CHAP. XIII.

IL est temps de mesler
l'utile avec le delecta-
ble: Ceux qui sentent
quelq̃ diminution à leur veüe,
ou qui craignent de l'auoir
foible, verront en ces deux
chapitres tout ce qui se peut
trouuer de plus rare dans les
iardins des Medecins Grecs,
Arabes & Latins, pour la cō-
seruatiō de la veüe. Je m'y suis
autrefois esgayé, & en ay ef-
fluré tout ce que i'y ay peu
voir de plus beau. Or d'autant
qu'une des principales causes
de l'imbecillité de la veüe: (i'o-
seray bien asséurer que c'est la
plus commune) vient d'une

humidité superflüe de l'œil, & de l'impurité de ses esprits: Je dresseray pour cela vn regime exquis, qui seruira comme de patron & de modelle à toutes les autres maladies de l'œil. L'art qui enseigne de guarir les maladies, que les Grecs appellent en vn mot Therapeutique, se sert ordinairement de trois instrumēs, de la diete, ou façon de viure, de la chirurgie, & de la pharmacie.

La diete
tient le
premier
rang à la
curatiō.

La façon de viure tiēt tousiours le premier rang, & a esté iugée des anciens la plus noble partie, d'autant qu'elle est amie & familiere de nature, ne l'altere en aucune façon, & ne luy apporte aucun trouble, comme font les medicamēts & les operations manuelles. Ceste façon de viure ne consiste pas seulement au boire &

au manger, comme le vulgaire pense, mais en l'administration de six choses, que les Medecins appellent non naturelles, qui sont l'air, le boire & le manger, le dormir & veiller, le mouuement & repos, l'inanition & repletion, & les passions de l'ame.

Je commenceray mon regime par l'air, d'autant que la- La force de l'air.
nimal ne s'en peut passer vn seul moment, & qu'il a vne puissance incroyable à changer & alterer tout soudain nos corps: il s'é va par le nez droit au cerueau, par la bouche droit au cœur, par les pores du cuir & par le mouuement des arteres il per ce tout le corps: il fournit de matiere & d'aliment à nos esprits. C'est pourquoy le diuin Hippocrate remarque tresbien que de la

qualitez
de l'air.

constitution de l'air depend
entierement la bonne & mau-
uaise disposition des esprits &
des humeurs. A l'air nous de-
uons remarquer ces premie-
res & secondes qualitez; les
premieres sont chaleur, froi-
deur, humidité, secheresse:
desquelles les deux premieres
se nomment actiues, les deux
dernieres passives: les qualitez
secondes sont quand l'air est
gros, espois, subtil, pur, ob-
scur, lumineux; or accommo-
dons tout cela à nostre vsage.

L'air pro-
pre pour
la veüe.

Il faut pour la conseruation
de la veüe choisir vn air qui
soit temperé en ses premieres
qualitez, qui ne soit ny trop
chaud, ny trop froid, ny trop
humide. Il n'est pas bon de
s'exposer à l'ardeur du Soleil,
ny aux rayons de la Lune ou
au serain. Les vents Meridio-

naux & Septentrionaux sont Les vêts
cōtraires
à la veüe ennemis des yeux : lisez ce qu'en escrit Hippocrate à la troisieme section des Aphorismes. Le vent d'Austre (dit-il) rend la veüe trouble, l'ouye dure, la teste pesante, les sentimens hebetez, & tout le corps lasche & paresseux, pource qu'il engēdre des esprits grossiers : l'Aquilon est trop vif, & pource (dit le mesme auteur) il mord & pique les yeux. Les lieux bas aquatiques, humides, & marecageux sont du tout contraires à la veüe : il est beaucoup meilleur d'habiter es lieux secs, & vn peu esleuez. Si on est contraint de se loger aux lieux humides, il faudra Corre-
ction de
l'air ar-
tificielle. alterer & purifier l'air avec des feux artificiels, faits avec le bois de laurier, geneure, rosmarin, tamaris : ou bien on

De l'excellence de la veüe,

Parfum.

pourra faire ce parfum des Arabes à la chambre, à laquelle on demeure le plus. Prenez des fueilles d'euphrase, fenouil, marjolaine, de chacune vne once, du bois d'aloës bien puluerisé vne dragme, d'encës trois dragmes : meslez le tout ensemble, & en parfumez fort souuent vostre chambre.

Quel
doit estre l'air
en ses
qualitez
secôdes.

Quant aux secondes qualitez, l'air gros, espois, plein de brouillars est contraire à la veüe, il le faut choisir net & purgé de toutes vapeurs aigueuses, terrestres, nitreuses, sulphurees & d'autres mineraux, surtout de l'argent vif; la poussiere, le feu, & la fumee nuisent infiniment à l'œil: c'est pourquoy ceux qui ont la veüe debile ne doiuent jamais souffler l'alchymie, car ils perdroient & l'œil & la bourse: la

du moyen de la conseruer. 80

vapeur qui sort des estangs & des corps morts est tresdommageable. L'air ne doit point aussi estre trop lumineux; car vne lumiere excessiue dissipe les esprits, & fait souuent perdre la veüe. Nous lisons que les soldats de Xenophanes ayans passé par les neges deuiendrent quasi tous aueugles: & Denys Tyrā de Sicile aueugloit ainsi tous ses prisonniers. car les ayans enfermez dans vne cachotte obscure, les faisoit tout soudain conduire en vn lieu bien clair, & perdoiēt tous la veüe. A la lumiere nous rapporterons les couleurs: toutes couleurs ne sont pas propres à le veüe, le blanc dissipe les esprits les attirant à soy, le noir les rend trop grossiers: il n'y a que le vert, le bleu & le violet qui la resiouissent

la lumie
re con-
traire à
l'œil.

Les cou-
leurs pro-
pres à la
veüe.

bien fort. Nature nous enseigne cela en la conformation de l'œil. car elle a teint la tunique vüee de vert & de bleu du costé qu'elle regarde le crystallin. La couleur du saphir & de l'esmeraude est fort propre à la veüe: si tu veux voir bien souuent ces deux couleurs meslees. Je t'enseigneray vne chose qui te sera fort aisee. Prens des fleurs de bourache, & des fueilles de pimpernelle, & lors que tu voudras boire iette les dans ton verre: cela te seruira doublemēt. car la couleur resiouira tes yeux, & les herbes rabbatrōt par leur propriété la fumee du vin. Et voilà quant à l'air.

Le second point du regime consiste au māger & au boire. Il faut donc sçauoir les viādes qui sont propres, & celles qui

Le boire
& man-
ger.

peuvent nuire à la veüe. On le doit abstenir en general de toutes viandes grossieres, visqueuses, vaporeuses, salces, venteuses, douces, picquantes & pleines d'excremens: il faut s'accoustumer à māger moins au souper qu'au disner.

Le pain doit estre de pur ^{le pain} froment, bien leué & vn peu salé, auquel on y pourra mettre de l'anis ou du fenouil; il ne le faut iamais māger chaud ny qu'il passe trois iours. Le pain sans leuain nuit extremement à la veüe, & principalement s'il y a de l'yuroye. car on tiēt que l'usage de l'yuroye fait perdre la veüe. J'ay autrefois leu vn plaisant traiēt dans Plaute d'vn valet, qui n'osant appeller son cōpagnon aveugle, luy reprochoit qu'il auoit mangé de l'yuroye.

Les chairs qui se cuisent

De l'excellence de la veüe,

fort aisément & qui n'abondent pas en humidité superflüe sont les meilleures, comme celles des poulets, chapons, gelinottes, perdrix, phaisans, tourterelles, allouettes, pigeons sauvages, & autres oiseaux de montagne, lesquels on peut entrelarder de sauge ou de l'hysope des montagnes. Il y a certaines chairs qui ont vne propriété de fortifier & esclaircir la veüe, comme les chairs de pie, d'arondelle, d'oie. des viperes bien preparees, de loup, de bouc, des oiseaux de proye. Les Arabes remarquent que les yeux des animaux par ie ne sçay quelle propriété & similitude confortent la veüe. ils se seruent bien souuent des chairs d'arondelle & de pie sechees au four, & en saulpoudrent leurs viandes. Ils

nous deffendent l'vſage des groſſes chairs, côme de pourceau, de lieure, de cerf.

Les poiſſons, ſi nous voulôs Les poiſſons. croire le Prince des Arabes, ſont ennemis des yeux ; mais ie croy qu'il entend de ceux des eſtâgs, qui ont la chair viſqueuſe, ou qui ſont ſalez ; car ceux qui ont la chair ferme, comme truittes, rougets, & ſemblables, ne ſont pas contraires. Les œufs frais & mollets avec vn peu de ſucré & de canelle eſclairciſſent merueilleuſement la veüe, mais s'ils ſont fricafſez avec le beurre nuſent infiniment.

Toute viande de paſte, paſtiſſeries & laiçtages nuſent aux yeux.

Quât aux ſaleures, eſpiceries Les couleurs. & ſaulſes, toutes ne ſont pas Sels arti- deffendues. Nous faiſons des ficiels.

De l'excellence de la veüe,

sels artificiels qui seruent merueilleusement à esclaircir la veüe: on en doit saler ordinairement les viandes. Le sel theriacal est tresexcellent, auquel on pourra adiouster de la noix muscade, de son escorce qu'on appelle *macis*, du girofle & du fenouil. Il se fait aussi du sel d'euphrase en ceste façon. Prenez du sel commun vne once, de poudre d'euphrase deux dragmes, de canelle, & d'escorce de muscade le poids de demy escu, meslez le tout ensemble & en salez vos viandes. Il y en a qui adioustent à ces sels la chair de pie rostie au four.

Espiceries.

Les fortes espiceries, comme le gingembre, poivre, & moutarde nuisent aux yeux: il se faudra contenter de la muscade, girofle; canelle, avec vn peu de safran.

Tous legumes sont fort cō-
traire à la veüe, horsmis les
lupins qui aident par quelque
propriété.

Pour le regard des herbes, ^{Les her-}
on recōmande pour les yeux ^{bes.}

le fenouil, la sauge, marjolai-
ne, rosmarin, betoine, mēthe,
serpoulet, les asperges, la pim-
pernelle, cichoree, persel: on
deffend au cōtraire la laiçtuë,
le nasitort, l'aneth, le basilic,
pourpier, poree, le chou, aulx,
oignons, & toutes les racines
qui ont bulbe, comme aussi
les truffes & champignons.
Les Arabes qui ont esté meil-
leurs potagers que les Grecs,
recommandent les naueaux:
il est vray qu'il y faut tous-
iours mesler du fenouil ou de
l'anis, pource qu'ils sont fort
venteux.

Les fruits cruds & qui ont ^{Les} fruits.

beaucoup d'humilité nuisent
à la veüe: on pourra à l'entree
de table vser de pruneaux
cuits, & au deffert d'une poire
ou d'un coin bien cuit pour
fermer l'orifice de l'estomach,
& empescher que les fumees
ne mōtent. Il ne sera pas mau-
uais de prendre apres le repas
vn peu de fenouil, ou d'anis
cōfit, vn morceau de cotignac
de mirobolans, de noix mus-
cade confite. Les figues & les
raisins ne sont pas deffendus;
si sont bié les noix, les chastai-
gnes, & les oliues trop meu-
res. Voila pour le manger.

Le boire

la quan-
tité.

Quant au boire nous y de-
uōs remarquer deux choses, la
quantité, & la qualité. Pour la
quantité ce grand Medecin
Archigenes disoit qu'en tou-
tes maladies des yeux le trop
boire estoit dōmageable. Pour

la qualité, Aristote en ses Pro- La qua-
lité.
blemes escrit, que ceux qui
boient de l'eau ont la veüe
plus subtile; Toutesfois Aui-
cenne & Rhazis cōdamnent
l'vsage de l'eau, & croy qu'ils
ne font pas desplaisir à plu-
sieurs bons compagnons qui
aimeroient autant perdre la
veüe que le vin. Il faut pour les
accorder boire le vin fort tré-
pé, & choisir vn petit vin, qui
ne soit point piquant, ny va-
poreux: les vins doux & nou-
ueaux sont fort fumeux, les
gros vins arrestent trop long
temps à l'estomac, & enuoyēt
grande quātité de vapeurs au Vins ar-
tificiels.
cerueau. Nous faisons vn vin
artificiel de l'euphrase qui est
tres-singulier pour la cōserua-
tion de la veüe. Arnould de
Villeneuve grād Medecin as-
seure auoir guarý vn vieillard

De l'excellence de la veüe,

quasi du tout aveugle, avec
le seul vsage du vin d'eufraise,
ou bien on pourra ietter vn
bouquet d'euphrase dans le
vin qu'on boit ordinaiement,
ou comme i'ay desia dit, de la
pimpernelle, & des fleurs de
bourache; car outre ce qu'ils
resiouissent par leur couleur
la veüe, ils seruiron à purifier
les esprits, & reprimer les va-
peurs du vin: ce sont herbes
assez cōmunes & qu'on trou-
ue en toute saison. Ceux qui
ne voudront boire du vin vse-
ront d'un hydromel simple,
ou en composeront vn en ce-
ste façō. Prenez quinze liures
d'eau de cisterne ou de fontai-
ne, vne liure de bon miel, me-
slez le tout dans vn pot y ad-
ioustāt du fenouil, de l'euphra-
se & du macis, enuelopez dās
vn nouet le poids d'un escu,
faictes

Hydro-
mel.

Et du moyen de la conseruer. 85
faites cuire le tout, ostant l'escume du miel iusques à ce que le tiers soit consommé.

Au veiller & dormir faut ^{le dor-}
garder vne mediocrité : le ^{mir &}
dormir trop profond nuit, le ^{veiller.}
dormir du Midy rend le visage bouffi, trouble la veüe, & appesantit tout le corps: il faut dormir sur les costez, & la teste assez haute. Les veilles excessiues dissipent les esprits, refroidissent le cerueau, & nuisent infiniment à la veüe.

Il est bon de se coucher trois ou quatre heures apres le souper, & se leuer assez matin; se pourmener par la chambre, tousser, cracher, nettoyer les oreilles, purger le corps de ses excrements ordinaires : & apres il faut peigner la teste tousiours en arriere, la tenir bien nette. & ne deuons pas,

comme on a acoustumé, lauer le visage ny les yeux d'eau froide; car le froid est ennemy des yeux & du cerueau: il vaudra mieux y mettre vn peu de vin blâc, avec l'eau de fenouil & d'euphrase tiede.

L'exercice
vni-
uersel.

L'exercice moderé de tout le corps est bon au matin, & ne peut-on viure en santé (cōme remarque Hippocrate) si on ne traueille, pour dissiper les excremens de la troisieme digestion.

Les particuliers exercices seruïront aussi, comme les frictions des cuisses, & des iambes, pour diuertir les vapeurs qui montent aux yeux.

Exercice
particu-
lier des
yeux.

Les yeux ont leur particulier exercice; le mouuement trop soudain & circulaire les affoiblit: de les tenir longuement fichez en vn lieu

& comme immobiles, cela les
lasse encores plus , pource
qu'en ce mouuement tonique
toutes les fibres des six mus-
cles sont également tenduës,
comme nous voyons aux oi-
seaux qui se retiennent en l'air,
sans bouger. Il est donc meil-
leur de les mouuoir, pource
que les muscles faisant leur
action successiuent, se sou-
lagent l'un l'autre. Il n'est pas
bon de lire beaucoup, princi-
palement apres le repas, ny s'a-
muser à quelque lettre menuë,
ou à quelque autre besoigne
bien deliée, pource que la fa-
culté & l'organe trauaillent
beaucoup apres ces petits ob-
jects. Il ne faut point regarder
les corps qui se meuuent de
vitesse, ny qui tournent en
rond.

Toutes passions de l'ame

Passions
de l'ame

nuisent beaucoup à la veüe,
mais entre autres la melan-
cholic & les pleurs.

Le vêtre
doit estre
lasche.

Le ventre doit estre tous-
iours lasche en toutes mala-
dies des yeux : ce qu'Hippo-
crate a remarqué, par l'exem-
ple des ophtalmiques, & de
ceux qui ont les yeux chaf-
sieux. Que s'il estoit trop pa-
resseux, il le faudra solliciter
avec tout plain de petis reme-
des benins, comme bouillons
laxatifs, pruneaux & raisins
laxatifs, clysteres lenitifs, &
autres. On fait cuire les pru-
nes de damas dans vn sirop
avec le sené, l'agarc & le suc-
cre: on en prêt quatre ou cinq
deuant le repas au matin.

*Remedes choisis pour la conserva-
tion de la veüe, & l'ordre qu'on
doit obseruer en les appliquât.*

CHAP. XIII.

D' Autāt que l'affoiblissement de la veüe viēt ordinairement, ou de l'intēperature du cerueau, ou de la mauuaise disposition de l'œil : Le Medecin rationel & methodique doit tousiours auoir esgard à ces deux parties; le cerueau s'il est trop humide doit estre desseiché, & l'œil qui est debile doit estre fortifié. Platon en vn de ses Dialogues nous aduertit, qu'il ne faut iamais seicher ny fortifier l'œil par remedes externes, que la teste ne soit premierement purgee. Nous cōmencerons donc à vuider ceste teste; & pource qu'il est mal aisé de la bien purger, si tout le corps qui luy enuoye ordinairement

La pur-
gation
de tout
le corps
& du cer-
ueau.

rement des excrements n'est
biẽ net, il faudra choisir vn re-
mede, qui puisse en purgeãt le
cerueau euacuer doucement
tout le corps, & qu'il ait aussi
quelque proprieté pour l'œil.
La forme des pilules est la plus
propre pour cest effect. Les
Arabes recommandent les pi-
lules elephangines, d'agaric, &
celles qu'on appelle *lucis ma-
iores & minores*. nous en pour-
rons dresser vne forme de ce-
ste façon.

Descri-
ption de
pilules.

Prenez de l'aloë bien lauë
en eau de fenouil, & d'euphra-
se trois dragmes, de bon aga-
ric vne dragme & demie, de
rubarbe vne dragme, d'escor-
ce des mirabolãs citrins frot-
tee en huile d'amãdes douces
quatre scrupules, du sené de
leuant bien puluerisé vne dra-
gme, de mastic, gingembre &

du moyen de la conseruer. 88

canelle, de chacun demy scrupule, de trochisq̃s alādal cinq ou six grains pour seruir de pointe, malaxés tout cela avec le suc de fenouil & le sirop de stechas, & en faictes vne masse, de laquelle faudra prendre vne dragme deux fois le mois, ou le soir, ou le matin. ou bien;

Prenez de la poudre de hie-
re deux dragmes, de bon aga-
ric quatre scrupules, du fené
vne dragme, de semence d'a-
nis, fenouil, & seseli de chacu-
ne demy scrupule, du macis,
canelle & de la mirrhe, de cha-
cune cinq grains, avec le miel
rosat, anthosat, & l'eau de fe-
nouil; faites en vne masse & en
prenez vne dragme toutes les
semaines. Ceux qui ne peuent
aualer de pilules vseront de ce
sirop magistral.

Syrop
magi-
stral.

Prenez racines de fenouil,

H iiii

De l'excellence de la veüe,
d'acorus, & d'heleniũ, de cha-
cune vne once , de fueilles
d'euphrase, bethoine, fume-
terre, mercuriale, cichoree,
germendree, verbene, de cha-
cune vne poignee, vne dou-
zaine de raisins de damas, &
autant de prunes, semences
d'anis & de fenouil deux dra-
gmes, fleurs de sauge, stechas,
romarin, & d'euphrase, de cha-
cune vne petite poignee. Fai-
te cuire le tout en eau claire, &
l'ayant coulé adioustez y l'ex-
pressiõ de trois onces de sené,
qui auront infusé long temps
en la susdictẽ decoction tiede:
l'expression d'vne once d'aga-
ric avec vne dragme de giro-
fle, & autãt de canelle: Faiçtes
recuire le tout avec suffisante
quantité de sucre, iusqu'à ce
qu'il ait la consistance d'un sy-
rop bien cuit, aromatisez le

Et du moyen de la conseruer. 89

avec demy dragme de noix muscade & autant de la poudre diarhodó. Si on y veut sur la fin mettre de la rhubarbe infusee & fort exprimee le poids de demy once, le syrop n'en sera que meilleur. On en prendra tous les quinze iours la quâtité de deux onces, plus ou moins, selon l'effect qu'on en verra, avec vn bouillon ou avec vne decoction capitale & oculaire.

Les clysteres frequens seruēt ^{Clysteres} à toutes maladies des yeux, ^{res.} des oreilles, & de la teste.

Si le cerueau estoit par trop humide, & que la temperature du corps n'y resistast point, l'vsage de l'esquine ou de la falseparille seruiroit beaucoup ^{Decoctions sudorifiques.} y adioustant des fueilles d'euphrase & de semence de fenouil. car en consommant les

humiditez superflues de tout le corps, il fortifieroit le cerueau & l'œil: ie croy que l'vsage du salafraſ qui a l'odeur de l'anis, ſeroit encore plus propre.

Mastica-
toires.

Le corps eſtant purgé par ces remedes vniuerſels, on pourroit apres avec plus d'aſſeurâce euacuer le cerueau par la bouche & par le nez, qui ſont les cõduits ordinaires que nature a deſtiné pour ſon expurgation; l'approuuerois bien plus les maſticatoires que les errhines, pource que le nez a vne fort grande communication avec l'œil par le trou du grand angle, de ſorte que tirât avec violence quelque ſuc par le nez, nous pourrions attirer à l'œil qui eſt la partie malade: c'eſt auſſi l'ordonnance de ce grand Medecin Hippocrate à

la seconde section du sixiesme des Epidemies. Il faut (dit-il) diuertir les defluxiōs des yeux au palais & à la bouche. il vaudroit donc mieux mascher quelque chose, cōme des raisins de damas arrousez d'vne goutte de l'essence de fenouil. ou biē on pourra frotter le palais avec ladite essence, & la vapeur mōtant iusques au cerueau & à l'œil, les fortifiera, & ne laissera pas d'attirer.

Les frictions de la teste faites en arriere avec des sachets, ^{Frictiōs de la teste.} les parfuns, & les bonnets artificiels que nous descrirons au chapitre du catarrhe euaqueront le cerueau par insensible transpiration.

Hippocrate aux maladies des yeux applique des vêtou- ^{Ventouses.} ses au col, à l'occiput, aux espauls & aux fesses.

Il ne faut pas oublier pour l'euacuation particuliere de la teste les cauterés: il est vrai que les Medecins ne sont pas d'accord du lieu où lon les doit mettre. Il y en a qui les appliquent au dessus de la teste, mais ie tiés cet endroit vn peu suspect, & en ay veu arriuer de fascheux accidents, à cause du pericrane qui peut estre bruslé si le caustique penetre trop: j'aimerois mieux le mettre au derriere. car la reuulsion en seroit meilleure, & puis il est tout certain que la source de tous les nerfs est au derriere; c'est vne tresbelle obseruatiō, & que fort peu de gens ont remarquee, ie l'ay souuent monstree aux anatomies publiques & priuees. Il y a vn Medecin Italien qui se vante d'en auoir esté le premier autheur, mais

Cauteres.

Belle obseruatiō de l'origine des nerfs.

i'auois leu il ya long temps ceste obseruatió dás Hippocrate au liure de lanature des os. Ce cautere se doit appliquer non pas sur l'occiput, car il n'é sortiroit rié, mais entre la premiere & seconde vertèbre: c'est là aussi où lon met ordinairement les setôs. Aux maladies inueterées des yeux i'approuuerois pour la deriuation, les cauterres appliquez derriere l'aureille, pource que les rameaux iugulaires & carotides, d'où viennent toutes les veines & arteres externes de l'œil, passent par là. Voila, à mon aduis, les moyens les plus propres pour l'euacuatió tant sensible qu'insensible de tout le corps, de la teste & des yeux. Je n'ay point parlé de la saignée, pource qu'elle n'a point de lieu icy, & tant s'en faut qu'elle puisse

lieu propre pour
appliquer les
cauterres

la saignée.

profiter à ceux qui ont la veüe debile, qu'elle l'affoiblit d'auantage, euacuant le sang, qui est le thresor de nature & le suc qu'elle cherit le plus. Aux grandes douleurs, inflammations, & defluxions soudaines, elle peut seruir.

Après l'euacuation il faut penser à fortifier le cerueau & l'œil, & à cela seruiront les opiates, tablettes, & poudres qui ont propriété d'esclaircir & fortifier la veüe, la theriaque & le mithridat sont fort recommandez à ceux qui ont le cerueau & les yeux fort humides.

Remede pour fortifier & esguiser la veüe. Les conserues aussi des fleurs de bethoine, de sauge, de romarin, & d'euphrase. On pourra composer vne opiate à la façon qui s'ensuit.

Opiate. Prenez des conserues des

fleurs d'euphrase, de bethoine
& de romarin, de chacune
vne once, de theriaque vieille
trois dragmes, conserue de
roses demie once, de la pou-
dre de diarhodó vne dragme
& demie, du macis deux seru-
pules, avec le syrop de conser-
ue de citron, en faut former
vne opiate, & en prendre bié
souuent le matin au sortir du
liét.

On pourra aussi faire vne Confe-
ction.
confection avec deux onces
de sucre rosat, & autant de su-
cre boragenat, avec deux dra-
gmes de la poudre diarho-
don, & demy dragme de pou-
dre d'euphrase, bethoine &
fenouil, qu'on pourra prendre
le matin.

Le soir en s'allant coucher Poudre
on vsera de certaines pou- pour pié
dres, afin que leur force soit dre le
soir.

portee avec la vapeur des viâ-
des. Prenez trois dragmes
d'euphrase, deux dragmes de
fenouil, vne dragme d'anis &
de fefeli, deux scrupules de
macis, & autant de canelle, gi-
rofle, demy dragme de semen-
ce de ruë & du chamedrys, v-
ne dragme de semence de pi-
uoine, de sucre rosat tât qu'il
en faudra: faictes envne pou-
dre bien subtile, & en prenez
vne cuilleree à l'heure de vo-
stre coucher.

Poudre
dige-
stive.

On peut aussi apres le repas
vser de poudres digestiues
avec la coriandre, le fenouil,
les roses rouges, le corail, les
perles, l'euphrase, le macis, &
le sucre rosat, ou bien vser de
ce condit.

Condit.

Bon

Prenez du fenouil & de co-
riandre confits, de chacun de-
mie once, d'escorce de citrōs,

& mirabolans confits de chacun deux dragmes, de l'euphrase seiche vne dragme, du macis demy dragme, du sucrofat tant qu'il en faudra: faiétes en vn condit, duquel prendrez vne cuilleree apres chaque repas.

Les Arabes recommandent fort ceste poudre pour en vser apres les repas: Prenez vne dragme des trochisques des viperes, quatre scrupules de poudre d'euphrase, 2. scrupules de fenouil doux, vn scrupule des pierres qui se treuuét dans les yeux du brochet, quatre onces de sucrofat, & en faiétes vne pouldre.

Voila quant aux remedes internes qui seruent pour esclaircir & fortifier la veüe: il faut maintenant venir aux externes, qui sont les eaux, collyres, vnguëts. Il y en a vne infi-

Remedes
externes

nité de receptes, mais i'ē veux
mettre trois ou quatre des
plus exquisēs & qui sont expe-
rimētees. on se lauera le matin
les yeux de ces eaux distillees.

Eau di-
stillee.

Prenez les sommitez de fe-
nouil, de rue, euphrase, veruei-
ne, tormentile, bethoine, ro-
ses sauuages, de l'anagalis ma-
fle, pimperlle, esclaire, agri-
moine, cheure-fueille, hyso-
pe des montagnes, du filer des
montagnes, de chacune deux
bōnes poignes, coupez tou-
tes ces herbes bien menu, &
les faites infuser premieremēt
au vin blanc, puis en l'vrine
d'vn ieune garçon bien sain, &
pour la troisiēme fois dans le
laiēt de femme: en fin dans du
bon miel: & apres faites distil-
ler tout cela, & gardez bien
soigneusemēt ceste eau, iettez
en tous les matins vne goutte

Et du moyen de la conseruer. 94
dans l'œil.

On pourra aussi tous les matins se lauer les yeux d'un vin dans lequel on aura fait bouillir du fenouil, de l'euphrase, & un peu des mirabolans chebules.

On fait vne eau des sucz d'anagalis masle, de fenouil, ver- Autre eau.
ueine, pimpernelle, german-
dree, esclaire, ruë: on y met
apres du girofle, du macis, de
la noix muscade, deux ou trois
dragmes, & ayant fait infuser
le tout dans du vin blanc, on
le faict distiller avec du bon
miel.

Je trouue ce remede que ie Remede propre pour la veüe.
vai descrire fort bon pour cō-
seruer & fortifier la veüe. Pre-
nez de l'eau d'euphrase & de
roses bien distillees 4. onces, Bon
aiez apres deux ou trois petits
nouets dans lesquels il y ait

De l'excellence de la veüe,

vne dragme & demie de ruthe bien preparee & vn scrupule de bon aloës : trempez ces noüets dans les eaux susdites, & en lauez tous les soirs vos yeux.

L'eau du
pain ex-
cellente.

L'eau qu'on appelle du pain est tres-excellente: on fait vne paste avec de la farine où il y a beaucoup de son, & de poudres de ruë, fenouil, & de l'esclaire qu'on appelle grande chelidoine: de ceste paste on en fait vn grád pain qu'on fait cuire au four, estant cuit tout aussi tost on le fend en deux, & le met on entre deux plats d'argent ou d'estain fort bien fermez, de sorte que la vapeur n'en puisse sortir, il en sort vne eau que l'on doit conseruer pour les yeux, l'extraction du fenogrec avec le miel est fort recommandee.

L'eau distillee des fleurs

bleuës qu'on appelle bleuets
qui croissent parmy les bleds
est excellente pour la conser-
uation de la veüe.

On prend aussi la tige du fe-
nouil vn peu au dessus de la
racine, on la coupe & la rem-
plit on de la poudre du sucre
candi, il en sort vne liqueur
qui est singuliere pour les
yeux.

Je louë fort l'vsage de ceste
eau que ie vai descrire.

Prenez vne liure & demie Eau
de vin blanc, & autât de bon-
ne eau rose, vne once de tu-
thie bien preparee, demie on-
ce d'escorce de muguet ap-
pellee macis : mettez tout ce-
la ensemble dans vne fiole de
verre bien bouchée, & l'ex-
posez au soleil ardent l'espace
de vingt iours, la remuant
tous les iours iusques à ce
qu'elle deuienne bien claire.

Vnguēt
pour les
yeux.

Il y a vn vnguēt singulier
pour la conseruatiō des yeux.

Prenez deux onces de graisse de pourceau bien recente, faites la tremper dans l'eau rose l'espace de six heures, puis relaeuez la par douze fois differentes, avec du vin blanc du meilleur que pourrez trouuer, par l'espace de cinq ou six heures, adioustez apres à ceste graisse de la tuthie bien preparee & fort subtilement puluerisee vne dragme, de la pierre hematites bien lauee vn scrupule, d'aloës bien laué & puluerise 12. grains, de perles puluerisees trois grains: incorporez le tout ensemble avec vn peu d'eau de fenouil, & en faites vn vnguēt, duquel en mettrez fort peu aux deux coins des yeux. Il y a tout plain d'autres remedes externes qui peuuēt seruir aux yeux, cōme collires

du moyen de la conseruer. 96

& poudres qu'ô soufflé dedâs,
mais ie ne les trouue point si à
propos que les eaux.

Les Arabes vsent pour la ^{Laue-}
conseruation de la veüe des ^{ment de}
laucemens de teste, mais il n'est
pas trop bon au mal des yeux
d'émouuoir le cerueau: le la-
uemēt se pourra faire en ceste
façon. Prenez de la lexiuē fai-
te des cendres de ferment, de
fucilles de stechas, bethoine,
euphrase, chelidoine, chamo-
mille, de chacune vne poi-
gnée, d'agaric & mirabolans,
chebules, liez en vn drapeau,
de chacun deux dragmes, fai-
tes bouillir le tout iusqu'à la
côsomption de la quatriesme
partie, & en lauez la teste. ou
biē prenez de l'eufrase sechee
& la reduisez en cendre, y iet-
tât de l'eau d'eufrase, & en fai-
tes vne lexiue.

Voila les moyens avec les-

De l'ex. de la veüe, & du moyen &c.
quels nous conseruerons la
veüe, principalement si la di-
minution vient d'une trop
grande humidité du cerueau
& des yeux, comme est celle
de Madame la Duchesse d'V-
sez, à qui ce discours est parti-
culierement dedié. Je ne des-
cris point les remedes qui sôt
appropriéz à chaque maladie
de l'œil, il me faudroit em-
ploier trop de temps, j'ay vou-
lu seulement dresser ce regime
general qui seruira de patron
pour les autres maladies. Mō-
sieur Guillemeau Chirurgien
du Roy en a fait vn traicté
fort docte auquel on trouue-
ra les plus exquis remedes des
anciēs & modernes autheurs:
Je renuoiray donc le lecteur à
son liure qui est en langue vul-
gaire.

Fin du premier Discours.

SECOND



SECOND DISCOVERS,
AVQUEL EST TRAICTÉ
des maladies melancholiques,
& du moyen de les guarir.

Que l'homme est vn animal diu &
politique, ayant trois puissances nobles
particulieres, l'imagination, le
discours, & la memoire.

CHAPITRE



E Sarrasin Abdalas
estant importuné, &
côme forcé de dire,
qu'est-ce qu'il trou-
uoit de plus admirable au mô-
de, respondit en fin braue-
ment, que l'homme seul estoit
par dessus toute merueille.
Réponse à la verité digne
d'un grand Philosophe, & non

louan-
ge de
l'hōme.

d'un homme barbare ; Car
l'hōme ayant en son ame gra-
uee l'image de Dieu, & repre-
sentāt en son corps le modelle
de l'vniuers, peut en vn instāt
se trāsformer en tout comme
vn Protce, ou receuoir en vn
moment cōme vn chameleon
l'impreffiō de mille couleurs.
Phauorin ne recognoist rien
de grand en la terre que l'hō-
me; les sages d'egypte l'ōt vou-
lu honorer du tiltre de Dieu
mortel; mercure trois fois grād
l'appelle animal plein de diui-
nité, messager des Dieux, sei-
gneur des choses inferieures,
familier des superieures; Py-
thagoras mesure de toutes cho-
ses; Synesius orizō des choses
corporelles & incorporelles;
Zoroaster par admiratiō le pu-
blie par tout effort & miracle
de nature; Platō merueille des

merueilles ; Aristote , animal politique plein de raison & de cōseil, qui est tout, ayant tout par puissāce, non pas matériellement, cōme vouloit Empedocle, mais par reception des especes : Pline, ioüet de la nature, tableau de l'vniuers, abre-gé du grand mōde, Parmy les Theologiens il y en a qui l'ont appellé, toute creature, d'autant qu'il a communication avec tout ce qui est créé, il a l'estre avec les pierres, la vie avec les plātes, le sentiment avec les bestes , l'intellect avec les Anges . les autres l'ont honoré de ce beau tiltre de gouverneur vniuersel, qui tient toutes les creatures sous son Empire, à qui tout obeit, & pour qui tout l'vniuers est créé : c'est en somme le chef d'œuvre de Dieu, & le plus

D'où

vient

l'excel-

lence de

l'hōme.

noble de tous les animaux.
Or ceste excellence qui le
fait reluire sur tous , ne des-
pend point de son corps,
encores que ce soit le mieux
formé, le plus temperé, & le
mieux proportionné qui soit
au monde, seruant aux autres
d'une reigle de Polyclète, &
aux architectes comme d'un
exemplaire pour tous leurs
bastimens. ceste noblesse, di-
ie, ne prouient pas du corps
qui est materiel & corrupti-
ble, son extraction vient de
plus haut : c'est l'ame seule
qui l'anoblit , forme du tout
celeste & diuine, qui ne sort
pas de la puissance de la ma-
tiere, comme celle des plan-
tes & des bestes : Elle est
créée de Dieu, & viét du ciel,
pour gouverner le corps aus-
si tost qu'il est organisé, ses

L'excel-
lence de
l'homme.

actions nous rendent asses de
preuue de sa noblesse. car ou-
tre la faculté vegetatiue &
sensitiue, elle a trois puissan-
ces particulieres qui l'esle-
uent par dessus les autres ani-
maux: l'imagination, la raison,
& la memoire. La raison est
la souueraine, les deux autres
pource qu'elles la seruent or-
dinairement, l'vne de rappor-
teur, l'autre de greffier, iouys-
sent des priuileges de nobles-
se, logent dans la maison
Royale, & tout aupres de la
raison, l'vne en son anticham-
bre, l'autre en son cabinet.
L'imagination represente à
l'intellect tous les obiects
qu'elle a receu du sens com-
mun, & rapporte ce que les es-
pions ont descouuert: Sur ce
rapport l'intellect prend ses
conclusions, qui sont bien

Les trois
puissan-
ces no-
bles de
l'ame.

L'imagi-
nation.

Des maladies melancholiques,
souuent fausses quand l'ima-
ginatiō rapporte infidelemēt.
Et tout ainsi que les plus adui-
~~sez capitaines~~ font bien sou-
uent de foles entreprises sur
vn faux aduertissement; ainsi
la raison fait bien souuent de
fols discours sur le faux rap-
port de la fantasie.

Opinion
des grecs
contre la
noblesse
de l'ima-
ginatiō.
Il y a certains philosophes
Grecs qui ont voulu oster ce
tiltre de noblesse à l'imagina-
tion, & se sont efforcez de la
rendre aussi vile, que les autres
operatiōs sensibles: i'en ay au-
tre fois leu deux opinions: la
premiere est de ceux qui pen-
sent que l'imagination ne dif-
fere pas du sens commun:
l'autre est de ceux qui disent
que l'imaginatiō est aussi bien
commune aux bestes qu'aux
hommes; cela estant, qu'on ne
la doit point appeller noble.

Mais ie feray voir à vn chacū Erreur de ces Philosophes.
comme ils se sont lourdement
abusez.

Tous ceux qui se sont mes-
lez de bien philosopher, tien-
nent pour resolu que l'imagi-
nation est quelque chose de
plus que le sens commun ou
intérieur, qui iuge de tous les
obiects externes, & auquel
comme au centre se rappor-
tent toutes les especes sensi-
bles: car le sens commun re-
çoit les especes en mesme tēps
que les sens externes, & avec
la puissance (s'il faut parler en
termes scholastiques) reale
de l'object, mais l'imagination
les reçoit & retient sans la
presence de l'object; L'ima-
gination compose & ioint
les especes ensemble, comme
de l'or & de la montagne el-
le feint vne montagne d'or,

Diffé-
rence entre
l'imagi-
natio &
le sens
cōmun.

ce que le sens cōmun ne peut faire: le sens interieur ne peut comprendre que ce qui est aperceu par les sens externes, mais l'imagination passe plus outre: car la brebis ayant veu le loup le fuit tout aussi tost, comme son ennemy; ceste inimitié ne se cognoist pas par les sens, ce n'est pas vn object sensible, il n'y a que l'imagination qui la cognoisse. C'est doncques vne puissance bien differente du sens commun, qui se trouue veritablement aux bestes, mais elle ne s'y trouue pas en mesme degré de perfection qu'aux hommes. Je veux qu'vn chascun voye la difference qu'il y a entre l'imagination des bestes, & celle des hommes. L'imagination des bestes ne leur sert que pour suivre les mouuemēs & passions

Differē-
ce entre
l'imagi-
natio de
l'hōme
& celle
des be-
stes.

de l'appetit, & n'est addonnee,
qu'à la pratique, c'est à dire, ou
à la poursuite de ce qui leur ^{Première.}
sert, ou à la fuite de ce qui leur
peut nuire; L'imagination de ^{Secōde.}
l'homme sert & à la pratique
& à la contemplation. L'ima-
gination des bestes ne peut
feindre aucune image, sinon
en tāt qu'elle luy est presente;
l'homme a la liberté de cōce-
voir ce qu'il luy plaist, & enco-
res qu'il n'ait d'objets presēs
il en va prendre dans le thre-
sor qui est la memoire tant
qu'il luy plaist. Les bestes ima- ^{Troisième.}
ginent seulement quand elles
sont en exercice, & non pas
hors de l'œuvre; l'homme en
tout temps & en toute heure
peut imaginer. La beste ayant
imaginé se meut tout aussi ^{Quatrième.}
tost, & poursuit ce à quoy son
appetit l'incite; l'homme ne

suit pas tousiours les mouuemens de son appetit, il a la raison qui l'arreste, & recognoist bien souuent la faute. L'imagination des bestes ne compose point des montagnes d'or, ne forge point de chimeres, & d'asnes volans, comme fait celle de l'homme. En fin l'imaginatiō de l'homme semble participer de quelque discours avec l'intellect. car ayāt veu vn lion peint, il recognoist qu'il n'en faut auoir peur, & se ioignant en mesme instant avec la raison se rassure. Voila comme l'imagination de l'homme s'esleue sur celle des bestes, & pourquoy ie la mets au rang des puissances nobles de l'ame. Les Arabes l'ont tellement exaltee, qu'ils ont creu que l'ame, par la vertu de l'imagina-

Cinquieme.

Sixiesme.

Vertus
de l'ima-
ginatiō.

tion pouuoit faire des miracles, percer les cieux, forcer les elemens, planer les monts, & monter les plaines: bref qu'elle tenoit sujettes & sous son empire toutes les formes materielles. ils appelloient ces ames ennoblies: C'est donc la premiere puissance de l'ame que l'imagination.

L'intellect suit apres qui s'esueille par le rapport de l'imagination, qui rend les choses sensibles, vniuerselles, qui discourt & prend les conclusions, qui procede des effets aux causes, & des commencemens, par les moyens, iusques aux fins. Les Philosophes ont distingué cet intellect au passible, & à l'agent: le passible ou patient est celuy qui reçoit les especes toutes pures & depouillees de leur matiere, & qui

La secō.
de puis-
sance de
l'ame,
qui est
l'intel-
lect.

Intel-
lect pas-
sible.

L'agent.

La raisõ.

est comme le sujet de toutes les formes: l'agent est comme vne lumiere qui esclaire & parfait le patiẽt: de sorte que l'vn sert comme de matiere, & l'autre de forme; & de tous deux est faite la raison, partie souueraine de l'ame, particuliere à l'hõme, qui peut beaucoup sans le corps, & à qui le corps sert bien souuent d'empeschement; seule immaterielle, impassible, immortelle, differente des sens & de toutes actions corporelles, pour ce que le sens se corrompt par vn object excellent, comme l'ouye par vn son impetueux, le goust par vne saueur extreme, la veüe par vne blancheur excessiue, tescmoin en est le Ty.

Comme
la raisõ
differe
des sens.

ran de Sicile, qui auẽgloit par cet artifice tous ses prisonniers; mais l'entendement,

plus l'object est excellent, plus il se rend parfait & s'ennoblit, la contemplation des choses hautes & diuines le raut, c'est son plus grand contêtement, c'est tout son souuerain bien. C'est ceste seule puissance qui croist à mesure que le corps decline, qui montre sa vigueur lors que les mēbres defaillēt, qui se tend & roidit lors que tous les sens sont laschez, qui voltige par l'air & se pourmene par l'vniuers lors q̃ le corps est immobile, qui nous fait en dormant bien souuent voir quelques rayons de sa diuinité, predisant les choses futures, & si elle n'est estouffee des vapeurs gourmandes, s'esleue par dessus tout le monde, & par dessus sa nature propre voit la gloire Angelique & les mysteres du ciel. En fin la

La me-
moire.

Des maladies melancholiques,
raison ayant voltigé par tout,
discouru & cōceu vn million
de belles idees, ne les pouuant
plus retenir, les donne en gar-
de à la memoire, qui est la fi-
dele greffiere, où sont mis
cōme en depost tous les plus
precieux thresors de l'ame;
c'est ceste riche thresoriere qui
enferme en vn seul cabinet
toutes les sciences, & tout ce
qui s'est passé depuis la creatiō
du monde, qui loge tout sans
rien confondre, qui remar-
que le temps, les circonstan-
ces, & l'ordre, & qui est (com-
me dit Platon) vn reseruoir du
flux perpetuel de l'entende-
ment: ceste puissance se nom-
me reminiscence, & est parti-
culiere à l'homme: car les be-
stes ont bien quelque espece
de memoire, mais elles ne se
resouuiennent pas du temps,

de l'ordre & des circonſtan-
ces, cela ne ſe peut faire ſans
ſyllogiſme. Voila donc l'ame
de l'homme accompagnée de
ces trois puiffances nobles, de
l'imagination, de la raiſon, &
de la mémoire, qui ſe ſont tou-
tes trois logees en vn meſme
Palais, & dans ceſte tour ron-
de que nous appellons teſte:
mais ſi c'eſt par tout le cerueau
egalement, ou ſi chacune a ſa
chambre à part, on n'en eſt pas
trop reſolu. Je ſçay biẽ qu'il y a
vne grande querelle entre les
Medecins Grecs & Arabes Opiniõs differen-
pour les logis de ces trois prin- tes tou-
ciſſes, & qu'õ ne les a point en- chant le
cores peu accorder. les Grecs ſiege de
les veulẽt loger par tout le cer- ces trois
ueau; les Arabes dõnent à cha- puiffan-
cune ſon quartier: les Grecs ces.
ſouſtiennent que par tout où
eſt la raiſon, l'imagination

Les oreilles
les loger
par tout
le cer-
veau.

l'accompagne, & la memoire
aussi, & que toutes trois sont
aussi bien au deuant qu'au der-
riere: bref, qu'elles sont tou-
tes par tout le cerueau, & tou-
tes en chaque partie d'celuy.
Ils alleguēt pour vne de leurs
principales deffenses, que l'a-
ction similaire est toute par
tout son subiect, comme la
nourriture est par tout l'os
egalement, & en quelque par-
tie de l'os que ce soit tu y trou-
ueras tousiours ces quatre fa-
cultez, l'attractrice, retentri-
ce, concoctrice, & expultrice.

Opiniō
des Ara-
bes con-
traire.

Raison.

Les Arabes veulent au con-
traire que chacune de ces puis-
sances ait son siege particu-
lier: il y a de fort belles raisons
pour leur party. Premieremēt
il est tout certain qu'il y a plu-
sieurs chambretes dans le cer-
veau, que les Anatomistes

appellent ventricules; ces chambres ne sont pas inutiles, & ne peut-on penser qu'elles soient faites pour autre vſage que pour loger ces trois puissances; l'imagination doit estre logee aux premieres, la raison à celle du milieu, la memoire à celle du derriere: l'apparence y est fort grande; car l'imagination reçoit tous les objets sensibles, elle doit donc estre fort pres du sens: or est-il que tous les sens sont au deuant de la teste; l'imagination presente tous ces objets à la raison qui les rend immateriels & vniuersels, il faut donc la loger de suite. La raison s'estant quelque temps seruie de ces belles idees, les donne en garde à la memoire; il faut donc qu'elle soit au derriere & comme dans son

Seconde cabinet. D'avantage, l'imagination se faisant par reception doit avoir son siege en la plus molle partie du cerueau, d'autant que l'impression des images se fait plus aisément en vn corps mol ; la memoire qui doit retenir & cōseruer les especes, demâde vne partie plus dure, autrement l'image seroit aussi tost effacee, que tracee: la raison cōme la plus noble doit estre logee en la partie du cerueau qui est la plus tēperée. Or il n'y a point de doute que la partie anterieure du cerueau ne soit la plus molle, celle du derriere la plus dure, & celle du milieu la plus temperee: il faut donc croire que l'imagination est au milieu, & la memoire au derriere.

Troisiesme.

Les Philosophes qui ont écrit de la physiologie, disent

que ceux qui ont le derriere de la teste bien eminent ont la memoire fort heureuse : ceux qui ont le front grand, fort esleué & comme en bosse, ont l'imaginative tres-belle : & ceux à qui les deux eminences deffailent, sont stupides, sans imagination & sans memoire. Si nous voulons (dit Aristote en ses Problemes) ^{Quatriesme.} bien imaginer, nous ridons le front & le retirons en haut : si nous voulons nous resouvenir de quelque chose, nous baissions la teste & nous frottons au derriere, qui monstre bien que l'imagination est au deuant, & la memoire au derriere. On a bien souuét remarqué que le derriere de la teste ^{Cinquieme.} estant blessé, la memoire s'en est perduë tout à l'instant. l'adiousteray pour fortifier

Sixies-
me.

le party des Arabes , que la forme & capacité des ventres du cerueau semble montrer au doigt le siege de ces trois puissances. Le quatriesme ventre a la forme pointuë , afin que les especes soient plus vnies , & que la reflexion se puisse mieux faire au troisieme, où est la raison : les deux premiers sont les plus capables , pource qu'ils reçoivent les premiers objets qui ne sont pas encore purifiez : celui du milieu estoit le plus propre pour la raison, d'autant qu'elle pourroit receuoir les images des deux premiers, & les ayât oubliées les rechercher cōme dans ses plus secrets archifs au dernier. En fin ce qui a fait opiniastrer les Arabes de soutenir que ces trois puissances auoient leur logis à part, est

Septies-
me.

qu'ils ont souuent remarqué qu'une des trois pouuoit estre offensée, sans que l'autre le fust; l'imagination est bien souuent deprauee la raison demeureât en son entier: & au cōtraire; combien y a-il de phrenetiques & de mélancholiques, qui discourent tresbien avec leurs foles & vaines imaginations? Galien recite deux histoires de deux phrenetiques, l'un desquels auoit l'imagination troublee & la raison du tout entiere, l'autre auoit l'imagination entiere & la raison troublee. Nous en voyōs vne infinité qui perdēt du tout la memoire, & ne laissent pas de bien discourir. Thucydide raconte qu'en ceste grande peste qui depeupla quasi toute la Grece, il y en eut plus d'un million qui oublierent tout

iusques à leur nom propre, & pour cela ils ne deuindrent pas fols. Messala Coruin fortant d'une maladie n'eut pas souuenance de son nom propre. Trapezonce fut fort sçauant estant ieune, mais approchant de sa vieillesse oublia tout entierement. Puis donc qu'une de ces puissances peut estre separemēt offensee, il faut croire qu'elles ont chacune leur siege particulier. Si c'estoit à moy à vuidier ceste querelle, ie dirois q̃ les Grecs ont plus subtilemēt philosophé, & que leur opinion est la plus veritable: mais que celle des Arabes sera tousiours la plus suiuiue du vulgaire pour auoir plus d'apparence. Je n'enfonceray pas ceste dispute plus auant: il me suffit de faire voir que l'ame a trois puissances nobles

Conclu-
sion.

qui logent toutes dans le cer-
veau, qui fôt paroistre l'hōme
admirable sur toutes les crea-
tures, qui le rendēt capable de
gouverner tout le monde, &
qui luy donnent le tiltre d'ani-
mal sociable ou politique.

*Que cest animal plein de diuinité
s'abaisse par fois tellement, &
se depraue par vne infinité
de maladies, qu'il deuient
comme beste.*

CHAP. II.



E viens d'esleuer l'hō.
me iusqu'au plus haut
degré de sa gloire, le
voila le plus accom-
ply d'entre tous les animaux,
ayant comme i'ay dit, en son
ame grauee l'image de Dieu,
& en son corps le modele de

Misere
de l'hō-
me.

l'vniuers. le le veux maintenāt
repræsenter le plus chetif &
miserable animal du monde,
despouillé de toutes ses gra-
ces, priué de iugement, de rai-
son, & de conseil, ennemy des
hommes & du Soleil, errant
& vagabond par les lieux soli-
taires: bref tellement depra-
ué qu'il n'a plus rien de l'hom-
me, & n'en retient que le nom
seul. Ceste deprauation se voit
bien souuent en l'ame seule, le
corps demeurant sain & sans
tache: comme quand l'hom-
me, par sa malicieuse volonté
deuenu apostat, efface le diuin
charactere, & vient avec l'or-
dure du peché polluer le saint
temple de Dieu, quand par vn
appetit desreglé il se laisse tel-
lement transporter à ses pas-
sions, comme à la cholere,
haine, & gourmandise, qu'il
deuiant

Depra-
uatiō de
l'ame
seule.

deuiét plus furieux qu'un lion,
plus inhumain qu'un tygre,
plus ord & vilain qu'un por-
ceau. Je n'entreprends point de
corriger ceste deprauation, ie
laisse ce discours aux Theolo-
giés; Qu'on lise la Philosophie
morale, on y trouuera de fort
beaux enseignemés pour mo-
derer ces folles passions. Je
viens à l'autre deprauatiō qui
est forcee, & qui peut arriuer
aux plus religieux, quand le
corps, qui est comme le vais-
seau de l'ame, est tellement al-
teré & corrompu, que toutes
ses plus nobles puissances en
sont depraues, les sens pa-
roissent tous esgarez, les mou-
uemens desreglez, l'imagina-
tion troublee, les discours fols
& temeraïres, la memoire du-
tout volage. La premiere de-
prauation merite chastiment;

Depra-
uation
qui viē
par le vi-
ce du
corps.

Mala-
dies qui
attaquē
l'ame.

Des maladies melancholiques,
comme estant malicieuse &
volontaire: mais celle-cy qui
vient par force & est causée de
la violence des maladies, me-
rite qu'un chacun en aye com-
passion. Or les maladies qui
assaillent plus viuement nostre
ame, & qui la rendent prison-
niere aux deux puissances in-
ferieures, sont trois, la phrene-
sie, manie, & melâcholie. Con-
temple les actions d'un phre-
netique, ou d'un maniaque, tu
n'y trouueras riē de l'homme;
il mord, il hurle, il mugle vne
voix sauuage, rouē ses yeux
ardens, herisse ses cheueux, se
precipite par tout, & bien sou-
uent se tuē. Regarde comme
vn melancholique se laisse par-
fois tellement abaisser, qu'il
se rend compagnon des be-
stes, & n'aime que les lieux
solitaires: le m'enuai te le

pourtraire au vif, & tu iugeras
lors quel il est. Le vray me- Belle de-
lancholique (i'entens celuy scriptiō
qui a la maladie au cerueau) du melā-
est ordinairement sans cœur, choli-
que,
toufiours craintif & tremblot-
tant, ayant peur de tout, &
se faisant peur à soy-mefme,
comme la beste qui se mire;
il veut fuir & ne peut marcher,
il va par tout fouspirant &
fanglottant avec vne triftesse
infeparable qui se change sou-
uent en defefpoir, il est en per-
petuelle inquietude de corps
& d'esprit, il a les veilles qui
le confument d'vn costé, &
le dormir qui le bourrelle de
l'autre; car s'il pense donner
tréue à ses passions par quel-
que repos, auffi tost qu'il veut
fermer la paupiere le voila af-
faily d'vn million de phan-
toīmes & spectres hydeux, de

Des maladies melancholiques,
fantasques chimeres, de songes effroyables; s'il veut appeller quelqu'un à son secours la voix s'arreste tout court, & ne peut parler qu'en begayât: il ne peut viure en cōpaignie; bref c'est vn animal sauuage, ombrageux, soupçonneux, solitaire, ennemy du Soleil, à qui rien ne peut plaire que le seul desplaisir qui se forge mille fausses & vaines imaginations.

Or iuge maintenant si les titres que j'ay donné cy deuant à l'homme, l'appellant animal diuin & politique, peuuent compatir avec le melancholique. Ne pense point pour tout cela (ô Athee) conclure que nostre ame souffre quelque chose en son essence, & par cōsequent qu'elle soit corruptible: elle ne s'altere iamais, &

Contre
les Athees
qui pensent l'ame mortelle.

ne peut rien patir, c'est son organe qui est mal disposé. Tu le pourras, si tu le veux, entendre, par la comparaison du Soleil: tout ainsi comme le Soleil ne sent iamais diminution en sa clairté, encore qu'il sēble souuent s'obscurcir & s'eclipser, mais c'est ou l'espaisseur des nuës, ou la Lune qui se met entre deux: ainsi nostre ame semble souuēt patir, mais c'est son instrumēt qui n'est pas bien disposé. Il y a vn beau texte dans Hippocrate à la fin du premier liure de la diete, qui merite d'estre graué en lettres d'or. Nostre ame (dit il) ne se peut changer en son essence, ny par le boire, ny par le manger, ny par aucū excez, il faut rapporter la cause de toutes ses alterations, ou aux esprits avec lesquels elle se mesle, ou aux vais-

Beau
passage
pour
l'immo-
rtalité.

Des maladies melancholiques,
seaux par lesquels elle s'escou-
le. Or l'organe de ces puissan-
ces nobles est le cerueau, qui
est consideré du Medecin, ou
comme partie similaire, & sa
santé cōsiste en la bonne tem-
perature; ou cōme organique,
& sa santé gist en la conforma-
tion louable de son corps &

Pour les des cautez. Toutes les deux
a ctions sont necessaires pour l'exerci-
de l'ame ce de ces trois facultez: Il est
la tem- perature & la cō-
forma- tiō sont requises.
formation, & en vn liure tout
entier soustient fort & ferme
que les mœurs de l'ame suiuent
la temperature du corps, tu le

Les
mœurs
naturel-
les se
peuent
corriger
par les
acqui-
ses.
verras au chapitre suiuant. Je
ne veux pas toutesfois tant
attribuer à la temperature ou
à la conformation, qu'ils puis-
sent du tout forcer nostre
ame; car ces mœurs qui sont

naturelles & cōme nees avec nous, se peuvent corriger par les mœurs que les Philosophes nomment acquises. L'histoire de Socrate le fait assez paroistre. Zopyre grand Philosophe qui se mesloit de iuger & cognoistre à la simple veüe, les mœurs d'vn chacun, comme il eut vn iour contemplé Socrate lisant, estant fort importuné de tous les assistās de dire ce qu'il luy en sēbloit, respondit en fin qu'il l'auoit reconnu pour le plus corrompu & vitieux homme du monde. Le rapport en fut soudain fait à Socrate par l'vn de ses disciples, qui se moquoit de Zopyre. Lors Socrate par admiration s'escria, ô le grand Philosophe, il a du tout reconnu mes humeurs; j'estois de mon naturel enclin à tous ces

Histoire
re tres-
belle de
Zopyre
& de
Socrate.

Des maladies melancholiques,
vices, mais la philosophie morale m'en a destourné; Et à la verité Socrate auoit vne teste fort lōgue & mal figuree, le visage difforme, le nez retroussé. Ces mœurs donc naturelles qui viennent de la temperature & conformation du corps, pourueu que ces deux vices ne soient excessifs, comme aux melancholiques, peuvent estre domptees & corrigees par les mœurs que nous nous acquerons par la philosophie morale, par la lecture des beaux liures, & par la frequentation des hommes vertueux.

Qui sont ceux qu'on appelle melancholiques, & comment on doit distinguer les melancholiques malades d'avec les sains.

CHAP. III.

TOVS ceux que nous appellons melâchologiques ne sont pas trauallez de ceste miserable passion, qu'on appelle melancholie: il y a des complexions melancholiques qui sont dans les bornes & limites de la santé, laquelle (si nous croiôs les anciens) a vne fort grande estendue. Il faut donc pour traicter ce subiect methodiquement distinguer premierement toutes les differences des melancholiques, afin que la similitude des noms ne trouble la suite de nostre discours. C'est ^{il y a} vne chose toute resoluë en la ^{quarr} medecine, qu'il y a quatre hu- ^{humeurs} meurs en nostre corps, le sang, ^{en nos} le phlegme, la colere, & l'hu- ^{corps.}

Des maladies melancholiques,

meur melancholique, qui se trouuent en tout temps, en tout aage, & en toute saison meslees, & confuses ensemble dans les veines, mais inegalement: car tout ainsi qu'on ne peut trouuer vn corps auquel les quatre elemens soient egalelement mixtionnez, & qu'il n'y a point de temperament au monde auquel les quatre qualitez contraires soient en tout & par tout egales, mais il faut qu'il y en ait tousiours vne qui surpasse: ainsi ne se peut-il voir vn animal parfait auquel les quatre humeurs soient egalelement mixtionnees, il y en a tousiours vne qui domine, c'est celle qui donne le nom à la complexion: si le sang surpasse les autres on appelle ceste complexion sanguine; si le phlegme, phlegma-

Il y a
tousiours vne
humeur
qui domine.

tique; si la cholere, cholerique ou bilieuse; si la melancholie, melancholique. Ces quatre humeurs si elles ne sont par trop excessiues, peuuent fort aisémēt compatir avec la santé, car elles n'offensent pas les actions du corps sensiblemēt. Il est bien vrāy que chaque complexion produit ses effers differēs, qui rendent les actiōs de l'ame plus viues ou plus pesantes. Les phlegmatiques sont ordinairement stupides & lourds, ont le iugement tardif, & toutes les puissances nobles de l'ame comme endormies, pource que la substance de leur cerueau est trop crasse, & les esprits qui s'y engendrent trop grossiers: ceux là ne sont point propres aux grandes charges, ny capables des belles sciences; il ne leur

Effets
de l'hu-
meur
phleg-
matique

Des maladies mélancholiques,

La complexion sanguine à quoy est propre.

faut qu'un liêt & vne marmite. Les sanguins sont nais pour la société. ils sont quasi toujours amoureux, aiment à rire & à plaisanter: c'est la plus belle complexion pour la santé & pour viure longuement, d'autant qu'elle a les deux principes de la vie, qui sont la chaleur & humidité, mais ils ne sont pas si capables des grandes charges, ny des hautes & difficiles entreprises, pource qu'ils sont impatiens, & ne peuuent s'occuper long temps à vne chose, estâs ordinairement distraits par les sens & par les delices auxquelles naturellemēt ils sont adonnez. Les bilieux ou cholériques pour ce qu'ils sōt chauds & secs, ont l'entendement subtil & plein de gentiles inuentions: mais ils ne s'en foncent

Les cholériques à quoy sont propres.

guerres aux profondes contemplatiōs, il ne leur faut pas mettre en main des affaires où la longueur & le trauail du corps y soient requis, ils n'y sçauroient vaquer; le corps & les esprits les empeschēt: leurs esprits sont dissipables pour la ténuité, & leurs corps debiles ne peuuent endurer longues veilles: i'adiousteray ce que dit Aristote en ses Morales, qu'ils aiment la variété des obiects, & pour ceste occasion ne sont pas si propres aux deliberations d'importance. Les melancholiques sont tenus pour les plus capables des grandes charges & hautes entreprises. Aristote en ses Problemes escrit que les melancholiques sont les plus ingenieux, mais il faut entendre sainemēt ce passage,

Les melancholiques ingenieux,

trois es-
peces de
melan-
cholie.

car il y a plusieurs especes de melancholie; il y en a vne qui est du tout grossiere & terrestre, froide, & seiche; il y en a vne autre qui est chaude & aduste, on la nomme *atrabilis*; il y en a encores vne qui est meslee avec vn peu de sang, ayât toutesfois plus de seiche- resse q̃ d'humidité. Celle qui est froide & terrestre, rend les hommes du tout grossiers & tardifs en toutes leur actions & du corps & de l'ame, timides, paresseux, & sans entendement, on l'appelle melancholie asinine: celle qui est chaude & bruslee rend les hōmes furieux & incapables de toutes charges. Il n'y a donc que celle qui est meslee avec vn peu de sang qui rende les hommes ingenieux, & qui les face exceller sur les autres, les

raisons y font toutes claires: ^{Pour}
le cerueau de ces melancho- ^{quoy les}
liques n'est ny trop mol, ny choli- ^{melan-}
trop dur, il est vray que la sei- ^{ques sōi}
cheresse y domine. Or Hera- ^{inge-}
clite disoit souuent que la lu- ^{nieux.}
miere seiche rédoit l'ame plus
sage: il y a fort peu d'excremēs
en leur cerueau, les esprits en
font plus nets, & ne se dissipēt
pas aisement, ils ne sont gue-
res destournez de leurs sens;
leur imagination est fort pro-
fonde, la memoire plus fer-
mé, le corps robuste pour en-
durer le trauail, & quand ce-
ste humeur s'eschauffe par les
vapeurs du sang, elle faiēt
comme vne espee de saincte
fureur, qu'on appelle enthou-
siasme, qui faiēt philosopher,
poëtiser, & prophetiser: de sor-
te qu'elle semble auoir quel-
que chose de diuin. Voy-

Des maladies melancholiques,
la les effects des quatre complexions, & comme elles peuvent toutes quatre estre dans les limites de la santé. Ce n'est pas donc de ces melancholiques sains que nous voulons parler en ce discours: nous traitterons seulement des malades, & de ceux qui sont travaillez de ceste passion, qu'on appelle melâcholique, laquelle ie m'en vai descrire.

*Definition de la melancholie, &
toutes ses differences.*

CHAP. IIII.

DES maladies prennent cōmunément leur nom ou de la partie qu'elles attaquent, ou de quelque fascheux accident qui les accompagne, ou de la cause qui les engēdre:

La melancholie est au rang de ces derniers: car ce nom luy a esté donné pource qu'elle est causée d'une humeur melancholique. Nous la définirons avec les bōs auteurs, vne espeece de resuerie sans fieure, accompagnée d'une peur & tristesse ordinaire, sans aucune occasion apparēte. La resuerie tient en ceste definition le nom de gēre, les Grecs l'appellent plus proprement *Ἰσχυρομανία*, les Latins *delyrium*. Or il y a deux fortes de resuerie, l'une est avec fieure, l'autre sans fieure: celle qui est avec fieure, ou est continuē & traueille tousiours le malade, ou elle le reprend par intervalles: la continuē se nomme propremēt phrenesie, qui viēt ou par l'inflammation du cerueau & de ses membranes, ou

D'ou est ce que la melancholia pris son nom.

Differēce de resuerie,

Des maladies melancholiques,
par l'inflammatiō du diaphragme ; c'est pourquoy les anciens Grecs le nommoient *Φέρες* : celle qui donne relasche arriue ordinairement aux fieures ardentes & à la vigueur des fieures tierces, on l'appelle *Φέρις*. L'autre espee de resuerie est sans fieure, qui est ou avec rage & furie, on la nōme manie: ou avec peur & tristesse, & s'appelle melācholie. La melancholie doncques est vne resuerie sans fieure avec

Qu'est-
ce que
resuerie.

peur & tristesse. Nous appel-
lons resuerie lors qu'une des
puissances nobles de l'ame,
cōme l'imagination, ou la rai-
son, sont deprauees. Tous les
melācholiques ont l'imagina-
tion troublee, pource qu'ils se
forment mille fantasques chi-
meres, & des obiects qui ne
sont pas: ils ont aussi bien sou-

uent la raison deprauee. Il ne faut donc pas douter q̄ la melancholie ne soit vne resuerie, mais elle est ordinairement sans feure, pource que l'humour est seiche, & a ces deux qualitez froideur & seicheresse, qui resistent du tout à la pourriture: de sorte qu'il n'y peut exhaler nō plus que des cēdres aucune vapeur pourrie qui puisse estre apportee au cœur pour y allumer la feure. La peur & la tristesse sont accidents inseparables de ceste miserable passion pour les raisons que ie deduiray au chapitre suyuant. Voila la melancholie descrite comme vn symptome ou accident, qui se rapporte à l'actiō blessée, c'est à sçauoir à l'imagination & raison deprauee. Cet accidēt est cōme vn effect de quelque cause, & depend

Pour-
quoy la
melan-
cholie
est sans
feure.

Des maladies melancholiques,
immédiatement d'une mala-
die; car comme l'ombre suit le
corps, ainsi le symptome suit
& accôpaigne la maladie. Tous
les Medecins Grecs & Arabes
pensent que la cause de cet ac-
cident est vne maladie similai-
re, c'est à sçauoir l'intempera-
ture froide & seiche du cer-
ueau. Le cerueau donc est la
partie offensée, non pas en sa
côformation, car il n'y a point
de tumeur contre nature, ses
ventres ne sont ny pressez, ny
remplis comme à l'apoplexie
& au haut mal, mais en sa pro-
pre substance & temperature;
son temperament est alteré, il
est par trop desleiché & refroi-
dy. Hippocrate en ses Epide-
mies & aux Aphorismes l'a
tres-bié remarqué. Les epilep-
tiques (dit-il) deuiennēt sou-
uent melancholiques, & les

La me-
lancho-
lie est v-
ne mala-
die simi-
laire.

Le cer-
ueau est
offencé
en sa té-
peratu-
re.

Cōment
les me-
lancho-
liques
deuien-
nēt epi-
lepti-
ques.

melancholiques epileptiques, selon que l'humeur melancholique occupe les ventres ou la substance du cerueau, si ceste humeur altere la temperature qu'il appelle l'ame (pource qu'il semble que les àctiōs plus nobles de l'ame s'exercent par ceste temperature) sans doute il causera la melancholie: mais si elle se respand dans les ventres & cauitez du cerueau, fera le haut mal, d'autant que les ventres estans pressezz, & l'esprit ne pouuāt aller libremēt aux nerfs, le cerueau se retire, & tire quant & soy sa grand queue d'où viennent tous les nerfs, qui est cause de ceste contraction vniuerselle. Je croy que la definition de la melancholie est assez esclaircie par ce petit discours: venons maintenant à ses disse-

Differē-
ces de la
melan-
cholie. rences . Il y a trois differences
de melancholie : l'une vient
par le vice propre du cerneau,
l'autre vient par sympathie de
tout le corps , quand tout le
temperament & toute l'habi-
tude est melancholique ; la
derniere vient des hypochon-
dres , c'est à dire des parties
qui y sont contenuës, mais sur-
tout de la rate , du foye , & du
mesentere . La premiere s'ap-
pelle absoluëment & simple-
ment melancholie , la dernie-
re avec addition se nomme
melancholie hypochondria-
que ou venteuse ; La premiere
est la plus fascheuse de tou-
tes, travaille continuellement
son subject , & luy donne fort
peu de relasche : l'hypochon-
driaque ne le traite point du
tout si rudement, elle a ses pe-
riodes , & fait bien souuent

tréue avec son malade. La premiere a plusieurs degrez de malice : si elle n'a rien d'extraordinaire ne chāgera point son nom ; mais si elle deuient du tout sauuage elle s'appellera lycanthropie : si elle vient de ceste rage & violente passion qu'on nomme Amour, erotique. L'hypochondriaque aussi a ses degrez, il y en a de bien legeres, il y en a de bien violentes. Or ie traiçteray de toutes ces especes par ordre, cōmençant à celle qui a son siege dās le cerueau.

De la melancholie qui a son propre siege au cerueau, de tous les accidens qui l'accompagnent : Et d'ou viennent la peur, la tristesse, les veilles, les songes horribles & autres symptomes.



Les acci-
dents qui
suyuent le
melan-
cholicque

A melancholie qui vient par l'intemperature seiche & froide du cerueau, est ordinairement accompagnée de tant de diuers & faicheux accidens, qu'elle doit esmouuoir vn chacun à compassion; car le corps n'en est pas seulement transi, mais l'ame en est encôres plus gehennée. Voicy tous les tyrâs & bourreaux du melancholicque; la peur l'accompagne tousiours, & le saisit par fois d'un tel estonnement, qu'il se fait peur à soy-mesme; la tristesse ne l'abandonne iamais, le soupçon le talonne de pres, les soupirs, les veilles, les songes effroyables, le silence, la solitude, la honte, & l'horreur du So-

du Soleil, sont comme acci-
dés inseparables de ceste mi-
serable passion. Icy nous a-
uons vn beau champ pour
philosopher : ie m'en vai
pour plaisir esgayer à recer-
cher toutes les causes de ces
accidens, commençant à la
peur. Les plus grands Mede-
cins sont en dispute d'où
vient ceste frayeur des melā-
choliques. Galien rapporte
tout à la couleur de l'humeur
qui est noire, & pense que les
esprits estans rendus sauua-
ges, & la substance du cer-
ueau cōme tenebreuse, tous
les obiects se representent
hideux, l'ame est en perpe-
tuelles tenebres. Et tout ainsi
comme nous voyons que la
nuict apporte de soy quel-
que effroy, non seulement
aux enfā, mais quelquefois

Pour-
quoy les
melan-
choli-
ques ont
tous-
iours
peur.

Raisō de
Galien.

Auer-
rhoës se
moque
de Galie.

La cou-
leur n'est
point
cause de
la peur.

Raison
premie-
re.

Secôde.

Des maladies melancholiques,
aux plus asseurez, ainsi les
melancholiques ayans dans
leur cerueau vne continuel-
le nuict sont en crainte per-
petuelle. Auerrhoës plus sub-
til Philosophe que grãd Me-
decin, & ennemy iuré de Ga-
lien, se moque de ceste rai-
son. La couleur (dit-il) ne
peut estre cause de ceste
peur, pource que la couleur
ne peut alterer que l'œil, &
est seulement object de la
veüe, l'ame ne peut voir sans
les yeux. Or il n'y a point
d'yeux dans le cerueau; com-
me donc se pourra elle trou-
bler de la noirceur de l'hu-
meur melancholique, puis
qu'elle ne la peut voir? J'ad-
iousteray pour renforcer le
party d'Auerrhoës, que tant
s'en faut que la couleur noi-
re soit cause de ceste peur
aux melâcholiques, que c'est

la couleur qu'ils aiment le plus, ils sont ennemis du Soleil & de la lumiere, s'uyuent les tenebres par tout, recherchent les lieux vmbreux, marchent bien souuent la nuict, & avec plus d'assérance que le iour. D'auantage la manie est causee d'une humeur aussi noire que la melancholie, car l'humeur atrabilaire est toute noire, & luisante comme de la poix, qui peut noircir tout de mesme les esprits & le cerueau. Or est-il que les maniaques ne sont nullement craintifs, ils sont hardis & furieux, n'appréhendent aucun danger, se precipitent au trauers des flammes & des cousteaux. En fin si le noir nous espou-
Troisième.
Quatrième.

Opiniõ
d'Auer-
roes.

Des maladies melancholiques,
dis; or est il q̃ ceux qui abon-
dent en phlegmes sont ordi-
nairement timides : La cou-
leur doncques ne peut estre
la cause de ceste peur. Il faut
(dit Auerrhoës) que ce soit
la temperature de l'humeur
melancholique, qui est froi-
de, & qui produit des effects
contraires à la chaleur. Le
chaud rend les hommes har-
dis, remuans, & precipitez
en toutes leurs actions : le
froid au contraire les rend
timides, pesants, & mornes.
Tous ceux qui sont d'un té-
perament froid deuiennent
craintifs: les vieilles gens or-
dinairement sont timides, &
les eunuques aussi: les fêmes
sont tousiours plus padureu-
ses que les hommes, bref les
mœurs de l'ame suiuent le té-
perament du corps. Voila

cès deux grands personnages bien differés en opiniõ;
ie pense qu'on les pourra ac- Opiniõ
de l'aut-
heur.
corder si on ioint ces deux
causes ensemble, la tempera-
ture de l'humeur comme la
principale, & la couleur noi-
re des esprits cõme celle qui
peut beaucoup aider. L'hu-
meur melancholique estant
froide refroidit non seule-
ment le cerueau, mais aussi le
cœur, qui est le siege de ceste
puissance courageuse, qu'on
nõme irascible, & abbat son
ardeur; de là vient la crainte:
la mesme humeur estant noi-
re rend tous les esprits ani-
maux qui doiuent estre purs,
subtils, clairs & lumineux, les
réd, dy-ie, grossiers, obscurs,
& comme tous enfumez: or
l'esprit estant le premier &
principal instrument de l'a-

Des maladies melancholiques,
me, s'il est noircy & refroidy
tout ensemble, trouble ses
plus nobles puissances, & sur
tout l'imagination, luy re-
presentant tousiours des es-
peces noires, & des visions
estranges qui peuuent estre
veües de l'œil encorés qu'el-
les soient au dedans. C'est
vne subtilité qu'on n'a (peut-
estre) encorés apperceue, &
laquelle sert infiniment pour
la defféce de Galien: l'œil ne

Que no^r
pouuons
voir
quelque
chose au
dedans.

voit point seulement ce qui
est dehors, il voit aussi ce qui
est au dedans, encorés qu'il
le iuge externe. Ceux qui
ont quelque commencement
de suffusion voyét plusieurs
corps voletans comme for-
mis, mousches & poils lōgs,
ceux qui vomissent de mes-
me. Hippocrate & Galien
entre les signes du flux de

sang critique , mettent ces visions faulles , on voit des corps rouges par l'air, qui n'y sont pas pourtât, car vn chacun les verroit ; c'est vne vapeur interieure qui se represente au crystalin selõ sa propre couleur ; si elle vient du sang paroist rouge , si de la cholere ; iaune : pourquoy donc la vapeur de l'humeur melancholique, & des esprits qui sont tous noirs ne se pourra-elle voir en sa propre couleur & se presenter ordinairement à l'œil , & puis à l'imagination ? Le melancholique peut voir ce qui est dans son cerueau, mais c'est sous vne autre espece, pour ce que les esprits & vapeurs noires vont continuellemēt par les nerfs, veines & arteres du cerueau iusques à l'œil,

Des maladies melancholiques,
qui luy font voir plusieurs
ombres & phâtosmes en l'air,
de l'œil les especes sont rap-
portees à l'imagination, qui
les ayant quasi tousiours pre-
sentes demeure tousiours en
effroi. Ce qui me fait ioindre
la couleur noire avec la tem-
perature, est, que bien sou-
uent le cerueau est refroidy,
& toutesfois on n'a ny ceste
peur, ny ces spectres hydeux.
Le phlegme est encores plus
froid que l'humeur melan-
cholique, & cependant il ne
trouble pas l'imagination,
pource que sa blancheur a
quelque similitude avec la
substâce du cerueau, & avec
la couleur & clairté des es-
prits; mais l'humeur melan-
cholique en est du tout en-
nemie. Nos esprits ont la
froideur & les tenebres pour

L'hu-
meur
melan-
choliq
du tout
contrai-
re à nos
esprits.

Et du moyen de les guarir. 125
aduersaires, s'étans le froid ils
se retirét au dedans, & com-
me les tenebres arriuét s'en-
fuiét en leur citadelle, aban-
donnent les extremitez, &
nous font dormir; l'humeur
melâcholique a to^r les deux,
elle est froide & tenebreuse;
il ne se faut donc pas eston-
ner si elle trouble les puis-
sances nobles de l'ame; puis-
qu'elle infecte & noircit son
principal organe qui est l'es-
prit, lequel allant du cerueau
à l'œil, & de l'œil au cerueau,
peut faire ces visions noires
& les représenter tousiours
à l'ame. Voila le premier ac-
cident des melancholiques:
ils ont tousiours peur, crai-
gnent tout, mesme ce qui est
le plus assésuré, sôt sans cœur,
honorent leurs ennemis &
abusent de leurs amis, appre-

Des maladies melancholiques,

hendent la mort, & toutes-
fois (ce qui est eſtrâge) la de-
ſirent ſouuent, iuſques à ſe
precipiter eux meſmes; mais
c'eſt lors que la crainte ſe
tourne en deſeſpoir, il eſt
vray que cela n'arriue point
ſi ſouuent aux melancholi-

Les ma-
niaques
ſe tuent
plus ſou-
uent que
les melā-
choli-
ques.

ques cōme aux maniaques.
Nous auōs fort peu d'exem-
ples des vrais melācholiques
qui ſe ſoient tuez, mais des
furieux il ſ'en trouue beau-
coup, & des plus grands per-
ſonnages. Empedocle Agri-
gentin deuenu maniaque ſe
precipita dans les flammes
du mont *Ætna*. Ajax Tela-

Exem-
ples.

monié deuenu forcené pour
ce qu'on luy auoit reſuſé les
armes d'*Achille*, & qu'on les
auoit adjuſſees à *Vlyſſe*, paſſa
vne partie de ſa rage ſur tout
le beſtail qu'il trouuoit, pen-

fant tuer Vlyffe & tous ses compagnons. Cleamenes insensé se tua de son propre glaive. Orestes ayant tué sa mere Clytemnestra, fut tellement agité de sa manie, que si son amy Pylades ne l'eust soigneusement gardé il se fust cent fois precipité. Il arriue donc plus souuent aux maniaques qu'aux melancholiques de se tuer.

Le second accidēt qui n'abandonne gueres les melancholiques est la tristesse, ils pleurent & ne sçauent de quoy: ie croy que l'intemperature del'humeur en est cause: car comme la ioye vient de chaleur & d'humidité temperées, ainsi la tristesse vient des deux qualitez contraires qui se trouuent en ceste humeur. Les sanguins ordinai-

Pour-
quoy les
melancholiques
sont tristes.

Des maladies melancholiques,

rement sont ioyeux, pource qu'ils ont de l'humide meſlé avec le chaud; les choleres sont chagrins & faſcheux, pource que leur chaleur eſt ſeiche, & a comme vne pointe; les melancholiques sont tristes & refroignez, pource qu'ils ſont froids & ſecs. Ainſi ce pauvre Bellerophon qui eſt ſi bien deſcrit dans Homere alloit errant par les deſerts ſe lamentât & plaignant tousiours. Et le Philoſophe Ephesien nommé Heraclite viuoit en perpetuelles pleurs pource (dit Theophraſte) qu'il eſtoit melancholique: Ses eſcrits tous confus & noircis d'obſcurité le teſmoignent aſſez.

Pour-
quoy les
melâcho-
liques
ſont ſoup-
çonneux.

Le ſoupçon ſuit ces deux
accidens de pres, le melan-
cholique eſt tousiours ſoup-

conneux , s'il voit deux ou trois qui parlent ensemble, il pense que c'est de luy. La cause du soupçon vient de la crainte, & du discours oblique : car ayât tousiours peur il croit qu'on luy dresse des embuscades, & qu'on le veut tuer. Les melâcholiques (dit Aristote) s'abusent ordinairement aux choses qui dependent de l'eslection, pour ce qu'ils oubliēt bien souuēt les propositions vniuerselles, auxquelles consiste l'honneste, & suiuent plustost les mouuemēs de leur folle imagination.

Ils sont en perpetuelle inquietude & de corps & d'esprit, ils ne peuuent respondre estās interrogez, & changent souuent d'un genre en l'autre. L'inquietude viēt de

Pour
quoy ils
sont en
inquietude.

Des maladies melancholiques,
la diuersité des objects qu'ils
se proposent , car receuant
toutes les espèces & les im-
primât en forme de desplai-
sir, ils sont cōtrains de chan-
ger souuent & d'en recher-
cher de nouvelles, lesquelles
ne leur estant pas plus agrea-
bles que les premieres, les en-
tretiennent en ceste inquie-
tude.

Pour-
quoy les
melâcho-
liques
s'oupirēt
souuent.

Les melancholiques souf-
pirent ordinairement, pour-
ce que l'ame estant occupee
à la varieté des phantomes,
ne se resouuiēt pas de respi-
rer , de façon que la nature
est contrainte de tirer en vn
coup autant d'air qu'elle fai-
soit en deux, ou trois; & ceste
grande respiration s'appelle
soupir, qui est comme vn
redoublemēt d'haleine. Au-
tant en arriue-il aux amou-

reux, & à tous ceux qui sont attentifs à quelque profonde contemplation ; les badaux mesme qui s'amusent à voir quelque belle peinture, sont contrains de ietter vn grand soupir, ayant leur volonté (qui est la cause efficiente de la respiration) du tout distraicte & occupee à ceste image.

Il y a vn accident bien facheux qui cōsomme les patures melācholiques, les veilles continuelles. I'en ay veu qui ont demeuré trois mois entiers sans dormir. Or les causes de ces veilles seront assez aisees à entēdre, si nous sçauōs ce qui nous faict dormir. On remarque au sommeil la cause materielle, finale, formelle & instrumentaire. La matiere du dormir

Pour-
quoy ils
veillent
& ne peu-
uent dor-
mir.

Les cau-
ses du
dormir.

Des maladies melancholiques,
est vne vapeur douce, qui est
esleuee de la premiere & se-
conde digestion, laquelle ve-
nant par la moiteur à reslas-
cher & boucher to^r les nerfs
fait que tout sentiment &
mouuemēt cesse. La cause fi-
nale est la reparation des es-
prits, & le repos de toutes les
facultez animales, lesquelles
estans lassees par vn conti-
nuel exercice demādent vn
peu de relasche: ceste fin ne
se peut obtenir si l'ame qui
exerce toutes les actions ne
iouit de quelque tranquillité:
ainsi la pauvre Didon toute
troublee, ne pouuoit voir la
nuiet ny des yeux, ny de la
poitrine. La forme du dor-
mir consiste en la retraicte
des esprits & de la chaleur
naturelle du dehors au de-
dans, & de toute la circonfe-

rence au centre. La cause instrumentaire est le cerueau, qui doit estre bien temperé: car s'il est trop chaud, cōme aux phrenetiques, ou sec, cōme aux vieillards, le dormir ne sera iamais paisible. Aux

melancholiques la matiere Les causes des veilles aux melancholiques. defaut, l'ame n'est point en repos, le cerueau est mal disposé, la matiere est vne humeur melancholique, seiche comme la cédre, de laquelle ne se peut esleuer aucune vapeur douce, le cerueau est intemperé & du tout desseiché, l'ame est en perpetuelle inquietude; car la peur qu'ils ont leur represente tousiours des fascheux objects qui les rongent & les empeschét de dormir. Que si par fois il arriue qu'ils soient surpris de quelque sōmeil, c'est vn dor-

La cause
des son-
ges hi-
deux.

Des maladies melancholiques,
mir fascheux, accôpagné de
mille phantosmes hideux, &
de songes si effroiables, q̃ les
veilles leur sont plus agrea-
bles. La cause de to⁹ ces son-
ges se rapporte à la proprie-
té de l'humeur: car cōme le
phlegmatique sōge ordinai-
rement vn rauage d'eaux, le
cholerique vn embrasemēt;
ainsi le mélācholique ne son-
ge que de morts, de sepul-
chres, & toutes choses fune-
stes, pource qu'il se presente
à l'imagination vne espee
sēblable à l'humeur qui do-
mine, de laquelle la memo-
re viēt à s'esueiller, ou pour-
ce q̃ les esprits estās comme
sauuages, & to⁹ noircis, volti-
geās par tout le cerueau, & se
pourmenās iusques à l'œil,
representent à l'imagination
toutes choses obscures.

Les melancholiques sont aussi ennemis du Soleil, & fuyent la lumiere, pource qu'ils ont leurs esprits & humeurs du tout contraires à la lumiere. Le Soleil est clair & chaud, l'humeur melancholique est noire & froide. Ils aimēt la solitude, pource qu'estans occupez & attentifs à leur imagination, craignent d'en estre distraitz par la presence des autres & les fuyent; or ce qui les rend attētifs est qu'ils ont les esprits grossiers & comme immobiles.

Pour-
quoy ils
aiment
les tene-
bres.

Ils ont les yeux fixes & cōme immobiles pour la froideur & secheresse de l'organe, ils ont vn sifflement d'oreilles, endurent par fois le vertige: & cōme remarque Galien; aiment infiniment le

La cause
de leur
silence.

silence, & bien souuent ne
peuēt parler, non pas par le
vice de la lāgue, mais plustost
par ie ne sçay quelle opinia-
streté : en fin ils se forgent
tousiours quelque imagina-
tiō estrāge, & ont quasi tous
vn objet particulier qui ne se
peut effacer qu'auec le tēps.

*D'oū vient que les melancholiques
ont des particuliers obieċts tous
differens, sur lesquels ils resuent.*

CHAPITRE VI.

D'Imagination des me-
lancholiques, selon la
diuersité des subiects pro-
duit des effects si differens,
qu'il ne s'en trouuera pas
cinq ou six parmy dix mille,
qui resuent de mesme façon;
de sorte que les anciens ont

tresbien comparé ceste humeur au vin: Car tout ainsi que le vin (selon le temperament & les mœurs de ceux qui le boient) produit des effets differens, fait rire les vns, & pleurer les autres; red les vns assopis & lourds, les autres trop esueillez & furieux: Ainsi ceste humeur trouble en diuerfes façons l'imagination. Ceste diuersité vient ou de la disposition du corps, ou de la façon de viure, & de l'estude auquel on s'applique le plus, ou de quelque autre cause occulte. La disposition du corps represente les objets du tout semblables, ou qui en approchent de bien pres, pourueu que l'occasion, c'est à dire, quelque cause externe, s'y joigne. Ceux qui feront d'un

Compa-
raison du
vin au c
l'humeur
melâcho
lique.

D'où
vient la
diuersité
de ces
spectres.

premiere
cause.

Des maladies melancholiques,
temperament extremement
sec, & auront le cerueau fort
aride; s'ils voyent ordinaire-
ment vne cruche ou vn ver-
re (qui sont objects assez fre-
quens) penseront estre deue-
nus cruches ou verres. Ceux
qui aurônt des vers en l'esto-
mach ou aux intestins, s'im-
primerônt fort aisément, s'ils
sont melancholiques, qu'ils
ont vn serpent, vne vipere,
ou quelque autre animal dâs
le vêtre: ceux qui sont pleins
de vens penseront bien sou-
uent voler en l'air, & estre
trâsformez en oiseaux: ceux
qui abondent en seméce de-
uiendront enragez apres les
femmes, & auront tousiours
cet object deuât leurs yeux.
Toutes ces imaginations sui-
uent la disposition du corps:
& comme nous voyôs qu'en

dormant il nous arriue sou-
uent de songer mille choses
estranges qui suiuent la tem-
perature du corps, & le na-
turel de l'humeur qui domi-
ne (c'est pourquoy on appel-
le ces songes, naturels) ainsi
les melancholiques peuuent
& en dormant & en veillant
s'imprimer mille phátosmes
qui suiuent la proprieté de
l'humeur. Il y a toutesfois
difference au moyen de l'im-
pression, car les spectres, qui
se representent aux sains en
dormant, s'escoulét & n'ont
point d'arrest, pource que la
disposition est legere; mais
aux melancholiques le cer-
ueau semble desia auoir ac-
quis vne habitude, & puis
l'humeur qui est seche & ter-
restre ayant en vn corps dur
graué son image, ne la laisse

Des maladies melancholiques,
pas aisément effacer.

Seconde cause de ces imaginatiōs diuerses. Il y a d'autres imaginations aux melancholiques qui ne viennent pas de la disposition du corps, mais de la façon de viure, & de l'estude auquel iis se sont le plus adonnéz. Toutes les cōditions des hommes & toutes leurs mœurs ne sont pas semblables, l'vn se nourrit à l'auarice, l'autre à l'ambition; l'amour plaist à cestui-cy, la deuotion à celuy-là. Ceste humeur doncques imprimera aux melancholiques des objects conformes à leur condition, & à leurs actions ordinaires. S'il arriue qu'un ambitieux deuienne melancholique, il s'imaginera qu'il est Roy, Empereur, Monarque: Si c'est un auaricieux, toute sa folie se tournera vers les richesses:

richesses : si la deuotion luy plaisoit, il ne fera que barbotter, & n'abandonnera iamais les temples: Si c'est vn amoureux, il n'aura que ses amours en idee, il courra apres son ombre; autant en pourra-on dire de ceux qui aiment les procez, ou de ceux qui en santé s'estoient passionnez à quelque sujet particulier.

En fin nous remarquons en certains melancholiques d'imaginations si estranges, qu'on ne les peut rapporter, n'y à la complexiõ du corps, n'y à la cõdition de leur vie, la cause en est incogneüe, il semble qu'il y ait quelque mystere caché. Les anciens ont creu qu'il y auoit en ceste humeur *θεῖον τι*, quelque chose de diuin. Rhazis & Trallian escriuent auoir veu

Troisies.
me cause

plusieurs melācholiques qui ont souuent predict ce qui estoit depuis aduenu. Il y a vn Medecin Arabe qui cō-

Compa-
raisō du
melan-
cholicue
au bon
veneur.

pare les melācholiques aux bōs veneurs. Tout ainsi (dit-il) qu'un bon veneur auant que lascher son coup & desbander son arc s'assure de voir la beste par terre: ainsi le melancholicue par la precipitation de son imagination voit souuent ce qui doit aduenir, comme s'il luy estoit present. Nous lisons qu'un Marcus & vn autre Melanthius Syracusain deuindrent bons Poētes apres leur melancholie. Auicenne remarque que les melancholiques font par fois des choses si estrāges que le vulgaire pense qu'ils soient possedez d'un demon. Cōbien y a-il en no-

stre temps de grands person-
nages qui font difficulté de
condamner ces vieilles sor-
cieres, & qui croient que ce
n'est qu'une humeur melan-
cholique, qui depraue leur
imaginatiō, & leur imprime
toutes ces vanitez? Je neveux
point m'enfoncer plus avant
en ce discours, le subiect me-
riteroit vn plus grand loi-
fir. Concluons donc que la
diuersité des objects qu'un
melancholique s'imprime,
vient ou de la disposition
du corps, ou de la condi-
tion de sa vie, ou de quel-
que autre cause qui est par
dessus la nature. Ceux qui
n'ont peu du premier coup
comprendre toutes ces rai-
sons, les entendront (à mon
aduis) s'ils ont la patience de
lire ce petit discours, qui ser-

Conclu-
sion.

uirainfiniment pour esclaircir ce subject, & ne sera point hors de propos. Il arriue tout de mesme aux melancholiques comme à ceux qui songent, & autant remarquons no⁹ de causes aux vns qu'aux autres: le songe se rapporte aussi bien à l'imaginatiō que la melancholie. Or nous faisons trois sortes de songes; les vns sont naturels; les autres animaux; les derniers sont par dessus ces deux. Les naturels suiuent la nature de l'humeur qui domine; Celuy qui est cholere ne songe que de feux, de batailles, d'embrasemens: le phlegmatique pense tousiours estre dans les eaux. La cognoissāce de ces songes est necessaire au bon Medecin pour cognoistre la complexion & temperamēt

Trois
differe[n-
ces des
songes.

Songes
naturels.

de son malade. Hippocrate en a fait vn petit liuret, qui a esté commenté par ce grand personnage Iule Cesar de la Scale. Galien en a fait vn autre, auquel il enseigne q̃ par ces songes naturels on peut predire l'euenemēt des maladies. Ceux, dit-il, qui doiuent s'uer, songent ordinairement qu'ils sont dās vn bain d'eau tiede, ou dās vne riuiera. Il y en eut vn qui songea que sa cuisse estoit deuenüe de pierre, & comme il fut esueillé, la mesme cuisse tōba en paralysie. Le secōd genre des sōges est de ceux qu'on appelle animaux, qui viennent de quelque perturbation de l'ame. On definit ce songe vne representation de ce qui a passé le iour, ou par les sens ou par l'entendement; ce sont

Sōges animaux.

Des maladies melancholiques,
quasi les plus frequens: car si
nous auons veu, ou pēsé, ou
discouru le iour de quelque
chose avec beaucoup d'affec-
tion, la nuit le mesme ob-
iect se representera. Le pes-
cheur, dit Theocrite, songe
ordinairement de poissons, de
riuieres, de reths: le soldat
des alarmes, de surprises des
villes, de trôpettes: l'amou-
reux ne refuse la nuit qu'à
ses amours. Le dernier genre
des songes est par dessus la
nature, par dessus tous les
sens, & par dessus l'entende-
ment humain: ces songes ou
sont diuins ou diaboliques;
les diuins viennent de Dieu,
qui nous aduertit bien sou-
uent de ce qui nous doit ar-
riuer, & nous enuoye des re-
uelations pleines de grands
mysteres. Tels ont esté au

Songes
superna-
turels.

Songes
diuins.

vieil Testament les songes
d'Abraham, Iacob, Ioseph,
Salomō, Nabuchodonosor,
Pharaō, Daniel, Mardochee:
& au nouveau de sainct Io-
seph, des trois Rois d'Oriēt,
de saint Paul. Les songes dia-
boliques arriuent souuēt par ^{Songes}
l'astuce du malin esprit qui ^{diaboli-}
^{ques.}
va tousiours tournoyant à
l'entour de nous, & tasche
de nous attraper en veillant
ou en dormāt. Il nous repre-
sente donc bien souuent des
choses estrāges, & nous des-
couure en dormant des se-
crets, qui semblent estre ca-
chez à la nature mesme, il
trouble nostre imagination
par vne infinité de vaines il-
lusions. Voila toutes les cau-
ses des songes. Autāt en pou-
uons nous dire des melan-
choliques. Leur imagination

Des maladies melancholiques,

L'imagi-
natio des
melācho-
liques
troublee
en trois
façons.

est troublee en trois façons
seulement: par la nature, c'est
à dire par la complexion du
corps: par l'ame, c'est à dire
par quelque violēte passion
à laquelle ils s'estoient adon-
nez: & par l'entremise des
malins demons, qui les font
bien souuent predire & ima-
giner des choses estranges.

*Histoire de certains melācho-
liques qui ont eu d'estranges
imaginationes.*

CHAP. VII.

I'Ay assez amplement
descrit tous les acci-
dens qui accompagnent les
vrais melancholiques, & ay
recerché les causes de toutes
ces varietez: il faut mainte-
nant qu'en ce chapitre, pour
donner du plaisir au lecteur,
ie propose quelques exem-

ples de ceux qui ont eu des plus bizarres & foles imaginations: i'en emprunteray des Grecs, des Arabes, des Latins, & en adiousteray de celles que j'ay veu. Galien au troisieme liure des parties malades en recite trois ou quatre assez remarquables.

Il y auoit vn melancholique qui pesoit estre deuenu cruche, & prioit tous ceux qui le venoient voir de n'approcher de luy, de peur qu'on ne le cassast. Vn autre s'estoit imagine qu'il estoit transforme en coq, il chantoit oyant chanter les coqs, & se frappoit de ses bras, comme les coqs se battent de leurs ailes. Vn autre melancholique estoit en vne peine extreme craignât qu'Athlas ne se lassast en fin de soustenir le

Histoires
estranges

Premiere

Secōde

Troisieme

Des maladies melancholiques,
ciel, & qu'il ne le laissast tom-
ber sur luy. Aëce fait men-
tion d'un qui croyoit n'auoir
point de teste, & publioit par
tout qu'on la luy auoit cou-
pee pour ses tyrannies, il fut
guary fort subtilement par
l'artifice d'un Medecin nom-
mé Philotime. car il luy fit
mettre un bonnet de fer biẽ
pesant sur sa teste, & lors s'es-
criant que la teste luy faisoit
mal: fut tout soudain releué
de tous les assistans qui s'es-
crierent: Vous auez dõc vne
teste; par ce moyen il se re-
cogneut, & fut deliuré de ce-
ste fausse imagination. Tral-
liã escrit auoir veu vne fem-
me qui pensoit auoir deuoré
un serpent, il la guarit en la
faisant vomir, & iettant quãt
& quant un serpent qu'il te-
noit tout prest, dãs le bassin.

Quatri-
esme.

Cinqui-
esme.

T'ay leu qu'un ieune escho-^{sixiesme}
lier estant en son estude fut
surpris d'une estrange ima-
gination, il se mit en fantasie
que son nez estoit tellement
gros & allongé qu'il n'osoit
bouger d'une place, de peur
qu'il ne heurtast en quelque
lieu: tant plus on le pensoit
dissuader, tant plus il s'opi-
niastroit. En fin le Medecin
ayant pris un grand morceau
de chair & le tenant caché,
l'assura qu'il le guariroit sur
le champ, & qu'il luy falloit
oster ce grand nez: & soudain
pressant un peu son nez, &
coupant ceste chair qu'il a-
uoit, luy fit croire que ce
gros nez estoit coupé. Ar-^{Septiesme.}
themidore Gramairien ayant
veu un crocodile, fust surpris
d'une telle frayeur, qu'il ou-
blia tout ce qu'il auoit ia-

Des maladies melancholiques,
mais sceu, & s'imprima si
fort ceste opiniõ d'auoir per
du vn bras & vne iambe, qu'o
ne la luy peut iamais effacer.

Huicties-
me.

Il s'est veu plusieurs melan-
choliques qui pẽsoient estre
morts, & ne vouloient point
manger: les Medecins vsoiẽt
de cet artifice pour les faire
mãger. Ils faisoient coucher
quelque valet tout aupres
du malade, & l'ayant instruit
de faindre le mort, & ne lais-
ser pas d'aualler lors qu'on
luy mettroit de la viande à la
bouche, persuadoiẽt par ce-
ste ruse au melancholique,
que les morts mangeoient
aussi bien que les vifs. Il s'est
veu n'y a pas long temps vn
melancholique, qui se disoit
le plus miserable du monde,
pource qu'il n'estoit rien. Il y
a eu n'agueres vn grand sei-

Neufies-
me.

Dixies-
me.

gneur qui pensoit estre de verre, & n'auoit son imagination troublee qu'ë ce seul object, car de toute autre chose il en discouroit merueilleusement bien : Il estoit ordinairement assis, & prenoit grand plaisir que ses amis le visitassent, mais il les prioit qu'ils n'approchassët de luy. Il y a encore vn treshönest homme, & des meilleurs Poë-^{Onzieme.} tes François de ce Royaume, qui est tombé depuis quelques annees en vne bizarre apprehension. Estant trauail-
lé d'vne fièvre continuë accompagnée de grandes veilles, les Medecins luy ordonnerent vn vnguent narcotique, qu'on nomme *populeum*, & luy en frottoient le nez, le front, & les temples : Il eut des l'heure le *populeum* en tel-

Des maladies melancholiques,
le haine, que depuis il s'est
imaginé que tous ceux qui
approchét de luy le sentent:
on ne peut parler à luy que
de loin, si on touche à ses ac-
coustremens, il les iette &
ne les porte plus: au reste il
discourt tresbien, & ne laisse
pas de composer. On a tas-
ché par tous les artifices du
monde de luy oster ceste fo-
le impression, on luy a fait
voir la description de l'yn-
guent, pour l'asseurer qu'il
n'y entre rien de dangereux:
il le sçait, il l'accorde, mais
cet obiect est tellement gra-
ué qu'on ne l'a sceu encore
effacer.

Douzié-
me.

Aretee au premier liure
des longues maladies dit a-
voir veu vn melancholique
qui pësoit estre de brique, &
ne vouloit point boire crai-

Et du moyen de les guérir, 140
gnant d'estre destrempé.

Vn autre s'imaginoit auoir
les pieds de verre , & n'o- Trezié-
me.
soit cheminer de peur de les
casser.

Vn boulanger s'estoit im- Quator-
zième.
primé qu'il estoit de beurre,
& ne le pouuoit-on faire
approcher du feu ny de son
four, tant il auoit peur de se
fondre. La plus plaisante res- Quin-
zième.
uerie que i'aye iamais leu est
d'un gentilhomme Sienois
qui s'estoit resolu de ne pis-
ser point & de mourir plus-
tost, pource qu'il s'estoit ima-
giné qu'aussi tost qu'il pissé-
roit toute sa ville seroit inon-
dee. Les Medecins lui repre-
sentans que tout son corps
& cent mille comme le sien
n'estoient capables de noyer
la moindre maison de la vil-
le, ne le pouuoient diuertir

Des maladies melancholiques,
de ceste folle imagination.
En fin voians son opiniaſtre-
té & le danger de ſa vie trou-
uēt vne plaisāte inuētīon. Ils
font mettre le feu à la plus
proche maison, font sonner
toutes les cloches de la ville,
attirent plusieurs valets qui
crient au feu, au feu, & en-
uoient les plus apparens de
la ville qui demandent ſe-
cours, & remonſtrēt au gen-
tilhomme qu'il n'y a qu'un
moyē de ſauuer ſa ville, qu'il
faut que promptement il piſ-
ſe pour eſtindre le feu. Lors
ce pauvre melācholique qui
ſe retenoit de piſſer de peur
de perdre ſa ville, la croiant
en ce peril piſſa & vuida tout
ce qu'il auoit dans ſa veſcie,
& fut par ce moyen ſauluē.

Pour le regard de ceux qui
pēſent eſtre Rois, Empereurs

Papes, Cardinaux, telles folies font assez cōmunes, j'ay voulu seulement alleguer les plus rares. Et voila quant à la melancholie qui a son siege dans le cerueau, qui est causee d'une intemperature froide & seiche, ou sans matiere, ou avec matiere. Elle suit quelquefois les maladies chaudes du cerueau, comme frenesies & fieures ardantes, & lors le visage paroist rouge. Auicenne remarque que les begues & ceux qui ont les yeux mobiles, qui sont velus & noirs, qui ont les veines amples, les leures grosses, sont plus subiects à ceste melancholie: La tristesse, la peur, les profondes meditations, l'usage des viâdes grossieres & melâcholiques causent souuent ceste maladie.

*Regime de viure pour les melācho-
liques qui ont le cerueau malade.*

C H A P. V I I I.



LE me semble auoir
autresfois leu dans
Arctee qu'aux ma-
ladies inueterrees, & qui ont
pris quelque habitude, la
façon de viure sert plus que
tout ce qu'on pourroit tirer
des plus precieuses boëttes
de l'apothicaire. Le Prince
des Arabes Auicenne nous
aduertit que la façon de vi-
ure estant mesprisee, peut
corrompre la meilleure ha-
bitude du monde, & au con-
traire estant soigneusement
observee peut corriger la
plus mauuaise. Je commēce-
ray donc la curation des me-

Combiē
sert la
regime
aux vieil
les ma-
ladies.

lancholiques par ce regime.

Il faut choisir vn air qui soit temperé en ses qualitez ^{L'air} actiues , & aux passiues qui soit humide . On le pourra rendre tel par artifice , iettât dans la chambre force fleurs de roses , violes , de nenuphar. ou biẽ on aura vn grád vaisseau plein d'eau tiede qui humectera continuellement l'air ; il faudra parfumer la chambre avec des fleurs d'oranges,escorces de citron,& vn peu de storax . La chambre doit estre claire & tournée vers le Leuant:l'air grossier,obscur,tenebreux,puât, y est fort contraire , encores que les melancholiques le suyuent par tout. Il est bon de leur faire voir des couleurs rouges,iaunes,vertes,blanches.

Des maladies melancholiques,

Les viandes.

Pour le regard des viâdes, toutes celles qui sont grossieres, visqueuses, venteuses, melâcholiques, & de difficile digestion, nuisent infinimēt.

Le pain.

Il faut auoir du pain de bon fromēt, bien net, & purgé de son, sans sel, & qui soit (s'il est possible) paistri avec d'eau de pluye ou de fontaine.

Les chairs.

Les chairs les plus ieunes sont les meilleures, entre autres celles de veau, cheureau, mouton, poulets, perdrix: au contraire les vieilles, & qui ont vn gros suc: cōme celles de bœuf, pourceau, lieure, des oyseaux de riuere, & de toutes bestes sauages, comme sangliers, cerfs, sont du tout contraires. Galien condamne les chairs de bouc, de taureau, d'asne, de chien, de chameau, de renard: mais il

n'auoit que faire de les defendre, car on ne les mangera iamais pour friandise. Les Arabes recōmandent pour la melancholie les cerueaux des animaux par ie ne sçay quelle proprieté: mais ie pēse qu'ils n'y font pas trop propres, estans ennemis de l'estomach, & croy qu'ils ont esté superstitieux en vne infinité de choses.

Les poissons des estangs, & Les poissons. ceux aussi de la mer qui ont la chair grossiere & melancholique: comme les tons, dauphins, baleine, veaux marins, & tous ceux qui ont escaille, sont contraires à ceste maladie. On pourra vser des poissons qui se tiennent dans les eaux bien claires & coulantes. Les poissons salez ne valent rien.

Des maladies melancholiques,
Les œufs frais , mollets, &
pochez, avec la vinette ou le
verjus, sont tresbons.

Les po-
tages.

L'usage des potages &
bouillons est tresnecessaire,
car ceste humeur qui est sei-
che, doit estre humectee. On
mettra ordinairement dans
les potages de la bourrage,
buglose, pimpernelle, endi-
ue, cichoree, du houbelõ, &
vn peu de melisse; on se gar-
dera bien d'y mettre des
choux, des blettes, de la ro-
quette, du nasitort, des na-
ueaux, pourreaux, & des her-
bes trop ameres & trop pi-
quantes: Les orges mondez,
les amandes, & la boulie, ser-
uiront infiniment pour en-
uoier des vapeurs douces au
cerueau.

Legu-
mes.

On se doit abstenir de tous
legumes, comme pois, feues,

du moyen de les guarir. 144
& lentilles.

Pour le regard des fruiçts Fruiçts.
nous permettôs les prunes,
poires, grenades douces,
amâdes, raisins, pignons, ci-
trons, melons, & sur tout les
pommes qui ont vne mer-
ueilleuse proprieté pour l'hu-
meur melancholique : nous
deffendôs les figues seiches,
les melles, sorbes, chastai-
gnes, noix, artichaux, cardes,
& le formage vieux.

Quant au boire, il y a quel- Le boire
que differéd entre les Mede-
cins, les vns accordêt le vin,
les autres le deffendent. Je
pense qu'aux maniaques & à
ceux qui ont beaucoup de
chaleur aux hypochondres,
ou au cerueau, le vin est ex-
tremement contraire: mais
aux melâcholiques qui sont
froids, & secs, comme ceux

Des maladies melancholiques,
que nous traiçtōs icy, vn pe-
tit vin blāc ou claiet qui ne
soit ny doux, ny trop gros,
mediocremēt trépé, est fort
bon. Zeno disoit souuēt que
le vin adoucissoit les mœurs
des hommes, cōme l'eau les
lupins : & Auerrhoēs escrit
que le vin resiouyt l'ame &
les esprits. On pourra faire
autēps de vendāges vn vin
artificiel avec la bourrage &
buglose, qui est tres-singu-
lier pour toutes maladies
melancholiques, & en boi-
ra-on tousiours le premier
traiçt, soit au disner, soit au
soupper. Si on craint ceste
senteur, on iettera seulemēt
vn bouquet de fleurs de
bourrage, & de l'herbe mes-
me dans le vin qu'on boit
ordinairement.

Vin arti-
ficiel.

Les veilles sont du tout
ennemies

ennemies de ceste passion, il ^{Les veil-}
faudra par tous les artifices ^{les.}
qu'on pourra prouoquer le
dormir, tu en verras les
moyes au chapitre suyuant.

Les exercices moderez peu ^{L'exer-}
uent seruir beaucoup, mais il ^{cice.}
faut que ce soit en lieux plai-
sans & delicieux: cōme iar-
dins, prairies, vergers, où il y
ait plusieurs fontaines, ou
quelques riuieres; on ne se
doit iamais lasser en cet ex-
ercice, il faut se reposer sou-
uent.

Les melācholiques ne doi-
uent iamais estre seuls, il leur
faut tousiours laisser cōpa-
gnie qui leur soit agreable, il
les faut par fois flatter, & ^{Les pas-}
leur accorder vne partie de ^{sions de}
ce qu'ils veulēt, de peur que ^{l'ame.}
ceste humeur, qui est de sa
nature rebelle & opiniastre,

Des maladies melancholiques,
ne s'effarouche; par fois il les
faut tâser de leurs foles ima-
ginations, leur reprocher &
faire honte de leur coüardi-
se, les asseurer le plus qu'on
pourra, loüer leurs actions:
& s'ils ont autrefois fait quel-
que chose digne de loüâge,
leur remettre souuēt en me-
moire, les entretenir de plai-
sans contes: on ne doit point
leur proposer aucun subiect
de crainte, ny leur apporter
des fascheuses nouvelles.
Bref on doit les diuertir le
plus qu'on pourra, & chasser
de leur entendement toutes
les passions de l'ame, sur tout
la cholere, la peur, & la tri-
stesse: car comme dit Platon
au Charmides, la plus grâde
partie des maux q̃ le corps
endure viennēt de l'ame. Les
anciens recommandent entre

autres choses à toutes maladies melancholiques, soit chaudes, soit froides, la musique. Les Arcades adoucissent les mœurs de ceux qui les auoient rudes, par la musique. Empedocle Agrigétin remit vn ieune adolescēt qui estoit deuenu furieux avec la douceur de son chāt. Clinias musicien, aussi tost qu'il se voyoit assailly de sa passion melancholique prenoit sa lyre, & retenoit par ce moyen les mouuemens de ceste humeur. Dauid avec sa harpe lors que le malin esprit saissoit Saül, le resiouissoit, & il sentoit de l'alegement.

La musique fort propre aux melancholiques.


Le ventre doit estre tousiours lasche en toute maladie melancholique, il faudra donc le solliciter avec tout l'artifice qu'on pourra.

Le vêtre doit estre lasche.

Comme il faut guarir les melancholiques qui ont la maladie grauee au cerueau.

CHAPITRE IX.

maladies
melācho-
liques tou-
tes rebel-
les.

 **E**XPERIENCENOUS
fait tous les iours pa-
roistre que toutes les
maladies melācholiques sōt
rebelles, longues, & tres dif-
ficiles à guarir, la raison y est
assez apparente; car l'humeur
melancholique est terrestre
& grossiere, ennemie de la
lumiere, contraire aux deux
principes de nostre vie, qui
sont chaleur & humidité;
opiniaistre aux remedes, qui
ne veut ouir cōseil, ny obeir
aux preceptes de medecine,
c'est en somme vn vray fleau
& tourment des Medecins.

Aristote au septiesme de ses Ethiques dit, que les melancholiques ont tousiours quelque chose qui les mord: c'est pourquoy ils courent tousiours apres le Medecin, & ne les doit-on laisser sans remede. Je descriray en ce chapitre les plus propres remedes que j'ay peu remarquer, & la methode avec laquelle il faut traicter ces melancholiques.

Il me semble que pour la curation de la melancholie, nous auons besoin de trois geres de remedes, sçauoir est des euacuatifs, des alteratifs, & des confortatifs. Les euacuatifs sont les saignees & la purgation. Pour le regard de la saignee vniuerselle, Galien l'ordonne à la melancholie qui a son siege dans les

Trois
sortes de
remedes
pour les
melan-
choli-
ques.

L'euacuation.

La saignee vniuerselle.

Les saignes
es
ticulie-
res.

Des maladies melancholiques,
veinés, & par toute l'habitu-
de du corps, & veut que si le
sang qu'on tire paroist beau
& subtil, qu'on l'arreste quāt
& quant: mais à la melācho-
lie qui a son siege dans le cer-
veau, & qui vient d'une in-
temperature froide & sei-
che, il la deffend tres-expres-
sément. Les Arabes recom-
mandent à ceste melancho-
lie les saignes particulieres,
pour euacuer la cause pro-
chaine: ils ouurent les veines
du front, du nez, & des oreil-
les, appliquēt des ventouses
aux espaules avec scarifica-
tion, mettēt des sangsuēs sur
la teste, & en toute melan-
cholie, soit idiopatique, soit
sympatique, font ouvrir les
veines hemorrhoidales, aiāt
pour fondement l'Aphorif-
me onzième du liure sixief-

me qui dit, qu'aux melācholi-
ques & maniaques les va-
rices & hemorrhoides surue-
nans les guerissent; mais tou-
tes ces saignées particulieres
n'ont point de lieu au com-
mēcement de ceste maladie.

Il faut commencer par l'au-
tre genre d'euacuation, qui
est la purgation. Elle se peut
faire par clysteres frequents,

La pur-
gation.

breuuages, syrops, opiates; la
forme d'un clystere ordinai-
re pour les melancholiques

sera telle; Prenez racines de

Clystere

guimaue vne once, fueilles

de mauue, mercuriale, vio-

lette, houbelon, de chacune

vne grande poignee; semen-

ces d'anis & de lin, de chacu-

ne deux dragmes: vne dou-

zaine de pruneaux de damas,

de fleurs de bourrage, de vio-

les, & d'orge vne poignee:

Des maladies melancholiques,
faictes bouillir le tout en eau
claire, & coulez le; adioustez
y apres vne once de casse, de-
my once de catholicū, deux
onces d'huile violat, & au-
tant de miel rosat, faictes-en
vn clystere ordinaire.

Les Arabes vsent à la me-
lancholie, de pilules d'aloë,
de hierre & du lapis lazuli,
mais ie n'approuue pas tant
ceste forme que la liquide: il
vaudra donc mieux vser de
breuuages. Ceste potion
pourra seruir au commence-
ment de minoratif.

Portion
seruant
de mino-
ratif.

Prenez demy once de re-
guilisse, trois dragmes de po-
lypode de chesne, demy poi-
gnee de bourrage, buglose,
melisse, houbelon, vne dra-
gme d'anis, & de semence de
citron; trois dragmes de se-
né de leuant, vne petite poi-

gnee des trois fleurs cordiales, faictes le tout bouillir: prenez de ceste decoction quatre onces, & y faites infuser vne dragme & demie de rhubarbe; après l'expression dissoluez yvne once de sirop rosat & autant de celuy de pommes, faictes en vn breu- uage qu'il faudra prendre le matin & garder la chambre.

Il y en a qui prennent de- my once de fené dans vn bouillō de poulet: les autres vne once de casse, ou bié l'in- fusion & expression de dix dragmes de catholicum.

Ceste legere purgatiō aiant precedé le reste de l'humeur doit estre preparee: car de péser l'arracher tout du pre- mier coup par force, comme fōt les Empiriques, c'est ruī- ner le malade: il la faut atte-

Des maladies melancholiques,

Prepara-
tion de
l'hu-
meur
melan-
cholique

Apose-
me.

nuer, ramollir, destremper,
& suiure le commandement
de ce grand Hippocrate qui
dit en ses Aphorismes, que
lors qu'on voudra bien pur-
ger vn corps, il le faut rendre
fluide. A ceste preparation
seruiront les aposemes & iu-
leps. Prenez racines de bu-
glose, de enula campana, d'es-
corce de racines de cappres,
& de tamaris, de chacune vne
once, de fucilles de bourage,
houbelon, cichoree, fume-
terre, *capilli veneris*, summi-
tez de thym, & de melisse, de
chacune vne poignée, semé-
ces d'anis, fenouil, & citron,
chacune deux dragmes; des
trois fleurs cordiales, fleurs
d'orâge & d'epithime, de cha-
cune vne petite poignée: fai-
tes bouillir le tout en eau de
fontaine, & apres en auoir

coulé vne liure & demie ad-
ioustez-y deux onces de sy-
rop d'houbelon & autant de
celuy de fumeterre, & en fai-
tes vne aposeme clarifiée &
aromatisee, avec vne dragme
de poudre de canelle, ou de
l'electuaire de gemmis: il en
faudra prendre quatre ma-
tins de suite.

L'humeur estant ainsi pre-
paree on pourra repurger le
corps avec la mesme potion
ordonnee, à laquelle on ad-
ioustera du catholicum, ou
bien de la cōfection hamech
qui purge tresbien l'humeur
melācholique: ou si on veut
on preparera vne aposeme
qui purgera alternatiuemēt:
celle mesme qui est ja descri-
te seruira si on y fait bouil-
lir du sené de Leuant & du
polypode. Si ceste humeur

Medica-
mēs pl^r
faits
pour re-
purger
cest hu-
meur.

Des maladies melancholiques,
est trop rebelle, & qu'elle ne
se puisse euacuer par ces re-
medes benins, on sera con-
traint de venir aux plus vio-
lés. Le Roy Ptolomee vsoit
aux melâcholiques rebelles
du hieralogadium, mais la
hiere deseiche trop. Les Ara-
bes recommandent les pilu-
les du lapis lazuli des Indes,
celles de fumeterre, & celles
du lapis armenus. Il y en a
qui fôt vne poudre pour les
melancholiques qui est ex-
cellête. Prenez vne once de
lapis lazuli bien lauë en eau
de violes, deux onces descenë
de Leuât, vne once & demie
de bõ polypode, demy drag-
me de semence d'anis & ci-
tron, trois onces de sucre
câdi, deux dragmes des qua-
tre semences froides, trois
dragmes de fleur de sureau;

Poudre
purgati-
ue.

faictes en vne poudre; il en faut prédre le poids de deux escus. Tous les Medecins Grecs & Arabes ordonnent aux melâcholies inueterées & opiniaftres l'hellebore: il est vray qu'il y faut aller avec discretion, & ne le donner pas en substance, il le faut prendre en decoction ou en infusion, & faut qu'il soit du noir bien choisi, car les apothicaires védent bien souuét de l'hellebore noir, qui est vne espece d'aconit tres-pernicieuse, le blâc ne vaut rien icy; il faut aussi se garder de ne mesler rié avec l'hellebore, qui ait astringtion, côme les mirabolâs, de peur que cela ne le retiène trop long tēps à l'estomach. Les anciens Poëtes ont reconnu ceste propriété de l'hellebore pour les

*Vsage de
l'hellebo
re.*

Des maladies melancholiques,
melancholiques, car ils les re-
uoyent ordinairement en An-
ticyre ou croist le bon helle-
bore; & d'as homere à la secō-
de Odysee. Melampus grād
Medecin guarit avec l'helle-
bore les quatre filles du Roy
Proetus qui s'estoient voulu
esgaler à Iuno en beauté; &
pour punition estoient deue-
nues foles. Il y en a qui vsent
de l'antimoine preparee; mais
tous ces violens remedes
doivent estre ordonnez bien
à propos & avec discretion.
J'aimerois mieux vser des
plus benins & les reiterer
souuent, cōme d'un bon sy-
rop magistral, ou de quelque
opiate. Le syrop se pourra
composer des suc de bour-
rage, de buglose, & de pom-
mes avec le sené: ou bien on
vsera du syrop de pommes

Antimoi-
ne.

Syrop
magi-
stral.

Et du moyen de les guarir. 152
du Roy Sabor. L'opiate se
pourra faire en ceste façon.

Prenez vne once & demie
de bonne casse tiree en la va-
peur de la decoctiō des mau-
ues : ou si tu veux qu'elle ait
de la force dauātage, en la va-
peur de la decoction de l'hel-
lebore noir, car elle retiēdra
vn peu de sa vertu: apres prēs
vne once de tamaris, six dra-
gmes de catholicum, demy
once de sené, & autāt d'epi-
thyme, trois dragmes de bō-
ne rhubarbe arrosée de l'eau
d'endiue, iusques à ce qu'elle
samollisse: incorpore le tout
& le mesle bien avec le syrop
violat ou de pommes, & en
fais vne opiate: de laquelle
prēdras to⁹ les quinze iours
en forme de bolus la quanti-
té d'vne once plus ou moins
selon l'effeēt que tu en ver-

Dès maladies melancholiques,
ras. Et voila quant aux pur-
gatifs.

Remedes
altera-
tifs.

L'hume-
ctation
sert plus
que la
purgatiō

Le secōd gère des remedes
est de ceux qui alterent l'hu-
meur melancholique, c'est
à dire, qui ostent son intem-
perature. Ceste humeur pe-
che en froideur & seicheres-
se, mais plus en seicheresse, &
c'est ceste qualité qui la rend
ainsi rebelle & opiniastre: son
alteration donc cōsistera en
l'humectatiō. Galien au troi-
iesme liure des parties mala-
des & Trallian font plus de
cas de ces remedes alteratifs
q̃ des euacuatifs, & asseurent
auoir plus guarý de melācho-
liques en les humectāt qu'en
les purgeant. L'humectation
se fera par remedes internes
& externes: les internes sont
les bouillons, aposemes, sy-
rops. J'ay autrefois fait vser à

vn melancholique fort long
temps d'un bouillon de pou-
let avec la bourrage, buglo-
se, cichoree, pimpernelle, &
y faisois adiouster vn peu de
sasafras & de santal: il s'en
trouuoit extrememēt bien.

Bouil-
lions.

Les syrops de pommes, de
buglose, de houbelō, violat,
destrempent fort ceste hu-
meur. On pourra preparer
vne aposeme avec les mes-
mes herbes que i'ay descri-
tes cy dessus. L'usage du pe-
tit laiēt & du laiēt de cheure
ou d'asnesse seruira pour hu-
meeter.

Syrops.

Les remedes externes sont
ou vniuersels, ou particu-
liers; les vniuersels sont les
bains. Galien se vête d'auoir
guary plusieurs melancholi-
ques par le seul usage du
bain d'eau tiede: ou bien on

Remedes
externes.

Le bain.

Des maladies melancholiques,
pourra , si tout le corps est
extremement sec, & que la
peau soit fort rude, en faire
vn artificiel avec les racines
de guimaue, fucilles de mau
ue, violettes, laiçtuës, cicho-
ree, semences de melon, de
courges, d'orge, fleurs de
violes: on se baignera bien
souuent, & doit-on demeu-
rer long temps dans le bain
sans prouoquer les sueurs.
Estant dans le bain on pour-
ra auoir deux sachets réplis
d'amandes douces & ameres
pilees grossieremēt, & de se-
mēce de melon, & s'en frot-
ter toute la peau. Si tu veux
biē faire tō bain il faut ietter
le soir l'eau chaude dans la
cuue, & la laisser fumer toute
la nuiēt, puis le matin tu t'y
mettras dedans. Il y a plu-
sieurs praticiēs qui font des

bains du seul laiët, cōme on
fait souuēt aux ec̃tiques. Au
sortir du bain il y en a qui ^{Onctiōs}
font oindre tout le corps de ^{vnuer-}
huile d'amādes douces, vio- ^{selles.}
lat, ou beurre frais. Les reme- ^{Applica-}
des s'appliquent sur la teste, ^{tions sur}
qui est la partie la plus mala- ^{la teste.}
de, il la faut humecter par la-
uemens, embrocations, ou
d'eau tiede, & des mesmes
decoctions, ou des huiles de
semence de courge, d'aman-
des douces, violat & du laiët.
Le troisieme genre des re- ^{Reme-}
medes propres pour la me- ^{des con-}
lancholie, est de ceux qui ^{fortatifs}
fortifient & resiouissent les
esprits, qui sont comme dit
Auicenne, rendus sauuages
& tenebreux. Il faut dōc for-
tifier le cerueau & resiouir le
cœur: ce que nous ferons par
remedes internes & exter-

les in-
ternes.

Des maladies melancholiques,
nes: les internes sont syrops,
opiates, tablettes, poudres:
les externes sont epithemes,
fachets, vnguës Je t'en don-
neray vne forme de chacun.

Syrop
excellēt.

Le syrop le plus propre
que i'aye trouué pour res-
iouir & humecter ensemble
les melancholiques, est celui
que ie vay deſcrire, qui est
de l'inuention de Monsieur
Castellan mon oncle, qui a
esté des plus grands & des
plus heureux Medecins de
son temps, employé ordina-
rement au seruice des Roys
& des Roynes.

Prenez vne liure & demie
des fucs de bourrage & bu-
glose, vne liure de suc de pō-
mes bien douces, demi once
de suc de melisse, trois dra-
gmes de graine d'escarlatte
infusee longtēps en ces fucs,

& puis fort exprimee , demy dragme de saffrã, deux liures de sucre fin: faites en vn syrop parfaitemēt cuit, & aromatizez-le avec vne dragme & demie de poudre de diamargaritum froid, & quatre scrupules de poudre de diãbre; il en faut prendre & le matin & le soir deux ou trois cuillerees.

Des opiates il y en a de plusieurs façons; ie me contenterai de mettre ceste-cy. Prenez conserue de racines de buglose, & de fleur de bourrage, vne once de chacune, cōserue de mirabolãs, & d'escorce de citron confit demie once de chacune, trois dragmes de cōfectionalkermes, poudres de diamargaritum, & de l'electuaire des pierres precieuses, vne dragme de

Opiates.

chacune avec le syrop de pō.
mes:faictes en vne opiate, de
laquelle faut prendre vn pe-
tit le matin, beuuāt apres du
vin claiet trempé en eau de
buglose. Je descriray la for-
me des tablettes & des pou-
dres au chapitre de l'hypo-
condriaque.

Remede-
des ex-
ternes
pour res-
iouir.

Les remedes externes s'ap-
pliquent sur le cerueau & sur
le cœur. Sur le cerueau on
met des poudres & des bon-
nets. Mais pource que la plus
part de ces choses aromati-
ques sōt chaudes & seiches,
il n'en faut guere vser. Sur le
cœur on pourra plus hardi-
ment appliquer des epithe-
mes, sachets, vnguēts. Prenez
des eaux de bourrage & de
buglose demi liure de chacu-
ne, des eaux de melisse & de
scabieuse, quatre onces de

Epithe-
me pour
le cœur.

chacune, deux onces de bon vin blanc, vne dragme & demie de poudre de diamargaritū froid, trois dragmes de cōfection alkermes, semēce de melisse & de graine d'escarlatte de chacune vne dragme: meslez le tout ensēble & en faiētes des epithemes qu'appliquerez sur le cœur avec vne piece d'escarlatte. Si les epithemes liquides vo⁹ faschent, enferez vne solide avec les cōserues cordiales, ou bien porterez des sachets sur le cœur; la forme desq̃ls ie mettray au chapitre de l'hypocōdriaque, où ils serōt mieux à propos, d'autāt que les melācholiques hypocōdriaques ont quasi tousiours vn battemēt de cœur. Voila les trois genres des remedes qui sont à mon aduis neces-

Des maladies melancholiques,
saires pour la curation de la
melancholie qui a son siege
au cerueau, les purgatifs, al-
teratifs, & confortatifs.

Cōment
on reme-
dicra
aux veil-
les.

Il nous reste vn fascheux
accident à combattre, qui
sont les veilles, lesquelles
tourmentēt par fois si cruel-
lement les melancholiques,
qu'elles en ont mis plusieurs
en desespoir. Je m'ē vois des-
crire tous les artifices qu'on
peut inuenter pour leur sou-
lagement.

Remedes
internes
pour fai-
re dor-
mir.

Nous prouoquerōs le dor-
mir avec remedes internes
& externes. Des internes
nous en aurons de plusieurs
façons, pource que les melan-
choliques aiment fort la va-
riété. Nous leur ferōs vn or-
ge mōdé dormitif, vn cōdit,
vne opiate, vne tartre, vn re-
staurant, vne potion, vn bo-
lus, &

lus, & des pilules. L'orge mō- Orge
dé se fera avec la farine d'or- mondé.
ge preparee comme il faut,
avec les amandes qui auront
infusé en eau de roses avec
les quatre semences froides,
la seméce de pautot, & le suc-
cre rosat.

La forme du condit sera Condit.
telle : Prenez conserues de
fleurs de bourrage, & de bu-
glose de chacunes trois drag-
mes, de chair de courge con-
fite, & d'escorce de citron de
chacune deux dragmes, se-
mences de pautot blanc & de
melon vne dragme de chacu-
ne, de sucre rosat ce qu'il
faudra : faiçtes en vn condit,
duquel on prédra le soir deux
ou trois cuillerees.

L'opiate se fera de ceste fa- Opiate.
çon : Prenez conserues de
chair de courge, & de raci-

Des maladies melancholiques,
ne de laiçtuë de chacune vne
once, conserues de roses, &
de nenuphar de chacune de-
my once, poudre de diamar-
garitum froid vne dragme,
semence de pauot deux scru-
pules avec le syrop violat:
faictes en vne opiate, de la-
quelle faudra prendre le soir
la grosseur d'une bonne cha-
staigne.

Masse-
pain.

Pour diuersifier on pour-
ra faire vn masselpain: Pre-
nez des amandes douces pe-
lees, lauees en eau chaude, &
puis infusees en eau rose vne
liure & demie, semence de
pauot blanc bien recente &
mondee trois onces, deux li-
ures de sucre fin: faictes en
vne paste, & avec l'eau de ro-
ses formez en vn masselpain,
duquel prendrez à l'heure du
dormir.

du moyen de les guarir. 158

Il se fait aussi des resum- Resum-
ptifs ou restaurans liquides: ptif.

Prenez le blâc d'un bon cha-
pon, des eaux de roses & de
nenuphar vn quarteron de
chacune, des eaux de buglo-
se, pourpier & ozeille qua-
tre onces de chacune, deux
dragmes de poudre de dia-
margaritum froid: faictes di-
stillier tout cela au bain Ma-
rie.

La potion se peut ordon- Potion.
ner ainsi : Prenez du syrop
violat, de pommes & de pa-
uot de chacun demy once, de
poudre de diamargaritum vn
scrupule, avec vne decoction
de lactuës & d'endiue: faictes
vne potion.

Si tu aimes mieux vn bo- Bolus.
lus en voicy la forme: Prenez
trois dragmes de conserue
de roses, vne dragme de re-

Des maladies melancholiques,
quies de Nicolaus, & avec vn
peu de succe faiçtes vn bo-
lus ; ou bien : Prenez deux
dragmes de la conserue des
fleurs de pauot rouge , vne
dragme de theriaque recen-
te, & avec vn peu de succe
formez en vn bolus.

Pilules.

S'ils veulent des pilules, cel-
les cy seruiront . Prenez vn
scrupule des pilules de cy-
noglosse ou de styrax, & ma-
laxez le avec le syrop de pom-
mes . Les Chymistes fôt d'vn
laudanum . Or en l'vsage de
tous ces medicamens narco-
tiques internes , il faut s'y
comporter avec beaucoup
de iugement , de peur qu'en
voulant donner du repos au
pauvre melancholique, nous
ne le facions dormir perpe-
tuellement.

Les remedes externes ne

sont pas du tout si dāgereux, Remede-
nous en composerons de dix des ex-
ou douze façons: nous ferōs ternes
des poudres capitales, fron- pour fai-
taux, sachets, emplastres, vn- re dor-
guēts, epithemes, bouquets, mir.
pommes de senteur, lauemēs
de iambes.

Prenez des fleurs de pauot Poudre.
rouge, & de roses rouges, de
chacune trois dragmes, se-
mence de laiçauē, pourpier,
& du pauot blanc, de chacu-
ne deux dragmes, santal rou-
ge, & semence de coriandre
preparce, de chacune vne
dragme & demie; faiçtes en
vne poudre que ietterez sur
toute la teste ayant rasé le
poil. De ceste mēsmepoudre Frontal.
on pourra faire vn frontal, y
adioustant des fleurs de ne-
nuphar, & vn peu de marjo-
laine.

Des maladies melancholiques,

Sachets.

On peut faire de grands sachets en forme d'oreillers, qui seront remplis de fleurs de roses, de fucilles, & semences du blanc iosquame.

Epitheme.

On appliquera sur la teste ceste epitheme. Prenez des eaux distillees de laiçtuë, ozeille, & de roses de chacune trois onces, vne dragme de poudre diamargaritum froid. deux scrupules de roses rouges, & du santal rouge, faiçtes en vne epitheme.

Vnguent.

La forme de l'vnguent sera telle. Prenez du populeum demy once, de l'vnguent de Galien, qui se nomme refrigerant autât, vne once d'huile rosat, meslez le tout ensemble avec vn peu de vinaigre, & en oignez la teste, le front, & le nez.

Emplastre.

On pourra aussi faire cest

emplastre. Prenez du castoreum vne dragme & demie, de l'opium demy scrupule, meslez le avec vn peu d'eau de vie, & en faictes deux petits emplastres qu'appliquerez aux temples.

On fera des bouquets des fleurs de violes, roses, du faule avec vn peu de marjolaine, & les faudra tremper dans le vinaigre rosat & dans le ius de laictuë & de pauot, avec vn peu d'opium & de cāphre: ou bien prenez deux testes de pauot concassees & enfermées dans trois noüets, puis ayez de storax trois dragmes, & six onces d'eau rose avec vn peu d'opium, trempez ces noüets dans cest liqueur & les approchez souvent du nez.

Bouquets.

Noüets.

Il se peut faire vne pomme

Pomme
à sentir.

qu'on sentira. Prenez sē-
ce de Iosquame, escorce de
racine de mandragore, sēmē.
ce de ciguē, de chacune vne
dragme, vn scrupule d'opiū,
vn peu d'huile de mandrago-
re, meslez tout cela avec les
sucs de fumeterre, & de sem-
per-viua, & en faiētes vne pō-
me : laquelle si vous sentez
vous fera quant & quāt dor-
mir ; adioustez y pour la cor-
rection vn peu d'ambre & de
musc. Il y en a qui appliquēt
avec vn heureux succez des
sangsues derriere les aureil-
les, & ayant osté les sangsues
sāgsues. mettent quant & quant sur
la playe vn grain d'opium.

Laue-
mēt des
iambes.


Les lauements des iambes
seruent beaucoup pour faire
dormir. Prenez des fucilles
d'orāger & de marjolaine de
chacune vne bonne poignée,

deux testes de pauot blac, de roses, fleurs de nenuphar, & camomille, de chacune vne petite poignée, faiétes bouillir le tout en deux parts d'eau & vne de vin blanc; il en faudra lauer le soir les cuisses & iambes du malade chaudement : ie croy qu'avec cet artifice on fera dormir le plus esueillé melancholique du monde. Il est vray que pour ce que ces medicaments refroidissent trop, de peur d'esteindre ce peu de chaleur naturelle qui leur reste, il faudra leur faire par fois vser du syrop cordial, ou des opiates confortatiues. Et voila la curation de la melâcholie qui a son propre siege au cerueau: celle qui vient par l'intéperature seiche de tout le corps, se guarira quasi avec mesmes

Des maladies melancholiques,
remedes . Je viens d'óc à l'hypo-
chondriaque, mais pour-
ce qu'il y a vne espece de ce-
ste melancholie idiopathi-
que qui vient par vne rage &
folie d'amour, & qu'elle de-
mande vne curation particu-
liere, i'en feray vn petit dis-
cours.

D'une autre espece de melancholie,
qui vient de la furie d'amour.

CHAP. X.

 **L** y a vne espece de me-
lancholie assez frequen-
te, que les Medecins Grecs
appellent *erotique*, pource
qu'elle vient d'une rage & fu-
rie d'amour, les Arabes la
nomment *iliscus*, le vulgai-
re, passion diuine, comme
venant de ce petit dieu que
les Poëtes ont tant chanté.

Les nōs
de la me-
lancho-
lie a-
mourcu-
se.

Cadmus Milefien (si nous croyons Suidas) en a escrit quatorze grands liures , qui ne se voyent point auourd'huy : i'en feray seulement deux petits chapitres , à l'vn ie descriray la maladie , & à l'autre les remedes . Je ne veux point icy rechercher l'etymologie d'amour, & pourquoy ce nom d'Eros lui a esté donné; ie n'entreprends pas de la definir; trop de grands personages s'en sont meslez, & n'en ont sceu venir à bout: ie ne veux pas aussi examiner toutes ces differences ny ces genealogies : qu'on lise ce que Platon, Plotin, Marcile Ficin, Iean Picus Comte de la Mirandole, Mario Equicola, & Leon Hebrieu en ont escrit: ie me contenteray de faire voir vn de ses effects

Des maladies melancholiques,
parmy cent mille qu'elle pro-
duit . Je veux qu'un chacun
cognoisse par la description
de ceste melancholie com-
bien peut vne amour violen-
te, & sur les corps & sur les
ames.

Côme
l'amour
s'engen-
dre.

L'amour doncques ayant
abusé les yeux, comme vrais
espions & portiers de l'ame,
se laisse tout doucement glis-
ser par des canaux, & chemi-
nant insensiblement par les
veines iusques au foye, im-
prime soudain vn desir ardēt
de la chose qui est, ou paroist
aimable, allume ceste concu-
piscence, & commence par ce
desir toute la sedition : mais
craignant d'estre trop foible
pour renuerſer la raison, par-
tie ſouueraine del'ame, s'en
va droit gagner le cœur, du-
quel s'estant vne fois affeu-

ree comme de la plus forte
place, attaque apres si viue-
ment la raison & toutes ses
puissances nobles, qu'elle se
les assubiectit, & rend du
tout esclaves. Tout est per-
du pour lors, c'est faict de
l'homme, les sens sont esga-
rez, la raison est troublee, l'i-
magination deprauee, les dis-
cours sont fols, le pauvre a-
moureux ne se represente
plus rien que son idole: tou-
tes les actions du corps sont
pareillemēt peruerties, il de-
uiēt palle, maigre, transi, sans
appetit, ayant les yeux caues
& enfoncez, & ne peut (com-
me dit le Poëte) voir la nuit,
ny des yeux, ny de la poictri-
ne; Tu le verras pleurant, san-
glottant, & soupirant coup
sur coup, & en vne perpe-
tuelle inquietude, fuyāt tou-

Effects
de l'a-
mour
violēt;

Signes
du melā-
choli-
que a-
mou-
reux.

Des maladies mélancholiques,
tes les compagnies, aymant
la solitude pour entretenir
ses pensées; la crainte, le com-
bat d'un costé, & le desespoir
bien souuent de l'autre, il est
(comme dit Plaute) là où il
n'est pas, ores il est tout plein
de flammes, & en vn instant il
se trouue plus froid que gla-
ce : Son cœur va tousiours
tremblottant, il n'y a plus de
mesure à son pouls, il est pe-
tit, inegal, frequent, & se chā-
ge soudain, non seulement à
la veüe, mais au seul nom de
l'object qui le passionne. Par
tous ces signes ce grand Me-
decin Erasistrate recogneut
la passion d'Antioche fils du
Roy Seleuque, qui s'en alloit
mourât de l'amour de Stra-
tonique sa belle mere. car le
voyant rougir, pallir, redou-
bler ses souspirs, & changer

Histoire
d'Erafi-
strate.

si souuent de pouls à la seule
veüe de Stratonique, iugea
qu'il auoit ceste passion ero-
tique, & en aduertit le pere.
Galien avec la mesme ruse
descouurit la maladie de Ju-
sta femme de Boëce Consul
de Rome, qui bruloit de l'a-
mour de Pylades. Voila les
effets de ceste passioñ, & tous
les accidens qui accompa-
gnent ceste melancholie a-
moureuse. Qu'on ne l'appel-
le d'oc plus passion diuine ou
sacree, si ce n'est qu'on vueil-
le par ce nom représenter sa
grâdeur; car les anciens Poë-
tes appelloiët les grâds poif-
sons sacres, & les Medecins
ont donné ce nom à l'os sa-
crü, pource que c'est la plus
grande vertebre du corps.
qu'on ne luy donne plus ce
filtre de passion douce, veu

La cruau
té d'a-
mour.

La fable
de Tirye

que c'est la plus miserable
des miserables, & telle que
toutes les gehennes des plus
ingenieux tyrans n'en surpas-
serent iamais la cruauté. Le
Philosophe Thianec le sceut
bien dire à ce Roy de Baby-
lone, qu'il prioit d'inuenter
quelque cruel tourmēt pour
chastier vn gentilhomme qu'il
auoit trouué couché avec sa
fauorite: Dōne luy la vie (dit-
il) & ses amours le puniront
assez avec le temps. Les Poë-
tes nous ont tresbien repre-
senté la cruauté de ceste pas-
sion par la fable de Tirye: car
pour auoir trop aimé la dees-
se Latone, son foye est ordi-
nairement rongé par deux
vautours, & ses fibres renais-
sent tousiours. Mais com-
ment n'appellerons nous ce-
ste passion miserable, puis

qu'elle en a conduit plusieurs à ceste extremité, & à ce desespoir de se tuer? Le Poëte Ceux qui se sōt tuez par l'amour. Lucrece qui auoit escrit des remedes d'amour, en deuint si enragé qu'il se tua soy-mesme. Iphis desesperé pour l'amour d'Anaxarete, se pendit. Vn noble iuenceau d'Athenes deuint si amoureux d'une statuë de marbre merueilleusement bien elaboree, q l'ayant demandé au Senat pour l'acheter à quelque prix que ce fust, & le refus luy estant fait, avec deffence expresse d'en approcher, pource que ses folastres amours scandalisoient tout le peuple, vaincu de desespoir se tua. Voila comme l'amour depraue l'imagination, & peult estre cause d'une melancholie ou d'une manie, car traueillant

Des maladies melancholiques,
& l'ame & le corps, rendles
humeurs si seiches, que la tē-
perature vniuerselle, & prin-
cipalement celle du cerueau,
en est corrompue.

Autre es-
pece de
melan-
cholie
amou-
reuse.

Il y a vne autre façon de
melancholie amoureuse qui
est bien plus plaisante, quand
l'imagination est tellement
deprauée, que le melancholi-
que pense tousiours voir ce
qu'il ayme, il court tousiours
apres, il baise ceste idole en
l'air, la caresse comme si elle y
estoit : & ce qui est estrange,
encores que le subiect qu'il
ayme soit laid, il se le repre-
sente comme le plus beau du
monde : il est tousiours apres
à descrire la perfectiō de ce-
ste beauté, il luy semble voir
des cheueux longs & dorez,
mignonnement frisez, & en-
tortillez en mille crespillons,

Descri-
ptiō d'v-
ne par-
faite
beauté.

vn front vouté, ressemblant
au ciel esclairey, blanc & po-
ly cōme albastre, deux astres
bien clairs à fleur de teste, &
assez fendus, qui dardēt avec
vne douceur mille rayons a-
moureux, qui sont autant de
fleches, les sourcils d'hebe-
ne, petits & en forme d'arc,
les ioües blāches & vermeil-
les comme lis pourprez de
roses, monstrans aux costez
vne double fossette, la bou-
che de corail, dans laquelle se
voyent deüx rangees de peti-
tes perles Orientales, blan-
ches, & bien vnies, d'où fort
vne vapeur plus suauē que
l'ambre & le musc, plus fleu-
rante que toutes les odeurs
du Liban: le menton ronde-
ment fosselu, le teint vny, de-
lié, & poly comme du satin
blanc, le col de laiēt, la gorge

Des maladies melancholiques,
de neige, & dans le sein tout
plein d'œillet, deux petites
pommes d'alabaſtre rôdelet-
tes, qui s'enflent par petites
ſecouſſes, & s'abbaiſſent tout
quant & quant, repreſentans
le flux & reflux de la mer, au
milieu deſquelles on voit
deux boutōs verdelets & in-
earnadins, & entre ce mont
iumelet vne large vallee : la
peau de tout le corps com-
me iaſpe ou porphyre, à tra-
uers de laquelle paroiſſent
les petites veines : Bref ce
pauvre melancholique s'en
va touſiours imaginant les
trente ſix beautez qui ſont
requiſes à la perfection, & la
grace qui eſt par deſſus tout,
reſue touſiours à cet obiect,
court apres ſon ombre, &
n'eſt iamais en repos. J'ay veu
il y a quelques années vn ieu-

ne gentilhomme trauaillé de ceste espece de melancholie, il parloit tout seul à son ombre, il l'appelloit, la careffoit, la baisottoit, couroit tousiours apres, & nous demandoit si nous auions iamais rien vcu de si beau: la maladie le tint plus de trois mois, mais en fin il guarit. Aristote fait mētion d'vn ieune homme nommé Antiphon, qui voyoit tousiours son image deuant ses yeux: Quelques vns ont voulu rapporter cela à la reflexion des rayons qui sortoiēt de ses yeux, mais ie croy que son imagination estoit troublee.

Le moyen de guarir les fols & melancholiques d'amour.

C H A P. X I.

Deux
moyens
de gua-
rir ceste
maladie.



Il y a deux moyens de guarir ceste melancholie amoureuse : Le premier est la jouissance de la chose aimée, l'autre depend de l'artifice & industrie d'un bon Medecin.

Le pre-
mier.

Quant au premier, il est certain qu'ostant la cause principale du mal, qui est cet ardent desir, le malade se trouvera infiniment allegé, encores qu'il reste quelque impression au corps. Ainsi Erasistrate ayant descouvert à Seleuque la passion d'Antioque qui mouroit pour l'amour de sa belle mere, sauua la vie à ce iouuenceau : car le pere ayât compassion de son fils, & le voyant en extreme

Histoi-
res.

Premie-
re.

danger de sa vie, luy permit,
comme payen, de iouyr de sa
femme propre. Diogene aiāt Secōde.
vn fils forcené & enragé d'a-
mour, fut contrainct apres
auoir consulté l'oracle d'A-
pollon, de luy permettre la
iouyffance de ses amours, &
le guarit par ce moyen. I'ay Troisié-
me hi-
stoire
plaisāte.
autrefois leu vne plaisante
histoire d'vn iouuēceau d'E-
gypte, qui estoit extreme-
ment passionné de l'amour
d'vne courtisane qu'ō nom-
moit Theognide : elle n'en
faisoit cas, & luy demandoit
vne somme excessiue d'ar-
gent. Il arriue que ce pauvre
amoureux songea vne nuit
quil tenoit sa maistresse en-
tre ses bras, & qu'elle estoit
du tout en sa puisſāce: Com-
me il fut esueillé il sentit ce-
ste ardeur qui l'alloit consu-

Des maladies melancholiques,
mant du tout refroidie, & ne
recercha plus la courtisane,
laquelle en estant aduertie fit
appeller le ieune homme en
iustice, demandant son salai-
re , & alleguoit pour toute
raison, qu'elle l'auoit guary.
Le iuge Bochor ordonne sur
le champ, que le ieune hom-
me apporteroit vne bourse
pleine d'escus, & qu'il la ver-
seroit dans vn bassin, & que
la courtisane se payeroit du
son & de la couleur des es-
cus, comme le ieune homme
s'estoit contenté de la seule
imagination. Ce iugemēt fut
approuué de tous, horsmis
de ceste grāde courtisane La-
mie, laquelle remōstra à De-
metrius son amy, que le son-
ge auoit esteint & osté du
tout le desir au ieune hom-
me, mais que la veüe de l'or
l'auoit

l'auoit allumé & augmenté
dauantage à Theognide, &
qu'en cela on luy auoit fait
iniustice. I'ay voulu alleguer
ces trois hystoires, pour faire
voir que ceste rage & furie
erotique se pouuoit mode-
rer par la iouyssance de ce
qu'on ayme: Mais ce moyen
ne se deuant ny pouuât touf-
iours executer, comme con-
traire aux loix diuines & hu-
maines, il faut recourir à l'au-
tre qui depend de l'industrie
d'un bon Medecin. S'il arriue
donc qu'un Medecin recon-
tre quelqu'un de ces melan-
choliques passionnez & force-
nez d'amour, il doit premie-
rement tascher de le distraire
auec belles paroles de ces fo-
les imaginations, luy remon-
strer le dāger auquel il se pre-
cipite, luy proposer des exē-

Le second
moyen
pour gua-
rir les
melan-
choli-
ques a-
mou-
reux.

Les pa-
roles.

Des maladies melancholiques,
ples de ceux qui se sont rui-
nez, & qui en perdant la vie
ont aussi perdu l'ame; Si tout
cela ne sert de riē, il faut avec
vne autre ruse, & par l'entre-
mise de plusieurs personnes,
luy faire hair ce qui le va
tourmentant, en dire du mal,
appeller sa maistresse legere,
inconstante, folle, qui n'aime
que le changement, qui ne
fait que se rire & moquer de
sa passion, qui ne recognoist
point ses merites, qui aime
mieux vn valet pour assou-
vir son appetit brutal, que de
cōseruer vn hōneſte amour:
& à mesure qu'on blasmera
sa maistresse, il faut louer le
melancholique, publier l'ex-
cellence de son entendemēt,
& la valeur de ses merites. Si
les paroles n'ōt assez de pou-
voir de guarir ce charme, cō-

me à la verité elles peuuent
bien peu à l'endroit des me-
lancholiques opiniaftres, il
faudra inuêter d'autres moy-
ens : La fuite, c'est à dire le Le chan-
gement
d'air.
changement d'air, est vn des
plus finguliers remedes, il le
faut esloigner & depaïser du
tout : car la veüe de fa mai-
stresse luy r'alume tousiours
son desir, & le recit du nom
seulement sert comme d'a-
morce à ses ardeurs : il le fau-
dra loger aux champs ou en
quelque maison plaïsante, le
pourmener souuent, l'occu-
per à toute heure à quelque Les exer-
cices,
ieu plaïsant, luy proposer cêt
& cent differens obieçts, afin
qu'il n'aye loisir de penser à
ses amours, le mener à la
chasse, à l'escrime, l'entrete-
nir par fois de belles histoi-
res & graues, par fois de fa-

Des maladies melancholiques,
bles plaisantes , auoir de la
musique ioyeuse & il ne faut
pas le nourrir trop grasse-
ment, de peur que le sang ve-
nant à s'eschauffer ne resueil-
le la chair & renouelle ses
flammes. Ostez l'oyssiueté,
ostez Bacchus & Ceres, sans
doute Venus se refroidira.
Les Poëtes châtent par tout
que Venus n'a iamais peu
attraper avec toutes les ru-
ses ces trois Deesses, Pallas,
Diane, & Vesta. Pallas repre-
sente la guerre, Diane la chas-
se, Vesta le ieusne & austerité
de vie. Si tous ces artifices &
vne infinité d'autres que Ni-
gide, Samocrate & Ouide ont
descriit en leurs liures des re-
medes d'amour sont vains, &
que le corps soit deuenu en
telle extremité qu'il force l'a-
me à suiure son tēperament:

il faudra pour lors traicter ces amoureux cōme les melācholiques que j'ay descrits au chapitre precedēt, & quasi avec les mesmes remedes; faudra purger par interualle & doucement ceste humeur qui a grauē au cerueau vne habitude seiche, la faudra humecter par bains vniuersels, & par applications particulieres, par vn regime fort humectant; on le nourrira de bons bouillons, de laiēt d'amande, d'orges mōdez, de la boullie & du laiēt de cheure. Si les veilles le trauaillent on choisira des remedes que j'ay descrits. Il faudra aussi parfois resiouir le cœur & les esprits avec quelque opiate cordiale. Il y a certains remedes, que les anciens ont proposé pour guarir ceste passion erotique,

Les amoureux doiuent estre traitez cōme les vrais melācholiques.

Remedes diaboliques & deffendus.

Des maladies melancholiques,
mais ils sont diaboliques, &
les Chrestiens n'en doiuent
vser; Ils font boire du sang de
celuy ou de celle qui a causé
le mal, & assuret q̃ la passion
est tout incontinent amortie.

Histoire
de Fausti
ne bien
estranger.

J'ay leu dans Iule Capitolin,
que Faustine femme de Marc
Aurele, fut tellement esprise
de l'amour d'vn ieune gladia-
teur, qu'elle s'en alloit mou-
rât; Marc Aurele recognois-
sant sa passion, fit assembler
tous les Chaldeens, Magiciẽs
& Philosophes du pais, pour
auoir vn remede prompt &
assuré pour ceste maladie; ils
luy conseillerẽt en fin de fai-
re tuer secrettement l'escri-
meur, de faire boire à sa fem-
me de ce sang, & de coucher
le soir mesme avec elle. Cela
fut executé, l'ardeur de Fau-
stine fut estainte, mais de cest

embraslement fut engendré Antonin Commode, qui fut vn des plus sanguinaires & cruels Empereurs de Rome, qui ressembloit plus au gladiateur qu'à son pere, & ne bougeoit iamais d'auec les escrimeurs. Voila comme Satan vse tousiours de ses malicieuses ruses, & comme vne infinité d'imposteurs & affronteurs vont abusant le monde.

De la troisieme espece de melancholie qu'on appelle hypochondriaque, & ses differences.

CHAP. XII.

IL y a vne troisieme espece de melancholie qui est la plus legere, & la

Des maladies melancholiques,
moins d'agereuse de routes,
mais la plus difficile à estre
bien recogneuë : car les plus
grāds Medecins sont en dou-
te de son essence, de ses cau-
ses & de la partie malade ; on
l'appelle cōmunement hypo-
chōdriacque & venteuse : hy-
pochōdriacque, pource qu'el-
le a son siege aux hypochon-
dres : venteuse, d'autāt qu'el-
le est tousiours l'accōpagnée
des vents. Diocles a pensé
que c'estoit vne inflamma-
tion du pylore, qui est l'orifi-
ce inferieur du ventricule,
d'autant que le malade sent
vne oppression grande en ce-
ste partie ; vne douleur & ten-
siō extreme dans l'estomach,
vne ardeur & comme embra-
sement par tout le ventre,
plusieurs vents qui s'en esle-
uent avec vne serosité qui

Nom de
l'hypo-
chōdria-
que.

Opinion
de Dio-
cles.

sort ordinairement par la bouche, cōme si c'estoit vne humeur decoulante du cerueau. Galien au troiesieme li-

ure des parties malades sem- Opinion
de Galien
ble approuuer ceste opinion,

toutesfois il a esté repris de to^r les Medecins nouveaux:

d'autant que s'il y auoit inflammation à l'estomach, elle

seroit accōpagnée d'une fièvre continuë, & la maladie se-

roit aiguë: or nous voyons le cōtraire; car l'hypochondria-

que est vne maladie croni-

que, & le plus souuent sans fièvre. Theophile pense que

c'est vne inflammation du foye & des intestins: s'il en-

tend que ce soit vne inflammation seiche qu'on appelle

φλόγσις, son opinion est receuable, mais s'il veut prendre l'inflammation pour vn

Opinion
de Theo-
phile.

Des maladies mélancholiques,
phlegmō qui est vne tumeur
contre nature, on luy fera le
mesme reproche qu'à Galiē,
pource que tout phlegmon
du foye & des intestins est au
rāg. des maladies aiguës. Les
plus doctes Medecins de no-
stre temps ont desfiny l'hypo-
chondriacque, vne intempe-
rature seiche & chaude des
venes du mesentere, du foye,
& de la ratte causee par vne
obstructiō des humeurs gros-
ses, lesquelles venants à s'es-
chauffer enuoyent plusieurs
vapeurs qui causent tous les
accidens que nous descrirōs
au chapitre suiuant. Ceste de-
finition comprend toute l'es-
sence de l'hypochondriacque,
puis qu'elle demōstre les par-
ties malades, & la cause de
leur maladie. Les parties où
s'engēdre l'hypochōdriacque

definitio
de l'hy-
pochon-
driacque.

Les par-
ties ma-
lades en
ceste af-
fection.

font le mesêtere, le foye, & la ratte : le mesentere a vne fort grâde estendue. car il cõtient vn million de venes, vn nombre infiny de glandes quiles accompagnent , & ce grand corps tout rouge qu'on appelle pancreas. Ce mesentere ^{le mesentere} est comme vn magazin ordinaire d'vn million de maladies , & sur tout des fieures intermittentes. Là se peut arrester & eschauffer l'humêur qui fait l'hypochondriaque, & non seulement dans les veines, mais bien souuent dans le corps du pancreas qui est fort proche de l'estomach, & qui est couché sur le premier intestin appellé *duodenum* ou *pylorus* : & en cela pourroit on excuser Diocles & Galié qui ont prins le pylore pour le pâcreas, d'autât que ces deux.

Des maladies melancholiques,

le foye.

La ratte
est le pl²
souuēt le
siege de
ceste ma
ladie.

parties se touchent. L'autre partie qui fait l'hypochondriaque est le foye, quand il est trop eschauffé, & qu'il attire de l'estomach les viandes à demy cuittes, ou qu'il brule par trop les humeurs & les retient dans ses veines : mais celle qui engédre le plus souuent l'hypochondriaque est la ratte, d'autant que nature l'a faicte pour l'expurgation du suc melācholique; de sorte que si elle ne fait son deuoir ou de l'attirer comme il faut, ou de le purifier pour sa nourriture, ou d'en chasser le superflu : il ne faut pas douter que ce suc grossier regorgeant par toutes les veines voisines ne s'y eschauffe, & face vn merueilleux trouble en toute l'œconomie naturelle. Voila donc les parties

malades en l'hypochondriaque, le mesentere, le foye & la ratte. La cause de leur maladie est vne obstruction, car les veines de ces parties sont farciës & remplies de quelque humeur. Ceste humeur par fois est simple, cōme vne humeur melancholique naturelle, ou vne humeur aduste & atrabilaire, ou vne humeur phlegmatique & cruë, par fois elle est meslee de deux ou trois ensemble, ce qui arriue bien plus souuent, mais il faut tousiours que ceste humeur s'eschauffe pour faire l'hypochondriaque : si elle est bilieuse ou aduste il luy sera fort aisé de s'embrazer promptement, si elle est froide de sa nature, comme est la melâcholie & le phlegme, le long sejour & la trans-

la cause
de l'hypochondriaque,

Des maladies melancholiques,
spiration empeschée la pour-
ront eschauffer, ou bien il ne
faudra qu'un peu de levain
qui sera fourny d'une portio
de cholere aduste, pour allu-
mer tout le feu : ceste ar-
deur a esté appelée des an-
ciens *φλόγωσις*, de sorte que
nous pourrons définir l'hy-
pochondriaque. une inflam-
mation seiche des veines du
mesentere, du foye, & de la
ratte, causée par la suppres-
sion de quelques humeurs
grossieres.

De ceste définition nous
recuillerons toutes les diffé-
rences de l'hypochondriaque :
lesquelles sont prises ou de
la partie malade, ou de la ma-
tiere, ou des accidés. Si nous
avons esgard aux parties ma-
lades il y aura trois especes
de l'hypochondriaque ; l'he-

Diffé-
ce de
l'hy-
po-
chô-
dria-
que.

patique, l'esplenique, & la
mesenterique. L'hepatique ^{l'hepati-}
vient par le vice du foye, qui ^{que.}
attire par sa chaleur excessi-
ue trop grande quantité de
cruditez de l'estomach, & en-
gendre par la mesme intem-
perature des humeurs trop
chaudes, lesquelles ou il re-
tient dans ses veines, qui sont
en si grand nombre qu'on ne
les peut descrire, ou les res-
pand par tous les rameaux de
la porte. L'esplenique vient ^{l'esple-}
par le vice de la ratte, quand ^{nique.}
elle ne peut attirer, purifier,
& chasser l'humeur melan-
cholique. Cela arrive lors
qu'elle est trop grosse, ou
trop petite: estant enflée ne
peut attirer ny contenir tout
l'excrement; de sorte qu'il
faut qu'il regorge, & que
tout le corps en amaigrisse.

Ce qu'a tresbien remarqué Hippocrate en ses Epidemies quand il dit que ceux à qui la ratte fleurit, le corps deuient maigre: & l'Empereur Trajan auoit accoustumé de cōparer la ratte au fisc: car tout ainsi que l'augmentation du fisc est la ruine & apauurissement du peuple; ainsi la grosseur de la ratte extenuë le corps: la petitesse aussi qui vient du vice de la cōformation peut estre cause de cest accident. car ne pouuant attirer ny contenir tout ce qu'il faut d'humeur melancholique, il est contraint de regorger & de se respādre par tout le mesentere. Il y a vne certaine famille fort noble qui est sujette à ceste hypochōdriacque, ils en sont morts trois ou quatre à l'aage de

trentecinq ans, on n'y a sceu recognoistre autre cause que la petitesse de la ratte, car elle estoit si petite & estroite qu'elle ne pouuoit faire son office.

La derniere hypochondria- La mesenterique.
que est la mesenterique, qui se fait au pancreas, aux glandes & aux veines mesenteriques. Hippocrate & plusieurs autres Medecins recognoissent vne hypochondriaque hysterique, qui viét de la matrice par la retention des mois, ou de quelque autre matiere: elle produit mesmes effects que les autres, & est bien souuét plus furieuse pour la merueilleuse sympathie qu'a la matrice avec toutes les parties du corps.

La seconde difference de seconde difference
l'hypochondriaque est prinse

Des maladies melancholiques,
de la matiere : il y en a vn qui
se fait de melancholie froide
naturelle, laquelle se retenant
dans les veines & y estât pres-
see s'eschauffe apres : l'autre
se fait d'une humeur aduste
& bruslee ; l'autre de gros
phlegme & de cruditez avec
vn peu de cholere qui s'y en-
tre-mesle.

La der-
niere dif-
ference. La derniere difference est
prinse des accidēs : il y a vne
hypochondriaque legere. Il
y en a vne autre plus violēte.
Il y en a vne qui cōmence, &
vne autre qui est formee.

*Les signes de l'hypochōdriaque, &
d'où viennent tous les accidens
qui l'accompagnent.*

CHAP. XIII.

Hypochōdriaque biē
formee est ordinaire-

ment accompagnée d'une infinité de fâcheux accidés qui tiennent par fois les malades en telle angoisse qu'ils pésent à tous coups estre morts : car outre la peur & la tristesse, qui sont accidens communs à toute melancholie, ils sentent une ardeur aux hypochondres, oyent tousiours un bruit & tintamarre par tout le ventre, pouffent les vents de tous costez, ont une oppression en la poitrine qui les contraint de redoubler leur respiration avec un sentiment de douleur ; crachent souuent une eau subtile & claire, ont une fluctuation en l'estomach, cōme s'il nageoit tout en eau, sentent un mouvement violent & extraordinaire du cœur qu'on appelle palpitation, & sur le co-

Accidés
de l'hypo-
chondriaque
formée.

Des maladies melancholiques,

sté de la ratte, il y a quelque chose qui les mord & qui bat tousiours, ont des petites sueurs froides accōpagnées par fois d'une legere defaillance, la face leur rougit bien souuent, & leur semble que c'est vn feu volage ou comme vne flamme qui passe, leur pouls se change & deuient petit & frequent, sentent vne lassitude & foiblesse vniuerselle, & sur tout aux iambes, leur vêtre n'est iamais lasche; en fin ils amaigrissent peu à peu. Tous ces accidents dependent de ceste cause generale que i'ay descrite, mais il en faut ici recercher les particulieres. L'ardeur qu'ils sentent du costé de la ratte, du foye & de tout le mesentere vient de l'embrasement de ceste grosse humeur, soit

Causés
particulieres de
tous ces
accidēs.

D'où
vient
l'ardeur.

phlegmatique, soit attrabilai-
re, laquelle venant comme à
bouillonner s'enfle, & en-
voye ses vapeurs par toutes
les parties voisines. Le bruit <sup>Cause
des vêts.</sup>
qu'on oit par tout le ventre
vient de vents qui courent
par tout, & accompagnent si
bien ceste melancholie que
les anciës l'ont appellée ven-
teuse: nous remarquerons à
la generation de ces vents la <sup>1. a cause
mate-
rielle.</sup>
cause materielle & efficiente;
la matiere est vne humeur
grosse, attrabilaire, ou pitui-
teuse. Ces deux humeurs sont
quasi tousiours meslees en
ceste maladie, pource que le
foye estant trop chaud (com-
me il est ordinairement aux
hypochondriaques) attire &
rauit de l'estomach, qui est
son voisin fort proche, la
viande qui n'est qu'à demy

Des maladies melancholiques,
cuitte: il se fait donc vn amas
de cruditez dans les veines
par l'attraction du foye: il se
fait aussi vne generation des
humeurs chaudes & bruslees
par l'inteperature de ce vi-
scere; de façon qu'il y a tous-
iours dans les veines & du
crud & du trop cuit: le crud
y a esté attiré trop tost, le
bruslé s'y est engendré.

La cause efficiente des vêts. La chaleur debile est la cau-
se efficiente des vents, elle
meut & agite la matiere, mais
n'a pas le pouuoir de la diffi-
per du tout, & encore que l'a-
gent de soy-mesme soit assez
fort, toutefois n'estant point
proportionné à la matiere,
peut estre appellé debile.

D'où vient l'oppression. L'oppression qu'ils sentét à
la poictrine vient ou des vêts
ou des vapeurs grossieres, les-
quelles pressent le diaphrag-

me, principal instrument de la respiration, ou se mettent entre les espaces des muscles intercostaux, ou bien entre les tuniques tant internes qu'externes, de là viennent ces grâdes douleurs qui montent iusques aux espaules, & vont bien souuent aux bras par la cōtinuation des membranes, & sympathie des muscles.

Ceste eau que les melancholiques iettent ordinairement par la bouche est vn des plus affeurez signes de l'hypochondriaque, si nous voulons croire Diocles: la cause se doit rapporter au refroidissement de l'estomach qui engendre tout plein de cruditez. Ceste froideur arriue par la chaleur excessiue du foye qui attire le chyle tout crud, qui consomme toute

D'où
viennēt
les eaux
& la fluctuatiō.



la graisse de l'estomach, qui rait comme goulé toute la chaleur des parties voisines: l'adiousteray aussi que l'ebullition de l'humeur venant à se faire, le plus crud regorge souvent dans l'estomach, & le refroidit; de sorte que nous y remarquons les deux froids, le priuatif & le positif (ainsi qu'ont accoustumé de parler les Philosophes.)

D'où
vient la
palpita-
tion.

Le mouuement extraordinaire du cœur & de toutes les arteres vient de la vapeur qui s'esleue de ceste matiere agitée, laquelle attaquant assez viuement le cœur, & le defiant comme au combat luy fait redoubler ses pas, mais il en perd bien souvent la cadence, & ceste belle mesure qui doit estre au pouls defaut quelque fois. Les rou-
geurs

geurs qu'on voit au visage, ^{d'où viennent les}
les palpitations vniuerselles ^{rou-}
& ces chatouillemens qu'on ^{geurs.}
sent par tout comme petits
fourmis, viennent ou des vêts
plus subtils, ou des vapeurs
esleuees d'en bas. Les sueurs
froides arriuent lors que les ^{La cause}
vapeurs sortans des hypo- ^{des}
chondres cōme d'une four- ^{sueurs}
naise abordent à la peau qui ^{froides.}
est beaucoup plus froide, &
là s'espaisissent. La lassitude ^{d'où vient}
qu'ils sentent par tous les ^{la lassitu-}
membres, vient en partie des ^{de.}
vapeurs qui courants parmy
les espaces des muscles, & se
messans dans la substāce des
nerfs les rendēt plus lasches,
& font cōme vne stupeur, en
partie des cruditez & serositéz
qui sont avec le sang. ^{d'où vient}
L'amaigrissement vient, ^{l'amaigrissement.}
pource qu'il n'y a pas assez

Des maladies melancholiques,
de sang louable. Le vêtre est
dur pour la chaleur excessiue
du foye qui consomme toute
l'humidité des excréments.

*Histoires fort remarquables de
deux hypochondriaques.*

CHAP. XIII.

IL se trouue par fois
des maladies si estran-
ges en leur espee, que les
plus habiles Medecins y per-
dent le iugement. I'ay veu
deux hypochondriaques si fu-
rieuses, que l'antiquité n'en a
iamais remarqué de sembla-
bles, & la posterité peut estre
n'en verra de long temps de
telles. Il y auoit à Montpelier
vn honneste citoyen d'habi-
tude melancholique, & d'un
temperament atrabilaire, le-
quel ayant esté trauaillé par

Histoire
premiere

l'espace de deux ou trois années d'une legere hypochondriaque, laissa tellement accroistre le mal, qu'il se vit en fin reduit à ceste extremité; Il sentoit deux ou trois fois le iour vn leger mouuement par tout le ventre, & principalement sur le costé de la ratte: le bruit s'en esmouuoit si grand, que non seulement le malade, mais tous les assistans l'oyoient: Ce tintamarre duroit enuiron vn demy quart d'heure, & apres tout soudain la vapeur, ou le vent gagnant le diaphragme & la poictrine luy causoit vne oppression si grande avec vne toux seiche, que tous leussent pēlé astmatique. Cet accident estant vn peu remis, tout le reste du corps estoit tellemēt esbrālē qu'on l'eust

Des maladies melancholiques,
iugé semblable à vn nauire
qui est agité de la plus furieu-
se tempeste: il s'aduançoit, il
reculoit, on voyoit les deux
bras se mouuoir comme s'ils
eussent enduré des conuul-
sions. En fin ces vents ayans
couru par tout le corps &
fait vn rauage vniuersel, for-
toient avec si grande impe-
tuosité par la bouche, que
tous les assistés en estoient ef-
frayez, lors l'accez finissoit,
& le malade se sentoit allegé.
Ce n'est pas encôres tout,
deux ou trois mois auant
qu'il mourust il auoit tous
les iours deux ou trois peti-
tes syncopes, le cœur luy de-
failloit, avec vne enuie extre-
me de pisser, & comme il a-
uoit pissé il reuenoit à soy:
la violence du mal fut si grâ-
de que l'âme fut en fin con-

trainte d'abandonner son logis. Je fus appelé à l'ouuerture du corps, pource que ie l'auois assisté ordinairement en sa maladie avec vn de mes collegues monsieur Hucher Chancelier de nostre vniuersité, que i'ay bié voulu nommer par honneur, comme le cognoissant vn des plus doctes & plus experimétez Medecins de nostre temps. Je trouuay la poictrine à demy pleine d'vne eau noirastre & puante, le fenestre ventricule du cœur en estoit tout rempli, & dans le tronc de la grosse artere on y voyoit la mesme couleur. Lors me resouuenant d'vn beau passage qui est dans Galien au sixiesme liure des parties malades, ie remonstray à la compagnie que la cause de ces defaille-

Des maladies melancholiques,
mens, & de l'enuie frequente
de pisser, venoit de ceste hu-
meur maligne, laquelle tra-
uersant le cœur s'en aloit
par les arteres aux reins, & de
là à la vessie. J'ay voulu noter
cecy en passant pour defen-
dre Galien de la calomnie des
nouveaux Medecins, qui pé-
sent que le pus des empyi-
ques & des pleuretiques ne
se peut purger par le cœur
ou par les arteres. J'ay plus
amplement traité ce subiect
au troisieme liure de mes
œuvres anatomiques.

Belle ob-
servatiõ
pour la
defense de
Galien.

Seconde
histoire.

L'autre histoire est biẽ au-
si estrange, ie l'ay remarquẽe
cet hyuer à Tours, & ay esté
appellé en conseil avec mes-
sieurs d'Anselineau, Fale-
seau, & Vertunian, Medecins
tresdoctes & fort experimẽ-
tez. Vn ieune seigneur de-

puis huit ou neuf ans est tra-
uailé de ceste hypochôdria-
que : il oit tous les iours en-
uiron les neuf heures du ma-
tit vn petit bruit du costé de
la ratte : apres il sent esleuer
vne vapeur qui rougit toute
la poictrine, toutelaface, &
gaigne le plus hault de la te-
ste, les arteres des tēples bat-
tent bien fort, les veines du
visage sont enflées, & au
bout du front, où les veines
finissent, il sent vne douleur
extreme qui n'a que la lar-
geur d'vn sol, la rougeur
court par tout le bras gau-
che iusqu'au bout des doigts,
& represente vn feu volage
ou vn erisipele, le costé droit
en est du tout exempt. Du-
rāt l'accez il est si abbattu qu'il
ne peut sonner mot, les lar-
mes luy decoulent en abon-

Des maladies melancholiques,
dence, & luy fort de la bouche vne quantité incroyable d'eaux, le dehors brufle, & le dedans est comme glacé: la iambe gauche est toute pleine de varices, & ce que ie trouue de plus estrange à l'os gauche de la teste, qu'on appelle parietal, il y a vne piece d'os emportee sans qu'il ait precedé aucune cause apparente, comme coup ou cheute, & ne peut endurer qu'on le touché en cet endroit: la maladie a esté si rebelle que tous les remedes que les plus doctes Medecins luy ont ordonné ne l'ont iamais sceu abbatre. Il fut resolu en nostre conseil qu'on la combatroit par remedes extraordinaires, & par alexipharmques: nous n'en auôs pas encores sceu le succez. Voila

du moyen de les guarir. 185

comme ces grosses humeurs
bruslées & melancholiques
sejournans dans les veines du
foye, de la ratte, & du mesen-
tere, peuvent exciter vne in-
finité d'accidens estranges,
& sont cause d'une sedition
bien grande en toute l'œco-
nomie du corps.

La curation de l'hypochondriaque.

si on veut se sçavoir en quoy on se

CHAP. XV.

si on veut se sçavoir en quoy on se

POUR la curation de
l'hypochôdriaque ;
nous auôs besoin de
deux sortes de remedes ; les
vns s'ordonnêt hors de l'ac-
cez , & sont appellez prefer-
uatifs : les autres sont pro-
pres au temps de l'accez ; &
lors que le malade est travail-
lé de tous ces accidens : ie

Qv

Dés maladies melancholiques,

commenceray aux premiers.

Preserua
tion de
l'hypo-
chōdria-
que.

Remedes
euacua-
tifs.

Saignee.

La preservation se fera par trois genres de remedes, qui sont les euacuatifs, les alteratifs, & ceux qui fortifiēt: Les euacuatifs sont la saignée & la purgation: la saignée vniuerselle peut seruir pour corriger l'intemperature chaude du foye, & pour vider vne portion du sang melancholique; elle se fera de la veine basilique, que les Arabes appellent noire; les saignées particulieres des veines hemorrhoidales sont mises au rang des plus grands & assurez remedes pour l'hypochochōdriaque, d'autāt qu'elles euacuēt la ratte & tout le mesentere. Il y en a qui louēt l'ouuerture de ceste veine qui va au petit doigt de la main gauche, qu'on nomme *salua-*

tella. L'autre euacuation se fera par la purgation, laquelle ne doit point estre violente, de peur que ceste humeur ne s'effarouche dauátage. il faudra doncques purger tout doucemét & par interualles, Les purgatifs seront phlegmagoges & melanagoges, pource que cesont les deux humeurs qui pechét le plus: le fenné & l'agaric tiennent le premier rég. l'ay descrit au chapitre de la premiere melancholie les formes de plusieurs purgatifs qui pourroient icy seruir, mais d'autát que l'humeur qui fait l'hypochondriaque est meslee, il en faudra descrire d'une autre façon. l'approuue fort l'usage des syrrops magistralz & des opiates, qu'on pourra composer en ceste façon.

Des maladies melancholiques,

Syrop
magi-
stral.

Prenez racines de buglose
& d'asperges, escorces de ra-
cines de cappres & de tama-
ris, de chacune vne once, ra-
cines & fucilles de cichoree,
bourrage, buglose, houbelô,
fumeterre, ceterach, capilli
venetis, de chacune vne poi-
gnee, d'absynthe pontic, de la
melisse vne petite poignee,
de regulisse, & de raisins de
Corinthe lauez en eau tiede,
de chacune vne once, semé-
ces de citron, de chardon be-
nit, d'ediue, de chacune deux
dragmes, des trois fleurs cor-
diales, des fleurs de cichoree,
des sommitéz du thym, & de
l'epithyme, de chacune vne
petite poignee, faites cuire
le tout en suffisante quantité
d'eau claire, & l'ayant bien
coulé prenez en deux liures,
ausquelles adiousterez l'ex-

pression de quatre onces de
sené de leuant, qui aurót in-
fusé en la susdite decoction,
auec vne dragme de girofle,
l'expression d'vne once &
demy d'agarie qui aura in-
fusé en l'eau de menthe, a-
uec vn scrupule de zingem-
bre, & auec suffisante quanti-
té de sucre, faictes cuire le
tout en vn syrop parfaict, le-
quel garderez pour l'vsage
ordinaire. Il en faudra pren-
dre deux onces vne fois le
mois, ou deux, auec vn bouil-
lon de poulet dans lequel on
aura fait cuire de la bourra-
ge, buglose, houbelon, & des
capillaires. On pourra faire
vn syrop auec les suc des
mesmes herbes, & y mettre
mesmes laxatifs.

L'opiate que i'ay desia des-
crite pourra seruir icy, mais

Des maladies melancholiques,
il s'en peut faire d'une autre
façon, qui purge fort dou-
cement.

Opiate. Prenez du suc de la mercu-
riale bien depuré, ce qu'il en
faudra, faites y infuser par
l'espace de vingt-quatre heu-
res deux onces de senné de
levant, & faites les bouillir,
apres exprimez-le bien fort,
& ce qui sera coulé faites le
cuire avec le sucre en forme
d'electuaire, auquel adiouste-
rez deux onces de casse recé-
tement tiree de son canon,
demy once d'epithyme, deux
dragmes de girofle cōquassé,
& meslant bié le tout ensem-
ble en formerez vne opiate,
de laquelle on pourra pren-
dre demy once ou plus.

Ceux qui ne peuvent vser
des breuages ny des opiates
prendront des pilules qu'on

fera avec l'extraction du sené, de l'agaric, & de la rhubarbe, car les autres pilules ne sont pas trop propres en ceste maladie.

Prenez quatre onces de bō polypode, racines & fucilles de cichoree, buglose, fumeterre, houbelon, de chacune vne poignée, vne douzaine de raisins de damas, vne poignée des trois fleurs cordiales, faiçtes vne decoction iusques à vne liure, dans laquelle ferez bouillir deux onces & demie de sené, six dragmes d'epithyme, demy once de bon agaric. Tout cela ayant infusé vne nuit entiere le coulerez & exprimerez bien fort, adioustant demy once de bonne rhubarbe, qui aura infusé en la susdite decoctiō, avec vn peu de canelle. Vous

Extra-
ction de
sené
pour en
former
des pilu-
les.

Des maladies melancholiques,

mettrez apres tout cela ensemble sur les cendres chaudes, le ferez seicher iusques à ce qu'il ait vne cōsistence assez espaisse, & y adioustant trois dragmes d'epithyme, ferez vne masse de pilules qui purgera fort doucement, à la dose de quatre scrupules. Voila les plus doux purgatifs; en adioustant les clystères fréquens, qui peuuent seruir à l'hypochondriaque. Mais d'autāt que ceste humeur est grosse, & bien souuent cachée dans les plus profondes veines, il est mal aisé de la bien euacuer, si premieremēt elle n'est preparee: il faudra donc venir au second genre des remedes que nous auons appellé alteratifs. L'alteration consiste en l'humectation de ceste humeur & en l'attenua-

Remedes
alteratifs
internes.

tion : elle se pourra faire par remèdes internes & externes ; les internes sont les apozemes, qui doivent estre <sup>Apoze-
mes.</sup> médiocrement aperitives à cause des obstructions, & se faut bien garder d'eschauffer trop. Les herbes hepaticques & spleniques y seront fort propres, & ne faut pas oublier l'absynthe : car tous les bons praticiens assurent que la decoction seule d'absynthe a preservé vne infinité de personnes de l'hypochondriaque. Il ne sera pas mauvais pour <sup>Usage de
lesquine.</sup> destremper ces grosses humeurs, & pour desboucher les conduits, de faire user d'une decoction de l'esquine avec vn peu de saffras l'espace de douze ou quinze <sup>Bouil-
lons.</sup> iours. Les bouillons humectans & alteratifs, la façon de

Des maladies melancholiques,
viure, & le lait, serviront in-
finiment pour la preparation
& humectation de ceste hu-
meur seiche. Quant aux re-
medes externes, les bains v-
niuersels tiennent le premier
lieu: on fera aussi des fomen-
tations sur la ratte & sur tout
le mesentere, des onctions,
des liniments. Les fomenta-
tions serot remollitiues, me-
diocrement aperitiues, atte-
nuantes, & y faudra mesler
quelque chose qui dissipe les
vets, les formes en sont assez
communes. Les huiles de ca-
pres, d'amandes ameres, de ge-
nest, le sambucin, de lis, de ca-
momille & des graines d'hie-
ble sont les plus propres.

Remede-
des alte-
ratifs ex-
ternes.

Remede-
des con-
fortatifs

Le dernier genre des reme-
des est de ceux qui fortifient:
car il y a ordinairement en
l'hypochondriaque plusieurs

parties affoiblies qui reçoivent l'impression de ceste humeur: comme le cœur, l'estomach, le cerueau. La foiblesse du cœur est cause des palpitations & des legeres defaillances, l'estomach debile engédre tout plein de cruditez, le cerueau affoibli est la cause que l'imagination & la raison sont bien souuent troublees en ceste maladie. Il faudra donc auoir esgard à ces parties. Le cœur se fortifiera par remedes internes & externes: les internes sont opiates, condits, tablettes.

Moyens
pour
fortifier
le cœur.

Prenez cōserue de racine de buglose & de fleur de bourrage, de chacune vne once, de chairs de mirabolan & d'escorces de citron confites, de chacune demy once, deux dragmes de cōfection alker-

Opiate.

Des maladies melancholiques,
mes, de perles & de la pou-
dre de lieffe, vne dragme de
chacune, avec le syrop de pō-
mes, faiētes en vne opiate, de
laquelle faudra prendre deux
ou trois fois la semaine, avec
vn peu d'eau de buglose.

Tablet-
tes.

Prenez de la poudre de l'e-
lectuaire de gēmis & de lief-
se vne dragme de chacune, de
confection alkermes demy
dragme, de perles & d'esme-
raude bien puluerisees, vn
scrupule de chacune, du suc-
cre dissout avec l'eau de bu-
glose ou de melisse tant qu'il
en faudra, faiētes en des ta-
blettes du pois de trois dra-
gmes, il en faudra prendre le
matin & le soir deux ou trois
fois la semaine.

Muscar-
dins.

Pour les delicats & plus
friāds on fait des muscardins:
Prenez le tiers d'vne noix

muscade confite, trois dragmes d'escorce de citron, & autant de mirabolan confit, demi dragme d'ambre gris & autant de musc, du suc crele double de tout, & avec le mussilage de la gomme tragacant tiree en eau de buglose, faiêtes en des muscardins. Il ne faut pas trop souuent vser de ces remedes chauds à l'hypochondriaque, de peur d'irriter & effaroucher l'humour.

Les remedes externes pour fortifier le cœur sont epithe-
mes liquides, solides, huiles, Remedes externes.
vnguens, & sachets.

Prenez eaux de buglose, melisse, & de rose, de chacune quatre onces, du vin blanc vne once & demie, de graine d'esclate, des fleurs cordiales, de chacune vne dragme, Epithemes liquides.

Des maladies melancholiques,
de poudre de diamargaritum
& d'iambre, de chacune demi
dragme, demy scrupule de
saffran, meslez le tout & en
faictes des epithemes qu'ap-
pliquerez sur le cœur.

Epithe-
mes soli-
des.

Prenez conserue de fleurs
de bourrage, de rose & de
melisse, de chacune deux on-
ces, de la cōfection alkermes
& de hyacinthe, de chacune
deux dragmes, de la poudre
de gēmes & de lieffe, de cha-
cune demy dragme, avec
l'eau de melisse ou de fleur
d'orange, faictes en vne epi-
theme solide en forme de ca-
taplasme, qu'estendrez sur
vne piece d'escarlate, & ap-
pliquerez sur le cœur.

Huiles.

Prenez huile de iasmin &
du costus vne once, trois
grains d'ambre gris, frottez
en la region du cœur, ou aiez

du baume naturel.

Prenez des fleurs de camomille, de romarin & d'oranger, de chacune deux dragmes, du bois d'aloës, du fan-
tal muscatelin, de chacun vne dragme, d'huile de iasmin, & du baume naturel, de chacun vne once, six ou sept grains d'ambre & de musc, & avec vn peu de cire blanche, faictes en vn vnguent duquel oindrez le cœur. Vnguent.

Prenez de fueilles de melisse, de fleurs de bourrage, buglose, de chacun vne demy poignée, d'escorce de citron, & de sa semence deux dragmes, semence de melisse, & du basilic giroflé, de chacune vne dragme, des poudres de perles, esmeraudes, & hyacinthes, demy dragme de chacune, de l'os du cœur de cerf, Sachets.

vne dragme, du fental rouge,
& citrin vne dragme, quatre
ou cinq grains de bon am-
bre, conqassez tout cela &
en faictes vn sachet de taffe-
tas rouge bien entrepointé,
ayant la forme du cœur, &
portez le ordinairement sur
le cœur.

Voila les plus propres re-
medes tant internes qu'exter-
nes pour fortifier le cœur, &
pour empescher les foibles-
ses qui arriuent ordinairement
aux hypochondriaques.

Remede
des pour
fortifier
l'esto-
mach.

L'autre partie, qu'il faut for-
tifier est l'estomach, on vsera
de poudres digestiues pour
empescher qu'il n'engendre
pas tant de cruditez, & si on
l'oindra par dehors de quel-
ques huiles propres. La pou-
dre digestiue ne doit point
estre trop chaude.

Prenez

Prenez de panis & fenoil Poudre
confit de chacun trois drag- digestive
mes, escorce de citron confi-
te vne dragme, de perles pre-
parees, du corail rouge, de
chacune vne demy dragme,
deux scrupules de fine canel-
le, de sucre rosat quatre on-
ces: faictes en vne poudre, de
laquelle on prendra vne cuil-
lere e apres chaque repas.

On pourra par dehors for- Remedes
tifier l'estomach avec l'on- externes
ction des huiles de muscade, pour l'e-
nardin, & d'abfinthe, ou avec stomach
quelque sachet fait avec l'ab-
synthe, la melisse, girofle, ma-
cis, canelle, roses rouges, &
semblables poudres; il est
vray qu'il se faut bien garder
de les appliquer sur le foye,
d'autant que l'intemperatu-
re chaude de ceste partie est
ordinairement la source de

toutes les hypochôdriques. On pourra pour ceste occasion oindre le foye avec l'onguent rofat & santalin, bien lauez en eau de cichoree : ou bien on appliquera des epithemes des eaux de cichoree, endiue, ozeille, semées d'endiue, fleurs cordiales, du santal rouge.

Quant au cerueau qui est debile, de peur qu'il ne reçoive si grande quantité de vapeurs, on le pourra fortifier avec poudres capitales & legers parfuns.

Et voila quant aux remedes preseruatifs, qui se peuvent ordonner hors de l'accez, & qui empescheront sans doute que l'accez ne viendra point. car ostant la cause des accidens, il fault necessairement que les effects cessent.

Mais quand l'accez de l'hypo- Remedes
chondriaque trauaillera le pour l'ac
malade, il faut vſer d'autres cez de
remedes, lesquels le Medecin l'hypo-
diuerſifiera ſelō l'accidēt qui chōdria-
preſſera le plus. Si c'eſt la foi- que.
bleſſe, on laiffera tout pour Cōme il
fortifier le cœur, on employe faut re-
ra des remedes q̄ i'ay deſcrits medier à
cy deſſus: on prendra de l'al- la foi-
kermes, du pain trépé dās le bleſſe.
vin, des tablettes, & opiates
cordiales, d'eſcorce de citrō;
on appliquera ſur le cœur
des epithemes liquides & ſei-
ches, d'huiles, baumes, on-
guents, ſachets. Si l'oppref- Remedes
ſion, qui eſt le plus cōmun ac- pour les
cidēt de l'hypochondriaque, vēts qui
& qui viēt de ces groſſes va- preſſent.
peurs, ou des vents qui preſ-
ſent le diaphragme, & les
mēbranes, trauaille bien fort;
il faudra faire des frictiōs le-

geres aux cuisses & aux iam-
bes, donner vn clystere car-
minatif, appliquer des gran-
des ventouses sur la ratte, sur
le nombril, & sur tout le ven-
tre: & si la douleur de ces
vents est fort grâde, on pour-
ra prédre vne cuilleree d'eau
clairëtte, ou d'eau de canelle
distillee, ou d'eau celeste, ou
bien deux ou trois gouttes
d'essence d'anis dans vn peu
de bouillon bien chaud, ou
vn peu de theriaque & de mi-
thridat: si les vents s'opinia-
strent par trop, & ne veulent
bouger de la poitrine, on les
fera desloger avec quelques
sachets bien chauds appli-
quez, qui serôt faits de fleurs
de camomille, & de melilot,
des sommitez d'aneth, du
millet & de l'auoine fricassée.

On pourra aussi sur la re-

gion de la ratte appliquer des fomentations qui refoudrôt & dissiperont vne partie de ces grosses vapeurs. Voila les trois especes de melancholie que les anciens nous ont decrites, celle qui a son siege au cerueau, celle qui vient par sympathie de tout le corps, & celle qui s'esleue ordinairement des hypochondres, qui est la plus commune, & si frequente en ce miserable tēps, qu'il se trouue fort peu de gens qui n'en ressentēt quelque attaque. Je viens à la troisieme maladie de Madame la Duchesse d'Vzez, qui est le catarrhe.

Fin du second Discours.



TROISIEME DISCOVRS, AVQUEL est traicté de la generation des catarrhes, & comme il les faut guarir.

*Que le cerueau est le siege du froid &
de l'humide, & par consequent la
source des defluxions.*

CHAPITRE I,



E n'est pas sans cau-
se que ce grand ora-
cle de Grece Hip-
pocrate a escrit en plusieurs
endroits, q le cerueau estoit
le vray siege du froid & de
l'humide: car si nous regar-
dons sa substance moëlleuse,
son temperament froid, sa
forme ronde, caue & lon-

Le cer-
ueau sie-
ge du
froid &
de l'hu-
mide.

guette comme vne ventou-
se, & sa situation haute rece-
uant toutes les vapeurs des
parties basses, nous trouue-
rons que tout cela est dispo-
sé pour engendrer & conte-
nir grāde quantité d'eaux. La
substance du cerueau deuoit
estre molle & moëlleuse,
pour receuoir plus facilement
l'impressiō des images, & afin
que les nerfs qui en deuoient
naistre se peussent plus aisé-
mēt flechir: mais ceste moël-
le n'est pas semblable à celle
qui est dans les cauernes des
autres os: elle ne sert point
d'aliment au crane, elle ne se
fond point au feu, & ne se
peut consumer: son origine
est beaucoup plus noble, elle
se forme avec les autres par-
ties de la plus nette, & pure
portion des deux semences.

tempera
ment du
cerveau
froid.

Erreur
d'Aristo-
te.

Le temperament du cerueau
debuoit estre froid, pour tē-
perer les esprits animaux,
pour empescher leur dissipa-
tion, & pour garder que ceste
noble partie qui est ordinai-
remēt occupee à tant de bel-
les actiōs, ne s'ébrafast, & ren-
dist tous les discours temerai-
res, & les mouuemens desre-
glez, cōme il arriue aux phre-
netiques. Je me suis bien sou-
uent estonné cōme ce grand
Philosophe Aristote a osé
dire que le cerueau auoit esté
créé froid, seulémēt pour re-
froidir le cœur, & qu'il n'en
recognoissoit autre vsage. Si
le tēps & le lieu me permet-
toient de remonstrer son er-
reur, ie ferois voir que le ta-
lon a plus de force à refroi-
dir le cœur que le cerueau:
mais craignant de m'esgarer,

ie renuoycray le lecteur à ce
que Galien en a escrit au hui-
ctiesme liure de l'vsage des
parties. Je poursuiuray le fil
de mō discours, & diray que
le cerueau estant d'vne sub-
stance molle, & d'vn tempe-
rument froid & humide (si
on le veut comparer avec les
autres parties du corps) en-
gendre plusieurs excrēmens, Le cer-
ueau en-
gendre
beau-
coup
d'excre-
mens de
soy.
pource que se nourrissant
d'vn sang froid & crud, il faut
nécessairement qu'il en de-
meure beaucoup de reste, &
qu'il s'amasse quantité de su-
perfluitez : de sorte que de
soy & de sa nature propre il
est tousiours disposé à en-
gendrer & contenir des eaux. Il en en-
gendre
par acci-
dent.
il en engēdre aussi beaucoup
par accidēt à cause de sa for-
me & situation ; sa forme qui
est ronde, caue & longue cō-

me vne ventouse, attire de toutes les parties du corps les exhalations; sa situation qui est haute les reçoit aisément: de façon que ces vapeurs chaudes estâs arriuees en vne partie plus froide s'espaisissent & cōuertissent en eau, cōme nous voyons que les vapeurs esleuees des hypochondres embrasez, quâd elles arriuent au cuir qui est beaucoup plus froid, se congelent & conuertissent en fueur: ou comme les exhalations esleuees par la chaleur du Soleil en la moyenne region de l'air se condensent & conuertissent en pluye, gresle & neige. Voila donc comme le cerueau, & de soy, & par accident est propre à engendrer des excremens, & comme en tout animal on le

peut appeller siege principal du froid & de l'humide: mais principalement à l'homme, d'autant que pour la varieté des fonctions animales qu'il exerce, il a plus grande quantité de cerueau que les autres animaux. Or ces excremens (si nous croyons Hippocrate & Galien) font de deux fa- çons, les vns font grossiers, les autres subtils. Les subtils s'euaporent souuent par insensible trāspiration, les grossiers ont eu besoin de canaux pour leur expurgation. Nature a si bien pourueu à tous les deux, qu'il faut qu'un chacun admire icy son industrie: car pour l'exhalation des plus subtils elle a percé le crane, & a fait toutes ces futures que nous y voyons, qui seruent au corps comme de chemi-

Deux
sortes
d'excre-
mens.

Cōduits
pour
l'expur-
gation
des ex-
cremens.

nee, ou de fouspirail: & pour les plus gros excremés elle a fait deux canaux & aqueducs particuliers, par lesquels toutes les eaux se vuident: l'un s'en va rendre au nez, & l'autre au palais. Celuy du palais est le plus cōmun, on le voit venir du troisieme ventricule du cerueau, il est large par le haut, & va tousiours en s'estroissant comme vn entonnoir: c'est pourquoy les anatomistes l'appellēt *infundibulum*. par ce canal toutes les serositez des superieurs ventricules se purgent, & se vont rédre à vne glâde qu'on nomme pituitaire, qui boit comme vne petite esponge toutes les serositez, & apres les laisse tout doucemēt couler par plusieurs petites fentes, qui se voyent à costé de

Le canal
qui va
au palais

la selle de l'os sphénoïde, & s'en vont rendre au palais. L'autre canal s'en va au nez: ce sont deux eminences du cerueau qui ont la forme des mammelles, & s'appellent pour ceste occasion procez mamillaires. Leur principal vsage est bien de receuoir les odeurs & les apporter au cerueau: mais quand il y a trop grande quantité d'excremens, nature en abuse, & fait couler par ces deux apophyses les serositez qui passent par vne portion de l'os ethmoïde, qui est percé comme vn crible. Ce sont ces deux conduits, j'entens le nez & le palais, que nature a destinez pour la purgatiõ du cerueau. Il y en a d'autres extraordinaires qu'Hippocrate a remarqué au liure des glandes,

Le canal
qui va
au nez.

Côduits
extraor-
dinaires

comme les yeux, oreilles, la
moëlle dorsalle, les veines,
les nerfs: mais ceux-cy seruét
lors que tout est en désordre,
& que l'œconomie naturelle
du cerueau est peruertie.

*Que signifie ce mot de catarrhe,
quelle maladie c'est, & en quoy
consiste son essence.*

CHAP. II.

Sil le cerueau est bien
disposé il n'engédre.
Car que les excremens
naturels, & les purgera tous
les iours par les conduits que
nature luy a destiné: mais s'il
est intemperé, il en amassera
beaucoup plus qu'il ne faut,
lesquels ou de leur pesanteur
propre (qui est la forme ele-
mentaire) tomberont en bas,
ou seront chassez en quelque

partie par la vertu expultrice
du cerueau, qui se sentira
pressé de leur quantité, ou
qualité maligne. Ceste des-
cente d'humeur en quelque
façon qu'elle se fasse, se nom-
me generalement des Grecs
catarrhe, qui signifie autant
cōme defluxion. Je sçay bien
qu'il y a vne plus estroitte si-
gnification de ce nom, & que
cōme Galien remarque tres-
bien au troisieme des cau-
ses des symptomes, catarrhe
proprement est quand l'hu-
meur descoule dans la bou-
che: mais ie me seruiray icy
de la plus commune, & ap-
pelleray toute descente d'hu-
meur qui vient du cerueau
en quelque partie que ce soit,
catarrhe.

Que si-
gnifie le
nom de
catar-
rhe.

Catarrhe, si nous croyons
bien, est vn symptome du

Catar-
rhe est
vn sym-
ptome.

La mala-
die qui
est cause
de ce
sympto-
me.

troisième genre, qui est un vice aux excréments. ce symptome ensuit ordinairement un autre qui est l'action blessée; l'action qui est icy blessée est la coction. car le cerveau ne digerant pas bien l'aliment, engendre plus de superfluité qu'il ne faut. La coction offensée estant un symptome, depend immédiatement de quelque maladie. Je croy que c'est le plus souvent une intemperature froide & humide; la seiche en peut estre quelquefois cause par accident, retenât les vapeurs & empeschant qu'elles ne passent outre; la chaude aussi en fondant les humeurs & attirant trop de vapeurs, mais c'est plus rarement. Le cerveau donc est la partie malade aux catarrhes. La maladie

est vne intemperature qui
blesse immediatement la co-
ction, & de ceste lesion vient
le vice de l'excrement. Or
pour entendre la nature du
catarrhe, il est necessaire de
philosopher en ceste façon.

Catarrhe ou defluxion n'est
autre chose qu'un mouue-
ment d'humeurs d'un lieu à

Defini-
tion du
catarrhe

l'autre, que les Philosophes
appellent local. Or en tout
mouvement local, Aristote
en sa Physique remarque
cinq choses; Le mobile, c'est
à dire, ce qui est meu; le mou-
uant, c'est à dire, ce qui meut;
& trois termes; celui d'où
commence le mouvement,
celuy par où se fait le mouue-
ment, & celuy où se finit
& termine le mouvement.

Il faut
remar-
quer
cinq
choſes
au catar-
rhe.

Aux defluxions ce qui est
meu est l'humeur de quel-

1. Le
mobile

que qualité qu'elle soit, chaude, froide, douce, aigre, sale, tenve, crasse, simple, meslée.

2. Le
mouuant.

Ce qui fait mouuoir ceste humeur & luy fait changer de place, qu'on appelle en vn mot le mouuant, est double; l'vn est interne, l'autre externe.

Le mou-
uant in-
terne.

L'interne de rechef est double: la forme del' humeur, & l'ame, c'est à dire, la faculté expultrice: l' humeur si elle suit sa nature & sa forme elementaire, doit tousiours descendre pource qu'elle est pesante. Or il arriue souuēt que l' humeur n'estant plus regie de l'ame (comme quand la faculté retentrice est du tout affoiblie) tombe d'elle-mesme & n'a point autre principe de son mouuement que sa forme propre & sa pesanteur. Ainsi voyons-nous la

pluspart de ceux qui meurēt,
estre suffoquez d'un catar-
rhe, le cerueau ayant du tout
perdu sa force & estant com-
me lasche. L'autre principe
interieur qui meut les hu-
meurs, est l'ame; car nature a
dōné à toutes les parties vi-
uantes vne vertu expultrice
pour chasser ce qui leur peut
nuire. Le cerueau donques
estant irrité ou de l'abondan-
ce de l'humeur qui l'oppres-
se, ou de la qualité qui le pi-
quē, s'efforce de la chasser, &
la repousse le plus loin de soy
qu'il peut. Le mouuant ex-
terne est tout ce qui peut
par dehors presser, ou las-
cher, ou esbranler le cerueau:
l'air froid presse le cerueau &
fait descendre les humeurs,
l'air chaud & les bains las-
chent & fondēt les humeurs.

Le mou-
uant ex-
terne,

3. Le terme d'où commence le mouvement.

4. Le terme par où.

les coups, cheutes & les violentes passions de l'ame peuvent esbranler l'humeur qui est dans le cerueau, & luy faire changer de place. Voila quant au mouuant. Reste à rechercher les trois termes. Celuy d'où commence l'humeur à se mouuoir est le dedās, & le dehors du cerueau. L'humeur bien souuent se retient dans les ventricules & dans toute la substance du cerueau, & commence à partir de là : quelquefois elle se tient hors du cerueau entre l'os & sa membrane, & fait les defluxiōs externes. Les lieux par où ceste humeur passe, qui est l'autre terme, sont les conduits ordinaires & extraordinaires du cerueau. les ordinaires sōt le nez & le palais: les extraordinaires sont les

yeux, oreilles, nerfs, la moëlle, les veines & arteres, & l'espace qui est entre l'os & les membranes, ou les espaces des muscles. Le terme où se finit le mouvement de l'humour, peut estre toute partie du corps, pourueu qu'elle soit basse, subiecte à la teste & debile; car iamais la defluxiõ ne se fera de bas en haut. Voila la definition du catarrhe expliquée, venons maintenant à ses differences.

s. Le terme où se finit le mouvement.

Les differences du catarrhe.

CHAP. III.

DE s principales differences du catarrhe sont prises de la matiere qui decoule; des parties qui enuoyent ou reçoient, des accidents qui les accõpagnent,

& du moyen de leur generation. La matiere de tous ces catarrhes est vne humeur: i'appelle humeur tout ce qui est actuellement liquide, & qui flotte. Or en l'humeur nous pouuons remarquer plusieurs choses, la substance, temperament, qualité, saueur, & mixtion: & de tout cela nous en tirerons quelques differences du catarrhe. La substance ou consistéce de l'humeur (ainsi ont accoustumé de parler les Medecins) est ou tenve & subtile, ou grossiere & espaisse, ou mediocre. Il y a donc des catarrhes subtils & tous aigueux, & d'autres plus espais.

Premiere difference tiree de la substance de l'humeur. Le temperament de l'humeur est chaud ou froid: il y a donc des catarrhes froids & des catarrhes chauds; les froids sôt les plus ordinaires, & s'en-

Seconda difference du temperament.

Differéces principales de la matiere.

gendrent par vne intemperature froide & humide du cerueau : l'intemperature froide affoiblit la faculté côcoctrice, & fait que le cerueau amasse plus d'excremens qu'il n'est de besoin, & ne peut digérer les restes de son alimēt froid; l'intemperature humide affoiblit la faculté retenrice, & laisse escouler les humeurs, encores qu'elles ne soient superflues. On reco-
 gnoist ce catarrhe froid à plusieurs marques, car l'humour qui decoule n'est nullement picquante, le cerueau est endormy, les yeux troubles, l'ouye pesante, le nez bouché, tous les sentimens hebetez, la face palle, le corps lasche, pesant, & lourd : d'autant que la force des bras & des iambes viēt de la roideur

Signes
du catarrhe froid

des muscles & des nerfs. Or icy les nerfs sont tous ramollis, & comme laschez, pource que le cerueau, qui est leur commun principe, nage tout en eau. Le Medecin remarquera encores pour s'asseurer dauantage, le temperamēt, l'aage, le lieu del'habitation, la saison de l'annee, & la facon de viure: car si le corps est d'un tēperament froid, s'il est desia vieil, s'il habite aux lieux froids, aquatiques, marécageux, & que ce soit en hyuer; s'il se nourrit ordinairement de fruiets, de viandes humides & froides: & qu'il meine vne vie oyſiue & sedentaire, il ne faut pas douter que le catarrhe ne soit froid. Il y a aussi descatarrhes chauds, encores q̄ plusieurs doctes Medecins lenient, mais

Catar-
rhes
chauds.

mais l'autorité d'Hippocrate & l'experience nous assurent du contraire. Hippocrate fait mention d'une esquinance d'Esté, qui vient d'une defluxiõ subtile, acre, & chaude: nous voyons bien souuēt sortir par le nez une humeur iaune & bilieuse qui escorche tout, & il s'engendre ordinairement dans le cerueau de la cholere, laquelle se purge par les oreilles. Les anciens ont tresbien remarqué qu'il s'engendre au cerueau trois sortes d'excremens, les vns sont pituiteux, les autres melancholiques, les autres bilieux: Les pituiteux se purgent par la bouche & par le nez, les melancholiques par les yeux, les bilieux par les oreilles: nous voyons aussi en nettoiyāt les oreilles tout

Signes
des catar
rhes
chauds.

ce qui en sort estre iaune & extrememēt amer. Il y a dōc des defluxions chaudes, lesquelles sont telles, ou de leur generation, comme si elles se font de cholere, ou par corruption, comme quand le phlegme se pourrit, il acquiert vne acrimonie & deuient salé. Il est aisé de recognoistre ces catarrhes chauds: car si l'humeur passe par le palais & par la bouche, on la sent amere & picquante, elle brusle & escorche par tout où elle passe, le visage en est tout rouge & embrasé, le front extremement chaud, la fiere l'accompagne ordinairement: il faudra adiouster à tout cecy, le temperament chaud & bilieux, la constitution de l'air chaude, la façon de viure, & toutes autres

choses qui sont disposées à
eschauffer les humeurs & à
les engendrer. Nous remar-
quons encores à l'humeur
outre sa substance & tempe-
rament, sa qualité, c'est à dire troisies-
me diffé.
les mœurs: il y a des humeurs reçe de
la quali-
té de l'hu-
malicieuses, & qui ont quel-
que malignité occulte, il y
en a de plus douces, il y en a
de cuittes & de crues. De
ces mœurs nous tirerons vne
difference des catarrhes: il y
en a des rebelles & malins,
comme ceux qui accompa-
gnent la verole, ou qui vien-
nent de quelque reste d'icel-
le, on ne les guarit pas avec
les remedes ordinaires, il les
faut cōbattre par alexiphar-
maques: il y en a de plus
doux qui se guarissent fort
aisement, & par vne simple
purgation. il y en a de cruds

Signes
du carar-
rhe cuit
& crud.

& de cuits: on recognoist fil est crud quād on le voit clair, tenve, inegal, verd, iaune, amer, ou piquant: au contraire fil est egal, & du tout semblable à foy & vn peu espais, on iuge qu'il est cuit.

Qua-
trie^{me}
differeⁿ
ce du
goust.

Du goust & saueur qui est à l'humeur on prēd quelque difference de ces defluxions, il y en a de salees, de douces, d'aigres, & de fades: les salees sont tousiours les plus dange- reuses: car si elles tombent dans le poulmon font vn vl- cere, si dans les boyaux vne dysenterie: en fin nous pour- rōs tirer du meſlāge des hu- meurs ces differences. Il y a des defluxions simples qui se font d'vne seule humeur, & d'autres qui se font du meſlā- ge de plusieurs. Et voila no- stre premiere difference bien

particulierement recerchee,
qui est prinse de la matiere.

La seconde se peut recueillir des parties : or nous auons ^{différence} prinse ^{des parties.} deux sortes de parties à voir, celles qui enuoient, & celles qui reçoient : celles qui enuoyent sont le dedás du cerueau ou le dehors : le dedans est ordinairement plein d'excrements à cause du temperament froid & de la substance moëlleuse ; au dehors aussi, cōme entre le pericrane & le crane, & entre le cuir & le pericrane se peut retenir & amasser grãde quãtité d'eaux, ou par les vapeurs, qui ne pouuans passer outre se condensent : ou pource que des veines & arteres exude quelque serosité qui s'arreste.

De ces parties donc nous tirerons ceste difference des

Des catarrhes,

catarrhes, il y en a d'externes qui viennent du dehors, & coulent par la continuité des mébranes par toutes les parties externes iusqu'aux iointures: & font bien souuent la goutte: Il y en a d'internes qui viennent du dedans du cerueau & coulét par diuerfes voyes aux parties internes: s'ils prennent le chemin de la moëlle spinale feront vne apoplexie, paralyfie, stupeur, tremblement: s'ils vôt au dedans des yeux & des oreilles, causeront vn auement & vne surdité: s'ils vont au dedans du nez, ferôt ce qu'on appelle choriza; si au palais & à la trachieartere, la raucité; si dans les poulmōs, l'asthme, la toux, le phtisis; si dans l'estomach, vne lienterie, vn flux de ventre.

La troisieme difference ^{diffecēce}
sera prinse des accidens. Il y a ^{prinse}
des catarrhes suffocatifs qui ^{des acci-}
tuent soudainement, & sont ^{dens.}
ceux qu' Hippocrate appelle
συντόμως ἀπώλυντες, les au-
tres sont sans danger, & cou-
lent tout doucement. Il y a
des catarrhes sans fièvre, il y
en a avec fièvre; il y en a de
douloureux, & d'autres qui
sont sans douleur.

La derniere difference est ^{derniere}
prinse du moyen de leur ge- ^{diffecēce}
neration & des causes effi-
cientes. Il y a des catarrhes
idiopathiques qui s'égendrēt
par le vice particulier du cer-
veau, tout le reste du corps
estant bien sain: Il y en a de
sympathiques qui viēnēt de
la mauuaise disposition des
autres parties: cōme du foye
trop eschauffé & d'un esto-

Des catarrhes,

mach trop refroidy, le foye trop chaud, enuoye quantité de vapeurs au cerueau, & l'estomach refroidy engendre tout plein de cruditez. Il y a des catarrhes epidemiques & des sporadiques: les epidemiques ou populaires viennent de la cōstitution de l'air, cōme a esté la coqueluche de ceste annee, & celle qui courut par toute l'Europe, il y a enuiron dix ans. Les sporadiques viennent de la particuliere constitution des corps, & de la façon de viure qui est particuliere à vn chacun.

Des causes du catarrhe.

CHAP. II II.



Les causes du catarrhe sont ou externes ou internes: les

externes viennent ordinairement du vice de l'air & de la façon de viure. L'air nous peut alterer par trois moyens, par ses qualitez, par sa substance, & par son soudain chāgemēt: celuy qui est trop chaud, trop froid & trop humide est propre pour engendrer les catarrhes: le chaud vient à dissoudre & fondre les humeurs contenuës dans le cerueau, & par ce moyen les rend plus propres à couler: le froid est cause des defluxions, pource qu'il comprime le cerueau: & tout ainsi qu'une esponge pleine d'eau estant pressée on void ruisseler l'eau de tous costez; ainsi le cerueau estant pressé par le froid laisse decouler toutes ses humeurs: le mesme froid peut estre cause des catarrhes, en pouf-

fant & faisant retirer la chaleur du dehors au dedás. Les vents Meridionaux & Aquilonaires esmeuent bien fort les defluxions : car ceux-la remplissent le cerueau & le rendent pesant : ceux-ci le pressent. La longue demeure au Soleil & au serain en fait tout autant. Le changement soudain de l'air, & la mutatió des saisons sont au rang des causes qui esmeuent le catarrhe. Si aussi les saisons ne gardent leur temperature, comme remarque tresbien Hippocrate au troisieme liure des Aphorismes, l'annee sera toute catarrheuse. Si avec ceste alteration ou alienation du temperament il y a quelque vice particulier a la substance de l'air, comme quelque corruption occulte,

il s'engendrera vn catarrhe epidemique & pestilétiel. La façõ de viure peut aussi estre au rang des causes externes, qui engendrent & esmeuent le catarrhe: le trop manger & le trop boire remplissent le cerueau: c'est pourquoy les yurongnes & ceux qui mangent trop, sont ordinairement subjects aux catarrhes suffocatifs. L'abstinence trop grande les peut esmouuoir en attenuant & subtilisant les humeurs; ioint que l'estomach estant vuide, & n'ayant de quoy se remplir, est cõtraint d'attirer les humiditez des parties voisines. Les longues veilles, l'estude continuel, les passions de l'ame fort violentes, pource qu'elles dissipent la chaleur naturelle, & refroidissent le cerueau, engendrēt

les catarrhes : de demeurer aussi trop oisif, cela retient tous les excremens. Les grandes euacuations, & sur tout les saignées fréquentes & copieuses vieillissent merueilleusement vn corps & le rendēt tout catarrheux. Le trop dormir rend le corps bouffy, humide, & sur tout celuy du Midy. Voila les causes externes qui peuuent engendrer & esmouuoir le catarrhe: venōs maintenāt aux internes.

Les causes internes sont ou esloignees ou pl^o prochaines: les plus esloignees que quelques vns aimēt mieux appeller antecedētes, se rapportēt à la mauuaise disposition du cerueau, de la teste, du foye, de l'estomach, & par fois de tout le corps. L'intéperature froide, humide, & chaude du

cerueau, causent bien souuēt les catarrhes, la froide & humide de soy, la chaude par accident: la froide affoiblit la chaleur naturelle, ne cuit pas bien l'aliment, & ne peut dissiper les reliques; il faut donc qu'il se retiēne beaucoup d'excremēt: la chaude attire plus d'aliment qu'elle ne peut digerer, & pl⁹ de vapeurs qu'elle ne peut resoudre. Il y en a qui ont remarqué assez subtilement que la densité de la substance du cerueau estoit bien souuent cause des defluxions, pource qu'elle retenoit les vapeurs & empeschoit leur exhalatiō. La mauuaise conformation de la teste sert aussi beaucoup pour la generation des catarrhes: car ceux qui ont les sutures fort pressées, ou qui n'en ont

L'intēperance du cerueau fait les catarrhes.

La mauuaise cōformation.

point du tout, comme nous en auons veu plusieurs, sont subiects aux defluxiōs, pour ce que les vapeurs retenuës se conuertissent en eau: & les futures ont esté faictes principalement pour seruir de fouspirail & comme de cheminee au cerueau.

L'intēpe-
rature
des par-
ties bas-
ses.

L'intemperature des parties basses, & sur tout du foye & de l'estomach, est vne des plus ordinaires causes du catarrhe, si nous croyōs le prince des Arabes Auicenne. Car du foye excessiuemēt chaud sortent, comme d'un grand brasier, plusieurs exhalations chaudes, lesquelles par la température froide du cerueau se congelent & cōuertissent en eau: i'adiousteray q̄ ceux qui ont le foye fort chaud, ont aussi les veines biē chau-

des, de sorte que de toutes les veines s'esleuent continuellement des vapeurs. L'intemperature froide de l'estomach engendrant plusieurs cruditez, peut aussi estre cause des catarrhes. car tout le corps en est refroidy, ne pouvant la secõde digestion corriger le vice de la premiere. Que si toutes les causes s'accordent ensemble, c'est à dire que le cerueau soit froid & humide, le foye chaud, & l'estomach froid, il ne faut pas doubter qu'il ne se face vne perpetuelle generation d'excremens au cerueau; & c'est ce que les Arabes ont voulu dire, quand ils escriuēt que l'intemperature inegale des viscères est la principale cause des defluxions. Voila toutes les causes les plus

Les cau-
ses plus
proches
sont trois

La par-
tie qui
enuoye.

esloignées . Les plus proches non seulement du catarrhe, mais de toute autre defluxiõ, sont trois , la partie qui enuoye, celle qui reçoit, & la nature de l'humeur . A la partie qui enuoye nous remarquõs sa situation haute & sa force: si elle a ces deux qualitez, elle se deschargera fort aisément sur toutes les parties basses qui luy sont cõme subiectes. Hippocrate l'a tresbien remarqué au liure des plaies de la teste, quãd il dit, qu'entre toutes les parties de la teste le front est le plus subiect aux inflammations , pour ce que le front est contenu; or toute fluxion se fait de la partie contenant à celle qui est contenuë: le front est cõtenu, & pour raison de sa situation basse, & pour la pro-

ductiō des vaisseaux. La par-
tie reçoit l'humeur, ou pour-
ce qu'elle est basse, ou pour-
ce qu'elle est debile, ou pour-
ce qu'elle l'attire. Toute par-
tie basse peut recevoir la des-
charge de celle qui luy com-
māde: si la partie est debile el-
le y sera encore pl⁹ disposee.

la par-
tie rece-
uante.

La debilité vient ou de soy, ^{la partie}
& de sa nature propre, ou ^{debile.}
par accident: les parties rares
& spongieuses sont d'un na-
turel debile, cōme sont tou-
tes les glandes, & semble que
nature les aye industrieuse-
ment voulu creer telles, afin
qu'elles receussent les excre-
mēts & superfluitez des par-
ties nobles. Hippocrate en
discourt si bien en son liure
des glandes qu'on n'y sçau-
roit rien adiouster. Le cuir a
esté fait naturellement debi-

le a fin qu'il receust toutes le^s
superfluitez du dedans, &
pource on l'appelle emun-
ctoire vniuersel. Les parties
peuuent aussi estre debiles par
accident: cōme par vn coup,
cheute, ou par quelque inté-
perature: en quelque façon
qu'elles soiēt foibles cela les
rend disposees à receuoir la
descharge de ses voisines. La
derniere cause est quand la
partie attire l'humeur. Les
Arabes ont recogneu trois
causes de ceste attraction, la
chaleur, la douleur, & la fui-
te du vuide. La chaleur attire
de soy, pource que rarifiant
les parties voisines, attenuāt
les humeurs & eslargissant
les voyes, fait decouler l'hu-
meur. La douleur n'attire
pas propremēt, pource qu'el-
le est vne affection du sens;

Cōment
la partie
attire.

Cōme la
douleur
attire.

or le sens patit seulement & n'agist point, & tout sentiment se fait par reception: mais au lieu qui sent la douleur, les humeurs y decoulét, pour la debilité de la partie, joint que la chaleur naturelle estant affoiblie par la douleur, ne peut pas bien cuire l'humeur, il faut donc qu'il s'y arreste. Ceux qui disent que l'humeur decoule à la partie qui a senty la douleur, pource que nature y enuoye pour la soulager, les esprits & le sang, se trompét, à mon aduis, & font grand tort à la nature; car si elle cognoist que la partie a besoin des esprits & du sang, elle cognoistra aussi qu'e enuoyât ce sãg elle n'aduancera rien & nuira plustost: la douleur dõc n'attire pas proprement. La der-

Des catarrhes,

niere cause des defluxions se rapporte à l'humeur. car si elle est tenve en sa substance, chaude en temperament, acre & piquante en sa qualité, elle sera beaucoup plus apte à fluer.

*Regime de Viure general propre
pour les defluxions.*

CHAP. V.

E suiuray le mesme ordre en ce regime que i'ay fait aux deux autres. Il faut disposer toutes les six choses qu'on appelle non naturelles; de telle façon qu'elles puissent non seulement empescher la generation des catarrhes, mais aussi les dissiper & consumer estās engendrez. Qu'on

choisisse donc vn air qui soit
temperé en ses qualitez acti-
ues, & aux passives qu'il soit
du tout sec: Je dis qu'il doit
estre temperé en chaleur &
froideur, pource que l'air
chaud fondât les humeurs du
cerueau, & le froid les pres-
sant, les font decouler par
tout. Si l'air est trop froid,
qu'on l'eschauffe avec des bõs
feux faits de geneure, rosma-
rin, des bois de laurier, ches-
ne & figuier: s'il est excessiue-
ment chaud, qu'on le refroi-
disse avec des herbes & fleurs
qui en ayent la propriété. Il
faut fuir les vents Meridion-
naux & Septétrionaux, pour-
ce que ceux-là remplissent
trop, & ceux-cy pressent. On
ne se doit guere exposer aux
rayons du Soleil, ny au se-
rain: les vents qu'on appelle

Des catarrhes,

coulis sont extrememēt dangereux pour les catarrhes. L'inegalité de l'air (comme remarque Celse) esmeut biē fort les defluxions: i'appelle vn air inegal quand il est tantost froid tantost chaud. Pour le regard des qualitez passiuēs, il faut en toute defluxion que l'air soit sec: & pour ce il sera bon d'habiter aux lieux esleuez & esloignez des riuieres.

Aux viā-
des on
doit re-
marquer
trois cho-
ses.

Aux viādes on doit remarquer trois choses, la quantité, la qualité, & le moyē d'en vser. Pour la quantité, toute repletion est ennemie des complexions catarrheuses: il ne se faut iamais saouler, il vaut mieux se leuer de table avec faim, & quand on retrācheroit vn repas sur toute la semaine, on ne s'en porteroit

que mieux. Quant à la qualité elle doit estre contraire à la maladie ou à sa cause : la cause des catarrhes est vne humeur superflue, il faut donc vser de viandes desiccatiues. Qu'on s'abstienne en general de toutes viandes vaporeuses, grosses, venteuses, pleines d'excremens, & difficiles à digerer. Au moyen d'vser de ces viandes il faut observer plusieurs reigles : on ne doit iamais mettre d'as l'estomach de nouuelle viande que la premiere ne soit bien digeree : on se doit contenter d'une seule viande, & qui soit bonne. car la varieté engendre tout plein de cruditez, qui se meslent avec le sang dans les veines, & fournissent de matiere au cerueau. Il faut s'accoustumer de manger plus au

disner qu'au souper, d'autant que le dormir qui suit le souper de bien pres, enuoye grande quantité de vapeurs au cerueau, lesquelles se conuertissent apres en eau.

Le pain.

Le pain doit estre de bon froment & fort cuit, où il y ait vn peu de son & du sel, on ne le doit iamais manger chaud : à la fin du repas on pourra mâger du biscuit, auquel on mettra vn peu d'anis & de fenouil.

*Les
chairs.*

Les chairs rosties sôt beaucoup meilleures q̃ les bouillies, & entre autres celles qui n'abondent pas en humeurs: nous approuuons l'vsage des chapons, pigeons, perdrix, leuraux, cheureaux, cerfs, phaisans, cailles, tourterelles, & tous oiseaux de montagne, qu'on pourroit entre-larder
de sauge

de sauge & d'hysope des montagnes. On deffend l'vsage des oiseaux de riuere, des pourceaux, aigneaux, brebis, & ieunes veaux: les bouillons & potages n'y valent rien.

Les poissons sont extremement contraires.

Les poissons.

Toute sorte de laictage est ennemie des catarrhes, comme aussi toute façon de legumes.

Pour les herbages, les Ara-
Herba-
bes recommandent la sauge, ges.
l'hysope, menthe, serpolet,
marjolaine, rosmarin, pimpernelle, cerfueil, fenouil, coq. Aëce permet les choux & pourreaux, mais il deffend tres-expressément les aulx & oignons, pource qu'ils sont trop vaporeux, & toutes herbes froides & humides comme laictuës, pourpier, ozeil-

le, & semblables.

Fruicts. Tous fruicts qui abondēt en humidité, comme pommes, prunes, melons, cōcombres, meures, sont deffendus. On pourra vser de ceux qui ont vertu de secher, comme pignons, noisilles, pistaches, amandes, poires, coings, figues, raisins secs, mesles, forbes, & ce apres le repas. Voila pour le manger.

Le boire. Quant au boire, l'eau froide & le breuusage actuellement froid est ennemy de toute defluxion, si ce n'est qu'elle fust extrêmement chaude, piquante, & avec fleurs; l'eau d'orge avec vn peu de sucre & de canelle y est fort propre, ou vne ptisane, ou bien vn hydromel. Si l'estomach ne peut porter l'vsage de ces eaux, il faudra choisir vn vin

bien meur & petit qui ne soit
ny doux ny piquant. Les vins
muscats, l'hypocras & sem- le vin.
blables vins puissans & forts
gaignent tout quant & quât
le haut & remplissent le cer-
veau de vapeurs.

De boire aussi tost qu'on
se met à table esmeut & aug-
mente bien fort le catarrhe:
il n'y a rien si pernicieux à
ceux qui sont subjects aux
defluxions que de boire lors
qu'on se va coucher.

Le dormir excessif rend le le dor-
mir,
corps tout pesant & retient
les excrements au dedans, il
suffira de dormir six ou sept
heures, & pendant ce temps
on aura la teste & les pieds
couverts : car comme remar-
que Aristote, le froid des ex-
tremitez nuit infiniment à
ceux qui ont le cerveau froid

& humide. On doit dormir la teste vn peu esleuee, & sur les costez : car de dormir sur le dos, cela eschauffe le tronc dela grosse veine caue, qui est couché sur l'espine, & enuoye grand quantité de vapeurs au cerueau. Qu'on se garde bien de dormir au Midy ny quant & quant apres le repas, il vaudra mieux employer le temps à vne petite pourmenade, ou à quelque plaisât & gracieux deuis. Il ne faut pas aussi apres le repas se mettre tout soudain à la lecture, ou à l'escriture, ou apres quelque profonde meditation, pource que cela destourneroit la chaleur naturelle, qui doit estre du tout occupee à la digestion. Les lōgues veilles peuuent autāt nuire que le trop dormir,

Les veilles.

d'autant qu'elles dissipent la chaleur naturelle, & refroidissent le cerueau.

Il est bon de se leuer matin, & de se pourmener par la chambre, touffer, moucher, & se purger de tous les excremens naturels.

Les exercices vniuersels ^{L'exercice.} sont fort recommandez de ce grand Medecin Hippocrate, les particuliers seruiront aussi, cōme les frictions: mais ^{Fric-tions.} si la teste est debile & fort pleine, il faudra commencer les frictions par les parties basses, & venir des cuisses à l'espine, de là au bras, au col, & frotter la teste la derniere avec esponges, ou sachets artificiels.

Et pource que la teste est la fontaine de toutes les defluxions, il faudra bien auoir

Des catarrhes,

esgard a elle; il ne la faut pas trop charger, ny la laisser trop legere, il la faut mediocrement couvrir, & vaut toujours mieux y endurer du chaud que du froid: il n'est pas bon de la presser par trop, de peur que cela n'attire d'en bas.

Le ventre doit estre toujours lasche.

Methode generale pour la curation des defluxions.

CHAP. VI.

D' V T A N T qu'en toute defluxiõ il y a vne partie qui enuoye, & vne autre qui reçoit, il faut que le Medecin aye esgard à toutes les deux. La teste est la source & fontaine de tous les catarrhes: il faut dõc

employer vne partie de nostre industrie à vuidier ceste teste, à la secher & fortifier, de façon qu'elle ne puisse rien engendrer de nouveau. Je dresseray vne methode pour les defluxions froides & qui s'engendrent d'une intemperature froide & humide du cerueau, pource que ce sont les plus frequētes, & celle-la pourra seruir de reigle aux autres.

La premiere indicatiō que nous auons est de vuidier ceste source, de la secher, & tarir si nous pouuons. Les euacuations vniuerselles & particulieres seruiron t à cest effect: les vniuerselles doiuent tousiours preceder. Si le corps est plethorique, si la defluxion est chaude, s'il y a fièvre, & que le foye soit ex-

la premiere
indicatiō.

la saignée.

cessiuemēt chaud, la saignée
seruira beaucoup, mais tout
cela defaillant elle n'a point
de lieu, & c'est ce qu'enten-
dent les Medecins Arabes,
quand ils disent que le catar-
rhe, cōme catarrhe, ne demā-
de iamais la saignée, mais seu-
lement quand il est accom-
pagné de quelque accident.

Nous viendrons donc aux
purgations: il faudra cōmen-
cer par le clystere qui purge-
ra tout le corps & attirera
aussi du cerneau.

Les pur-
gations.

Clystere

Prends vne liure d'vne de-
coction commune, en laquel-
le tu adiousteras de la marjo-
laine, hysope, sauge, de cha-
cune vne poignée, trois drag-
mes de semence d'anet, de
fleurs de chamomile, stechas
& rosmarin vne demie poi-
gnée de chacune, ayāt le tout

coulé, dissouls y vne once de la benedicte, & autant de dia. phœnic, vne once de miel an. thosat ou mercurial, deux onces d'huile d'aneth, vn peu de sel, & en fais vn clystere.

Le lendemain on prendra Pilules.
vne dragme de pilules co-
chees qui seruiron de mino-
ratif, ou bien ceste potion. Potion.
Prenez vne dragme de bon
agaric, & autāt de rhubarbe,
faictes les infuser toute la
nuict avec vn peu de canelle
& de girofle dās les eaux d'hy
sope, ou de menthe: & apres
l'expression faicte, dissoluez
y deux dragmes de diaphœ-
nicum, ou du diacarthami, &
vne once de syrop rosat laxa-
tif, faictes en vn breuuage.

Si les humeurs sont froi- Prepara-
tion de
l'hu-
meur.
des, grossieres, & visqueu-
ses, il sera bon de les preparer

Apozeme.
me.

avec ceste apozeme. Prenez racines d'acorus, du sonchet & de galanga demy once de chacune, des fueilles de bethoine, hysope, marjolaine, sauge, melisse, agrimoine de chacune vne poignee, semences d'anis & fenouil trois dragmes de chacune, fleurs de rosmarin, stechas & de bethoine vne petite poignee, faiçtes cuire le tout iusques à vne liure & demie, à laquelle on dissoudra trois onces de miel anthosat, ou de gros succe, & en fera-on vne apozeme clarifiée & aromatizee, avec vne dragme de l'aromaticum giroflé, & avec vn peu de canelle, pour en prendre quatre matinees de suite. Apres cela on repurgera le corps avec les mesmes pilules, ou avec les pilules d'a-

garic *sine quibus* & *fœrides*, & la mesme potion augmentât vn peu la quantité. Les Arabes font vne gentille obseruation, pour le regard des pilules: ils disent qu'il faut qu'elles soyent vn peu grosses, pource qu'elles demeurent plus long temps à l'estomach, ne se dissoluent pas si tost, & tirent de plus loin. Voyla les purgations propres.

Les dietes sudorifiques Deco-
ctions
sudorifi-
ques. peuvent estre mises au rang des euacuations vniuerselles, car elles euacuent toutes les ferosittez qui sont contenues dans les veines, & desechent l'humidité superflue qui est dans les viscères. Nous les ferons avec le gaiac, salse parelle, squine & sasaffras: la forme de leur description & le

moyen d'en vser est assez congneu d'un chacun.

Le corps estant purgé par ces remedes vniuersels, on pourra euacuer particuliere-
ment le cerueau. L'euacua-
tion peut estre sensible & in-
sensible: celle qui est sensible
se fera par errhines, mastica-
toires, gargarismes, vesica-
toires, sinapismes, ventouses
scarifices, & cauteris: l'in-
sensible par poudres, sachets,
ventouses seches, parfums; les
errhines purgent le cerueau
par le nez: on en fait de plu-
sieurs façons, de secs & de li-
quides: les secs se font avec
les poudres de poiure, & de
semence de stasifagria, de l'hel-
leboire blanc: les liquides avec
les suc de marjolaine, de
mercuriale, de l'anagalis mas-
le, de la bette, des choux

Errhines

avec le vin blanc: il y en a qui recommandent fort l'huile denielle, si on en frotte le dedans du nez.

Les masticatoires purgent Mastica-
toires.
bien fort le cerueau, on les fait avec les racines de pirethre, ou avec le mastic, la noix muscade, les cubebes, les raisins de damas trempés en eau de sauge, ou en l'essence de sauge & de thym. Les gargarismes ne sont pas tant en vſage.

Les vesicatoires appliquez Vesica-
toires.
sur la teste euacuēt aussi sensiblement: on les fait avec du leuain bien fort, de fiente de pigeon, des mouches cantharides avec vn peu d'eau de vie. On peut aussi faire des emplastres qui tireront des Empla-
stres.
eaux avec la racine de brionnia, de tapſia, de graine de

Des catarrhes,

Pain
chaud.

moustarde de l'euphorbe. Le pain fort chaud appliqué sur la teste & sur la nuque avec vn peu d'eau de vie attire tout plein de serofitez. Les ventou-
ses. ses avec scarification ser-
uiront à ceste euacuation.

Caute-
res.

En fin aux catarrhes inue-
terez & rebelles les cauterres
profitent beaucoup, pour es-
puiser la fontaine, & pour di-
uertir l'humeur: on les appli-
que sur la teste, au derriere du
col, & aux bras.

L'euacua-
tion in-
sensible.

Il y a vne autre euacuation
insensible qui se fait lors qu'on
resoult l'humeur, & qu'on la
conuertit en vapeur, de sorte
qu'elle s'exhale apres par in-
sensible transpiration: les sa-
chets, poudres & parfums le
peuent faire.

Sachets.

Prenez du millet & de l'a-
uoine vne bonne poignée, du

son & du sel vne once: faictes fricasser tout cela , & enfermez-le dans vn sachet , que mettrez tout chaud sur la commissure coronale; ou bien.

Prenez semences d'anis , fenouil , & graine de laurier de chacune deux onces, de millet quatre onces, & autant de sel commun , des summitez d'aneth, des fleurs de camomile , & rosmarin vne poignée de chacune , fricassez tout cela , & le mettez dans des sachets qu'appliquerez sur la teste.

Les parfums qui tirent en *Parfūa* dehors , & resoluent se font ainsi. Prenez du storax , du benjoin , & de la nielle Romaine de chacune trois dragmes, du girofle, & de troscisques de gallia molchata de

Des catarrhes,

chacune vne dragme : faiſtes en vn parfum , duquel parfumeriez les accouſtrements de teſte; ou bien. Prenez de l'encens, du ſadanum, du benjoin de chacun trois dragmes: de gôme de lierre, de graine de geneure & du coriandre préparé, de chacune deux dragmes : meſlez tout cela pour vn parfum. Avec tous ces artifices nous pourrions accomplir noſtre premiere intention, qui eſt de nettoyer le cerueau & eſpuifer la fontaine des catarrhes.

Seconde
intentiō
de forti-
fier le
cerueau.

L'autre indication eſt de fortifier le cerueau, & oſter l'intemperature froide & humide, qui fait vne generation perpetuelle d'excremens, & qui conuertit tout en eau car en vain aurions nous eſpuisé ceſte ſource, ſi nou

n'empeschions qu'elle se remplist de nouveau: à cela nous employerons des remedes internes & externes. Les internes sont opiates, tablettes, ^{Remedes internes.} poudres; la theriaque & le mithridat y sont tres-singuliers, & les conserues de bethoine, rosmarin, stechas.

Prenez conserues de fleurs ^{Opiate.} de rosmarin, de stechas, & de bethoine de chacune vne once, de theriaque vieille deux dragmes, de poudre d'aromaticum rosatum, & du diagalanga de chacune vne dragme avec le syrop de stechas: faictes en vne opiate, de laquelle on prendra le soir à l'entree du liēt à la grosseur d'une petite noix.

On fera des tablettes en cette façon qui auront mesme ^{Tablet-} vertu. Prenez de poudre d'a-^{tes.}

romaticum , garyophilatum
vne dragme , de diagalanga
demy dragmé , de noix mus-
cade vn scrupule , de succe
dissoult en eau de bethoine
ou de melisse ce qu'il en fau-
dra : faiçtes en vn electuaire
en tablettes pesant chacune
trois dragmes , & en prenez
vne le matin deux heures a-
uant disner , & vne autre le
soir vne heure avant souper.

Vne poudre digestiue apres
le repas seruira pour fortifier
le cerueau & l'estomach.

Poudre
digesti-
ue.

Prenez trois dragmes d'a-
nis confit , deux dragmes de
canelle , vne dragme de noix
muscade , deux scrupules de
corail rouge , vn scrupule de
perles preparees & autant de
corne de cerf , du succe ro-
sat & du succe blanc quatre
onces de chacun : faiçtes en

vne poudre, de laquelle prendrez vne cuilleree apres chaque repas. Pour les riches on y adioustera vn peu d'ambre gris. Les eaux celestes, theriacales, imperiales sont tres-bonnes pour secher & fortifier le cerueau, & principalement aux vieilles gens, & à ceux qui sont d'un temperament froid.

Les remedes externes qui fortifient le cerueau sont les poudres capitales, lesquelles on iettera sur toute la teste, ou bien on en fera des bonnets.

Remedes
des ex-
ternes.

Prenez du girofle, du maccis, du bois d'aloës de chacun deux dragmes: des roses rouges, & de bethoine bien seche trois dragmes de chacune: faictez en vne poudre que ietterez ordinairement, sur

Poudre
capitale.

Des catharres

toute la teste: ou bien faiâtes vn petit bonnet en ceste fa-
çon.

Bõnets.

Prenez fueilles de bethoi-
ne, melisse, marjolaine, men-
the bien seches, de chacune
trois dragmes: du girofle,
macis, noix muscade de cha-
cune vne dragme, de roses
rouges, fleurs de rosmarin v-
ne dragme & demie, de grai-
ne d'escarlatta, du bois d'a-
loës, de chacun vne dragme:
faiâtes en vne poudre, laquel-
le meslerez dans du coton
pour en faire vn petit bon-
net entrepointé avec du taf-
fetas rouge. On fait aussi des
emplâstres qu'õ applique sur
toute la teste qui la fortifient
& desechent bien fort.

Empla-
stre pour
fortifier
le cer-
veau.

Prenez du ladanum bien
pur & du mastic de chacun
demy once, de l'encens & du

sandaraca de chacun trois dragmes, racines de fonchet, du girofle, d'Iris de Florence de chacune demy dragme, fleurs de sauge & de rosmarin, de roses rouges de chacune demy dragme, des cubebes deux scrupules, malaxez tout cela avec l'huile Irin & vn peu de terebenthine & en formez vn emplastre.

On nous a apporté depuis quelques annes des terres neuues vne gomme fort excellente qui se nomme *tacamahaca* : on l'applique sur la teste en forme d'emplastre, elle fortifie le cerueau, arreste toutes les defluxions, & a telle proprieté pour appaiser les douleurs, que le peuple des Indes s'en sert à toute sorte de douleurs, si ce n'est qu'il y ait inflammation apparente.

J'en ay veu de fort beaux effets.

**Lauemēs
de teste.** Tous les vieux praticiens louent fort pour secher & fortifier le cerueau, les lauemens de teste avec les herbes capitales, comme sont la bethoine, melisse, marjolaine, lauāde, des fleurs de stechas, rosmarin. On pourra faire vn saunon tres-propre en ceste facon.

**Saunon
propre.**

Prenez de bon saunon trois onces, d'agarc trois dragmes, d'iris de Florence deux dragmes, vne dragme de girofle, & autant de macis: faictes en vn saunon.

**Les
bains na-
turels.**

On recommande les bains naturels la douffe qu'on appelle, pourueu qu'ils soyent actuellement chauds & sulphurez, comme sont ceux de Balaruc, qui sont à quatre

lieuës de Montpellier.

Il y en a qui mettent tous
les soirs dâs les oreilles quel-
ques gouttes d'huile de the-
rebentine , & les bouchent
apres avec du coton musqué:
ils assurent que cela seche, &
fortifie fort le cerueau.

Huiles
pour met-
tre dans
les oreil-
les.

Tous ces remedes serui-
ront aux catarrhes froids , &
à ceux qui ont le cerueau
froid & humide . Si la deflu-
xion est chaude, & que le cer-
ueau soit chaud , le Medecin
aura ce iugement de diuersi-
fier les remedes & les appro-
prier à l'intemperature. Voy-
la les deux indications qui
ont esgard à la partie qui en-
uoye, il la faut premierement
espuiser, & puis la fortifier de
peur qu'elle n'engendre rien
de nouveau.

Il faut maintenant aduiser

ce qu'on doit faire à la partie qui reçoit. Toute partie basse & debile est subiectée à recevoir, mais selon la noblesse & necessité de la partie, il en faudra auoir plus ou moins de soin : si la defluxion tombe sur les yeux, i'en ay descrit les remedes ; si sur le nez, il le faudra diuertir ; si aux dents, tu verras comme il les faut conseruer au chapitre suyuant : si dans l'estomach, il se peut vuider par le ventre. Le plus dangereux de tous est celuy qui prend le chemin de la trachie artere qui tombe soudain en la poitrine ou dās le poulmon. car il empesche la respiration, qui est l'action la plus necessaire, & suffoque l'animal. A ceux-là doncques il faut promptement remedier. On employera tous les remedes

remedes q̄ i'ay descrits pour
vuider, diuertir, & destour-
ner ce mouuement d'hu- ^{quand il}
meurs ; mais s'il estoit trop ^{faut arre}
rapide nous serons contrains ^{ster le ca}
de l'arrester tout court avec ^{tarrhe.}
remedes qu'on tiendra en la
bouche, & qu'on pourra a-
ualler, commençant aux plus
legers, cōme sont le bol d'ar-
mene, la terre sigillee, le tra-
gacanth, conserue de roses
vieilles, le succe rosat de-
quoy on pourra faire des pe-
tites formules.

Prenez de conserue de ro- ^{Petitestas}
ses vieilles vne dragme & de ^{blettes.}
mie, poudre de tragacāth vne
dragme, de la terre sigillee,
& du bol de leuāt deux scru-
pules de chacun, du succe
dissoult en eau de l'infusion
de la gomme tragacanth ce
qu'il faudra, faiētes en de pe-

tites formules. Si cela ne sert, il faudra venir aux plus forts, comme sont le diacodium, la theriaque recente, les pilules de cynoglosse, ou bié celles qui sont descrites des anciens, qui se font du styrax, galbanum, opium, & myrrhe parties egales. Ces remedes ne se doiuent ordonner qu'en l'extreme necessité, & lors qu'on craint vne suffocation soudaine.

Remedes
externes
qui arre-
stēt le ca-
tarre.

On peut aussi arrester le catarrhe avec remedes externes, comme parfums, emplastres; Prenez des roses rouges, de coriandre preparé de chacū vne dragme & demie, du mastich, sandaraca, de gomme de lierre, vn scrupule de chacun, semēce de pauot demy scrupule, de graine de myrrhe demi dragme, faictes

en vne poudre pour en parfumer la teste, & par la bouche mesme ou par le nez on en pourra tirer la fumee. La gôme tacamahaca, de laquelle i'ay parlé cy dessus, est tres-propre pour suspendre & arrester soudain les catarrhes.

Le catarrhe estant vn peu arresté, il faudra apres nettoyer ce qui est dans la poitrine, & le vuider par remedes becchiques, & qui font tousser. Ie n'en descriRAY pas icy les remedes particuliers, d'autât que ie n'enseigne que la methode generale qui peut seruir aux catarrhes.

Le moyen de conseruer les dents.

C H A P. XII.

D'AVTANT que les catarrhes tombent souvent sur les dents, & les ga-

stent bien fort, ie pense que ie ne feray pas desplaisir aux Dames si i'enseigne en vn petit chapitre le moyen de les conseruer.

Enquoy
cōsiste la
beauté
des dēts.

Pour auoir les dēts belles & saines il faut qu'elles soient blanches, polies, dures, fermes, & q̃ la chair des gēciues soit entiere, dure, & reserree. Ie m'en vois premierement monstrier tout ce qui les peut esbranler, noircir, & rouiller: & puis ie descriray les remedes les plus exquis qui peuvent seruir pour leur embellissement.

Tout ce
qui vient
aux dēts

l'air.

L'air froid, comme remarque Hippocrate au cinquiesme liure des Aphorismes, est ennemy des dents.

les vian.
des.

Toutes viâdes crues, douces, visqueuses, aigres, grasses, dures, vaporeuses, & qui

sont actuellement froides, nuisent infiniment aux dêts, les crues enuoyent plusieurs vapeurs qui les noircissent & roüillét: les douces, visqueuses, & grasses, laissent beaucoup d'ordure: les aigres les agassent, & font vne stupeur à cause de leur aspreté & inégalité; les dures les esbrâlent bien fort.

Il faut vser des chairs qui ayēt bõ suc, & qui se digerēt fort aisément: car pour auoir belles dents, on doit sur tout auoir soin de l'estomach.

L'vsage ordinaire du lait, le fromage, la patisserie, les tartres, les legumes les gastent, le sucre entre autres choses les noircit. Il n'est pas bon de mascher d'un costé seulement, il faut mascher la viande des deux costez egalemēt,

Le vie.

pource que les dents oyſiues ſe corrompent. Les chairs d'aigneau & pourceau, & toutes fritures, leur ſont extrêmement contraires, cōme auſſi l'vſage ordinaire des fruits qui ſont trop humides. Les anciens remarquent que les porceaux gaſtent du tout les déts & la genciue. Il faut boire le vin bien trempé, & qu'il ne ſoit point doux ny trop froid: Les bouillons par trop chauds & toute autre viande exceſſiue ment chaude les gaſtent. On doit eſtre ſoigneux de les tenir bien nettes apres qu'on a mangé, & pource les cures dents de lentisque, de meurte, de romarin, du cyprez, & d'autres bois qui ayēt quelque aſtriſtion ſont tres-propres, on y peut adiouſter vn peu de bois d'aloës: il ne

faut pas les nettoyer avec le
cousteau, avec vne espingle,
avec de l'or ou de l'argent,
comme plusieurs font, pour-
ce que cela lasche les liga-
mêts: il ne faut pas aussi trop
longuement y fouiller, prin-
cipalemēt ceux qui sont sub-
iects aux defluxions. Apres
auoir bien nettoyé les dents
on les pourra lauer avec vn
peu de vin trempé. L'usage
continuel & ordinaire du su-
blimé noircit & gaste bien
fort les dents: mais si on veut
empescher qu'il ne face au-
cun mal, il le faut premiere-
ment bien preparer, & apres
n'en vser iamais qu'il n'ait
trempé dans l'eau trois ou
quatre mois, changeant au
premier mois tous les iours
d'eau, & aux autres vne fois
ou deux la semaine: il n'en

Le subli-
mé nuit

cōme on
se peut
garder
qu'on
n'offen-
ce les
dents,

faut aussi jamais mettre sur le visage qu'on n'aye premieremēt lauē la bouche & nettoyé les dents, & faut auoir de l'eau dans la bouche. Voilà tout ce qui peut nuire aux dents.

Voyons maintenant ce qui leur est propre. Il y en a qui ont les dents bien blanches, mais elles ne sont pas fermes, ou pource que les ligaments sont lasches, ou pource que la genciue se descharne : les autres ont les dents bien fermes, mais elles sont noircies. Il faut donc auoir deux sortes de remedes, les vns qui blanchissent, les autres qui rafermissent les dēts & qui encharnent.

De ceux qui blanchissent il y en a vne infinité, mais ie choisiray les plus propres.

Les Medecins Grecs recom- remedes
mandent sur tous les autres pour blā.
la pierre pōce bruslee & mise chir les
en poudre, leur remede ordi- dents.
naire est cestui-cy. Prenez de
la pierre ponce & du sel bru-
lez de chacune trois drag-
mes ; du iōc odorat deux
dragmes, de poiure vne drag-
me & demie, mettez tout ce-
la en poudre & en frottez
les dents. Nous ferons vne
poudre qui sera, à mō aduis,
trespropre pour blanchir.

Prenez du crystal pur vne
dragme & demie, du corail Poudre.
blāc & rouge de chacun vne
dragme, de pierre ponce &
d'os de seiche de chacū deux
scrupules, du marbre bien
blanc, de la racine d'iris de
Florence, de canelle, & de la
graine d'escarlante de chacu-
ne demy dragme, du sel com-

Des catarrhes,

mun vne dragme, des perles bien preparees, vn scrupule, d'albastre, & d'alun de roche de chacun demy dragme, de bon musc dix grains, mettez tout cela en poudre bien subtile, & en frottez les dents tous les matins, après lauez les avec du vin blanc. De ces mesmes poudres on peut faire des opiates en y adioustât du miel.

L'esprit de vitriol meslé avec vn peu d'eau commune blâchit merueilleusement les dents, & est vn des plus singuliers remedes: il y en a qui font grand cas de l'eau fort bien trempee avec l'eau commune: on peut faire d'une eau distillee qui les blanchit aussi. Prenez souffre vis, alun, sel gemme, de chacun vne liure, de vinaigre quatre on-

Eau di
stillee.

ces: les autres mettent au lieu de vinaigre l'esprit de vitriol, tirez en l'eau avec vne cornue à feu lent, afin que l'eau ne sente le souffre. Ceste eau blanchit extremement les dents, & nettoye les gēciues pourries. Si les dēts sont fort noirs & limonneux:

Prenez de farine d'orge & Poudre. du sel commun deux onces, meslez cela avec du miel & en faiētes comme vne paste, laquelle on mettra dans vn papier, & la fera-on seicher au four. On prendra de ceste poudre trois dragmes, des cācres bruslez & pierre ponce, de coques d'œufs en poudre, d'alun, de chacun deux dragmes, d'escorce de citron seche vne dragme, on meslera tout ensemble & en frottera on les dents.

Racines
de guimauues
prepa-
rees.

Les racines de guimauues bien preparees nettoient & blanchissent bien fort les dents, la façon de les preparer est telle. Prenez racines de guimauues bien nettes, mettez les en plusieurs pieces assez languettes, faictes les bouillir dás l'eau avec du sel, de l'alun, & vn peu d'iris de Floréce: apres faictes les bien sécher au four ou au Soleil, & en frottez les dents.

Pour as-
seurer les
dents qui
branlent.

Si les dents ne sont assurees & qu'elles branlent: Prenez racines de bistorte & de pētaphyllum, de chacune vne once, racine de fouchet deux dragmes, des roses rouges, d'esponge bedegar, du lentisque de chacū demy once, du sumach deux dragmes, de girofle vne dragme, faictes cuire tout cela en eau ferree &

du gros vin, & vous en lauez les genciues, adioustez y vn peu d'alun. ou bien; Prenez du corail rouge & de corne de cerf, d'alun de chacun vne dragme & demie, du sumach, de l'esponge bedegar, de chacun vne dragme; faictes en vne poudre laquelle messerez avec le suc, ou avec le vin de coings, & en mettez sur les genciues & aux racines des dents en forme d'onguent.

Si les dents sont descharnees il faudra les encharner & faire renaistre la chair avec les remedes suiuaus. On fera vne poudre avec l'alun, le corail rouge, l'encens & son escorce, avec vn peu d'iris & d'aristoloche. ou bié: Prenez d'alun de plume, des balaustes, & du sumach, deux dragmes de chacun, du bois d'a-

Pour en-
charner.

loës, du fouchet, de la myrrhe & du mastic, de chacun vne dragme, faiçtes vne poudre: les opiates sont bien aussi propres pour incarner, & se tiennent mieux.

Opiate.

Prenez d'alun de roche demy once, du sang de dragon 3. dragmes, de myrrhe deux dragmes & demie, de la canelle, & du mastic, de chacun vne dragme: mettez tout cela en poudre fort subtile, & avec la quantité suffisante du miel, faiçtes en vne opiate, laquelle mettrez le soir sur vos genciues, & l'y laisserez toute la nuit, le lendemain matin les lauerez avec quelque decoction astringente ou avec du gros vin. Il y en a qui prennent tous les matins vn grain de sel à la bouche & le laissent fondre, apres ils s'en frottēt

Et du moyen de les guarir. 236
les dents avec la langue mes-
me, & tiennent que cela blâ-
chit & r'assure les dents, &
empesche la corruption des
genciues. Voila comme on
conseruera les dents.

Fin du troisieme Discours.





QVATRIESME DISCOVRS, AVQVEL est traicté de la vieillesse, & cō- me il la faut entretenir.

*Que l'homme ne peut tousiours demeu-
rer en vn estat, & qu'il luy est neces-
saire de vieillir.*

CHAPITRE I.

Tout ce
qui est
né doit
prendre
fin.

CEST vn edict gene-
ral & souuerain, pu-
blié par tout l'vni-
uers, & prononcé par la na-
ture mesme, que tout ce qui
a prins naissance, s'il est ma-
teriel, doit auoir vne fin : Il
n'y a rien sous la vouldé du
ciel (hormis l'ame de l'hom-
me) qui ne soit subiect à chā-
gement & corruption. Tous
les grāds Philosophes & Me-

decins ont sans contredit si-
gné cest arrest. Hippocrate
au premier liure de la diete,
Aristote en vn liuret qu'il a
fait de la longueur & brieue-
té de nostre vie, & Galien au
premier liure de la santé, en
ont rendu des raisons si clai-
res & apparentes, qu'il n'y a
point de moyen de s'opinia-
strer au contraire; ioint que
l'experience nous en rend de
preuues si assurees, que ce-
luy qui en douteroit, seroit
tenu pour fol & despourueu
d'entendement. Nous faisons
tous les iours les funerailles
de nos ancestres; Nous regre-
tons à toute heure avec estō-
nement la perte de tant de
grands personnages; Et de
tout ce qui s'est passé depuis
la creation du monde, il n'en
est rien demeuré que ce que

De la vieillesse,

la memoire de l'histoire a cō-
serué à la posterité. Je ne
veux point icy recercher par
le menu toutes les causes qui
peuuent alterer & corrom-
pre les corps naturels, ie n'ay
que faire de la transmutation
des eleméts, de la corruption
des metaux, de la mort &
vieillesse des plantés: ie veux
seulement faire voir ce qui
peut alterer nos corps, &
tout ce qui les fait vieillir.
Mes demonstrations seront
puisees des plus viues & clai-
res fontaines de la philoso-
phie naturelle.

Les cau-
ses de la
vieillesse

Les causes de nostre disso-
lution sont ou internes ou
externes: les internes naisset
avec nous, marchent touf-
iours avec nous, & nous ac-
compagnét iusques au tom-
beau: Les externes viennent

Et comme il la faut entretenir. 238

par dehors, nous enuironnēt
de tous costez, & encores
qu'on se puisse garentir de
quelques vnes, il y en a neāt-
moins vne infinité qui sont
ineuitables. Celles qui nais-
sent avec nous sont deux, la
contrarieté des elemēts, des-
quels nos corps sont com-
posez, & l'action de nostre
chaleur naturelle. Les ele-
ments accompagnez de leur
quatre qualitez contraires,
(qui sont chaleur, froideur,
humidité, & seicheresse) pour
se mesler & vnir ensemble,
font comme vne espee d'ac-
cord, quittent chacun vn peu
de leur souuerain droict, &
se reduisent à vne mediocri-
té, qu'on appelle tempera-
ment; mais ceste alliance ne
dure guiere. car la qualité qui
domine & qui donne le nom

Causes
internes
de nostre
mort.

La cōtra-
rieté des
elemēts.

au temperament commence la sedition , s'attaque à son contraire qui est plus foible, & ne cesse de le combattre iusques à ce qu'il en aye veu la dissolution entiere : c'est là vne des causes de nostre mort qui est ineuitable , & que nous portons du ventre de nostre mere ; car il ne se peut trouuer vn corps au monde si egalelement mixtiõné , qu'il n'y ait tousiours vne des quatre qualitez qui surpasse. Celuy que les anciens ont descrit & appellé *ad pondus* , est imaginaire , ne sert que pour regler les autres , & ne se trouue non plus que la republique de Platon, & le parfaict orateur de Ciceron. Ceste contrarieté donc qui se trouue en nostre composition est la premiere cause

Et comme il la faut entretenir. 239

de nostre vieillesse. Et c'est ce qu'Aristote a tresbiē remarqué au liure allegué, quand il dit, que par tout où il y a cōtrariété, il faut que la corruption s'en ensuyue. L'autre

cause de nostre dissolution

est l'action de la chaleur na-

turelle. Nostre vie est fon-

dee sur deux appuis, qui

sont la chaleur & l'humidi-

té radicale; la chaleur est le

principal instrument de l'a-

me, c'est elle qui cuit, qui di-

stribue l'aliment, qui engen-

dre, qui estend & perce les

canaux, qui forme toutes les

parties, qui viuifie (cōme dit

Trismegiste) toutes les espe-

ces de l'vniuers, & les gou-

uerne selon leurs dignitez.

Ceste chaleur estant naturel-

le a besoin d'alimēt, l'humeur

qu'on appelle radicale luy

L'action
de nostre
chaleur,
seconde
cause de
la vieil-
lesse.

sert de nourriture, comme l'huile qu'on met dans les lampes entretient la flamme, ceste humeur venant à faillir, il faut necessairement que la chaleur perisse. Or l'humeur ne peut tousiours durer, d'autant que la chaleur la va minant & cōsommant tous les iours. Tu diras qu'il s'en faict vne perpetuelle reparation, & que ceste chaleur & humidité influentes, qui viennent du cœur comme d'une viue fontaine, & sont conduictes par les arteres, comme par des canaux, en peuuent autāt remettre qu'il s'en est perdu. Mais ie veux que tu sçaches que ce qui se repare ne peut estre si pur, & qu'il ne s'en remet iamais la mesme quantité. Pour la pureté il est ayse à voir que l'humeur qui se

'Nostre humidité ne se peut reparer en mesme qualité.

Et comme il la faut entretenir. 240
met à la place de celle qui est
perdue, ne peut atteindre le
mesme degré de perfection;
car nos parties solides, es-
quelles consiste tout le fon-
dement de la vie, sont fai-
tes d'une semence bien pure,
fort elaboree & raffinee en
tous ces labyrinthes qu'on
voit aux vaisseaux spermati-
ques, & maintenant elles se
nourrissent seulement d'un
sang qui se blâchit par la ver-
tu de la partie solide, & qui
ne passe point par tant de ca-
naux, & tout ainsi que le vin
tant plus que tu luy mets de
l'eau, se red plus aigieux, plus
foible, & en fin deuient tout
eau: ainsi la chaleur & humi-
dité radicale s'affoiblissent à
toute heure par l'opposition
du nouveau aliment qui a
toujours quelque chose de

La quan-
tité ne
peut estre
esgale.

dissemblable . Et puis c'est
vne maxime en la Philosophie
que tout agent naturel patist
en son action, & par conse-
quent s'affoiblit: Nostre cha-
leur s'affoiblissant tous les
iours ne peut reparer ce qui
est perdu en mesme degré de
perfection; il faut donc qu'il
vieillisse: & apres qu'il meure
du tout. Quât à la quâtité de
ce qui s'escoule, on ne la peut
reparer du tout en mesme
proportion, d'autant que la
dissipation se fait continuel-
lement, & la restauration ne
se peut faire que peu à peu,
& apres vne infinité d'altera-
tions. Voila comme ce qui
nous doit conseruer nous
ruïne, & comme nostre cha-
leur consommant l'humidi-
té radicale se tuë en fin elle-
mesme. Ces deux causes nais-
sent

Et comme il la faut entretenir. 241
sent, croissent & se nourris-
sent avec nous. Il n'y a Medec-
cin au monde, fust-ce *Æscu-*
lape mesme, qui nous en puis-
se garantir. Toutes ces li-
queurs precieuses, cet or po-
table, ces cōserues de rubis &
d'emerandes, cet elixir de vie
ceste fontaine fabuleuse de
Iouence, ne peuuent empes-
cher que la chaleur en fin ne
s'affoiblisse. Galien se moque
tresbien d'un Sophiste *Ægy-*
ptien qui auoit fait des com-
mētaires del'immortalité des
corps. Si on pouuoit (dit-il) a-
pres que l'animal est paruenu
à sa perfection, le renoueller
en mesme instant & luy faire
de nouveaux principes, sans
doute le corps se pourroit
rendre immortel : mais cela
ne pouuant estre, il faut que
l'agent naturel s'affoiblisse &

Opinion
des Egy-
ptiens cō-
damnee.

que necessairement il vieillisse. Les Ægyptiens & Alexan-
drins ont creu q̄ la cause na-
turelle de la vieillesse venoit
de la diminution du cœur; ils
disoient que le cœur crois-
soit iusques à cinquante ans
le poix de deux dragmes cha-
que annee, & depuis cinquā-
te ans alloit tousiours en di-
minuant, & qu'en fin se re-
duisoit en rien: mais ce ne
sont q̄ vanitez & pures folies.
Nous auons fait ouurir plu-
sieurs vieillards qui auoient
le cœur aussi gros & aussi pe-
sant que les ieunes. Il n'y a
donc que deux causes inter-
nes de nostre vieillesse, la cō-
trarieté des principes des-
quels nous sommes compo-
sez, & l'action de nostre cha-
leur naturelle, laquelle con-
sommant son humidité, va

Et comme il la faut entretenir. 242

pétit à petit se chāt & rafroidissant nos corps.

Il y a d'autres causes de ^{Les causes extérieures} nostre dissolution qui sont ^{inevitables.} externes & inevitables. Car

puis que nos corps sont composez de trois substances dissipables, l'une desquelles est subtile & aëree, l'autre liquide, & la dernière solide: il faut nécessairement que nous ayons quelque chose qui vienne du dehors pour les reparer: autrement nostre vie ne passeroit iamais le septiesme iour, car c'est le terme qu'Hippocrate a donné aux corps parfaits, & qui ont beaucoup de chaleur naturelle. Ce qui repare nostre substance s'appelle aliment, qui est triple, l'air, le breuvage & les viâdes: l'air entretient la substance spiritueuse, le breuvage la li-

quide, & les viandes la solide.
Ce triple aliment pour net &
purifié qu'il soit, a tousiours
quelque chose de dissembla-
ble à nostre nature qui ne se
peut assimiler: il s'en fait
donc vn excrement, lequel
estant retenu, altère le corps
& fait vne infinité de mala-
dies. Voila comme les vian-
des necessairement nous al-
terent. Je laisse toutes les au-
tres causes externes, comme
les exercices trop violans: la
vie oisive & sedentaire, les lô-
gues & continuëles veilles,
les passions de l'ame qui nous
peuvent vieillir, cômme la peur
& la tristesse, d'autant que
nous les pouuons aucune-
ment euitier. Je laisse aussi tou-
tes les causes fortuites & qui
nous arriuent par hazard, côm-
me blesseures: i'ay voulu seu-

Et comme il la faut entretenir. 243
lement monstrent qu'il est ne-
cessaire à l'animal de vieillir,
qu'il nourrist en soy les cau-
ses naturelles de la mort, &
qu'il en a encore d'externes
qui sont inévitables.

Descriptio tresbelle de la Vieillesse.

CHAP. II. ET LI. 3

Pour voir qu'il est tout
certain q nos corps
depuis le iour de leur
naissance sont sujets à plu-
sieurs changemens & altera-
tions; les medecins ayans es-
gard aux plus sensibles & ap-
parentes mutations, ont di-
uisé toute la vie de l'homme
en plusieurs parties, qu'ils
ont appellé aages. Les Egy-
ptiens ont fait autāt d'aages,
comme il y a de septenaires
enclos au nombre de cent,

Distin-
ction des
aages.

Opinion
des Egy-
ptiens.

Opinion
des Py-
thagori-
ciens.

car ils croyoient que l'homme ne pouuoit viure que cēt ans. Les Pythagoriciens qui ont esté fort superstitieux sur les nombres, ont publié par leurs escrits, que de sept en sept ans nous sentions vn changement remarquable; & en la temperature du corps, & aux mœurs de l'ame; & qu'on deuoit rapporter tout cela à l'excellence & perfection du septenaire. Je ne veux point icy débattre la questiō des nombres; ie l'ay traitée assez amplemēt à mō troisiēme liure des iours critiques; il me suffit d'arrester avec tous les plus celebres auteurs, que l'homme suivant le cours naturel de sa vie, endure cinq mutations remarquables en son temperamēt, & passe par les cinq aages, qui

notaiq
Cinq aages.

Et comme il la faut entretenir. 244

sont l'enfance, l'adolescence,
la jeunesse, l'aage viril ou cō-
sistant & la vieillesse. L'en-

L'enfance

fance est chaude & humide,
mais l'humidité surmonte &
tient la chaleur si subiecte

qu'elle ne peut montrer du-
tout ses effects; elle dure ius-

L'ado-
lescence.

ques à treize ans. L'adoles-
cence suit apres, qui est enco-
res chaude & humide, mais la
chaleur commence à surmō-
ter: on voit ses estincelles
briller & reluire par tout.

Aux masles la voix cōmence
à grossir, toutes les voyes se
dilatent, ils iettent leur pre-
miere laine. Aux filles les mām-
elles durcissent & crois-
sent à veuë d'œil, leur sang se
meut par tout le corps & se
fait faire place iusques à ce
qu'il ait trouué la porte: cest
aage va iusques à vingt qua-

La ieuneſſe.

L'aage
viril.

La vieil-
leſſe.

Trois
vieilleſ-
ſes.

La pre-
miere.

tre ou vingt cinq ans, qui eſt le terme prefix & limité pour l'accroifſſance. Apres vient la ieuneſſe qui eſt chaude & ſeche, pleine d'ardeur, de vigueur & d'agilité; on la fait couler iuſques à quarante ans. Lors le corps eſt paruen en ſon eſtat; c'eſt l'aage viril ou conſiſtant, qui eſt le plus temperé de tous, participant des quatre extremes également, il s'eſtend iuſques à la cinquantième année. Et là commence la vieillesſe, qui cōtient tout le reſte de noſtre vie. Or ceſte vieillesſe ſe peut encores diuiſer en trois: il y a la premiere vieillesſe, la ſeconde, & la derniere. Telaiſſe celle qui viét de maladie, qu'on appelle *ſenium ex morbo*. La premiere ſe nomme verte, qui eſt accompagnée de pruden-

Et comme il la faut entretenir. 249

ce, pleine d'expérience, & propre pour gouverner les republiques. La seconde commēce à soixante & dix ans, & est accompagnée de plusieurs petites incommoditez; elle est desia bien froide & sèche. Pour la froideur il y en a des marques si apparentes que personne ne l'a iamais mise en doute. car si tu les touches tu les trouueras tousiours aussi froids que glace, ils n'ont point vne viue & vermeille couleur, tous les sens sont affoiblis, & sont subjets à vne infinité de maladies froides: mais pour l'autre qualité, qui est la secheresse, quelques vns l'ont voulu debatre: ils disent que ceste vieillesse est humide & nō pas sèche, pource qu'on voit les yeux des vieillards tousiours larmoyans, le nez

La seconde.

Le tēpe-
rament
desvieil-
lards
froid &
sec.

leur decoule tousiours, il sort
de leur bouche grande quan-
tité d'eaux, ils ne font que
touffer & cracher. Mais Galie
respond tresdoctement au li-
ure des temperamēs, que les
vieillards sont humides d'v-
ne humidité superflue, &
qu'ils sont secs, de l'humidité
radicale: & au premier liure
de la conseruation de la san-
té il dit, que les vieillards ont
toutes ces parties seches, que
les enfans auoient humides,
c'est à dire, les parties solides,
desquelles despend le tempe-
rament vniuersel: c'est l'opi-
nion la plus veritable, & que
nous deuons tenir: car la mai-
greur, les rides, la durescé des
nerfs, & de la peau, la roideur
des ioinctures monstrent as-
sez ce temperament sec: les
gratelles aussi & demangeai-

Et comme il la faut entretenir. 246

sons vniuerselles, les galles qu'ils ont à la teste nous font bien paroistre que leur cerueau est plein d'humeurs sales, & non pas d'un flegme doux. En fin vient la dernière vieillesse qu'on nomme decrepite: à laquelle, comme dit le Prophete Royal, il n'y a que douleur & langueur; toutes les actions & du corps & de l'ame sont affoiblies; les sentimens sont hebetez, la memoire se perd, le iugement defect, ils deuient pour lors en enfance: Et c'est de ceux-là que le prouerbe Grec doit estre entendu: τοὺς γέροντας δις παῖδας, c'est à dire, que les vieillards sont deux fois enfans. Ceste dernière vieillesse est descrite dās le douzième chapitre de l'Ecclesiaste avec vne si belle

La dernière
vieillesse
qui est
decrepite.

allegorie qu'il ne se peut rien voir au monde de si excellent. C'est aussi le plus grand Philosophe, & le plus grand Naturaliste qui fut iamais, quis'en est meslé: c'est ce sage Salomon qui a autrefois cogné tous les secrets & mystères de la Nature, qui a discouru de toutes les plantes depuis le cedre du Liban iusques à l'hysope qui fort des murailles, c'est à dire, depuis la plus haute iusques à la plus petite: car pour l'hysope nous prenôs vne espece des capillaires, qui se nomme *salvia vita*, qui est vne des plus menues herbes qui se puisse voir. Je mettray ceste description tout au long, qui nous seruira, outre sa beauté, d'enseignement & de remonstrance. Aye souuenance (dit-il)

de ton Createur és iours de ta ieunesse, auant que le Soleil, les estoilles, la lumiere s'obscurcissent, & que les nuës retournent après la pluye : car lors les gardes de la maison trembleront, & se courberont les hommes forts, & cesseront les machelières, si seront obscurcis les vóyans par les fenestres, les portes seront fermées par dehors, à cause de l'abbaissement de la voix de la meule : & se leuera à la voix de l'oyseau; si seront humiliées toutes les filles chãteresses, ils craindront chose haute : l'amandrier florira, la sauterelle sera engraissee, le caprier sera flestry, auant que la chaine d'argent s'allonge, l'aiguiere d'or se rôpe, & soit cassee la cruche à la fontaine, & que la rouë soit brisee sur

Excellente allegorie pour descrire la vieillesse

Explication de trois vers

la cisterne, & que la poudre
retourne en terre comme el-
le y a esté, & que l'esprit s'en
aille à Dieu. Voyla la descri-
ption du dernier aage qui est
admirable, & qui a besoin
d'un bon anatomiste pour
estre bien entendue. En la
vieillesse decrepite le Soleil
& les estoilles s'obscurcissét,
ce sont les yeux qui perdent
leur lumiere. Les nuës re-
tournent apres la pluye, c'est
à dire, apres qu'ils ont long
temps pleuré, il leur passe de-
uant les yeux, côme des nuës
qui sont les grosses vapeurs
qui s'epaississét. Les gardes de
la maison tremblent, ce sont
les bras & les mains qui ont
esté donnez à l'homme pour
la deffense de tout le corps.
Les hommes forts se plient,
c'est à dire, les iambes qui

Explica-
tion de
l'allego-
rie.

sont les colonnes, sur lesquelles tout le bastiment est appuyé. Les machelières cessent, c'est à dire, les dents qui nous seruent à moudre & mascher la viande. Les voyās s'obscurcissent par les fenestres; ce sont les yeux qui se couurent souuent d'une cataracte qui ferme la prunelle, qu'on appelle fenestre de l'œil. Les portes se ferment par dehors à cause de l'abaisement de la meule: ce sont les machoires qui ne se peuvent ouvrir pour manger, ou les canaux de la viande qui s'estressissent. Ils se leuent à la voix de l'oyseau; c'est à dire, ne peuvent dormir & sont tousiours eueillez au chant du coq. Toutes les filles chanteresses sont humiliees; c'est la voix qui leur deffaut.

L'amandrier fleurist , c'est la
teste qui deuient toute blan-
che. La sauterelle s'engraisse,
ce sont les iambes qui deuie-
nent enflées. Le caprier se fle-
strit, c'est à dire , leur appetit
se perd ; car les capres ont
propriété d'exciter l'appetit.
La chaine d'argent s'allon-
ge , c'est ceste belle mouëlle
dorsale qui va tout le long de
l'espine, laquelle se lasche & se
courbe , & leur fait fleschir le
dos. L'aiguiere d'or se rompt,
c'est le cœur qui contenoit
comme vn vaisseau le sang
arterial & l'esprit vital , qui
font aucunement iaunes &
dorez , qui cesse de se mou-
uoir , & qui n'en peut plus
contenir comme s'il estoit
rompu. La cruche se casse à
la fontaine, c'est ceste grosse
veine caue qui ne peut plus

Et comme il la faut entretenir. 249

puiser de sang au foye, qui est le commun magazin & la fontaine qui arrouse tout le corps; de sorte qu'il ne sert nō plus qu'une cruche cassée. La rouë se brise sur la cisterne, ce sont les reins & la vessie qui sont tous laschez, & ne peuvent plus contenir l'urine. Lors que tout cela arrive, la poudre, c'est à dire, le corps qui est materiel, retourne en terre, & l'esprit qui est venu d'en haut retourne à Dieu. Voyla tous les cinq ages décrits & limitez par les années. Je ne veux pas pourtant qu'on s'adstaigne tellement au nombre des années, que d'iceluy depende du tout la ieunesse & la vieillesse; il se faut plustost regler au temperament: car tout homme qui sera froid & sec ie l'appelle-

Que le nombre des années ne fait pas la vieillesse,

ray vieil ; il y a beaucoup de vieillards à quarante ans , & vne infinité de ieunes à soixante ; il y a des complexions qui vieillissent bien tost , & les autres plus tard . Les sanguins vieillissent fort tard , pource qu'ils ont beaucoup de chaleur & d'humidité : les melancholiques , qui sont froids & secs , vieillissent plustost . Pour le regard des sexes , le féminin vieillit tousiours plustost que le masculin . Hippocrate l'a

tres-bié remarqué à son liure de l'enfantement du septiesme mois . Les filles (dit il) cōme elles sont dans le vêtre de leur mere , se formēt & croissent plus tard que les masles , mais cōme elles en sont hors croissent plustost , sont plustost sages & vieillissent plustost , à cause de la foiblesse du

Pour-
quoy les
femmes
vieillif-
sent plu-
stost que
les hom-
mes.

Et comme il la fait entretenir. 250
corps & de leur façon de vi-
ure. La foiblesse les fait plu-
stost croistre & vieillir ; car
comme les arbres qui sont
de courte vie croissent tout
quant & quant ; ainsi les
corps qui ne doiuent guiere
durer, paruiennent bien tost à
leur perfection. La façon de
viure les fait aussi vieillir,
pource qu'elles demeurent
quasi tousiours oyfues. Or il
n'y a rien qui vieillisse tant
que l'oyfueté.

*Regime pour se conseruer
longuement.*

CHAP. III.



PUIS que les causes
naturelles & ineuita-
bles de nostre vieil-
lesse sont trois, la contrarieté

de nos principes , la dissipation de la chaleur & humidité radicale, & les excrémens qui s'engendrent ordinairement par la nourriture : il faut si nous voulons conseruer le corps en bon estat, & garder qu'il ne vieillisse si tost, disposer ces trois choses de telle façon, que l'accord & vnion des elemens qu'on appelle temperature, soit bien entretenue, la chaleur & humidité qui se dissipēt à toute heure soyent reparees, & les excrémens qui se retiennent aux corps soyent chassez. Nous obtiendrons tout cela fort aysement avec vn bon Regime sans qu'il nous faille recourir aux medecines. Or ce nom de regime comme i'ay desia dict, comprend beaucoup de choses, qui se rap-

portent toutes à six. Les Medecins les appellent non naturelles, pour ce que si elles sont dextrement maniees, & qu'on s'en sache bien servir, elles conferuent la sante & peuuent estre dittes naturelles. Mais si on en abuse, si elles defaillent ou excedent tant soit peu, sont cause des maladies, & peuuent estre appellees contre nature. Ce sont l'air, le boire & manger, le dormir & veiller, le mouuement & repos, l'inanition & repletion, les passions de l'ame, desquelles ie m'en vois discourir par ordre.

Quel air on doit choisir pour vi-
 ure longuement, & quel est le
 plus propre pour les vieilles gens.

CHAP. IIII.

La neces-
 sité de
 l'air.

EN toutes les
 causes qui peuvent
 alterer nos corps, il
 n'y en a point de plus neces-
 saire, de plus soudaine & qui
 nous touche de plus près que
 l'air. La nécessité se fait as-
 sez paroître aux maladies qui
 nous priuent de la respiration,
 car s'il arriue qu'un des in-
 struments qui sont dediez,
 ou pour l'entree, ou pour
 la reception, ou pour la pre-
 paration de l'air, soit fort of-
 fencé, l'animal meurt quant
 & quant suffoqué, & semble
 que l'air & la vie aux animaux

parfaits soient comme inseparables. La chaleur naturelle (si nous croyons Hippocrate) se conserve par le froid modéré, & si tu ostes au feu l'air qui luy sert comme de souspirail, il est incontinent estaint & estouffé. Nos esprits qui sont instruments principaux de l'ame, s'engendrēt & se nourrissent de l'air, ne s'entretiennent & ne se purifient que par l'entree & sortie de l'air : c'est pourquoy tout le corps est percé, c'est pourquoy nos arteres battent par tout, & que la nature a fait de si belles & admirables emboucheures des deux vaisseaux ; de sorte que j'auzeray bien dire que l'air est aussi nécessaire à l'animal que son ame mesme. Quant à la soudaineté nous la ressentons

la soudaineté de l'air.

tous les iours. Il monte en vn
momēt par le nez au cerueau,
& trauerfant vn million de
destroits qui se voyent à ce
ret admirable, s'en va iusques
aux plus secretes loges, il des-
cend avec vne legereté & vi-
stesse incroiable par la bou-
che aux poulmons, & delà au
cœur, il perse insensiblement
les pores du cuir, & entre par
la transpiration des arteres
iusques aux plus profondes
cachottes de nostre corps.
C'est vn corps si commun &
si proche de nous, qu'il nous
environne tousiours par de-
hors, & ne nous abandonne
vn seul momēt, il le faut bon
gré mal gré que nous en ayōs
humer tousiours. Le diuin
Hippocrate ayant fort bien
reconnu ceste puissance de
l'air, dit en ses Epidemics &
au se-

au secōd liure de la diete, que de l'air depend entierement toute la constitution des esprits , des humeurs & du corps. Le choix doncques d'un bon air , d'une belle & plaisante demeure doit tousiours tenir le premier lieu en tout regime. Les Medecins

En quoy consiste la bonté de l'air.

reconoissent la bōté de l'air en sa substance & en ses qualitez: En sa substance quand il est bien purifié , quand il n'a aucune semence de corruption, & qu'il n'est point infecté des malignes vapeurs qui s'esleuēt des corps morts, des cloaques & immondices des villes , des eaux qui crouppissent. Il y a certaines plantes qu'on ne doit guiere approcher du logis ordinaire pour. ce qu'elles ont vne qualité contraire à l'esprit animal,

côme sont le noier, le figuier, les choux, les hiebles, la roquette sauuage, la ciguë, & vne infinité d'autres. La vapeur aussi des forges & des mines est fort ennemie du cœur, & faict, comme remarque Aristote, deuenir tabides la pluspart de ceux qui y travaillent. Si l'air est corrompu & qu'on ne puisse l'abandonner si promptement, il le faudra purifier avec des feux artificiels du romarin, genieure, cyprez, laurier, avec des parfums de bois d'aloë, des santaux, graines de genieure, cassolettes & autres choses aromatiques: la vapeur du vinaigre corrige merueilleusement la malice de l'air. Quât aux qualitez de l'air, tout excex de chaleur, froideur, humidité & secheresse est mau-

Moyen
de corri-
ger l'air.

uaise : il le faut choisir s'il est possible bien tēperé. on le recognoistra estre tel s'il s'eschauffe bien tost apres que le Soleil est leué, & s'il se r'affroidist prōptemēt apres q̃ le Soleil est couché ; s'il ne se peut trouuer de ceste tēperature, il vaut mieux qu'il soit vn peu sec que trop humide. car (cōme dit Hippocrate à l'Aphorisme quinziésme du troisiésme liure) les sechereffes en general sont tousiours plus saines que les humiditez.

○ Pour les vieillards il faut choisir vn air chaud , & leur chambre ne doit iamais estre sans feu; car il est tres-certain qu'ils se portent beaucoup mieux en Esté, pource qu'ils trainēt tousiours l'hyuer avec eux. Il les faut loger en vn lieu assez haut esleué, & leur

Quel air est propre pour les vieillards.

maison doit estre percee du costé du leuant à fin que le Soleil entre le matin en leur chambre, & du costé de Septentrion, pour purifier l'air & en chasser toutes les mauuaises vapeurs. A l'air ie r'apporteray les odeurs qui resiouyssent merueilleusement le cœur & tous les esprits. Il est bon de porter tousiours quelque bonne senteur, de se tenir net & propre, & changer fort souuēt de linge. L'air dōc s'il a toutes ces qualitez, seruira pour reparer nostre premiere substance que les Medecins nomment spiritueuse qui s'engēdre, se nourrit & conserue de l'air.

*Les regles generales qu'on doit garder
au manger & au boire pour viure
longuement.*

C H A P. V.

DE boire & le manger
doyuent tenir le se-
cond rang , car l'un
repare ce qui se perd de liqui-
de, l'autre conserue & entre-
tiét ce qui est de pl^r solide. Je
ne veux pas icy descrire par-
ticulierement toutes les vian-
des qui peuuét nuire ou pro-
fiter, qui sont de bon ou mau-
uais suc, qu'on lise ce que Ga-
lien en a escrit aux liures de
la faculté des aliments, & en
ses liures de la conseruation
de la santé. Je veux seulemēt
en ce chapitre enseigner les
regles generales que j'ay ti-
rees des autres Medecins, &
sur tous d'Hippocrate, qui

seruirôt à toute sorte d'aages
pour garder de vieillir bien
tost, dôt la premiere sera telle.

*Premiere
reigle.*

On ne doit iamais manger
qu'õ n'aye vn peu de faim. car
l'estomach ne fait cas des viã-
des qu'il n'appete pas, & bien
souuent digere mieux les plus
mauuaises quand il en a ap-
petit, que les pl⁹ delicates qui
ne luy plaisent. Tu trouueras
ceste reigle à l'Aphorisme tré-
tehuictiesme du second liure.

*Seconde
reigle.*

La seconde reigle est qu'il
faut bien mascher la viande
auant que l'aualler. car si tu
l'aualles sans mascher il en ar-
riue deux incommoditez; La
premiere est que tu manges
plus qu'il ne faut, & charges
par ce moyen trop ton esto-
mach; L'autre est que ton e-
stomach trauaille beaucoup
à cuire ce qui n'est pas mas-

ché. Les dents & la bouche seruent autât à la preparation de la premiere digestion, cōme fait l'air à attendrir les viandes aux cuisiniers; & c'est vne des raisons pourquoy ceux qui ont beaucoup de dents viuēt long tēps, pource qu'ils maschent bien leur viande. Tu trouueras ceste sentence à la sixiesme section du 2. liure des Epidemies.

La troisieme est qu'il se faut bien garder de réplir trop l'estomach, & celuy q veut viure longuement se doit tousiours leuer de table avec faim. La raisō y est toute apparēte; car si tu charges beaucoup ton estomach, tu traualles partrop la chaleur naturelle, qui est le principal instrumēt de l'ame, & le rēds en fin tout lāguide, pource q tout agēt naturel en

La troi-
siesme.

agissant repatit. Hippocrate a tresbié noté cela au sixiesme de ses Epidemies. C'est (dit-il) vn des principaux chefs pour la santé, de ne se nourrir point à son saoul, & de n'estre point paresseux au trauail.

Le qua-
triesme.

La quatriesme regle est de ne mäger que d'une ou deux fortes de viandes. car la variété nuit infiniment & ruine nos estomacs, pour ce que les viandes ne sont pas d'une mesme qualité, & par conséquent vn mesme degré de chaleur n'y suffit pas : les vnes se cuisent plustost, les autres plus tard, ainsi toute la cuisine est troublée : ioint que mägeant diuersité de viâdes & de sauces, on est contraint de boire plus souuent : or ce boire empesche la digestion, comme tu vois qu'en mettant souuēt

de l'eau dans vn pot on empesche que le bouillon ne se cuit pas. Il ne faut donc iamais abuser del'estomach, encore qu'il soit fort bon, d'autant que si tufasches le cuisinier, tu dîneras mal. Lis ceste belle sentence d'Hippocrate à la sectiõ troisieme du sixiesme liure des Epide-mies. La paresse (dit-il) de l'estomach est cause d'un desordre vniuersel & de l'impurité des vaisseaux. Or comme la repletion est dommageable, & engédre tout plein de cruditez, aussi la trop grande abstinence peut apporter tout plein d'incômoditez à la santé, pource que l'estomach estant vuide se réplit de mauuaises humeurs. & Galien mesmes remarq qu'un estomach affamé si on ne l'appaise de

quelque amiable liqueur, attire premierement du cerueau vne infinité d'eaux, & apres si la necessité le contraint, les plus gros excremens qui sont contenus au boyau ileon.

La cin-
quième.

La cinquiesme est d'observer en mangeant vn certain ordre qui doit estre tel, que les viandes qui se corrompēt aisément doiuent estre les premieres, pource qu'estās prises à la fin, gastent & corrompēt les autres: celles qui se cuisent & digerent avec moins de peine, doiuent entrer les premieres dans l'estomach: les grosses viandes, les dures, les pesâtes serōt les dernieres tout au contraire de nos cuisines artificielles. Les viandes qui laschēt le vêtre cōme pruneaux, pōmes, potages, doiuent aussi estre les premieres.

sixiesme
reigle.

La derniere regle est qu'il

Et comme il la faut entretenir. 258
faut s'accoustumer de mâger
pl⁹ au souper qu'au disner; i'en-
tens si le corps est bien sain &
qu'il ne soit point suiet aux ca-
tarrhes. Les raisons y sont tou-
tes claires; car il y a pl⁹ d'inter-
ualle du souper au disner, que
du disner au souper: il y a d'oc
plus de tēps pour cuire & di-
stribuer l'aliment. Il est tout
certain q̄ quād nous dormōs
la chaleur est plus forte, pour-
ce qu'elle se retire toute à son
centre. J'adjousterai que pour
biē digerer no⁹ auons besoin
du repos; or la nuit toutes les
fonctions animales cessent, il
n'y a riē qui destourne nostre
chaleur, elle pourra d'oc beau-
coup mieux cuire. Tous les
grands Medecins, Hippocrate,
Galien, Auicenne, l'ont ain-
si ordonné. Tous les anciens
l'ont ainsi practiqué. Les

Athletes , comme remarque Galien au cinquiesme liure de la conseruation de la santé, ne mangeoient iamais de la chair qu'à leur soupper. Les Pythagoriciens (cōme escrit Aristoxenus) ne prenoient à leur disner qu'un peu de pain avec du miel : Et durāt le siege de Troye les soldats Grecs (si nous croyons ce qu'en dit Philemon) faisoient quatre repas le iour, mais aux trois premiers ils ne prenoient que du pain & du vin, au dernier qui estoit leur soupper ils mangeoyent des chairs de porceau. Voyla les reigles generales qu'on doit obseruer au manger, auxquelles i'adiousteray pour la fin, q̃ la vraye heure de manger est celle du iour, qui est la plus temperee , en hyuer la plus chaude, en Esté

& comme il la faut entretenir. 259
la plus fresche, apres auoir
fait vn mediocre exercice.

*Comme il faut particulièrement
nourrir les vieilles gens, & de
quelles viandes.*

CHAP. VI.

DE s viandes desquelles
on veut nourrir les vieil
lards ie doiuent ordonner se-
lō les degrez de leur vieilles-
se. La premiere vieillesse qui
est encore verte & vigoreuse
se pourra seruir de toutes les
reigles que i'ay descrites au
chapitre precedant, mais les
deux autres ont besoind'estre
conduictes eu ceste façon. Il
les faut eschauffer & hume-
cter, par ce que leur tempera-
ment est froid & sec. Qu'on
les loge donc trestous en vn

air bien chaud, & que leur châtre ne soit iamais sâs feu.

La quã-
tité des
viandes.

En l'administration de leur viande il faut remarquer la quãtité, la qualité & le moyé d'en vser. Pour la quantité il ne les faut iamais charger de beaucoup de viande, pour ce que côme remarque Hippocrate à l'aphorisme quatorziésme du premier liure, ils ont fort peu de chaleur naturelle laquelle s'esteindroit, côme si tu iettois quãtité de bois à vn petit feu, ioint que côme dit le mesme autheur, ils endurét fort aisément le ieunesse. Pour la qualité il faut que leurs viâdes soiét de bon suc, de facile digestion, & d'une matiere rare, d'autant que la substance des vieillards ne se dissipe guiere, on leur doit deffendre toutes viâdes vis-

La qua-
lité. 

queuses, grossieres, vêteuses, phlegmatiques, melancholiques, & qui peuuēt opiler. Le moyē de leur en faire vser est de les nourrir peu & souuent, principalement ceux qui sont en l'aage decrepité, les autres qui ont vn peu de vigneūr se contēteront de trois repas le iour. Ainsi se nourrissoiēt ces deux vieillards desquels parle Galien au 5. li. de la conseruation de la santé, Antioche Medecin & Telephus Grammarien.

Leur pain doit estre de bon froment bien cuit & bien leuē avec vn peu de sel; il ne le faut pas māger chauld, pour ce qu'il ne se digere pas si aisēmēt, il altere dauātage, engēdre des obstructiōs & enuoie plusieurs vapeurs au cerueau, il doit estre du iour mesme, ou de deux, s'il passe les trois

iours il defeché trop & demeure trop long temps à l'estomach. Tous ces gasteaux faits avec du fourmage, du lait, du beurre, & autres pains sans leuain, leur sont tresdommageables.

Les
chairs.

La chair est vn fort bon aliment, nourrit beaucoup & se conuertit aisement en sang. Les chairs de difficile digestion & qui sont visqueuses, sont du tout contraires à cest aage, les chairs des oyseaux sont plustost cuites que celles des animaux à quatre pieds, & celles qui paissent es lieux secs, sont plus saines que les autres qu'on nourrit aux lieux aquatiques. Il faut choisir pour les vieillards vne chair de moyen aage; car les ieunes chairs sont trop humides, & les vieilles sont trop seches.

Leur nourriture doit estre de bons chapons, poulets, perdris, faisans, gelinottes, mouton, veau, franccolins, pigeonneaux. Les Arabes recommandent fort la chair des tourterelles, pource qu'elle engendre vn bon suc & rend tous les sens plus subtils. Il y en a qui louent la chair du pourceau, pource qu'elle approche fort du temperamēt de l'homme: mais ie la deffends aux vieillards, d'autāt qu'elle abonde en humidité superflue. Tous les cerueaux des animaux sont ennemis de l'estomach, les foyes engendrēt vn gros sang: les extremittez, comme la teste, la queue, les pieds, sont de difficile digestion & de peu de nourriture. Les chairs d'agneau, de bœuf, de sanglier, & des oyseaux de

riuiere ne valent rien pour l'estomach des vieillards, il leur faut faire des hachis delicats avec quelque fause, de bons cōsommez, de la gelee, & du blanc manger.

Les œufs

Les œufs frais & mollets leur sont tresbōs, car ils nourrissent beaucoup & promptement, s'ils sont durcis ou fricassez ne valent rien, pource qu'ils engendrent vn gros suc & arrestent trop dans l'estomach; les œufs pochez sont les plus sains, & ceux qui se cuisēt en eau chaude (qu'Aëce appelle estouffer) sont beaucoup meilleurs que ceux qu'on cuit sur les cendres, parce qu'ils se cuisent esgalemēt. Mais en quelque façon qu'on les mange, il y faut tousiours mettre du sel afin qu'ils descendent plustost: le blanc de

l'œuf nourrit fort peu, & dōne de la peine à l'estomach.

L'usage des poissōs leur est contraire, ils pourront manger d'un rouget, d'une sole, & d'une truite, & les faudra habiller avec le sel, la sauge, le fenouil & le vin. ^{Les poissōns.}

Les viandes de haut goust & qui piquent un peu, cōme aussi les saleures, ne leur sont pas mauuaises pour ouurer l'appetit, esueiller la chaleur naturelle & consommer tout plein de gros phlegmes qui sont dans leur estomach. Il est bon d'espicer leurs viandes avec le poiure, gingembre, canelle, & d'vser de la moustarde grise. Les oignons & les aulx ne leur sont pas mauuais s'ils les aimēt & s'ils ont accoustumē d'en māger. ^{Espices}

Le fourmage ne vaut rien, le beurre leur est sain, pource qu'il les humecte, les eschauffe & si adoucit la poitrine; l'huile d'oliue douce est aussi tresbonne. Le laiët sert à quelques vns, mais à ceux qui ont beaucoup d'obstruction il nuit plustost. Les anciens ont fait grand cas du miel en cest aage, ils en mettoient à leur pain, à leurs sauses, & quasi à toutes leurs viandes.

Les
fruiçts.

Les fruiçts crus & qui sont trop humides, pource qu'ils se corrompent aisément, ne leur sont pas bons. Les raisins de damas & ceux de passe sont amis du foye, de l'estomach, des reins & de la vésie. Les amandes font dormir, augmentent (si nous croyons Auicenne) la substance du cerueau, & nettoient

Et comme il la faut entretenir. 263
les voyes de l'vrine: les figues
seches, les pistaches, dattes,
noisilles rosties, noix con-
fites avec le miel, mirabolás,
oliues, pignons, sont propres
pour les vicillards.

*Quel breuuage est propre pour
les vieilles gens.*

CHAP. VII.



E boire est autant ne-
cessaire & vtile aux
vieillards, cōme il est
dommageable aux enfans. Il
ya vn ancien prouerbe qui
dit que les vicillards ne viuēt
que du piot, cōme les vieilles
aigles du suc des charognes.
Le vin est tout leur recōfort,
& pource on l'appelle le lait ^{louange}
des vieilles gens, il eschauffe ^{du vin.}
toutes leurs parties & purge

De la vieillesse,

la serofité des quatre humeurs par les vrines. Platon au second liure des loix escrit que le vin eschauffe les corps & anime les courages des vieillards, comme le fer se ramollit au feu. Zeno disoit souuent que le vin adoucissoit les mœurs des plus refroignez comme l'eau les Lupins. Vn des plus celebres Medecins qui sont sortis d'Arabie nommé Rhazis, escrit que les ieunes gens se doiuent abstenir du vin, mais aussitost qu'ils ont passé quarâte ans, toutes les fois qu'ils le voyent, ou le sentent, doiuent louer Dieu & luy rédre graces d'auoir eréé vne si douce & amiable liqueur. Or le vin qu'il faut choisir pour les vieilles gens doit estre vieil, rouge, assez fort, & si ne le faut guiere tréper. Les

quel vin
est pro-
pre pour
les vieill-
ards.

vins nouveaux doux, & grossiers ne valent rien, pource qu'ils opilent le foye, la ratte, les voyes de l'vrine, & rendēt la vieillesse subiete à l'hydropisie ou à la pierre. Il n'est pas bon de boire du vin à ieun, ny apres qu'on est fort eschauffé, pource que sa vapeur monte soudain au cerueau, offēce les nerfs, & cause des cōuulsiōs, des catarrhes soudains & des apoplexies. Les vieillards doiuent boire peu & souuent. Galien recōmande les vins artificiels qui se font de la betoine & du persil pour la pierre & pour la goutte, l'hippocras, la maluoisie, levin de Candie, pourueu qu'ils ne soiēt sophistiquēz ne leur sōt pas contraires: l'hydromel est recōmandé de tous, ils se peuuent seruir du cōmun pour la

boisson ordinaire, & de l'autre qu'on appelle vineux qui est fort comme de la maluoisie, ils en peuuent prendre le matin avec vnerostie.

De l'exercice des vieilles gens.

C H A P. V I I I.



L E S T tres-certain que tout aliment pour net & purifié qu'il soit, a tousiours quelque chose de dissemblable à nostre nature. Il faut donc qu'en toute coction il s'engendre necessairement quelque excrement, lequel estant retenu peut estre cause d'une infinité de maladies. Les plus gros excremens se purgent par vne sensible euacuation, mais les plus subtils peuuent

peuvent estre dissipéz & resolu-
 lus par l'exercice. C'est pour-
 quoy le diuin Hippocrate
 aux liures de la diete a tres-
 bié dit que l'homme ne peut ^{Necessi-}
 viure en santé s'il ne ioint le ^{té de l'ex-}
 traual avec l'aliment, pource
 (dit-il) que l'un repare ce qui
 est perdu, & l'autre dissipe ce
 qui est superflu. Platon en son
 Theætete escrit que l'exerci-
 ce entretient & conserue les
 corps, & qu'au contraire l'oy-
 siueté les ruine. L'exercice
 prins par mesure & avec or-
 dre empesche la repletion
 mere nourrisse d'un million
 de maladies, augmēte la cha-
 leur naturelle, tient tous les
 conduits du corps tant sensi-
 bles qu'insensibles ouuers,
 rend le corps agile, prepare
 & dispose toutes les superflui-
 tez tant vniuerselles que par-

ticulieres à l'excretiō, fortifie
merueilleusement les nerfs ,
& rend toutes les iointures
plus fermes, &c'est ce que dit
Hippocrate aux Epidemies,
que cōme le dormir est pro-
pre pour les viscères, aussi le
trauail sert pour la force des
iointures. Il y a vn beau traict
dans Celse que ie ne dois pas
passer sous silence. La paresse
(dit-il) rend le corps lasche &
pesant, le trauail le red ferme
& agile, l'oyssiueté nous faict
vieillir bien tost, & l'exercice
conserue longuement la ieu-
nesse. Or en la façon de cest
exercice il s'y faut dextremēt
conduire. Premieremēt on le
doit faire auāt manger, pour-
ce qu'ō esueille la chaleur na-
turelle qui doit digerer, & par
ce moyen la viāde que nous
prenōs trouue la chaleur tou-
te preste & non point endor-

Comme
il faut
faire l'e-
xercice.

Et comme il la faut entretenir. 265
mie. L'Aphorisme d'Hippocrate y est tresexpres, *Labores cibos precedant.* Que le trauail precede le mäger. Cest exercice doit estre reglé selô le mäger: ceux qui mangent beaucoup en doyuent faire beaucoup, ceux qui mägēt peu en doiuent moins faire. cest exercice aussi doit estre moderé, & egal. l'appelle moderé celui qui ne lasse point; egal, celui qui exerce toutes les parties du corps & haultes & basses egalemēt: l'exercice violēt & inegal ruine les corps les plus robustes, affoiblit les iointures, & rēd tous les muscles lâches, auxquels cōsiste vne partie de l'agilité. Celuy du matin est tousiours le meilleur, ou bien quand les deux premieres coctions sont faictes: celui qui se fait quād & quād

apres le repas engendre vne infinité d'obstructions, remplit les veines de cruditez, & fait trop tost descēdre la viāde de l'estomach. En hyuer il faut cheminer plus viste, en esté plus doucement, & doit tousiours le Medecin auoir esgard à la coustume. car cōme escrit Hippocrate au second des Aphorismes; Ceux qui ont accoustumé le trauail le portent plus aisément encore qu'ils soient foibles & qu'ils ayent attaints l'aage de vieillesse. Il y a d'exercices vniuersels & particuliers. Les vniuersels si on les peut faire sont les meilleurs: & entre to⁹ ceux là on louē le ieu de paume, les pourmenades à pied & l'aller à cheual. Les particuliers sont les frictions, qui seruēt merueilleusement pour esueiller la chaleur naturelle,

Comme il la faut entretenir. 267
pour attirer l'alimēt à la partie
& pour dissiper les vapeurs &
excremens de la troisiēme
coctiō quise retiennēt souuēt
dans les espaces des muscles
& parmi les membranes.

Les vieilles gens se doiuent ^{L'exerci-}
contenter d'un exercice mo- ^{ce des}
deré, de peur q̄ ce peu qu'ils ^{vieil-}
ont de chaleur ne se dissipe. ^{lards.}
Les frictiōs leur sont trespro-
pres; Il les faut frotter le ma-
tin apres qu'ils sont esueillez
iusques à ce que les parties
commencent à rougir & s'es-
chauffer. La friction doit cō-
mencer aux bras, puis il faut
venir aux espaules, au dos, à la
poitrine; delà faut descēdre
aux cuisses & remonter aux
espaules, la teste doit estre la
derniere, laquelle on doit
peigner & caresser tous les
matins. Il y a d'autres exer-

De la vieillesse,
cices particuliers des yeux,
de la voix, & de la poitrine
qui seruent.

*Quelles reigles on doit garder
au dormir.*

C H A P. IX.



LE DORMIR est
vn des chefs du
regime, Il y a cer-
taines reigles ge-
nerales que celuy qui se veut
empescher de vieillir bié tost
doit obseruer. Il est bon (dit
Hippocrate) de s'accoustu-
mer à dormir seulement la
nuit, & veiller le iour. Le dor-
mir du mydi est tres-dange-
reux & rend tout le corps pe-
sant & bouffy. Il ne faut ia-
mais se coucher que trois ou

Les rei-
gles du
dormir.

Et comme il la faut entretenir. 268

quatre heures apres le soupper, & doit-on faire quelque legere pourmenade par la chambre auant que se mettre dans le liect. Le vray & naturel dormir doit estre de sept heures, & ne faut point estre trop couuert, afin de donner passage aux vapeurs. On doit dormir la teste vn peu esleeue, de peur que la viande ne remonte du fonds de l'estomach à son orifice superieur: & ne doit-on coucher sur le dos, de peur que les excremens ordinaires du cerueau qui se purgent par le nez & par la bouche ne tombét sur l'espine, & pource aussi que couchant sur le dos, on eschauffe la grosse veine caue & la grande artere qui sont appuyees sur les lóbes, & ces

pour l'entretien de Z iiii

De la Vieillesse,

vaisseaux estans eschauffez augmentent la chaleur des reins, engendrent la pierre & enuoyēt quantité de vapeurs au cerueau.

Il est bon de faire son premier sōme sur le costé droict, de peur que le foye ne tombe sur l'estomach & le presse, cōme il feroit si on se couchoit sur la ratte, & puis couchant sur le costé droict, le foye se met au dessoubs de l'estomach, & luy seruant comme de rechaud ayde beaucoup à la digestion. Apres cela il se faut tourner sur le costé gauche, affin que les vapeurs retenues au costé droit s'exhalent: & en fin on se doit remettre sur le costé droict, à fin que ce qui sera cuit descende plus facilement. Il ne faut pas en dormant auoir

Et comme il la faut entretenir. 269
les membres estendus du tout, il les faut retirer mediocrement; car comme remarque Galien au premier liure du mouuement des muscles: le repos de tous les muscles consiste en yne mediocre contraction. & c'est la figure que les Anatomistes appellent moyenne, qui est la plus naturelle & la moins doloieuse. Voila les reigles generales du dormir que les vieillards ne sçauroient toutes observer. Nous leur permettons de dormir vn peu apres le disner, d'autant qu'ils passent quasi toutes les nuits en veilles. on rapporte la cause des veilles. à leur temperament qui est sec, & aux vapeurs acres qui s'esleuent ordinairement d'vn phlegme salé.

De la vieillesse,

Comme il faut resiouyr les vieillards, & les destourner de toutes violantes passions de l'ame.

CHAP. X.

PLATON en vn Dialogue qu'il nomme Carmides, escrit avec verité, que les plus violantes & dangereuses maladies que souffre le corps, viennent de l'ame: car l'ame (dit-il) ayāt vn pouuoir souverain & commandant absolument au corps, le meut, altere & change en vn moment comme il luy plaist. Cōbien voyons nous de maladies se former & guerir soudain par la seule force de l'imagination? Combien d'exemples auōs nous de ceux qu'une soudaine & extreme ioye a fait mourir soudainement?

le pou-
voir de
l'ame sur
le corps.

Et comme il la faut entretenir. 270

Et les ennuy, le chagrin, la tristesse ne nous precipitent ils pas en vne infinité de maladies melâcholiques qui seruēt de fleau aux Medecins & tournēt à leur confusiō pour leur opiniastrēté? Nous auōs leu plusieurs histoires de certains personnages qui sont blanchis en vingt & quatre heures de la seule peur & apprehension de la mort. Celuy donc qui voudra longuemēt & sainement viure, se doit tāt qu'il pourra rendre libre de toute passiō violāte. Les vieillards sur tōus s'ē doiuent exēpter, & pource qu'ils sont ordinairement plus subiets à la peur, aux ennuy, au chagrin, à cause de leur tēperamēt froid & de la foiblesse de leur cerueau, on leur doit ostēr toute occasion de crainte, & de

De la vieillesse,

tristesse, de peur de les refroidir d'avantage. Il n'y a point de danger de les mettre quelque fois en cholere, pour les esueiller, & eschauffer vn petit: il les faut resjouir le plus qu'on pourra, & leur donner tout subject de contentement. Or d'autant que tous les plaisirs & deplaisirs que nous ressentons en nostre ame, viennent des sens qui sôt ses vrayes espions, & fidesmes messagers, il faut si nous voulons donner du contentement aux vieillards, flatter & mignarder leurs sens, la veüe, l'ouye, l'odorat, & le goust, en proposant à chacun des objects agreables. L'œil se delecte merueilleusement de la veüe des belles fēmes, ie suis d'aduuis que les vieillards se cōtentent de cela : la varieté des

Les plaisirs de la veüe.

fleurs, la diuersité des belles couleurs les resiouit infinimēt, ils doiuent tousiours porter quelq̃riche & precieuse bague, & entre autres le saphir & l'esmeraude, pource qu'il n'ya point de couleur qui cōserue plus la veüe que le vert, & le violet. L'ouye a ses deli-
Les deli-
ces de
l'ouye.
ces particulieres qui penetrēt encore plus viuemēt & vont iusques au plus profōd de l'ame. La musique des voix & des instruments, adoucit les pl⁹ refroignez. Clinias, cōme i'ay remarqué audiscours des melācholiques, aussi tost qu'il se voyoit assailly de quelque passiō, prenoit sa lyre, & retenoit par ce moyē les mouuemens de son humeur. Il faut entretenir les vieillards de discours agreables, les louer, les flatter, ne leur cōtre dire à riē

De la vieillesse,

& leur proposer ce qui leur
peut plaire & à quoi ils ont esté
nourris, comme au marchand
le lucre, aux guerriers leurs
exploits & faits d'armes, aux
gés de lettres quelq̃ discours
docte: car cela les tiét esueil-
lez & cõtens. tesmoing en est
ce bon vieillard & grãd legi-
sateur Solon, lequel estant au
liet de la mort, & voyât deux
ou trois de ses amis qui par-
loient bas craignans de l'en-
nuyer, se leua vigoureušemēt
& les pria de parler plus haut,
festimant tresheureux si en
mourant il pouuoit appren-
dre quelque chose. Quant au
sens de l'odorat il est trescer-
tain que les bonnes odeurs
resiouissent le cœur, & puri-
fient tous les esprits. ie suis
d'oc d'aduis que les vieillards
portēt tousiours quelque bõ-

Le plai-
sir de l'o-
dorat.

Et comme il la faut entretenir. 172

ne senteur, cōme chaines & pommes musquées, qu'il y ait toujours dans leur chambre quelq̃ bōne cassolette, qu'ils se lauēt la barbe, les mains, le visage avec des eaux de senteur. Pour le gouſt cela se rap- Le plaisir du gouſt porte aux viādes, il leur faut toujours quelque friādise & quelque viāde de haut gouſt com-1 pour esueiller leur appetit. Voila donc en quoy consiste tout le regime des vieilles alors gēs: & faut pour cōclusion de tout ce discours, qu'vn chacun se rende ſçauant à cognoistre son naturel, & que l'experience de ce qui luy sert ou nuit, le rende maistre & Medecin de ſoy meſme.

Quels remedes ſont les plus propres pour les vieilles gens, Et par quel artifice on peut corriger les incommoditez de la vieillesse.

CHAP. XI.

Incômo.
ditez des
vieil-
lards.

LA vieillesse apporte d'elle mesme tant d'incômoditez que les Anciens ont creu qu'elle approchoit plus de la maladie que de la santé. Tu verras ordinairement les vieillards auoir le ventre dur, abôder en phlegmes & serositez acres qui leur causent de petites demâgeaisons & ardeurs en pissant, ils sôt tout pleins de vêts; & sentent vne foblesse vniuerselle, pource qu'ils ont l'estomach debile & la chaleur de tout le corps languide: ils sont quasi tous subiects aux defluxiôs, & ne cessent de cracher, tousser, pleurer. On peut pouruoir à toutes ces incômoditez avec des remedes benins & amiables.

Et premièrement il leur faut rendre le ventre bon, c'est à dire lasche avec bouillons artificiels qu'on preparera en plusieurs façons. Prenez des tendrons des mauues, de la mercuriale, des espines domestiques & sauuages, & d'une herbe qu'on appelle cynocrambe, faites bouillir cela avec vn poulet, & en prenez le matin. Le bouillon des chous rouges avec l'huile est tresbon, mais celui de coq est le plus excellēt de to^r: on le doit faire en ceste façon.

Prenez vn vieux coq, plumez le & le fouëttez bien, apres tuez le, & ayant euentré lauez le deux ou trois fois avec du vin blāc, & farcissez le ventre d'une poignée de racines de persil, de fueilles de bourrage, buglosse,

Comme
on rēdra
le ventre
lasche.

Bouillō
laxatif.

Bouillō
de coq.

pimpernelle, mercuriale, espines domestiques & sauvages, figues grasses, raisins de damas, dattes, iuiubes, semence de carthame, hylope, & faites cuire tout cela à perfection, coulez le apres bié proprement, & en faites prendre trois matins de suite. Quelques vns y adioustent vn peu de sel de tartre pour luy donner de la pointe. Ce bouillon sert infinimét aux vieillards. car il tient le ventre lasche, nettoye les voyes de l'vrine, & est fort propre pour la poitrine & courte haleine, à laquelle ils sont subiects. Les suppositoires leur doiuent estre ordinaires, & les clisteres aussi remollitifs. Galien ne veut pas qu'on vse de clysteres violans & acres: il se con-

Comme il la faut entretenir. 274

tente de la seule huile d'olive. Pour les laxatifs internes, j'approuve les pilules de hie-re, de l'aloë bien préparé, & celles qu'on nomme mastichines. La therebintine nettoye & purge tous les visceres sans danger.

Pour la foiblesse de leur e-
stomach & pour dissiper les
vents qui les trauaillent, on
recommande la racine de
gingembre confit, les tablet-
tes d'aromaticum rosatum,
le sucre anise, l'eau de cancel-
le, l'essence d'anis, de genie-
ure, de girofle. Pour esueil-
ler la chaleur qui semble estre
endormie par tout le corps,

Remede pour
la foi-
blesse
d'esto-
mach.

ie ne trouue rien meilleur
que de leur faire prendre sou-
uent le poix de deux escus
d'ambre gris dans vn œuf

Pour es-
chauffer
les vieil-
lards.

De la vieillesse, & comme &c.
bien frais . l'approuue fort
aussi l'vsage du theriaque, mi-
thridat, cōfection alkermes,
des eaux theriaquales , im-
périales, cœlestes; les formes
desquelles ie ne descriis point
pour estre au iourd'huy trop
cōmunes . On peut aussi for-
tifier toutes les parties par
remedés externes , comme
le cerueau par bonnets &
poudres capitales , entre les-
quelles Auenzoar loue les gi-
rosses puluerisez mis sur la
suture coronale , le cœur par
emplastres , onguens & sa-
chets , l'estomach par on-
ctiōs & sachets. En fin il faut
croire que toutes choses aro-
matiques & qui sentent bon
sont propres aux vieilles gés.

F I N.

Extrait du priuilege du Roy.

Il est permis à Iamet Mettayer Imprimeur ordinaire du Roy, d'imprimer ou faire imprimer le Discours de la conseruation de la veüe: des maladies melancholiques: des catarrhes: & de la vicilleſſe: Composez par Maistre André du Laurens, Medecin ordinaire du Roy, & Professeur de sa Majesté en l'Vniuersité de Medecine à Montpellier. Reueuz de nouveau & augmentez de plusieurs chapitres: Et deffences à tous autres Imprimeurs & Libraires d'imprimer ou faire imprimer, vendre ou distribuer lesdicts Discours sans le consentement dudit Mettayer, iusques au temps & terme de dix ans finis & accõplis, à cõmencer du iour qu'ils serõt acheuez d'imprimer, sur peine de cent escus d'amende, & de confiscation desdites impressions qui en seront trouuees, comme plus amplement est contenu audit Priuilege. Dõné à Paris le Premier iour d'Octobre mil cinq cens quatre vings dix-sept, Et de nostre regne le huietieme.

P A R L E R O Y.

R V Z E.